

1800



0140.

h



L. G. G.

16/11/63

CHRISTOPHORI CELLARII
ORATIONES
ACADEMICAE,

CONLECTAE

OPERA

IOANNIS GEORGII WALCHII,

QUI ET

PRAEFATIONE

DE

FATIS ORATORIAE
INTER GRÆCOS, ROMANOS

ET GERMANOS COPIOSE

EDISSERVIT.



*Possessor
libri est*

LIPSIAE,

SYMPTIBVS IO. LVD. GLEDITSCHII

& MAVR. GEORG. WEIDMANNI,

ANNO M DCC XIV.

H.

Christian Grünig
Vom 1733. d. 1. Maji.

ILLVSTRISSIMO ET GENEROSISSIMO
DOMINO,
DOMINO IOANNI
CHRISTOPHORO
S. R. IMPERII BANDERESIO
ET
LIBERO BARONI
A WOLZOGEN,
DOMINO CLIENTELARVM
NEVHVSI, ARÉNSTEINI, FAHRENFEL-
DII, GVTENBRONNÆ, MVHLFELDII,
BAVERBACHII, CETERA,
CONSILIARIO IMPERIALI
AVLICO, SERENISSIMI SAXON. CO-
BURGO-MEINVNGENSIS SANCTIO-
RIS SENATVS DIRECTORI, ITEM RE-
GIMINIS DVICALISQVE REDITVVM TRIBV-
NALIS PRÆSIDI EMINEN-
TISSIMO,
DOMINO MEO GRATIO-
SISSIMO.

ET
PER-ILLVSTRI ET GENEROSISSIMO
DOMINO, DOMINO
PAVLO HENRICO
LIBERO BARONI
DE TILEMANN,
DYNASTAE IN STEPFERS-
HAVSEN ET KRAEMERN,
SERENISSIMI SAXON. CO-
BVRGO-MEINVNGENSIS A CONSILIIS
SANCTORIBVS ET INLVSTRI PROTO-
SYNEDRIO ILLVSTRISSIMA DIGNI-
TATE PRÆSENTI,
DOMINO MEO GRATIOSO.

ET

ET
EXCELLENTISSIMO ET CONSVL-
TISSIMO
DOMINO,
DOMINO IOANNI
CHRISTOPHORO
TRIER,
SERENISSIMI PRINCIPIS
SAX. COBURG. MEINVNGENSIS
CONSILIARIO AVLAE ET IVSTITIAE
GRAVISSIMO,
PATRONO OPTIMO

S. P. D.

IO. GEORGIUS WALCHIVS.



Ollicitus adhuc fui,
quomodo occasionem
aliquam nanciscerer,
qua pietatis meæ, cuius
officio penitus VOBIS
dicatus sum, publicum aliquod mo-
numentum statuere, & deditissimæ
mentis meæ pignus haud contem-
nendum exhibere possim. Merita
VESTRA, quæ in meliorum litte-
rarum studia contulistis, tanta sunt
& adeo abundant, vt profitear in-
genue, quod illa haud explicare &
accuratius, quæ dignitas illorum &
diuina fere maiestas est, com-
memorare queam. Quamquam in-
primis distenti rebus publice ge-
rendis sitis & negotiorum, quæ pro
poten-

potentissimo PRINCIPE NO-
STRO & commodis communibus
præstatis, copia VOS circumstet;
non cessatis liberalibus disciplinis
fauere, earumque aduersus mali-
gnorum strepitus causam agere
fortiter. Summæ huius & singularis
benignitatis, qua meliorum litte-
rarum alumnos soletis prosequi, in
me ipso exemplum conspicuum at-
que inlustre est, quod non solum mi-
rifica in me & studia mea estis bene-
volentia, sed magnis etiam benefi-
ciis ornauistis. In quibus VESTRIS
in me meritis prædicandis si ætatem
omnem, quam summum numen
mihi largitur, consumsero, ægre
propter magnitudinem sufficiam
& paruam retulisse gratiam vide-
bor. Verum quum generosarum
mentium, hoc est VESTRARVM

similium, hæc indoles atque natura est, ut ad submissam clientum voluntatem, qua Patronis plane dediti sunt, respiciant, non miramini, credo, cur de incredibilis pietatis meæ pignore aliquo cogitaerim. De quo meditati nihil inter res litterarum mearum occurrat, vel mediocriter dignum ingenio VESTRO, nisi has CELLARII, qui omnium consensione disciplinarum humanitatis princeps habetur, orationes VOBIS sacras atque inlustri nomini VESTRO dedicatas exhibeam. Quæ quum a litterarum meliorum, quibus ipsi generosam & inlustrem mentem & animum vestrum adhibetis, principe profisciscuntur & res diuina persona VESTRA haud indignas declarant; me haud temeritatis
cri-

crimine insimulari posse, videor.
 Accipite ergo hoc publicum pietatis meæ testimonium, & facite, ut de eo, quæ consuetudo VOBIS est, beneuole iudicetis & ipsi erga me & musas meas beneuolentiæ VESTRAE in dies cumulum addatis; cui petitioni sollicitæ ut velitis adnuere, rogo, precor atque contendo submitte. Lipsiæ, d. XXX. Sept. clb lcccXIII.



LECTOR IAMICO

S. P. D.

IO. GEORGIUS WALCHIVS.

Studiorum & disciplinarum, quibus romanus populus caput suum extulit, animumque alienum ante ab humanitate, reddidit mansuetiorem, dicendi ars atque eloquentia utique summa & præcipua existit. Harum inprimis litterarum cultura effectum est, ut illius imperium ad tantam magnitudinem euectum sit, & per tot secula, quod nos in admirationem maxime trahit, sine offensa fortunæ in eadem immotum atque inconcussum etiam persisteterit. Tanta quippe auctoritas & tam maxima vis arti huic insita est, ut nemo, cuiuscunque sit litterarum professionis, vberimos fructus denegare possit, quum munere & lumine

mine illius a barbarie ad mores cultiores & a ruditate ad humanitatem & variam doctrinam traducamur. Illi, qui sacra & Iuris doctrina imbuti sunt, quo ornatius & ad culturæ atque elegantiae regulas componunt orationem, quum publica ista est recitanda, eo maiorem vim habet in animis audientium. Et quem fugit, quod legatis principum, aliisque aularum & ciuitatum ministris sæpe verba publica sint facienda, siue consultatio proferenda, siue cum populo agendum, vt suadeant vehementer, quod fructuosum & ipsum rei publicæ florem promouet, tuetur atque confirmat. Vnde haud miramur, quod ab omni tempestate, quam litteræ & elegantiores musæ primos inuenerint patronos, ars dicendi magni habita fuerit, & multi grauissimi æstimatores extiterint, vt fructus ex his studiis profectos vel in se deriuare possent. Omnes gentes adire, quæ per litteras has nobile nomen a se dederunt, a proposito & præfaminum ratione alienum est, qua breuiter omnia dicenda sunt, nec fusiore historiæ huius cognitione bene consuli nobis existimo. Admirandam gloriam, quæ veteres, inprimis

Græ-

Græcos, Romanos & Germanos nostræ quoque memoriæ ex litteris his consecuta, quamque posteritas alet, atque ipsa æternitas conseruabit, in præsentī accuratius expendamus.

II. Quemadmodum Græcia artium liberalium litteris maxime fuit exulta, Cicero pro Flacco cap. 17. & publica illarum officina exstitit; sic nihil fere dignius, nihil præstantius, nihil æque necessarium habuit, atque eloquentiam. Qua ætate vero diuinæ eloquentiæ disciplina excoli & tradi cœperit, & cui origo illius accepta debeatur, id est, quod veteres monumentis suis haud scriptum reliquerunt. Quin ante græcos exteris gentibus artis huius discendæ cura fuerit, non dubito, quum & alias disciplinas, easque sapientiæ, quæ summa cognatione & vinculo cum eloquentia coniunctæ sunt, ab istis acceperint. Quintilian. Lib. III. cap. 2. *Nec diu nos moretur questio, qua Rhetorices origo sit. nam cui dubium est, sermonem ab ipsa rerum natura geniti protinus homines acceperint? quod certe principium est eius rei. Huic studium & incrementum dederit utilitas: summam ratio & exercitatio.* Id constat ex veterum lectionibus, quod Græci differendi fa-
cun-

Prefatio.

cundiam antiquitate magna habuerint, eoque nomine, qui mos fuit & consuetudo, illius natales ad deos retulerunt. Dionysius Halicarn. περὶ τῶν παιηγυρ. dicendi artem ait: παρ' Ἑρμοῦ τε καὶ Μουσῶν λαβὴν, & Mercurio & Musis acceperisse. Et Hesiodus Θεογον. v. 81--88.

Ὄν τινα τιμήσῃσι Διὸς κῆρα μεγάλοιο,
Γεινόμενόν τ' ἐσίδωσι διοτρεφέων βασιλῆων,
Τῷ μὲν ἐπὶ γλώσῃ γλυκερὴν χίρσιν ἔειπεν,
Τῷ δ' ἔπε' ἐκ στόματός ῥεῖ μείλιχα· οἱ δὲ νυλαοὶ
Πάντες ἐς αὐτὸν ὁρῶσι, διακρίνοντα θεμίτας
ἰθέησι δίκησιν· ὃ δ' ἀσφαλῆως ἀγορεύων,
Αἰψά τε καὶ μέγα νῆκος ἐπισαμένῳ κατέ-
παυσε.

*Quemcunque honoraturus sunt Jovis filia magni,
In lucem editumque adspexerint a Jove nutri-
torum regum,*

*Huic quidem super linguam dulcem fundu-
rorem,*

*Huius vero verba ex ore fluunt suavia: ceterum
populi*

*Omnes ipsum respiciunt, reddentem ius
Rectis iudiciis, hic autem secure in concione ver-
ba faciens,*

*Statim etiam magnam contentionem scite diri-
mere solet.*

Quibus de causis Mercurio linguæ sacræ
& dicatæ fuerunt, ut gloriam & honorem,
quem

quem hac oris arte pepererint sibi, tuerentur, & in memoriam sapius reuocarent, & diligenter illius haberent custodiam, Coëlius Rhodigin. A. Lection. XIII, 5. & Spondanus ad Homer. Odysſ. γ. Quo animo de fabella hac cogitauerint, haud difficile est exponere, quum nimiam eloquentiæ ætatem, quæ mortales quasi superaret, interpretari & declarare voluerunt, qua sententia & musica & poësis firmatos nos reddit. Plutarchus de Iside & Osiride: *Εγμὴν γραμματικῆς καὶ μουσικῆς εἶναι εὐρετὴν νομίζουσι*, *Mercurium Grammatices & Musices inuentorem censent.* Quod ante *Orpheum* & *Homerum* egregios poetas, iam extiterint, qui in harum artium studiis liberalissimis sint doctrinisque versati, cum veritate maxime coniunctum videtur. Diu multumque disputatum fuit, num *Orpheus* vnquam vsuram vitæ perceperit, quod Aristoteles, teste Cicerone de N. D. I, 38. & ætate nostra Vossius de Poës. Const. c. XII. & Huetius Demonstr. Euang. p. 215. negatum iuerunt. Quibus opinionibus quum neutiquam accedimus, ab ipso *Orpheo* antiquissimæ ætatis poëta, haud contemnendum argumentum deriuamus, quo
orato-

Prefatio.

oratoriæ vetustas & antiquissima opera, qua
vetus Græcia litteris his operata est, potest
demonstrari. Namque Naso Metam. XI.
init. de Orpheo:

*Silvas, animosque ferarum
Threicius vates, & saxa sequentia traxit.*

Item:

Saxa ferasque lyra mouit Rhodopeius Orpheus.
Quam Orphei artem ipse Cicero de elo-
quentia interpretatur, quum ait de Inuent.
*Quo tempore quidam magnus videlicet vir &
sapiens cognouit, qua materia esset, & quanta ad
maximas res opportunitas animis inesset homi-
num, si quis eam posset elicere & præcipiendo me-
liorem reddere: qui dispersos homines in agris &
in tectis siluestribus abditos ratione quadam
compulit in unum locum & congregauit, & eos in
vnamquamque rem inducens utilem atque bone-
stam, primo propter insolentiam reclamantes, dein-
de propter rationem atque orationem, studiosus
audientes ex feris & immanibus mites reddidit &
& mansuetos.* Quod ad Homerum pertinet,
& ætas illius & patria auctorum sententiis
discrepat, quum eum Colophonii, Chii, Sa-
lamini, Smyrnæi suum ciuem esse confir-
mant, adde Fabricium Biblioth. Græc. Lib.
II. c. I. p. 253. & Leonem Allatium de Ho-
meri patria Lugd. Batau. 1640. 8. Vossium
de

de Poetis Græc. p. 9. Borrichium p. 8. & Adrian. Baillet in Jugemens des Sçauans Tom. IV. p. 1. p. 6. 90. Ingenium eius inluxit sine exemplo doctissimum post bellum Troianum, quum prolapsi essent anni centum & quinquaginta. Vossius vero de Natura & Constit. Rhet. c. X. Homerum omnis doctrinæ fontem pro oratorum parente habet, quem & Hermogenes præstantissimum appellat Rhetorem, quem Demetrius, Longinus & alii eloquentiæ magistrum agnoscunt, & de quo ipse Cicero de clar. Orator. *Nec tamen dubito, quin habuerit vim magnam semper Oratio. Neque enim iam Troicis temporibus tantum laudis in dicendo Vlyssi tribuisset Homerus & Nestori, quorum alterum vim habere noluit, alterum suauitatem, nisi iam tum esset honor eloquentia, neque ipse Poeta hic tam item ornatus in dicendo ac plane Orator fuisset, cuius etsi incerta sunt tempora, tamen annis multis ante Romulum fuit,* Clericus Art. Critic. Tom. I. p. 337. Kriegk. de Peregrinat. Rom. academ. p. 10. Namque Poësis multum facit ad culturam & conseruationem eloquentiæ, quamue rhetori utilis sit & necessaria, licet non ostendere: & poëtæ multum ex oratoria

pe-

petunt, multaque habent inuenta & senſa Rhetoricæ, prout Macrobius Saturn. Lib. I. c. XXIV. recte ſcribit, eiꝛque præclari ſunt cuſtodes. Immo vberriſſimam ſermonum ſegetem in Homero reperimus, qui ex perſona inluſtrium Ducum recitantur & tanta elegantia verborum ſuauique compoſitione conſpicui ſunt, vt horum viſ in eorum, qui legunt, mentibus aut ſedandis aut excitandis exprimatur. Sic Achilles Patrocli manibus orationem dicauit, Iliad. VI. vt de Neſtore Iliad. I. v. 247. Menelao, Iliad. III, 209. Vlyſſe Iliad. III, 218. & aliis conticeſcam, quarum orationum exempla Homerus conſignata reliquit.

III. Poſt hos qui floruerunt in Græcia, quam plurimi ſunt, & partim tradiderunt præcepta rhetorices, partim ſtudioſe declamando operam eloquentiæ nauarunt. Qui primus litteris eloquentiæ animos aliorum formauerit, non adeo certo deſiniri poteſt, quod veteres auctores, ad quorum teſtimonia nobis conſugiendum eſt, opinione ipſi diſcrepant. Inter homines primus, qui initia illa a diis immortalibus proſecta augere cœpit, *Tiſias*
b fuit,

fuit, eiusque vestigia legerunt *Trasimachus*, *Theodorus*, auctore Aristot. Repreh. Sophist. Libr. II. c. 8. med. Socrates apud Platonem in *Phædr.* p. 1239. Φῆν, δεινὸς εἴοικεν ἀποκεκρυμμένην τέχνην ἀνευρεῖν ὁ τισίας, ἢ ἄλλος ὅς τις δῆποτ' ὦν τυγχάνει, καὶ ὅποτεν χαίρει ἰνομαζόμενος, O quam callide abstrusam artem adinuenisse videtur *Tisias*, Vel quicumque alius fuerit vel quocunque alio cognomine delectetur. *Plinius* Libr. V. cap. 39. originem artis huius *Cadmo Milesio* vindicare videtur, quum ait: *Nec fraudanda Miletus eive Cadmo, qui primus prosam Orationem condere instituit.* Sed quum *Cadmi* illius, *Pandionis* filii, nomen inter historiarum auctores est celebratissimum, & de vrbe patria, item tota *Ioniam* libros quatuor composuit, *Vossius* H. G. Libr. I. cap. I. p. 4. non est, vt *Cadmus* honoris huius particeps fiat. Accedit quod ipse *Plinius* Libr. VII. cap. 56. famam hanc *Pherecydi* relinquat: *Prosam orationem condere Pherecydes Syrius instituit, Cyri regis aetate, historiam Cadmus Milesius.* *Pausanias* *Corin-*

rinthiacis commemorat quendam *Pittbe-*
um, qui explicauerit artem dicendi, cu-
 ius librum ab Epidauro homine editum
 ipse euoluerit. Præter *Tisiam Corax* nescio
 quis a Cicerone ex Aristotele de orator.
 libr. I. c. 21. & Brut. c. 12. traditur, qui
 præcepta artis oratoriæ conscripserit, Cle-
 ricus Art. Critic. Tom. I. p. 338. Ad e-
 ius nomen alludens Cicero Libr. III. c. 21.
Coracem, inquit, *vestrum patiamur nos qui-*
dem pullos suos excludere in nido. Magi-
 ster fuit Tisiæ, cum quo pactum iniit, vnde
 origo prouerbii: κακὴ κόρα κακὸν ὄν: *mali corui mali ouis*, Erasmi. de Adag.
 Chil. I. Cent. IX. n. 25. Vossius de Rhet.
 c. 9. Diogen. Laërt. in Empedoc. Libr.
 VIII. segm. 57. narrat *Empedoclem* ἑρτο-
 ρικὴν ἐνϋμῶν *rhetoricam inuenisse*, cui senten-
 tiæ & Quintilianus Libr. III. c. 1. Instit. O-
 rat. fauet, *primus post eos*, inquiens, *quos*
poëtæ tradiderunt, monisse aliqua circa rhe-
toricem Empedocles dicitur. Discipulus fuit
 & sectator Pythagoræ; præceptor vero
 Gorgiæ Leontini. A Plutarcho de vit.
 dec. Rhetor. *Antipbon* dicitur ἀπὸ τῶν

*primus, qui ῥητορικὰς τέχνας ἐξήνεγκε, oratoria artis præcepta edidit. Photius: πρῶτον δὲ αὐτὸν καὶ ῥητορικὰς συντάξασθαι φασί τέχνας, ἀγγιγὼν γεγοιότα, adi Fabricium Biblioth. Græc. Libr. II. c. 26. p. 834. & Philostrat. de vit. Sophist. vit. Antiphontis, & Cresollium Theatr. Rhetor. Libr. I. c. 6. p. 26. De Aristotele Paschius Inu. Nou-Antiq. p. 73. Quam artem attice, scienter, perite, apte, distincte & ornate dicendi Aristoteles professus est, primus scriptis ad Theodectem tribus libris, quibus perfectissime omnia, ex intima philosophia desumptis, argumentum executus est. Namque Cicerone auctore Libr. II. c. 2. de Inu. veteres scriptores artis huius a Tisia repetitos in unum locum conduxit Aristoteles, & nominatim cuiusque præcepta magna conquisita cura perspicue scripsit, atque enodata diligenter exposuit. Quemadmodum hi momenta artis oratoriae litteris mandarunt, ut ista a-
lumnis suis & eloquentiæ cupidis traderent: sic alii declamando & compositione orationum affectabant nomen & gloriam, se dicendo valere. An-*

Ante *Antiphontem* multi laude hac iam clari fuere, vti *Menestheus*, qui contra *Thesium* dixit, *Libanius* Tom. II. p. 480. *Sophilus Rhetor* pater *Antiphontis*. Primus, qui orationes scriptas recitavit, traditur *Pericles*, ante quem littera nulla est, quæ quidem ornatum aliquem habeat, & oratoris esse videatur; *Cicero Brut.* c. 27. & *Suidas* περικλ. adde *Plutarchum* vit. *Periclis* p. 156. *Cresollium* Libr. I. c. 6. p. 43. & *Bælium Lexic.* *Philostratus Lemnius* air. *Sophist.* Libr. I. f. 487. *χεδίων δὲ πηγὰς λόγων, οἱ μὲν ἐν Περικλέῳς πρώτῃς ῥῆναι φασιν. ὅθεν καὶ μέγας ὁ Περικλῆς ἐνομιόθη τὴν γλῶτταν. Οἱ δὲ δὴ τῶν Βυζαντίων Πύθω, ὃν Δημοσθένος μόνον Ἀθηναίων ἀναρχεῖν φασί θρασυνόμῳ, καὶ πολὺν ῥέοντα. οἱ δὲ Αἰσχίνης φασί θρασυνόμῳ, καὶ πολὺν ῥέοντα. οἱ δὲ Αἰσχίνης φασὶ τὸ χεῖρ ἔχειν ἔρημα. τῆτον γὰρ πλεῦσαντα εἰς Ῥόδον παρὰ τὸν Κάρα Μαύσωλον, χεδίῳ αὐτὸν λόγῳ ἄσαι. ἐμοὶ δὲ, πλεῖστα μὲν ἀνθρώπων Αἰσχίνης δοκεῖ χεδιάσαι πρεσβέων τε, καὶ δότο πρεσβέων, συνηγορῶν τε, καὶ δημηγορῶν. καταλιπεῖν δὲ μόνους ἵς συγγεγραμμένους τῶν λόγων. ἵνα αὖν Δημοσθένος φροντισμάτων, μὴ πολλῶ λίπωιτο. χεδίς δὲ λόγος, Γοργίας ἀρξάν. παρελθὼν γὰρ εἰς τὸ Ἀθηναίων θεῖαιρον ἐθαῖρσεν ἐπὶ πᾶν, περιβάλλετε. καὶ τὸ κινδύνεμα*

τὸτο, πρῶτον ἀνεφθέγγατο, ἐνδεικνύμεν δὲ
 καὶ πάντα μὲν εἰδέναι, πρὸς πάντος δ' ἂν εἰπῶν,
 ἰφίης τῷ ἡμερῶ, *Prompte autem Orationis
 fontes e Pericle primum nonnulli proma-
 nasse dicunt. Quapropter lingua magna
 Pericles cognominatus est. Sed aliqui a
 Pyzantio quodam Pythone; cuius audacem
 & nimium exuberantem orationem solus
 Atheniensium Demosthenes tolerasse fertur.
 Alii vero extemporaneam orationem inuen-
 tum Aeschinis fuisse asserunt. Quippe qui,
 cum Rhodum nauigasset, apud Mausolum
 Carium extemporalis carmine cecinisse dici-
 tur. Atque is omnium maxime in legatio-
 ne, foro, & concione, extempore egisse
 mihi videtur Aeschines; & tantum
 Orationes reliquisse conscriptas, ne lu-
 cubrationibus Demosthenis multo inferior
 haberetur. In prompta oratione Gorgias
 principatum obtinuit. Nam cum Atheni-
 ensium prodiiisset in theatrum, proponite
 quodcunque libuerit, dicere ausus est. At-
 que primus tale periculum se subiturum
 professus est, ostendens se omnia scire, &
 de quaque re compositae se extempore posse di-
 cere.* A Platone dicitur πάντων τελεώ-
 ταιος

ταῖος εἰς τὴν ῥητορικὴν γινώσκει. *perfectissimum fuisse oratorem.* Ingenium eius floruit temporibus Thucydidis & Alcibiadis; suggestum adscensurus precatus est, ne quod verbum menti eius occurrat, quod populum posset offendere, Quintilianus XII. c. 9. Aelianus H. V. libr. IV. cap. 10. Multis veterum est opinio, quod Antiphon primus sermones elaborauerit, & ceteris gloria eloquentiæ præstiterit, Quintilianus Inst. Orat. III. 1. *Antiphon quoque & orationem primus omnium scripsit & nihilominus artem ipse composuit,* Plutarch. vit. dec. Rhetor. Photius Biblioth. Clemens Alexandr. 1. Strom. p. 308. Colomesius Opuscul. litter. p. 216. Hermogenes Libr. II. de formis p. 80. de eo inquit, quod poeticis vocabulis plenæ fuerint eiusdem orationes, addatur Laertius Libr. II. 46. p. 108. Vossius de Histor. Græc. Libr. IV. c. 7. p. 458. Quamquam veterum monumentis quibusdam mandatum sit, quod ante *Periclem, Pisistratum, Solonem, Clisthenem, Themistoclem* eloquentiæ honore & fama flore-

ruerint. *Isocrates* oratione de permutatione p. 506. monstrat, quod *Solon* primus omnium *Sophista* fuerit adpellatus :
 ἔκην ἐπὶ γε τῶν προγόνων ἔτοι ἔχεν. ἀλλὰ τὰς
 μὲν καλῶμεν σοφιστὰς ἐθαυμάζον, καὶ τὰς
 συνόλης αὐτὰς ἐζήλυν τὰς δὲ συκοφάντας
 πλείων κακῶς αἰτνῶντες ἐνόμιζον εἶναι. μέγιστον
 δὲ τεκμήριον, Σόλωνα ἐμὲν γὰρ τὸν πρῶτον τῶν
 πολιτῶν λαβόντα τὴν ἐπωνομίαν ταύτην προ-
 τὰ τὴν ἡζιώσαν τῆς πόλεως εἶναι : nam eos qui
sophista dicebantur, magni faciebant, eo-
 rumque familiares beatos iudicabant : Sy-
 cophantas autem, perniciosissimos hos existi-
 mabant. Cuius rei maximum signum il-
 lud est, quod *Solonem*, qui primus civium
 hoc cognomen sortitus fuit, gubernatorem
 ac principem civitatis esse voluerunt. ad-
 de *Wolfium* p. 707. *Meursium* in *Solone*
 p. 9. *Themistium Orat.* IV. p. 40. *Io.*
Rosinus & *Ger.* *Io.* *Vossius* *Solonem*
 auctorem ritus defunctorum manibus pa-
 rentandi, faciunt, auctoritate *Anti-*
sthenis & *Plutarchi* freti, vid. *Petrum*
Fabrum Lib. III. c. 13. semestr. quam-
 quam id de lege forsan & consuetu-
 dine intelligendum est, De *Themisto-*
cle, cuius res gestas persecuti sunt *Hero-*
do-

dotus, Thucydides, Diodorus, Plutarchus, Nepos ac Iustinus, ait Cicero d. I. *Post hanc ætatem aliquot annis, ut ex Atticis monumentis potest perspicui, Themistocles fuit: quem constat cum prudentia tum etiam eloquentia præstitisse.* Aetati Periclis æquales erant *Alcibiades, Critias*, de cuius dictione Dionysius Halic. & scriptis Meursius Bibl. Attica; *Theramenes, Ephialtes*, Pericli amicus, de quo Plutarchus p. 154. 157. Sed ut intellectum est, quantam vim haberet accurata & facta quodammodo oratio; tum etiam magistri dicendi multi subito exstiterunt. *Leontinus Gorgias* in honore magno fuit, discipulus *Empedoclis*; *Isocratis* & *Alcidamantis* præceptor. Orator hic magnus laudatur, & certe pater fuit Sophistarum, Cicero libr. II. de fin. ab init. & Libr. I. de Orat. c. 93. *Cressollius* Theatr. veter. Rhet. Libr. I. c. 5. Hic eo processit audaciæ, ut de omnibus, quæcunque rogaretur, etiam promte respondere iactitaret, Philostratus Libr. II. ab init. *Valerius Maximus* Libr. VIII. c. 15. Laudat eum Philostratus I. de Soph. p. 446, perstringit vero Plato in Gorgia.

Orationes ejus binæ supersunt, quas *Aldus* & *H. Stephanus* edidit; in romanum autem sermonem *Guilielmus Canterus* transtulit. *Andacides* oris quoque floruit virtute, cuius rei orationes, quæ exstant, quatuor testes sunt luculenter, vid. *Fabrium Bibl. Græc. Libr. II. c. 26. p. 839.* His adjungimus *Thrasymachum Cbalcedonium*, de quo *Diodorus* περὶ τῆς Δημοσθένος δεινότητος f. 164. 165. τρίτη λέξεως ἦν ἡ μικτή τε καὶ σύνθετος ἐκ τῶν τῶν δυῖν. ἦν ὁ μὲν πρῶτος ἀρμοσάμενος καὶ κατὰσῆσας εἰς τὸν νῦν ὑπάρχοντα κόσμον. ἔτε Θρασύμαχος ὁ χαλκηδόνιος ἦν, ὡς οἶεται Θεόφραστος, ἔτε ἄλλοις, ἐκ ἧς λέγειν. οἱ δὲ ἐκδεξάμενοι καὶ ἀναβρέψαντες, καὶ ὁ πολὺ ἀποχρόντες τῆς τελειώσεως, ῥητόρων μὲν, *Isocrates* ὁ *Ἀθηναῖος* ἐγένετο. *Φιλοσόφων* δὲ *Πλάτων* ὁ *Σωκρατικός*. *Tertium genus dictionis erat mixtum & compositum ex illis duobus: quod quidem primus num inuenerit produxeritque in hunc mundum vel Thrasymachus Cbalcedonensis, ex Theophrasti sententia, vel alius quispiam non possum affirmare. Qui vero hos genus dicendi receperunt & excoluerunt eiusdemque non abstinerunt perfectione, fuere ex Rhetoribus quidem Isocrates Atheniensis, ex*
Phi-

Philosophis autem Plato Socraticus. Protagoras Abderites filius Menandri & Democriti auditor, primus mercede rhetoricam docuisse, litteris veterum mandatus est. Diogenes Laertius Libr. IX. §. 51. & A. Gellius V. 3. Hunc Plato *πρότερον Γοργίᾳ καὶ Προδίκῳ*, Gorgia & Protico anteriorem fuisse, contendit. Meminit adhuc Cicero Prodicti cuiusdam, de quo Gresollius Lib. I. cap. 5. p. 37. *Cbii*, Hippia Elei, quos vero, breuitati intenti intactos relinquimus, & ad Cephalum, Lysiae patrem & ad ipsum Lysiam animum nostrum aduertimus. De Cephalo adi Tzetz. Chil. VI. hist. .34. p. 298. & Suidam. Lysiam Cicero egregiis ornat testimoniis ad Brut. c. 9. *Tum fuit Lysias ipse quidem in causis forensibus non versatus, &c.* add. in Orat. c. 9. Hæc repetit Quintilianus Libr. X. c. 1. Eius Orationes quædam, de quibus consulas Fabricii Biblioth. Græc. d. 1. in opere Aldino extant. De Isocrate Vellejus Paterc. 1. 16. 5. *Quid ante Isocratem, quid post eius auditores eorumque discipulos clarum in oratoribus fuit? adeo quidem ætatum angustiiis temporum, ut ne-*

mo memoria dignus alter ab altero videri nequiverint. Cicero in Bruto : *Exstitit igitur iam senibus illis, quos paullo ante diximus, Isocrates, cuius domus cunctæ Græciæ quasi ludus quidam patuit, atque officina dicendi, magnus orator, & perfectus magister, quamquam forensi luce caruit, intraque parietes aluit eam gloriam, quam nemo quidem meo iudicio, est postea consecutus, iis & ipse scripsit multa præclare & docuit alios.* Plinius H. N. VII. c. 30. testatur, vendidisse vnam orationem viginti talentis. Audiuit Prodicum Ceum, Protagoram, Gorgiam Leontinum, Tisiam Syracusanum & Theramenem Rhetorem. Ipse eloquentiæ disciplinis instituit Hyperidem, Isaum, Xenophontem, Theopompum, Naucratem, Ephorium, Theodectem, Philiseum, Demosthenem. adde Plutarchum vit. Isocr. Laertium III. 2. Suidam, Dionys. Halic. de antiqu. Rhetor. Alcidasantis cuiusdam mentio fit apud Laërt. in Protag. & a Quintiliano III. cap. 1. inter oratores numeratur : Tuscul. Cicer. c. 48. scripsisse mortis laudationem discimus. Isaus discipulus Lysia & Isocratis, magister vero Demosthenis,

nis,

nis, fuit, de quo Plutarchus Libr. de clar. Orat. Adhuc alius fuit *Isæus* rhetor, isque iunior, de quo Plinius II. epist. 3. n. 1. *Magna Isæum fama præcesserat, maior inuentus est.* Iuuenalis Satir. III. 74. *Sermo, promptus & Isæo torrentior;* quæ vetus Scholiastes de juniore interpretatur; licet & de antiquiore Demosthenis præceptore possint intelligi. *Plato* ætate sua eloquentiæ ac philosophiæ laude claruit præcipua, vt Diodorus Siculus Libr. XII. declarat: æmulabantur eum Sophistæ multa industria diligentiaque, Gellius Libr. I. c. 9. Vossius de rhetor. p. 76. Eum præter Isocratem audiuit Lycurgus, Atheniensis rhetor, de quo videas Plutarchum in vita ejus & Fabricium d. l. p. 861. Verum maximam facundiæ laudem sibi conciliarunt, omnium, qui litteris oratoriæ imbuti sunt, consensione, *Demosthenes & Aeschines*, quorum merita ex testimoniis cognoscere possumus, quæ Hieronymus Wolfius vberime conlecta operibus præmisit, adde Ren. Rapini comparat. Demosthenis cum Cicerone & Acta Erud. 1686. p. 192. Cicero de clar. Orat. plures addit: *Huic Hyperides pro-*
xi-

ximus & Aeschines fuit & Lycurgus & Dinarchus & is, cuius nulla extant scripta, Demades, aliique plures. Aristoteles, Platonis auditor, ea fama eloquentiæ viguit, ut in ore omnium & laudis voce fuerit versatus, quasi aureum orationis flumen effunderet, vide Fabricii Bibl. Græc. Libr. III. c. 6. Hactenus de antiquis Græcorum oratoribus. Plures sunt, inprimis Atheniensium, qui addi potuissent, vel ex Quintiliano & Suida, qui alios iuniores rhetores Atticos in Νικίσπατος memorat, Nicostratum, Dionem Chrysostomum, Polemonem, Aristidem, alterum Polemonem, Horodem, Aeschinem; sed non est, ut adhuc sim copiosior. Ante Demosthenem quoque celebres Athenis fuerunt oratores, prout ipse Demosthenes Orat. de Coron. p. 344. f. fatetur: καὶ πολλοὶ παρ' ὑμῖν, ἄνδρες Ἀθηναῖοι, γεγονόασι ρήτωρες ἐνδοξοὶ καὶ μεγάλοι πρὸ ἐμῆ κ. τ. λ. ἑτεροὶ μυρίοι; Atqui multi apud vos, Athenienses, fuerunt oratores celebres, & magni ante me: Callistratus ille, Aristophon, Cephus, Tarasbulus, innumerii alii; adde Ciceron. Lib. II. de Orat. cap. 22. & 23.

IV. Qui

IV. Qui in dicendo ornati erant, ac sermonis vbertate valebant *Philosophi, Sophista & Rhetores* appellati sunt. Vt sapientiae studium ex Aegypto & aliis regionibus in Græciam migrauit, cultores illius & qui ei dicabant animos, σοφοὶ dicebantur, quo nomine deinde & a Romanis omnes appellati sunt, qui arte aliqua excellebant, adi Muretum in primam Ciceronis Tusculanam. Ferrar. de Acclamat. l. 16. III. 12. Vossium de Imit. c. 8, n. 2. Cresoll. Theatr. Rhetor. III. 20. Lipsium epist. ad Belg. Cent. II. 48. & Samuel. Pitiscum Lexic. Antiqu. Roman. Tom. II. p. 818. Quod nomen quum superbiae plenum existimaret Pythagoras, maluit ipse φιλόσοφος, *studiosus sapientiae* nuncupari, quod nomen deinde conseruatum fuit & propagatum. Verum qui litteras sapientiae tractabant, & quibus cultura illius curæ cordique erat, σοφισταὶ quoque sunt nominati. Diogenes Laërtius de vit. Philos. proem. p. 8. οἱ δὲ σοφοὶ, καὶ σοφισταὶ ἐκαλεῖντο. καὶ ἑμόνον, ἀλλὰ καὶ εἰ ποιητὰς σοφισταὶ. καὶ αὐτοὶ καὶ Κρατῖν ἐν Ἀρχιλόχῳ τῆς περὶ Ὀμηρον καὶ Ἡσίοδον ἐπαινῶν, ὥς καλεῖ, *Ipsi tamen sapientes*

tes Sophista etiam sunt dicti. Neque hi solum, verum Poëta quoque, Sophistarum appellatione honorantur. Nam Cratinus in Archiloco Homerum & Hesiodum admiratus ita illos vocat. Philostratus de vitis Sophistarum Lib. I. f. 489. σοφιστὰς δὲ ἀπὸ παλαιοὶ ἐπώνυμαζον, ὅτι μόνον τῶν ῥητόρων τὰς ὑπερφωναντάς τε καὶ λαμπρὰς, ἀλλὰ καὶ τῶν φιλοσόφων τὰς σὺν εὐραΐᾳ ἐρμηνεύοντας; Veteres igitur non modo nobiles clarosque rhetores, sed philosophos etiam, facunde se explicantes, Sophistas appellarunt. Tertullianus c. 34. de an. Pythagoram Samium Sophistam; Cratinus proœmio Diog. Laërt. Homerum & Hesiodum non aliter vocat, & Pindaro Od. XIII. ἀρχαῖα σοφίσματα sunt ab antiquis inuenta sapientia: Sophistas nominabant etiam Theologos, medendi artis expertos, alios sapientes, somniorum interpretes, coniectores. adi Cresollium Theatr. Rhetor. Libr. I. & Cl. Kriegk. de Sophistarum Eloquentia p. 6. Hi Philosophi operam quoque eloquentiæ navarunt, & plurimi Sophistarum retenta philosophia in artis huius disciplinis studia sua operamque loca-

cabant, Quintil. Inst. Orat. proœm. p. 4. Philostratus Lemnius Sophistarum vitas describens, duo eorum genera constituit, quorum alterum eorum est, qui quum profiterentur Philosophiam, ob singularem in dicendo facultatem inter Sophistas numerati sunt. Quorum ex numero fuisse Dionem ait, & cum eo *Carneadem* Atheniensem, *Leonem Byzantinum* & alios pene innumeros recenset. vid. Philostratus de Vitis Sophistarum p. 486. 487. 588. Artis oratoriae vero Magistri Sophistæ in primis appellati sunt, Philostr. in vita Eudoxi. Εὐδοξὸς μὲν ὁ Κνίδιος τῆς ἐν Ἀκαδημίᾳ λόγους ἱκανῶς ἐκφρονήσας, ὅμως ἐνεγράφη τοῖς σοφισταῖς ὅτι τῷ κόσμῳ τῆς ἀπαγγελίας, καὶ τῷ χεδιάζειν ἐν, *Eudoxius Cnidius satis Orationes in Academia commentatus inter Sophistas ad numeratus est, partim ob professionis ornatum, partim quod ad subito dicendum pulcre se accingeret.* Cresollus Theatr. Rhet. Libr. I. c. I. p. 9. Tandem σοφιστῶν nomen, inquit, in iis conquieuit, qui docerent eloquentiam quorum plurimi singulis at atibus summa in ea re gloria præsiterunt & monumentis annalium celebrantur. Sic dicti

funt *Sophista Pericles, Protagoras, Gorgias, Aeschines Prodicus, Hippias Elcus, Aristoteles*. Quanquam sic nomen *Sophistarum* magistris & sapientiæ & eloquentiæ fuit commune; *Socrates* tamen, quum consuetudinem rhetorum fugerit, effecit, vt a Philosophis seiuncti *Sophistarum* nomen soli retinerent. Cicero Libr. III. de Oratore: *namque veteres illi vsque ad Isocratem, omnem omnium rerum, quæ ad res hominum, quæ ad vitam, quæ ad virtutem, quæ ad rem publicam pertinebant, cognitionem & scientiam cum dicendi ratione iungebant: postea dissociati a Socrate, dissecti a doctis, & deinceps a Socraticis item omnibus, philosophi eloquentiam despexerunt, oratores sapientiam, neque quidquam ex alterius parte tetigerunt, nisi quod illi ab his aut ab illis hi mutuarentur: ex quo promiscue haurirent, si manere in pristina communione voluissent.* Horum *sophistarum* pater dicitur *Gorgias Leontinus*, vt supra monui. Rhetorum denique nomen apud Græcos valuit. Non ignoro, quod multi inter *Rhetorem* & *Sophistam* differentiam fuisse adfirmant, sed
Pla-

Plato Gorg. p. 520. ταυτόν ἐστὶν σοφιστὴς καὶ
 ῥήτωρ ἢ ἐγγύς τε καὶ παραπλήσιον, idem est
 Sophista & rhetor, aut proximum quid at-
 que affine, adde Ibid. p. 465. & Vossii-
 um de Nat. & Constit. Rhet. c. 1. Mari-
 us vero Victorinus proœm. exposit. in
 Rhet. Rhetor est qui docet litteras, atque
 artis traditor est eloquentia. Sophista est, a-
 pud quem dicendi exercitium discitur. O-
 rator est, qui in causis privatis ac publicis
 plena & perfecta utitur eloquentia. Sed
 Cresollius d. l. Libr. I. c. 2. p. 17. Ve-
 rum cum ῥήτωρ non modo apud Græcos
 eum significet de schola politum, & etiam in
 orando perfectum; sed præterea illum, qui non
 minus quam Sophista ad docendam iuventu-
 tem & aperiendos eloquentia fontes adhibe-
 retur, qua ratione inter se differrent quære-
 bam. Mentionem facit Cresollius adhuc ali-
 us discriminis, cuius vero haud diligenter
 ratio habita fuit, multo minus dignum est,
 ut copiose de eo edisseramus. Cicero Libr.
 I. cap. 18. de Oratore. Sed tum maxi-
 me tamen hoc significabat, eos, qui rhe-
 tores nominarentur, & qui dicendi præce-
 pta traderent, nihil plane tenere, neque

posse quemquam facultatem assequi dicendi, nisi qui philosophorum inuenta didicisset.

V. Necesse quidem est, ut de ipsa horum eloquentia, eiusque natura disquiramus; sed præstitit id præter Clericum Art. Critica T. I. p. 341. Cl. Kriegkiius de Sophistarum eloquentia adeo feliciter, ut nihil ingenio meo relictum fuisse videatur. Horum elocutionem, inuentio- nem, finem orationis, alias scientias, quas eloquentiæ iunxerunt, luculenter execu- tus est, ut legentium animos non parum delectet, nec minus suauitate trahat ad- ficiatque. Sedes & domicilium huius eloquentiæ erant Athenæ, in quibus sum- ma dicendi vis & inuenta est & perfecta: in hac ipsa ciuitate profecto nulla vnquam ve- hementius, quam eloquentiæ studia vi- guerunt, ut Cicero Libr. I. de orator. cap. 4. loquitur. Diodorus Siculus: ὁμοίως ἢ κατὰ τὴν παιδείαν ἤτις πολὺ προέβη, καὶ φιλοσοφία προετιμήθη καὶ ῥητορικὴ παρὰ πᾶσι μὲν Ἕλλησι. μάλιστα δὲ Ἀθηναίοις φιλό- σοφοι μὲν γὰρ οἱ περὶ τὸν Σωκράτην καὶ Πλά- τωνα καὶ Ἀριστοτέλην, ῥήτορες δὲ Περικλῆς καὶ

Ἰσοκράτης, καὶ οἱ τῶν μαθητῶν. Ita ceterarum quoque doctrinarum studia eximios progressus fecere: Præcipuus tamen honor Philosophia tributus est & eloquentia, cum apud omnes Græcos populos, tum Athenienses imprimis. Inter Philosophos excelluerunt Socrates, Plato, Aristoteles; inter oratores Pericles & Isocrates, & discipuli ab hoc instituti. Velleius Paterculus. Libr. I. c. 18. Transit admiratio a conditione temporum & ad urbium. Vna urbs Attica pluribus annis eloquentia quam vniuersa Græcia, vberiusque floruit, adeo, ut corpora gentis illius separata sint in alias ciuitates, ingenia vero solis Atheniensium muris clausa existimes, adde Ciceronem in Bruto, Emmium de republica Athen. p. 7. Meursium de fortun. Attic. c. 11. & Græuium, magnitudinis causa semper nominandum ad Ciceronem, pro Flacco. cap. XXVI. p. 264. Hinc quum Romani filios in Græciam ablegarent, Athenas sedem ac templum disciplinarum deligebant, quod ibi disertissimorum hominum vberimus esset prouentus. Cicero primum Athenis ad eos accedebat, qui eloquentiæ gloria proemi-

nebant, & ad latus *Demetrii Syri*, non ignobilis dicendi magistri erat: deinde *Diodorum Stoicum* diligentissime frequentavit in philosophia. Verum enim vero duo præcipue loca Athenis erant, *Academia* & *Lyceum*, Conring. Antiquit. Academic. p. 9. Quod ad Academiam attinet, erat ædificium nobile, amplum & amœnum & ibi schola Platonis, vnde sectatores eius *Academici* dicti. Pausanias cap. XXIX. ἐγχεῖν τῷ ᾧ Ἀκαδημία, χωρίον ποτὲ ἀνδρὸς ἰδιώτου, γυμνάσιον ᾧ ἐπ' ἐμῷ, Proxime urbem est *Academia*, privati olim hominis possessio, mea ætate gymnasium. Vid. Cellarii N. O. A. Libr. II. cap. 13. p. 1150. In *Lyceo* fuit *Peripatus*, Aristotelis deambulatio, Harpocrat. ἐν τῶν παρ' Ἀθηναίοις γυμνασίων ἐστὶ Λύκειον, unum ex gymnasiis Atheniensium *Lyceum* est. Non dubium est, quin & in *Academia* & *Lyceo* publice Oratoriarum partes præceperint, licet sæpius id in *Lyceo* contigisse videatur. Cicero in Orat. c. 20. Fateor me Oratorem non ex Rhetorum officina, sed ex *Academie* spatiis exstitisse. Athenis erat divisio rhetorum seu Sophistarum, & quidam erant

erant & vocabantur *εὐτελέστεροι*, quorum
ius & auctoritas subselliis e throno definie-
batur; alii *δυνατώτεροι*, præstantiores, qui
orbem uniuersum sic inter se diuidebant,
vt quædam prouinciæ huic; aliæ illi di-
scipulos traderent, Julius Pollux Lib. IV.
c. 6. & Quintilian. Instit. Lib. II. c. 3. Ho-
noraryum Oratorum & Sophistarum com-
mune Athenis fuit decem millia drachma-
rum, Lucianus in Eunuchis p. 841. & Quinti-
lian. Lib. III. c. 1. Quamquam Cicero in Bru-
to ait: *Hoc autem studium non erat com-
mune Græciæ, sed proprium Athenarum;*
aliæ tamen ciuitates quoque fuerunt, in
quibus illud altum, conseruatum & excul-
tum fuit. *Apolonia* imprimis offert se,
vrbs nobilissima, quo C. Cæsar Octauia-
num Cæsarem pacatis ciuium bellis, ad
erudiendum liberalibus disciplinis mi-
sit, Vell. Paterc. II, 59. Studiis elo-
quentiæ magnus honos fuit, nec defue-
runt rhetores, vt adeo magnus semper
eorum prouentus exstiterit, quorum pe-
ctora cupiditate artis huius discendæ fla-
grabant. De Augusto scribit Dio lib. XLV.
p. 271. & *Apollodorus* nobilis est, de quo

Lucianus in Macrobiis p. 475. Strabo Lib. XIII. p. 430. addatur Jonsius de script. Histor. philos. Lib. II. c. 17. p. 204. De *Megar*is, vrbe Græciæ plura doctores geographicarum rerum & Kriegk^{ius} subnotarunt. Ceterum nihil nobis est, quod Ciceroni opponere possumus, quum ait: *Quis autem Argium Oratorem, aut Corinthium aut Thebanum scit fuisse temporibus illis?* & Vellei. Paterc. I. 18. *Neque ego hoc magis miratus sim, quam neminem Argium, Thebanum, Lacedæmonium oratorem aut dum vixit auctoritate, aut post mortem memoria dignum existimatum. quæ vrbes & multa alia talium studiorum fuisse steriles, nisi Thebas vnum os Pindari inluminaret.* Reliqua quæ supersunt de sophistis & rhetoribus Græcorum, luculenter declarant Cresoll^{ius} d. I. Voss^{ius} de natur. rhetoric. Morhof^{ius} Lib. VI. cap. 2. Polyh. Litter. & Kriegk^{ius} de sophistarum eloquentia, quos cupidi historiæ harum litterarum adire possunt.

VI. Extra Græciam magna dicendi studia fuerunt, maximique his artis disciplinis habiti honores, vid. Cicer. in Brut.

Iam

Iam possem recensere loca Siciliae, Galliae, Hispaniae, Britanniae, Africae, Asiae, Thraciae; sed vereor, ne commentatio excedat propositam formam; adhuc larga occasio de illis copiose edisserendi in libro nobis erit, quem de *litteratis romanorum prouinciis* meditamur. Veniamus ad *Romanos*, qui hac eloquentiae facultate eminentissimi & adeo clari fuerunt, ut aliis gentibus palmam sane dubiam reddiderint. Romani itaque eloquentiae, quae ex Graecia in Latium migravit, primas detulerunt, & illi omne studium a pueris consecrarunt, ita ut eam philosophiae & iurisprudentiae anteferrent. Ut primum de illis disquiramus, quorum studia & merita clara sunt, ante Punica bella haud inuenimus, quos ponamus in numero oratorum. Memorantur quidem orationes *Menanii Agrippae*, Liu. II. Florus II, 23. *M. Vallerii Corucini*, id. Liuius, *Appii Claudii*, *C. Fabricii*, *M. Curii*, *M. Popili*: sed recte Cicero in Bruto cap. XIV. *sed hos oratores habitos esse, aut omnino tum ullum eloquentiae premium fuisse,*

nihil sane mihi legisse videor, tantummodo coniectura ducor ad suspicandum; ad Cellarii nostri Dissertat. academicas, quas iunctas emisimus p. 346. Primum Cicero cap. XV. ponit *M. Cornelium Cetbegum*, consulem, Ennii præceptorem; de quo Vossius de Poet. Latin. p. 4. Proximus huic successit Censorius *Cato*. Cicero: *Hunc igitur Cetbegum consecutus est atate Cato, qui annis XII. post eum fuit consul. Nec vero habeo quemquam antiquiorem, cuius quidem scripta proferenda putem, nisi quem Appii Cæci oratio hac ipsa de Pyrrho, & nonnulla mortuorum laudationes forte delectant: & hercules hæ quidem exstant.* Quinctilianus Lib. III. cap. i. *Romanorum primus, quantum ego quidem sciam, condidit aliqua in hanc materiam M. Cato ille Censorius, post M. Antonius incoavit.* Solus fere est, cuius setum prosa oratione ævo illo superstitem habemus: clari enim sunt libri *de re rustica*; *Originum* & aliorum scriptorum, quorum fragmenta apud A. Gellium & priscos grammaticos Festum, Nonnum, Charisium

um conligantur, vid. Plinium VII, 27. XXV, 2, Nepotem vir. eius; Plutarchum Catone Mai. Valerium Maximum VIII, 7. Victor de viris inlustr. c. 47. Fabricium bibliothec. latin, p. 48. Caue, ne Catonem hunc cum *M. Porcio Catone* Vticensi seu *Catone minore* confundas, de quo Celsarius Programmat. p. 387. vberius edisserit. Huic adiungimus *Sergium Sulpicium Galbam*, Catoni Censorio æqualem, de quo Cicero I. de Orat. cap. X. *Equidem Serg. Galbam memoria teneo, diuinum hominem in dicendo.* Et extremo de Claris Orat. *Galba fuit inter tot aequales vnus excellens, cui & Cato cedebat senior, & qui temporibus illis ætate inferiores fuerunt; Lepidus postea, deinde Carbo.* Præter hos maior numerus oratorum sese proferebat, qui a Cicerone in Bruto laudantur, *C. Lælius, P. Scipio Æmilianus,* vterque *Gracchus, C. Carbo, Q. Catulus, M. Drusus & alii.* Vell. Patercul. II, 9. *Eodem tractu temporum nituerunt oratores Scipio Æmilianus, Læliusque, Ser. Galba, duo Gracchi, C. Fannius, Carbo Papirius.* Nec
pra-

prætereundus Metellus Numidicus, & Scaurus, & ante omnes L. Crassus & M. Antonius. Quorum ætati ingeniisque succedere C. Caesar Strabo, P. Sulpicius. Quo propiores vero L. Crassus & M. Antonius ætate Ciceroni; eo illustriores etiam atque ornatiores exstiterunt, de quibus vide Ciceronem in Brut. cap. XXXVII. Clarissimum vero lumen sicut eloquentiæ, ita præceptis quoque eius dedit M. Tullius Cicero, sub quo principe vniversa dicendi vis erupit, Velleius Patercul. I, 17. Heic in Ciceronis merita, quæ in eloquentiam ad maiorem elegantiae locum euehendam contulit; latius excurrere, superuacaneum esse existimo, nec copia temporis, quæ nobis relicta est, tanti rei sufficit. De libris oratoriis, quos Cicero conscripsit, & in quod tempus conueniant, adi Schurz-fleischium nostrum de auctoritate rhetororum ad Herennium n. 4. Eodem tempore floruit Crispus Sallustius, de cuius oratoriæ facultate eo minus dubitamus, quo orationes, quas operi suo interposuit, de hac re eo magis testes sunt locupletes,

B.C.

B. C. cap. XX, LI, LII. B. I. cap. XIV, qua Adherbalem inducit loquentem & indignationem senatus romani in Iugurtham concitantem, adde Krebsium de imitatione verb. & rerum p. 61. Inter oratores locum quoque, tametsi non magnum sibi fecerunt *Pompeius Magnus*, quem Vell. Paterc. II, 29, 3. *eloquentia medium* vocat, *Servius Sulpicius*, *C. Cassius*, *Trebonius*, *Plancus*, *Cælius* & alii, quorum epistolæ inter Ciceronianas servantur. Hoc seculum magnum quoque prouentum poetarum tulit, qui eo magis in numero oratorum habendi sunt, quo maiori vinculo & ars poeseos & eloquentiæ coniuncta est adeo, vt sine detrimento vtriusque haud diuelli & separari queant. Principes sunt meritis suis *Virgilius*, *Horatius*, *Ovidius*; vt de *Catullo*, *Tibullo*, *Propertio*, *Manilio*, *Pedon. Albinouano* taceam, quum illorum ingeniis haud æquales sint, adde *Vossium*, *Borrichium*, *Baillet* & alios. Numerus tantum poeticus ab oratorio differt, nec poetæ tam purioris latininitis, vt proxime hoc illustratum dabimus, cultor-

cultores sunt; sed quis quæso oratoria facultatem vimque dicendi illis abrogabit? Tempore Augusti eminuit in historicis quidem *T. Liuius Patavinus*; sed tanta differendi vbertate præstitit, ut inter principes rhetorum poni mereatur, cui Quintilianus Lib. X. cap. I. *lacteam vbertatem* tribuit; eumque Herodoto comparatum, dicit *cum in narrando mira iucunditatis, clarissimique candoris, tum in concionibus, supra quam enarrari potest, eloquentem*. Sic enim ducere omnia cum rebus tum personis accommodata, & adfectus, præcipue eos, qui sunt dulciores, neminem historicorum commendare magis. Et Lib. VIII, cap. I. *mira facundia* vir dicitur. *Asinius Pollio*, cuius inuidia Liuii meritis multum voluit detrachere, clarissimus quoque Ciceronis & Augusti temporibus fuit, nec eloquentiæ rudis. Ab excessu Augusti paullatim eloquentia decidit, prout latinitas quoque inclinatio quodammodo facta est. Seneca præf. lib. I. *Controuersiarum: Ut possitis aestimare, in quantum quotidie ingenia decrescant, & nescis*.

nescio qua iniquitate natura, eloquentia se retro tulerit; quidquid Romana facundia habet, quod insolenti Græciæ aut opponat aut præferat, circa Ciceronem effloruit. Omnia ingenia, quæ lucem nostris studiis attulerunt, tunc nata sunt: in deterius deinde quotidie data res est. Ex seculo igitur argenteo, ut aiunt, inter rhetores & oratores numeramus Velleium Paterculum, Marcum Senecam, Lucii patrem; Fabium Quintilianum, Plinium Iuniorem; ex poetis M. Annaum Lucanum; Valerium Flaccum & Silium Italicum. De Velleii Paterculi stilo Cellarius præfat. ad eum ita iudicat: *Stilus Velleii, quamvis non ubique est historicus, sed oratoris sapit ingenium; tamen nec ideo posthabendus, sed commendandus magis est, quia plus ad orationes aut similes sermones quam ad integras historias scribendas adolescentes adducuntur.* M. An. Seneca auctor est Controuersiarum & Suasionum; Quintilianus vero Institutionum orator. & declamationum, quarum multæ extant: De eo Martialis lib. II, epigr. 90.

Quin-

*Quintiliane, vaga moderator summe iu-
uenta*

Gloria romana, Quintiliane, toga.

Fuit Hispanus & Romæ multis annis rhetorice docuit, vid. Gunth. latin. restit. P.I. append. p. 126. 127. *Plinius*, qui *Traiano* panegyricum sermonem dicavit, fuit eloquentissimus virorum; ut Buchnero de comm. rat. dicendi p. 52. audit, adi Conradum Lycosthenem, Io. Mariam Catanæum, Conrad. Rittershusium, Iacobum Thomasiū & Christophorum Cellarium in vit. *Lucanus*, inquit Cellar. Prol. ad Cur. post. p. 30. *poeta ardens & concitatus, & sententiis clarissimus, & ut dicam, quod Fabius X. cap. 1. sentit, magis oratoribus, quam poetis adnumerandus. Nihil enim fabulis inuoluit, ut fere poeta solent; sed civile bellum ad fidem historice perscribit, ut tamen suauitate poeticam & heroicam maiestatem aequaliter seruet. Valerius Flaccus eloquens quoque & ornatus; & Silius Italicus religiosissimus Virgilii disserti imitator fuit, Post æneo latinitatis seculo ex tenebris*

nebris se quodammodo emerfit clarissimosque tulit oratores, *Lactantium*, præter anonymos Panegyristas *Mamertinum*, *Nazarium*, *Eumenium*, & *Theodosii* imperio *Latinum Pacatum*, *Aurelium Symmachum*. Posthac oratoria ars, vt & ceteræ liberales litteræ, inruentibus barbarorum gentibus, pristinum splendorem solidamque dignitatem amiserunt. Hæc de ipsis oratoribus sufficiant; plura addere, inprimis de illis, quorum orationesperierunt, superfedeo: adde *Vossium* de *Natura rhetorices*; 4.^o cap. 14. 15. & *Morhof.* Lib. IV. cap. 11. 12. 13. 14. *Polyh. Litter.* Fuerunt enim viri disertissimi, de quorum fetibus vero posteritas nihil conseruauit; quò pertinent *Q. Hortensius*, *C. Curio*, *C. Licinius Caluus*, *M. Brutus*, *M. Cælius*, *M. Callidius*, *C. Iul. Caesar*; tempore Augusti *M. Valerius Messala Corvinus*, *C. Asinius Pollio*, de quo supra, *M. Porcius Latro*, *T. Cassius Seuerus*, *T. Labienus*, *Sext. Iul. Gabinianus*, *C. Asinius Gallus*, *Iunius Gallio*, & alii. De auctoribus Rhetoricorum ad *Herennium* & *Dialog.* de causis corrupt. eloquentiæ ali-

am occasionem disputandi nobis reſerua-
uimus. Heic non intactum relinquo SC
factum *Fannio Strabone & Valerio Meſſala*
conſulibus, (quorum conſulatum Theod.
I. ab Almeloueen Faſt. Conſ. Lib. II, p. 99.
in annum V. C. 1093, incidiffe iudicat,)
de philoſophis & rhetoribus, VTI ROMÆ
NE ESSENT, Suetonius de clar. Rhet.
cap. I. & A. Gellius libr. XV. cap. II. Hoc
iterum ſub tempus L. Craſſi eodemque
auctore factum eſt, Latinos rhetoras vrbe
expulſos eſſe, vid. Sueton. diſt. loc. & Cel-
larius diſſert. academic. p. 348.

VII. Hi cultores eloquentiæ & magi-
ſtri *Oratores, Rhetores & Sophiſta* diceban-
tur. Inter *Rhetorem & Oratorem* olim
differentiam fuiſſe, Polydorus Vergil. libr.
I. cap. XIV. extr. tradit: *Orator eſt, qui*
cauſſas agit; rhetor, qui rhetorice proſi-
tetur. Marius Victorinus expoſ. in I.
Rhetor. ad hæc verba. *Verum Oratori*
minimam illud eſt, de arte loqui &c. Ora-
tor duo habere debet, vt artem tradat di-
cendi, vt ipſe ex arte dicat: ſed officium
boc verum eſt, vt ex arte dicat. Illud

autem accidens, ut artem dicendi tradat, quod rhetoris officium solum est. Hinc Cicero de Officiis I, 1. *Proprium oratoris est, apte, ornate & distincte dicere.* vide Vossium de nat. & constit. Rhet. cap. 1. Sed. Erasmus Schmidius ad Pindarum Pyth. d. 9. p. 191. *Estque ῥήτωρ, ut hoc etiam addam, Orator.* Sic Δημοκρίτης ῥήτωρ. Αἰσχίνης ῥήτωρ. Scire itaque perquam velim, quam probata auctoritate, Orator sit, qui orationes conscribat: Rhetor vero, qui praecepta artis oratoriae tradat. Sane hos σοφιστὰς dictos fuisse scio. Oratores vel caussidici erant, seu forenses; vel oratores priuati: illi agebant causas publicas declamando; hi vero rhetoricam & eloquentiam docebant magnatum liberos. Sidonius Lib. V. epist. 5. *Pueritiam tuam competenter scholis liberalibus memini imbutam, & saepe numero acriter eloquenterque declamasse coram oratore, satis habeo compertum.* Lampridius Alexandro: *Ad Athenaeum audiendorum & Graecorum & Latinorum Rhetorum vel Poetarum causa frequenter pro-*

cessit. Audiuit autemetiam forenses Oratores causas recitantes, quas vel ad ipsum, vel apud prefectos urbis egerant. vid. Casparum Barthium ad Claudian. p. 76. b. Verum enim vero, quum in Italia & græce & latine docerent, perorarentque, *sophista* ille dicebatur; qui præcepta eloquentiæ græce; *Rhetor* vero qui latine proponeret. Cuiusmodi Sabinus Clodius Sophista fuit, de quo Seneca lib. IV. Controu. XXVI. Discrimen alii sic ponunt, quod rhetor sit, qui litteras tradat; sophista vero, apud quem dicendi exercitium discatur, Tertullianus de pallio cap. vltim. p. 230. Gregor. Nazianzenus epist. X. ad Basilium & Suidas in voce *ῥητωρ*. Discrimina hæc initio quidem obseruata fuisse videntur; tractu vero temporum, quum essent, qui & docebant & perorabant, illa in desuetudinem venisse, arbitramur. adde Petrum Francium de ratione declamandi p. 5.

VIII. Iplius eloquentiæ fata exponere, multi laboris est & a breuitate, quam sectari tenemur, aliena. Id obseruare sufficiat, quod orationes veterum

Ro-

Romanorum varii sint generis & argumēti, prout differendi occasionem status rei publicæ exhibebat; nec istæ formæ publicarum rerum nostrarum facile applicari possunt. Libera republica declamabant & de rebus publicis, quum partim ciuem romanum accusarent, defenderent, vt Cicero Milonem, Roscium Amerinum, Archiam Poetam, partim contra eum dicerent, vt idem in Verrem, Catilinam: partim fugienda, partim obseruanda populo proponerent, quod plerumque ex rostris loco ad radices Palatini in foro Romano fiebat. Caussam dixerunt vel paucis verbis, Gellius V. 10. Asconius Pedian. 3. Verr. p. 76. vel pluribus, prout plura exempla Cicero nobis reliquit. Primus tertio consulatu Cn. Pompeius frenos quasi eloquentiæ adhibuit & certum dicendi spatium caussarum patronis præscripsit, Auctor. Dial. de Orat. c. 38. n. 2. ipsam vero legem, quareis ad dicendum tres horæ; accusatoribus duæ sunt constitutæ, Dio Lib. 49. memoriæ prodidit. Quibus sermonibus a concio-

ne Rhetores multum obtinebant; ita ut in dicendi eorum facultate magna pars romanorum felicitatis posita fuerit. *Et quanto quis, inquit Auctor Dialog. de causis, corrupt. eloquen. plus poterat dicendo, tanto facilius bonores assequeretur tanto magis missis honoribus collegas suos anteibat.* Verba quoque de rebus priuatis fecerunt, quum exempli gratia senatui, patronis, principibus, gratias agerent, gratularentur mortuos ex rostris plerumque laudarent, de qua re Cicero de Oratore, Quintilianus Instit. Orat. & ætate nostra Vossius de natur. rhetoric. & instit. Orat. copiose dixerunt. Ritus parentandi a Plutarcho ad Valerium Publicolam refertur; licet id a Dionysio Halicarn. Lib. V. in dubium vocetur; adde Fabrum Lib. III. c. 13. Seme- str. Hæc honorum officia præstant propinqui propinquis; amici amicis; maxime viris illustribus, quorum memoriam haberent sanctam & virtutes admirarentur. De Augusto, qui auiam Iuliam defunctam pro concione laudauit, vid. Suetonium cap. VIII. LI. adde Quintilianum XII, 6. Dionem Cassium Lib. LVI. p. 592. Appianum de bello ciu. lib. II. p.

II. p. 521. Qui primus viros inclutos, apud Romanos post fata dilaudare instituerit, id definire Dionysius d. I. haud sustinet, ad Meursium de funer. cap. 30. 34. Kirchmannum de funeribus Lib. III. cap. 18. Gutherium de iuribus Manium Lib. I. cap. 12. & 25. Eiusmodi orationes etiam Cicero recitavit, ut ipse Lib. II. cap. 14. de oratore fatetur. adde Cresollium p. 190. 191. Kriegkium de modis inclarescendi apud Roman. p. 57. Quod ad dispositionem veterum orationum adinet, sunt illæ vel *integra*, ut ex sex, quas constituabant, partibus constarent, prout oratio pro Roscio Am. exemplum est; vel *minus integra*, quum haud omnes partes adhiberentur, quæ libelli rhetororum declarant luculenter. De ipsa elocutione ex fatis latinæ linguæ, de quibus Cellarius & Borrichius in primis meriti sunt, iudicare possumus; nec opus est, ut vel heic de ea edisseramus.

IX. De eloquentiæ magnitudine Cicero Lib. I. cap. 5. Orator. ita disputat: *Huius*

autem incredibilis quedam magnitudo & difficultas erat; est enim scientia comprehenda rerum plurimarum, sine qua verborum volubilitas, inanis atque irridenda est, ipsa oratio conformanda non solum electione, sed etiam constructione verborum, accedat etiam lepos quidam facetiæque & eruditio libero digna. Hinc Romani primum animum ad eas artes applicabant, quæ mentem atque ingenium ad ipsius eloquentiæ culturam præparare possunt. Grammaticam perlustrabant, quod oratoris futuri fundamenta iacit, Quintilian. l. 4. Primâ autem cura litterarum græcarum fuit, quæ non minus olim necessariae erant, quam hodieque latinæ sunt. Auspiciûm fiebat a poetis, inprimis Homero, qui originem eloquentiæ non minus quam sapientiæ Græcorum dedit; quo nomine appellat eum Hippodromus apud Philostratum lib. II. p. 48. *παλῆρα & Φωνὴν ποφιστῆν*, adde Gisbertum Cuperum in Apotheosi p. 119. & Cellarii Dissert. Academic. p. 671. Huic Menander, Sophocles, Euripides adiungebantur, Dein hi-

historicis, Thucydidi, Herodoto, Xenophonti, Polybio; tum philosophis & denique rhetoribus se dabant; adde Dornmayeri dissert. philol. de Eloquentia. Momenta artis eloquentiæ & publice & privatim tradebant; quibus præceptis rite cognitis, ipsa exercitia declamandi legendi, vertendi superaddebant. Alii enim in orbe eloquentiam docuerunt ære publico; alii priuata quasi opera: illi in Capitolio; hi passim in vrbe; illi certo numero, hi incerto, vide quæ habentur in constitutione Theodosii & Valentiniani augustorum, quæ & in Theodosiano & Iustiniano codice reperitur. Sub tempus imperatorum constituti sunt grammatici latini decem; græci totidem; sophistæ siue rhetores latini tres; Græci quinque, philosophus vnus, duo iuris Romani periti. Qui intra domos priuatas has disciplinas liberales exercuerunt, eorum numerus definiri non potest, vid. Conringium Dissert. Antiquit. Academia Diss. I. p. 10. Duplicis exercitationis, quæ diuerso tempore fuit obseruata, men-

tionem facit auctor Dialogi de causis corrupt. eloqu. cap. 34. Ergo apud maiores nostros iuuenis ille, qui foro & eloquentia parabatur, imbutus iam domestica disciplina, refertus honestis studiis, deducebatur a patre, vel a propinquis, ad eum oratorem, qui principem locum in civitate tenebat. Hunc sectari, hunc prosequi, huius omnibus dictionibus interesse, siue in iudiciis, siue in concionibus assuescebat, ita ut altercationes quoque excipere, & iurgiis interesse, utque sic dixerim, pugnare in prælio disceret. cap. 35. At nunc adolescentuli nostri deducuntur in scenas scholasticorum, qui rhetores vocantur: quos paullo ante Ciceronis tempora exstitisse, nec placuisse maioribus nostris, eo manifestum est, &c. Declamando ingenium exercuerunt varia ratione; adi Clericum Art. Critic. Tom. I. p. 344. idque græce & latine. Cicero de se in Bruto cap. XC. Commentabar declamans, sepe cum M. Pisone, & cum Q. Pompeio, aut cum aliquo quotidie, idque faciebam multum etiam latine, sed græce sæpius,

ius, quod græca oratio plura ornamenta
 suppeditans, consuetudinem similiter Latine
 dicendi anteferebat. Immo ad præ-
 uram vsque summus hic orator græce
 leclamauit, Suetonius de Clar. Rhet. cap.
 . De ratione, quam obseruabant, ver-
 endi græca in latina testes sunt Plinius
 lib. VII. epist. 9. & Quintilianus Lib. X.
 . 5. Præterea vero Grammaticis pariter
 atque rhetoribus græcis vsi sunt, prout
 Capitolinus vit. Anton. Philos. cap. 2.
 Grammatici græci *Alexandri*; Oratorum
Annii Marci, *Caninii Celeris* & *Herodis*
Attici mentionem facit. Verum Roma-
 ni filios suos in exterarum regiones, in pri-
 nis Græciam ablegabant, vt eloquentia
 & aliis artium disciplinis ornatiores fie-
 rent easque rectius & maiori mentis ar-
 dore excolere possent. De quibus pere-
 grinationibus academicis commentati
 sunt singulari opera Paganinus Gauden-
 tius, Hermannus Conringius, Io. Henri-
 cus Bœclerus, Augustus Buchnerus, Chri-
 stophorus Cellarius & Georg. Nicol.
 Kriegkhus.

X. De

X. De Germanorum origine, nomine, lingua, bellis quæ cum Romanis gesserunt, & aliis, quas excoluerunt, scientiis, non disputabo, quum doctores rerum geographicarum & historiarum copiose hæc Germanorum momenta litteris prodiderunt. Germani sæpius ab aliis contemti fuerunt, quasi obtusioris essent ingenii; falsissimum hoc esse, eorum eloquentia dudum euicit. Cuius rationem ut clare cognoscamus, fata illius, quæ ævo antiquiori & medio subierunt, curatius inlustranda esse arbitror. Primis temporibus, trium quippe seculorum, hanc dicendi virtutem Germanis cognitam & magni habitam fuisse, testantur veterum monumenta luculenter. Pomponius Mela Lib. III. cap. 2. p. 50. edit. Voss. *Habent (Galli) tamen & facundiam suam, magistrosque Sapientie Druidas.* Ex quibus colligi potest, quod veteres Germani & eloquentiam & philosophiam, quibus arcta est cognatio adfinitasque, excoluerint. Druides quidem, de quibus Cæcilius Frey & Elias Puffendorf-

fius

fus maxime meriti sunt, cum Guilelmo
 Postello omnium gentium sapientibus,
 Chaldaeis, Ægyptiis, Indis Græcisque
 haud anteferendi sunt; magistri tamen
 sapientiæ fuerunt & ex patria Britannia
 egressi, Germanos ea erudierunt. Cæ-
 sar de B. G. VI. cap. 13. *Illi (Druides)*
rebus diuinis intersunt, sacrificia publica
ac priuata procurant, religiones interpre-
tantur: ad hos magnus adolescentum nu-
merus disciplina causa concurrit, magno-
que ii sunt apud eos honore. Nam fere
de omnibus controuersis, publicis priua-
tis que, constituunt; &c. Hos quos
 Cæsar laxiore voce vocat *Druides*, alii in
 tria genera dispescunt, *Bardos, Vates*,
 qui sacrificia obeunt; : & *Druides* pro-
 prios, qui circa philosophiam versentur,
 Strabo Lib. IV. p. 136. & Lucan. lib. I. v.
 448. sq. *Bardi* hymnos & carmina teste
 Strabone, tractabant; quibus & profam
 orationem adiunxisse eos, vero quam
 proximum est. Marcellinus Lib. XV:
Bardi fortia virorum illustrium facta
heroicis composita versibus cum dulcibus
lyra

hæc modulis cantitarunt. Adde Diodorum, Morhofium de Lingu. Germanic. cap. 6. p. 272. & Wagenfeilium intr. von den Meister-Sängern cap. 4. p. 499. Cæsar quidem d. 1. cap. 21. *Germani, inquit, neque Druides habent, qui rebus diuinis præsent, neque sacrificiis student; sed Cluuerius Germania antiqua ostendit, quod verba hæc: Germani Druides non habent; ea sententia sint accipienda: Germani non student sacrificiis.* Apparet exinde, quod veteri Germanorum genti cura quædam eloquentiæ sit vindicanda; licet dentur, qui gloria artium harum liberalium eos fraudare voluerunt, vide H. L. Schurzfleischium Notit. Biblioth. Vinar. p. 3. 4. Prouocant ad Tacitum, qui ait: *Litterarum secreta viros pariter ac feminas ignorasse; sed indicat, opinor, Tacitus, litterarum seu characterum secretorum expertes fuisse & ignaros, adi Iacob. Burckhardum de fatis L. L. in German. p. 26. Quid? quod ipse Tacitus cap. XI. Mox rex, vel princeps, prout ætas cuique, prout nobi-*

biliter, prout decus, prout facundia est, audiuntur, autoritate suadendi magis, quam iubendi potestate. Conf. Paschii Inuent. Nou-antiqu. p. 6. Seculo III. Cliuix officina & schola publica eloquentiæ constituta fuit, cuius gubernandæ cura viris commissa est, qui semper in omni genere dicendi maxima facultate viguerunt, vid. Panegyricos veteres p. 324. Eloquentia non ita exculta fuit, ut verborum elegantias meditarentur; & maximo studio vim, quæ facundiam comitatur, gestirent; sed id egerunt, ut naturæ donum, quod illis haud defuit, conseruare & aliqua parte augere possent. Quibus regulis hanc artem præceperint, qua ratione eam excoluerint, qua occasione & qua lingua semper declamauerint, posteritati haud scriptum reliquerunt. Quamquam antiqua Germanorum gens, auctore Tacito cap. II. annales & historias scripserint; per posteros tamen ab interitu haud vindicatis, parum nobis est, ex quo rei huius cognitionem petere possimus, *Auentinus Annal.*

nal. Boior. lib. 1. Id haud a veritate alienum est, quod lingua vernacula. vñ fuerint, licet & romana ad eos iam transvecta fuerit: quam minime a Teutonica, quæ Praschii, Schottelii, Reimmanni sententia est, deriuandam a Romanis acceperunt. Seculis, quæ infecuta sunt, summa barbaris Germanorum gentem inuaserat, quæ litteries his aliisque liberalibus adeo rudis fuit, vt omnis scientia & omne studium meliorum disciplinarum proscriptum videretur, adde Iacob. Burckhard. de fatis L. L. in Germ. cap. II. p. 45. Quæ tempora diligentius rimari eo nomine superse-
deo, atque ad octauum seculum progredior, cui maxima litterarum incrementa atque ingenuarum artium vindicanda esse, existimo. *Carolus* enim *Magnus* non solum ipse litteris elegantioribus imbutus fuit; sed mirifica quoque erga eas in maiorem locum promouendas beneuolentia. Philosophiæ barbaricæ disciplinas cum politiore litteratura coniunxit; antiquissima carmina

na litteris consignari præcepit; magistratus & sacerdotia amplissima, vt Osna-
brugense, Halberstadiense, Paderbor-
nense, Mindense, Verdense, Bremen-
se, Monasteriense, Hildesiense, insti-
tuit. Quid? quod de scholis litterarum
publicis condendis cogitauit, & prout
Francorum annales commemorant, ex
Roma discessurus, viros litteris eleganti-
oribus ornatos in Franciam secum addu-
xit. Quin inter harum litterarum culturam
haud neglecta sit eloquentia, minime du-
bitamus, inprimis quum de ipso Carolo
Eginhardus vita eius: *Erat eloquentia co-
piosus & exuberans, poteratque, quicquid
vellet, apertissime exprimere*, adde Auen-
tinum Lib. IV. & Hachenbergium Ger-
man. med. dissert. VI. p. 43. edit. Turckii.
De ipso *Eginhardo*, quem litteris & phi-
lologiæ & eloquentiæ perpolitum fuisse
constat, copiose egit Schminkius vit. eius,
& Burckhardus cap. 3. Post *Caroli Ma-
gni* e vita discessum *Ludouicus Pius* & suc-
cessores auitis & paternis virtutibus haud
similes, liberalibus litteris fauere desie-
runt,

runt, nec merita illorum in rem litterarum publicam copiosa sunt atque eximia, conf. Schurzfleisch. Notitiam Bibl. Vinar. p. 9. His enim temporibus omnes fere litteræ in Germania exularunt & monachorum inertia purioris latinæ linguæ, quæ fundamentum est ceterarum disciplinarum, cultura plane dimissa fuit. Io. Tritthemius Catalogo virorum Germaniæ inlustrium multos conlegit, quibus laudem singularis eloquentiæ, facundiæ & compositæ orationis adhibuit; sed fides, qua hæc demonstranda, sit penes auctorem. Lingua & romana & teutonica tempore Caroli M. rhetores docuisse oratoriæ præcepta, vero simile esse putamus, quod summus hic imperator utrique linguæ ex tenebris productæ, priscum restituere decus operam dedit. vid. Morhof. de Lingua. Germanor. & Poef. P. II. Hachenberg. Germ. med. Diff. VI. VII. Hertium Biblioth. Germ. P. I. Quamquam Vossius præf. libr. de vitiis Sermon. Carolus M. variis in locis Scholas erigendo præclare est meritus de studiis vniuersis;
me-

melius tamen de rerum doctrina, quam lingua romana. Quod si ex fatis poeseos, quæ oratoriæ cognata est, de eloquentiæ flore iudicare possumus; tempore hoc & teutonica & latina poesis fuit exculta & fautores inuenit. Excultæ poeseos romanæ argumentum exhibet *paeta anonymus latinus*, qui imperatoris Arnulphi præclaras virtutes consignavit; quemue ab interitu inlustris Leibnizius vindicauit: vt de opere *Hrosvithe* taceam, vid. Vossium & Eschenbachium de poetis christianis sacris. De *Ludouici pii & Otton. II.* erga poesin teutonicam beneuolentia nihil proferam, quum ille ipsam mentem litteris his adhibuit; hic eas priuilegiis haud contemnendis exornauit. Quantis auctibus hoc litterarum genus seculo XII. euectum fuerit, & in dies magna elegantia magnumque decus eis accesserit, id Morhofius declarat perspicue p. 292. de *Lingu. Germ.* Quid? quod *Lambertus Schaffnaburgensis*, seculi XI. historiarum auctor, facundiæ & eloquentiæ haud rudis fuit; tantum abest, quin inter oratores po-

natur. vid. Vossium de H. L. I. c. 47. Hederichium Notit. auctor. & Hertium Biblioth. Germ. p. II. f. i. n. 484. Et de *Friderico I.* ait Hachenbergius p. 143. *Sane inter egregias laudes, quas Friederico I. Imperatori Otto Frisingensis & Radevicus tribuunt, illam ceteris omnibus præstare autumant, quod ad insignem animi fortitudinem ac temperantiam, singulare eloquentia studium adiecisset.* &c. Tempore *Friederici II.* *Petrus de Vineis*, Germanus maxime nituit, & seculi sui optimus & facundia præstantissimus habitus fuit. *Secul. XIV.* lugubris quidem musarum facies extitit, iisque nullus honos habitus est; seculo tamen, quod insequeretur ad vitam reuocatur, priorem dignitatem auctoritatemque receperunt. *Rudolphus Agricola* laudem inprimis meretur, qui differentiam Logices & rhetorices, & quantum cuiquetribuendum sit, solide demonstrauit, ut ipse *Melanchthon* Tom. II. *Declam.* p. 204. dicat: *nulla extare recentia scripta de locis & usu Dialectices me-*

meliora & locupletiora Rudolphi libris. Plura vide apud Richartum Biblioth. Cæsar. Vindobon. p. 15. & Burckhardum de fat. L. L. in Germ. cap. V. *Conradum Celtem Friedericus III.* in academia Vindobonensi eloquentiæ ac poeseos professorem primarium constituit, vt ex constitutione eius de honore & priuilegiis poetarum a. c. cl. hoc promulgata apparet apud Goldastum Tom. III. Constit. Imperial. Ex schola *Rudolphi Agricola* adhuc alii prodierunt, & exemplo illius excitati, litteris melioribus & eloquentiæ operati sunt, de quibus consule Burckhardum d. l. Angustia temporis quum me circumstat, breuitatem sequor, & ex seculo XVI. inter scriptores rhetorices refero *Io. Sturmium & Melchiorem Iunium, Ioachimum Camerarium, Dauidem Chytraum, Philippum Melancthonem &c.* Hic pedem figo. Ea enim, quæ accurratius de oratoribus & auctoribus rhetorices seculi XV. XVI. XVII. inprimis oratoria *Weissana*, eiusque fatis dicenda

c 3

sunt,

sunt, adeo copiosa mihi videntur, vt peculiari dissertationi, quam CELLARII præfationibus & dedicationibus præmittendi animum habeo, referuanda esse arbitrer.

Inter præstantissimos eloquentiæ viros poni meretur CHRISTOPHORVS CELLARIVS, qui tanta oris virtute va-
luit, vt omnis Ciceronis facundia in eo posita & conspicua maxime videretur. Testes extant locupletes panegyrici sermones quorum summa maiestas est, siue ad elegantiam & puritatem verborum; siue ad suauem rerum compositionem; siue ad alia respicias, quæ orationibus virtutes atque auctoritatem conciliant. Quo nomine quum utilitati meliorum litterarum, eorum inprimis, qui prioris latinitatis cultores sunt, inuigilare soleo; facile quisque iudicare poterit, cur CELLARII nostri optimi orationes vno fasciculo iunctas publicauerim. Ipsa vox tanti viri, cuius merita maxime veneror, me studiose diligenter-
que

que ad hanc operam hortata est, quam ante paucos dies, quum vltimum redderet spiritum, effudit: *Vtinam orationes meas, magno studio conscriptas in summam redigere & publicare possem!* Quantam operam præstiterim & quam difficilis fortuna mihi orationes has conquirenti visa sit, non pluribus heic proferam, quum ita fuerunt distractæ, vt sæpius de integro opere Cellarii orationum desperauerim. Sed industriæ meæ opem tulerunt singularem venerandus BYDDEVS, excellentissimus SCHNEIDERVS & grauissimus CELLARIVS, paternis & ingenii & mentis virtutibus simillimus, quorum erga me beneuolentiam grata mente semper venerabor. Extremo operis clarissimi DORNMEYERI, mihi amicissimi orationem, quam beati CELLARII manibus dicauerat, lubieci, quod & puritate latini sermonis & vbertate rerum maxime fuit commendabilis & digna ideo, quæ ab interitus periculo vindic-

dicetur. Illæ, quæ duce eo atque magistro ab aliis recitatæ sunt, proxime lucem publicam quoque percipient; in quibus conligendis immensam adhuc operam conlocaui, nec felicior defuit successus. Bene vale,
Lector optime.



CHRI-

CHRISTOPHORI
CELLARII
ORATIONES
ACADEMICAE,





ORATIO I.

QVAE

AVGVSTO CONDI-
TORI ACADEMIAE
FRIDERICIANAE

NOMINE ILLIVS
POST INAUGVRATIONEM
GRATIAS AGIT.

Habita est clolxciv.



Ta nobis omnia cuc-
nire Deus iubeat, vt omnium
mens & cogitatio gessit augu-
sto PRINCIPI & DOMI-
NO nostro Friderico III, Ele-
ctori Brandenburgico, immortales gratias agere,
cuius incredibili benignitati Musæ nostræ & ini-
tia sua, & incrementa & stabilitatem post Deum
debere se intelligunt. Plausus hominum innu-
merabiles, publicæ voces & gratulationes, com-
munis omnium læticia satis nobis testimonia sunt,

quo quisque adiectu, qua singulari pietate, qua gratæ mentis significatione fuerit, quum magnus **PRINCEPS** ac **DOMINVS** noster, augustius quam pro voto & expectatione nostra, Academiam, quam condiderat, auspiciatissimis ritibus initiisque sanctissimis inauguraret. Tot exultantium hominum sensus, uti ex mentis recessu sese proferunt; tot gestus miranda vi lætitiæ expressos; tantum votorum & gratulationis conuentum atque lætissimum strepitum vel animo complecti, res certe non leuis aut exigua est; oratione autem, uti sunt, efferre, fateor non solum vulgarem doctrinam superare, sed iis etiam, qui exercitationes sunt, non facillimum ad explicandum esse, quum mille anfractus animorum penetrare, mille congratulantium voces imitari oporteat, qui publico nomine, quod omnes debent, officium facere, & omnium verbis merentissimo **CONDITORI** gratias agere, vel sponte sua vel iussus etiam in se susceperit. Quod munus dum mihi iniunctum esse video, ingens onus & vix ferendum persentisco. Sed grauius aliud mihi impendet, quod pariter subeundum esse intelligo, etsi tantæ id molis ac magnitudinis sit, ut non facile ingenium inueniatur, quod ferundo illi sine offensione sufficiat. Dicendum enim de **MAXIMI PRINCIPIS** virtutibus est, quæ siue bellorum magnitudinem spectemus, siue felicitatem bene constitutæ reipublicæ, utique summa & admiranda omnia, plura etiam sine exemplo contuemur; quæ si
quem

quem forſan deterreant, ne id in ſe graue munus recipiat; puto excuſatius illum facturum eſſe, ſi renuerit, quam ſi cupidus adgrediatur, quod ſuſtinere propter molem & grauitatem non valeat. Ego equidem nolo hac deprecatione vti, quum ſciam, neminem fortasſe ex veſtro ordine, Patres conſcripti, fore, qui excuſationem meam facile accipiat: nec vero deſpero, eandem cauſſam, quæ alios ab officio liberare poſſit, mihi etiam præſidio inter agendum fore, vt maiori fiducia ſuſcipiam, quod faciendum reſtat; non quaſi audacior ceteris ſim, aut mihi ad obeundum illud paratior eſſe videar; qui, quam exiguæ res meæ ſint, minime quidem ignoro; ſed quia eadem magni Principis maietas mihi veniam pollicetur, ſi quantum potero, non quantum debeo, de ſummis rebus & ingenio meo maioribus, ſum verba facturus, idque breuius, quam virtutum laudandarum magnitudo exigebat, vel veſtra audientium poſtulat expectatio. Qua fiducia venia veſtræ, Auditores ſpectatiſſimi, in me ſuſcipio, quod maius eſt ingenio meo; & arctius etiam, quam pro amplitudine eius, conſtringo, non omnia perſecuturus, quæ dicenda in hac cauſſa ſint: ſed quæ pro temporis ratione ſe animo meo iniiciunt, vt præteruſchi aut tranſilire non liceat, etiamſi a nemine, vt decet, & neque ab eloquentiſſimo amplificari ornarique verbis poſſint. Vos modo propoſito huic fauete, & ſi oratio me deſecerit, quod animus mihi præſagit; credite quæſo, non irreligioſitate, aut indiſtriæ neglectu, (quanquam

nec hunc omnem a me deprecor, debilitatis meae conscius) sed magnitudine rerum, quæ dicendæ sunt, ita ut fieret, accidisse.

Quoque versus oculos in hac vrbe circumfero, aut cogitatione memoriam illarum rerum repeto, quæ proximis diebus magnifice cum nostris Musis peracta sunt; omnia magna atque miranda senobis obiciunt: sed admirabilius nihil est, quam inter belli tumultus grauissimos, non secus ac in otio & pace, litterarum ac doctrinæ sacrarium constitui, opulenter dotari, auguste ac splendidissime dedicari. Belli enim hæc natura est atque indoles, ut non solum, quo fulmen eius peruadit, litterarum cultum deiiciat atque prosterнат, sed vicinos etiam conterreat adeo, ut studiorum progressus omnis impediatur, aes in Musas impendendum ad castra destinetur, & rei nullius, quam litterariæ, spes minor inter arma relinquatur. An vero posterì credituri sunt, apud nos omnia contrario se modo habuisse, ut, quo funestius bella in Europa sæviebant, eo magis cresceret spes excitandi litterarum domicili? quam etiam euentus par votis nostris aut omnino maior, consequutus fuit, dum vndiq; decerptum iuuentutis florem tanta frequentia tantoque numero huc allatum vidimus, ut hæc noua Aeademia, etiam antequam inauguraretur, cum antiquissimis Germaniæ de nobilitate ciuium non modo certare, sed, quod præfiscine dixerim, palmam etiam haud dubie præripere poterit. Quis ergo non magnopere miretur, res ali-

bi dissociabiles viſas, armorum curam & ſtudium rei litterariæ, difficillimis his temporibus miſceri ac ita coniungi potuiſſe, vt & bellum maximis impenſis gereretur, & magnifice etiam excitarentur litterarum ſtudia? Quidquid intra hominum mediocritatem non conſiſtit, Deo imputamus, vt ſuæ origini vindicentur, quæ ab ipſa ducuntur æternitate. In Academia huius initiis diuina auſpicia non obſcuris ſignificationibus perſpecta habuimus, nec hodieque diſſitemur, quantum cœlo illius cauſſa debeamus. Quum vero ita Deus cum mortalibus agat, vt ſi quid magnum perficiendum eſt, ipſe conſilia regat, conatum adiuuet, progreſſum fortunet; quis dubitabit Sereniſſimum Fridericianæ Conditorum Deo duce in hanc mentem cogitationemque ingreſſum eſſe, vt contra fortunâ, hoc eſt, contra communem bellorum ſortem, ſuæ ſpei, quam magno animo conceperat, immotus ſecurusque inſtaret, eaque omnia faceret ſtatueretque; quamuis maximo bello diſtentus, quæ vix altiſſima quies & diuturnitas pacis proferre potuiſſet. Hæc vera & diuinitus adlata fortuna eſt: hæc felicitas omnibus votis atque deſideriis præferenda, quia ſapientiæ conſiliis innixa nunquam loco ſuo mouetur, ac fructus ſuos communi vtilitati & reipublicæ adfert & relinquit poſteritati. Nummis, marmoribus antiquam Romam, quoties felici ſucceſſu viſa fuerat, inſcripſiſſe nouimus, FELICITAS TEMPORVM, FELICITAS SAECVLI, FELICITAS PERPETVA. Nos non minus, quam Romani,

habemus, quod de temporum felicitate, inter ceterorum planctus ac misérias, nobis gratulemur, qui tranquille ac pacate omnes viuimus, atque Academiae nostræ flores & maturos fructus in ipsa herba atque germine videmus. Sed Romanorum mentio ad id, vnde digressus fui, vt reuertar, me admonet, qui mecum constitueram, rem admirabilem, otium liberalium litterarum, inter belli dira negotia natum, auribus animisque vestris declarare. Imperiorum, quæ Deus a principio rerum esse voluit, primas partes tulisse Romanam rempublicam, sapientum iudicio consensioneque probatum est. Quæ enim in aliis sparsim laudanda occurrebant; cumulata & coniuncta apud Romanos erant omnia. Enituit gens aliqua in bello, sed obsoleuit in pace: aliam toga; sed non & arma honestarunt: litterarum studiis hæc inclauit, sed obhæsit circa ceteras virtutes: sola antiqua Roma fuit, in qua nulla laudis materia sterileceret. Siquid iudicare de populis possum, aut tempora temporibus conferre, dicam libere, vix gentem in Europa esse, quæ ad veterum Romanorum gloriam propius, quam Brandenburgica, accedat. Romani ex aliis pœne multis magnisque virtutibus, quibus excelluerunt, imprimis fortitudinem ac bellandi peritiam cum humanitatis studiis & artium disciplinis tanto vinculo coniunxerunt, vt nemo in gente illa vel mediocriter clarus fuerit, si C. Marius, ciuiliis belli facem, exceperimus, quin vtroque præstare studio sibi curæ cordique

dique haberet. Vtriusque etiam fructus nobilissimos amplissimosque perceperunt. Nam ut Martis alumni orbem terrarum subegerunt; ut artium litterarumque cultores, quem deuicerant orbem, siue amplissimas prouincias, in potestate, citra motum rebellionis, tenuerunt, id quod prudentiæ, ex litterarum studiis enatæ, tribuendum est, quia excellentibus ingeniis sæpius defuit ars, qua victos regerent, quam qua hostes superarent. Victoriæ cum aliis gentibus communes habuere: doctrinam autem, cum bellica laude coniunctam, ita propriam possiderunt, ut nulla gens ab rerum conditu in orbe esset, quæ utriusque ex æquo gloriam maiorem, quam Romana, consequuta memoretur. Quod commercium præstantissimarum virtutum religione confirmauerunt, vno delubro & Herculis & Musarum sacra adeo arctissime complexi, ut, qui Miranda veteris Romæ scripsit Iustus Lipsius, nihil opere suo prodiderit, quod in admirationem æque rapiat, quam diuersissimi ingenii Deorum in vno templo consociatio. Fuluius Nobilior, Aetolorum victor, qui Antiochum magnum contra Romanos concitauerat; quum Ambraciam cepisset, mirandæ artis Musarum simulacra, Græcis ablata, in urbem transuexit, & tertio post anno Censor in æde locauit, quam ex multa censoria exstruxerat, illaq; inusitato nomine ac honore dedicauit HERCVLI MVSARVM. Ignoscant mihi Romani, quod gloriâ illis præreptâ nostræ Fridericianæ vindicatû eam. Heic, heic est templû Herculis Musarû, hoc est

eiusmodi bonarum artium & omnis liberalioris disciplinæ sacrarium, quod propter potentissimum Conditoris sui præsidium vere HERCVLEVM appellari debet, quia fortissimus Heros & Dominus noster ea orbi Christiano contra immanissimos hostes adhuc præstitit, & hodieque præstat, ut fabulosis poëtarum carminibus Herculi, terrarum liberatori, vix maiora contribui potuerint. Idem autem, tanquam Romana proles esset, sic vna cum belli studiis, humanitatis & optimarum artium disciplinas fouet, tuetur, conseruat, ut verè HERCVLEMVS ARVM appellare possimus, atque adeo etiam omnes debeamus: quippe æquali pœne numero tot robustissimos exercitus alit, quot Academias habet: & Aula ipsius æque viris doctrina & rerum vsu illustribus, quam fortissimis belli ducibus in tantum abundat, ut ei parem in Europa his temporibus inueniri qui dubitet, nihil quod reprehendendum sit, committere videatur. O dulce commercium vtriusque militiæ, Martis atque Apollinis! O suauem armorum & litterarum concordiam! Hæc admiranda societas fecit, ut vetus Roma inuicta esset, quia quam diu vtrumque studium Romani excoluerunt, florentissimam tutissimamque rempublicam habuere, ut inde mihi non vano augurio diuinare posse videar, quemadmodum Brandenburgica Electoralis Domus æque litterarum & armorum studiis deditissima est, ut nec Europa eius similem ostentare possit; Ita impofterum quoque, uti nunc est, feli-

feliciſſimam illam firmiſſimamque ſemper fore, quia ſic vtriuſque rei diſciplina inſtituta eſt, vt non facile metuendum ſit, ne alterutra minuat^r aut detrimentum aliquando capiat. Vidimus modo, vidimus ſereniſſimum & exporrec^tum vultum clementiſſimi Academiae PATRIS: audiui^mus auguſtam & mai^eſtatis plenam illius vo^cem, qua fidem nobis, qua induſtriam, qua concordiam præcepit & diligent^{iſſ}ime commendauit: adſpeximus & admirati ſumus incredibilem ſplendorem, regiam pompam, Attalicos ſumtus: & nunc ingentia etiam beneficia atque priuilegia cognoui^mus, quibus potentiſſimus ELECTOR has Muſas ſuas tam ipſe dotauit, quam ab inuictiſſimo LEOPOLDO, Romanorum Imperatore auguſtiſſimo, dotari ornarique curauit: & ne quid deſit honoris & exim^{iæ} auctoritatis, Sereniſſimum Filium ſuum, FRIDERICVM WILHELMVM, in ſpem Electoratus & tot prouinciarum genitum, RECTOREM Academiae MAGNIFICENTIſſimvm præfecit: quæ ſingula indubitato argumento ſunt, quanta cura, quanto adfectu indulgentiſſimus PATRIAE PATER hanc filiam ſuam FRIDERICIANAM complectatur: etiam ſignum nobis ad bene ſperandum tollunt, non longe abſuturum eſſe, vt pluribus in dies a clementia illius beneficiis adficiamur. Quibuſcunque intereſſe celebritati illi licuit, peregrinis, indigenis; aut qui ab aliis vel voce vel litteris id traditum perceperunt; ad ynum omnes laudant,

laudant, prædicant, in cœlum ferunt incomparabilem tanti principis virtutem, clementiam, beneficentiam, inusitatumque favorem erga litterarum studia ac incredibilem amorem erga hanc suam Fridericianam. Iudicate nunc quæso, Auditores, quid nos Academicos deceat, quorum propria sunt, quæ ceteri mirantur, beneficia: & plura ab eodem munificentissimo Conditore expectare in posterum iubemur. Hæc sane qui non maximi æstimat, næ is bona nostri sæculi non intelligit, indignus etiam, qui hac felicitate temporum & reipublicæ cum aliis melioribus fruatur. Præveniunt nos peregrini, extranei, ac doctissimus quisque Belgarum tantæ munificentiae gratias agunt, & hunc in Musas favorem in cœlum laudibus tollunt, epistolis, carminibus, & scriptis adlocutionibus prædicant, ad quos inde nihil amplius redundat, quam ad communem statum rei litterariæ. Quid ergo nunc nostri putatis officii esse, ut dignas gratias liberalissimo MVSAGETAE nostro agamus? Plinius Traiano gratias egit: egit & Gratiano Ausonius, sed uterque aliud egit, quam nobis agendum est in præsentia, quum de aliis potius virtutibus (de quibus neque nos tacemus) quam de litterarum instauratione, dicendum illis fuerat: aut si de litterarum etiam studiis, id breviter tantummodo & tanquam transeuntibus attigerunt. Quod dum pluribus verbis mihi faciendum restat, hæreo, obstupesco, nec verba quibus explicem, quæ mente omnes tenemus,

repe-

reperio: nisi aliquid dixisse me putabitis, si quod optimo cuique Romanorum Principum adclatum fuit, nostro beneficentissimo ELECTORI adclamauro. Vulcatius Gallicanus, Ælius Lampridius, & Iulius Capitolinus auctores sunt, Romanum Senatum, aliquando etiam alios, Marci Antonini, Alexandri Seueri, Gordiani maioris clementiam non aliis verbis, quam his paucis, religiose prosequutos esse, DILTE SERVENT Antoinne; DILTE SERVENT Alexander; DILTE Gordiane SERVENT; & quos alios his dignos vocibus ac gratulationibus habuere. Tanta mihi fiducia bonitatis tuæ est, clementissime ELECTOR, vt obligatione officii, quod hoc die obo, me exsolui posse credam, si eadem breuitate, qua Romani vsi sunt, TE in præsentia appellem, iisdemque verbis votorum summam comprehendere tentem, & eadem adclamatione omnes, qui heic præsentés sunt, tum officii sui, quo TIBI deuincti sunt, tum spei, quam de TE omnes habent, gratulabundus admoneam. Dicimus omnes vno animo, concordi voce, pari pietate: aut si non omnes dicunt, animo tamen cogitant, quod ego dicam: DEVS TE SERVET FRIDERICE III; DEVS TE SERVET PRINCEPS OPTIME: TVA SALVS NOSTRA SALVS: TVA VITA CONSERVATIO NOSTRA: TVA VIRTVS NOSTRVM EST PRAESIDIVM. DET TIBI AETATEM

TEM DEVS, QVAM MERERIS:
SERVET TIBI ANIMVM, QVEM
IPSE DEDIT, VT TANTO MA-
IOR SIT LITTERARVM GLORIA,
QVANTO AVGVSTIOR ES IMPE-
RII TVI FELICITATE.

Ibit in sæcula, fuisse Principem, qui quum
bellicæ rei gloria potuisset maximus esse, hanc
nullam aut leuem existimauerit, nisi etiam parem
laudem ex litterarum studiis, in maius meliusque
prouectis, consequutus esset: nisi titulis suis splen-
didissimis adiecisset etiam nomen MVSAGE-
TAE, quod Herculis statuae, lyram & plectrum
tenentis, Romæ subscriptum esse nouimus. Ve-
niam peto, Auditores, quod vota interrumpam.
Lætitia me adfectus turbat, vt præpostere omnia
agam, nec ordinis legem, quam ipse constitueram,
obseruem. Dico enim, vt aliud ex alio occurrit.
Musarum Herculis, de quo dixi, reminiscor: non
autem causam, cur diuersa Numina composuerint
Romani, memini me dixisse. Dicat pro me Eu-
menius, in Galliis sub Herculeo Augusto & Cæ-
sare Constantio Rhetoricæ doctor clarissimus, id
factum ab Romanis fuisse ideo, QVIA MV-
TVIS OPIBVS ET PRAEMIIS IV-
VARI ORNARIQVE DEBERENT
MVSARVM QVIES DEFENSIONE
HERCVLIS ET VIRTVS HERCV-
LIS VOCE MVSARVM. O Elector po-
tentissime! defensionem tuam experti sumus &
quo;

quotidie experimur; eandemque perpetuam nobis fore pro summa benignitate tua speramus. Quod alterum est, nunquam Musarum vox de laudibus tuis conticescet; sed tuas res maximas domi forisque, pace ac bello gestas, & in posterum, Deo iuvante, gerendas, æternitati, qua dignæ sunt, commendabit, ut ista comitem æui sui semper tuam gloriam trahat. Hoc votum, hæ preces nostræ sunt, ut incolumitati tuæ accedat perpetuitas. Tenuēs quidem Musæ nostræ & vix cunabula egressæ sunt: sed tamen pro officio, quod obeunt, & pro obsequio, quod debent, ad gloriam tuam augendam prædicandamque felicitatem, aliquid adferent. Seis, Domine, pro diuina intelligentia tua, ubi vera Principis, ubi sempiterna sit gloria, in quam nihil fortunæ, nihil senectutis temporum liceat, quæ vetustate magis florescat. Non verendum mihi est, in sapientiam tuam intuenti, ne ardgantior vox mea videatur, si dixerō, quod non ignoras, litteras omnium fundamenta virtutum esse, quæ quum ætate tenera in consuetudinem venerunt, omnia deinceps officia vitæ, & ipsa, quæ diuersissima videntur, militiæ atque castrorum munia conualescunt. His quum sedem novam tribuere nouisque dotare ornamentis benignissime dignatus sis; necesse est, perpetua TIBI ex eo gloria oriatur, magnisque in dies auctibus per terras se dispargat, ut nullis illa spatiis, nisi quibus cælum terminatur, finiri possit, & quamdiu homines erunt, FRIDERICIANÆ CONDITOR

DITOR ATQVE SERVATOR omni-
um eruditorum ore atque animo celebretur. Omni-
no enim ingens illud beneficium tuum est, & ma-
gno Principe dignum, eiectas exfulantesque Musas
ad Rempublicam reuocare, nouum iis domicilium
aperire, & quæalibi extincta erant litterarum
studia in suis finibus suscitare, eademque suæ inte-
gritati ac nitore restituere. Crede nobis, CLE-
MENTISSIME DOMINE, non hæc bre-
uis prædicatio TE, sed honor æternus annalium
colet, TIBI gratias aget, nec vlla tam ingrata
erit posteritas, vt diuinum factum tuum non
perpetuo laudet: nulli bonæ mentis alumni erunt,
& liberalium artium æstimatores, qui non grata
mente se TIBI debere confiteantur: nec FRI-
DERICIANAE appellatio sine TE postero-
rum memoriæ recurret. Sunt in honore ho-
minum & in honore famæ magna nomina, ex obli-
uionis tenebris Musarum studio extracta, quo-
rum id munus consuetudoque semper fuit, vt
cultores suos & dignitatis amplificatores æterni-
tati consecrent, & gloriam illorum immortalis cu-
ra & custodia tueantur. Omnia bene sapienter-
que facta obsecrat ignoratio, nisi memoriam illo-
rum sua voce suisque Musæ litteris conseruent:
quanto maiori fide hoc factum tuum, quo ipsas
ornasti, custodituras esse existimas, quæ tantum
liberalitati tuæ debere se profitentur, vt cui plus
debere sese intelligant, inter ætatis nostræ Prin-
cipes certe inueniant neminem. Musæ immor-
tales

tales sunt, & in doctorum hominum voce, in libris ac ingenii monumentis perpetuo viuunt, & statoribus suis ac conseruatoribus perennitatem famæ conciliant. Hæ & TIBI & MAGNO NOMINI TVO laudis æternitatem spondent, vt quanto posteritas serior exsurget, tanto maius cum annis tua gloria incrementum capiat. Vidisti modo, quum Academiam dedicares, oppletas vndique huius vrbs vias, angustumque tramitem relictum tibi; vidisti referta tecta & pondere suo, hoc est spectantium multitudine, laborantia, qui omnes in gloriam tuam incredibiliter intenti paratique erant: sed vnus ætatis homines, & circumiacentis tantum regionis, non amplissimis finibus circumscriptæ, vidisti. Quantus ergo cumulus accedet gloriæ tuæ, quum vniuersus orbis, in quantum litteris excultus est; & omnium sæculorum, quæ sequentur, eruditi homines tuum factum in ore ferent, & æternitati, quam meretur, insinuabunt? Vides itaque, GLORIOSE PRINCEPS, neque numerum illorum, neque finem etiam futurum esse, qui tuam erga Musas voluntatem in summis laudibus ponant, & Academicæ instaurationem æternis vocibus atque litteris extollant. Magna est gloria tua, quam ex belli victoriis habes: magna etiam, quam ex aliis, quæ struis, operibus habes: sed tamen eam horum naturam atque indolem esse non ignoras, vt aliquid sibi fortuna inde, aliquid etiam tempus & longa dies vindicet. Quam autem ex litterarum stu-

diis, in melius auspicio tuo productis, consequutus laudem es, ita proprie atque constanter ac sine socio tua est, ut neque tempori, cuncta cetera consumenti, illa cedat; neque fortunæ, rerum imperiosæ dominæ, quidquam de suo iure concedat. Quare gaude tuo tam excellenti bono: & frui eum natura tua, tum laude virtutibus tuis parta, ex qua maximus fructus iucunditasque est sapienti. Sis felix, **OPTIME PRINCEPS**, sis Musis tuis, uti es, semper propitius, quæ in gloriam tuam in singulos dies succrescunt. Sis felix, **MAGNANIME PRINCEPS**, in bello pro patriæ libertate suscepto, ut quoties cum hoste congressus fuerit exercitus tuus, superior discedens, triumphalia ornamenta ferat, & tuam gloriam victoriis identidem auctiorem cumulationemque efficiat. Sis felix Imperio Romano, felix provinciis Brandenburgicis, felix in pacis & belli negotiis, ut semper læteris felicitate tua, & Tecum lætentur omnes tui, qui fide, qui obsequio, qui cultu **TIBI** obstricti sunt. Antea verba deficiebant, Auditores, quum gratias augusto Academiæ **PATRI** acturus essem: nunc quoque me deficiunt, quibus vota, pro eiusdem salute animo concepta, rite pleniusque nuncupemus. Quemadmodum vero non tam adorantium verbis, quam innocentia Deus oblectatur, isque gravior esse censetur, qui puram mentem, quam qui carmen meditarum, sacra iis infert: ita celestis indoles **ELECTORIS** nostri sperare iubet, si vita
&

& moribus & obsequio nos tales geramus, quales ille saluberrimis sanctionibus voluit esse, &, ut simus, beneficiis ac ornamentis inuitat; nos non ingratos erga PRINCIPEM videri, nec immemores acceptorum censerī posse. Hoc enim gratiarum actiones agant, meminerintque, sic maxime Principem laudari, si quorum est gratias agere, illius voluntati obsecundent; & strenue perficiant, quod is fieri & institutis & impensis suis voluit. Quod si hæc optima gratiarum actio est, quod nemo fortasse dubitat; agite quæso, Patres, & ciues Academiæ, quisque ad id incumbite, ut elementissimus PATRIAE pater intelligat, nos memores beneficiorum esse, quia non immemores voluntatis simus, quam ille tam sanctis significationibus declarauit. Eadem ratio in votis, quæ facienda sunt, obseruetur, ut adfectu magis atque pietate, quam verbis ambiciosi concipiantur, & eos mores præ nobis feramus, ut TANTI PRINCIPIS beneficentia non indigni videamur. Igitur sine adfectione solemnem vocem atque formulam, quam supra dixi, sub finem solemnitatis nostræ repetamus, quia simplex & cuncta complexum vnum omnium votum est SALVS PRINCIPIS. In hanc preces nostræ tendunt: hac diuinitus impetrata, omnia consequuti nobis videmur. DEVS igitur, omnes dicimus, SERVET TE, FRIDERICE OPTIME, PRINCEPS SAPIENTISSIME: DEVS TE SERVET MVSA-

RVM PATER INDVLGENTISSI-
ME: SERVET TE ET SERENISSI-
MAM VXOREM TVAM ELECTRI-
CEM, DOMINAM NOSTRAM CLE-
MENTISSIMAM: SERVET SERE-
NISSIMVM IVVENTVTIS PRIN-
CIPEM, ACADEMIAE HVIVS RE-
CTOREM MAGNIFICENTISSI-
MVM, ET ALTERAM SOBOLEM
CELSISSIMAM, IVXTA CVM SE-
RENISSIMO FRATRE GVBERNA-
TORE DVCATVS MAGDEBVRGI-
CI, ET CETERIS FRATRIBVS AE-
QVE SERENISSIMIS MARCHIO-
NIBVS BRANDENBVRGICIS; SER-
VET TVAM AVGVSTAM DOMVM
ET FELICITATEM EIVS CON-
SERVET.

Sic stante, florente incolumitate tua stabit flo-
rebitque salus ciuium tuorum, & miris auctibus
incrementum ex te capiet, ac fructus feret vniuer-
sæ reipublicæ cum sacræ tum ciuili, tum etiam
litterariæ quouis tempore salubres ac vtilis. Stante
& florente salute tua, salus florebit tuæ Academiae,
auspiciis nunc tuis constitutæ, & de augusto Nomi-
ne tuo, ad augendum splendorem illius, felici omine
nomen suum auspicatissimum sortitæ. Repeto ite-
rum iterumque læticia incitante, pietate iubente,
priscam illam & nunquam non fructiferam vocem,
DEVS TE SERVET, FRIDERICE,

ut Fridericiana tua seruetur, & augeſcat, & ex
tua firmitudine ſtabilitatem ſuam accipiat, quia Te
ſaluo nihil deſperamus, quod incremento illius
vel ornamentis addi poſſe videatur, aut in maius
altiusque promoueri. Hæc PRINCEPS opti-
me, CONDITOR ET CONSERVA-
TOR munificentiffime, hæc inquam noſtra omni-
um fit actio gratiarum, pro ſalute tua conceptis
verbis vota facere, & tuam ſalutem, tuam
felicitatem æterno, cui credis, & a nobis es cre-
ditus, Numini commendare. Tu vero, æterne
Deus, his votis noſtris adue, ut lætetur tuus
FRIDERICVS, & quam honori ille tuo
dedicauit, floreat ſemper Academia
FRIDERICIANA.



ORATIO II.

SERENISSIMO POTENTISSIMO-
QUE PRINCIPI AC DOMI-
NO, DOMINO

FRIDERICO,
REGI BORUSSIAE, MAR-
CHIONI BRANDENBURGICO
AC S. ROM. IMPERII ARCHI-
CAMERARIO, CETERA.

IPSO REGALIS AVSPICII
ET SACRAE VNCTIO-

NIS DIE,

HOC EST

XVIII. IANVARII clō lxxl.

Habita.

Maiestas Regia nobis, Auditores, ad-
oranda est. MAIESTAS. o
quanta lux! REGIA. quam sua-
vis vox! nam illa fulgore coruscat,
qui

qui nostra omnia splendidiora reddit, omnia maiora, digniora facit: R E G I S nomen naturam indolemque beneficam sonat, qualem sidera benigniora præ se ferunt, quæ terram lumine ac contactu fouent, agris vbertatem præbent, quæ gignuntur iuuant, genitis incrementum dant, vitamque omnium tuentur & conseruant. Quos enim maiores in cælo ignes suspicimus, minorum siderum quasi Reges esse, & tam lumen illorum augere, quam illustrare terrestria, quis negat nisi cæli terræque imperitus, & indignus vt illius luce, huius opibus, cælesti munere productis, fruatur? Hæc maiora sidera & benefica lumina Reges in terris imitantur, vt in excelsa loco, quasi in cælo constituti, humano generi opem ferant, & quod æquum, quod bonum est, omnibus impertiant. Cæleste itaque imitamentum & magnitudinem virtutis ad summum prouectæ audimus, quum lætissimo nuntio ex Borussia adfertur, hodie (o faustam lucem!) serenissimum potentissimumque Principem ac Dominum, Dominum FRIDERICVM, Marchionem Brandenburgicum & S. Rom. Imperii Archicamerarium ac Electorem, Patrem patriæ indulgentissimum, nostrumque mitissimum Dominum, benignis fatis & propitio cælo REGEM BORVSSORVM, dignissimo tanta Maiestate apparatu, renuntiari, summæ potestatis insignibus splendidissimis, corona, sceptro, purpura condecorari, & ea omnia diligentissime fieri, quæ maximam REGI aucto-

ritatem, hoc est MAIESTATEM dant, & spem maioris roboris, & firmioris præsidii, auctiorisque benignitatis ac munificentiae non Borussia modo, sed cunctis ditioni Brandenburgicae subiectis, etiam vicinis & sociis populis adferunt. Quos ergo nunc plausus, splendidissimi Auditores, in Borussia efferri putatis? quas edi voces & faustas acclamationes? quæ vota fieri pro REGIS salute, pro REGNI prosperitate? quas audiri congratulationes? Non capit Borussia amplis finibus suis bona verba omnia, signa omnia lætitiæ: in nostras percussu regiones adferuntur, & heic, heic quoque læta omnia, quæ ibi proclamantur, exaudire mihi videor, quæ repetita voce hanc civitatem, hanc Academiam, & hoc ipsum, quod complemus, auditorium videntur personare. Iustæ lætandi gratulandique causæ Borussia sunt quotquot Regni felicissimi formam ac nomen accipiunt: iustæ quoque Brandenburgicis cunctis regionibus, quæ decus inde maius, quæ præsidium validius, quæ commoda largiora abundantioraque sperant & exspectant: iustiores autem præ ceteris huic nostræ sunt FRIDERICIANAE. Qua enim lætitia nunc sensus suos exprimat? quibus se plausibus attollat, ut PATRI & SERVATORI suo gratuletur, & pro salute EIVS in feros annos proroganda pietatis officium faciat? Liberi gaudent & exultant, quum parentibus honores novi accrescunt, idque tam pietatis officio faciunt, quam spe optimo-

mioris fortunæ, qua inde sibi quoque prospiciatur.

Quod igitur religio officiorum iubet, quod subiectio multo demississima gestit, ad quod quisque obsequio suo ac munere incitatur; id hac luce, spectatissimi Auditores, deuote & alacriter prosequamur, nec ulli populo aut ciuitati concedamus, vt huius diei officio pietateque nos anteuertat, quia multæ nos maximi momenti rationes circumstant, quæ non tam adliciunt, quam premunt, vrgent, vt ceteros omnes hoc festo die si non voce, tamen mentis pia & fausta meditatione, & votorum sinceritate superemus. Glorietur incluta Regiomontanorum Academia, quod instituta sit a primo D V C E Borussiae, ALBERTO Brandenburgico: at nostra est condita ab REGE primo ex eadem DOMO celsissima. Illa spectatrix huius diei magnificentiae est: nos, quod oculis non potest subiici, locorum excludente distantia; animo representemus, & mentis ac vocis officio agamus omnia, quæ praesentes illi concipiunt, quæ acclamant, & gratulantur. Quas partes quum mihi a magnifico PRORECTORE & omni Senatu Academico impostas videam, ad agendas illas, quantum possum, eo promptius accedo, quo ipse potentissimo REGI, meo clementissimo DOMINO, sum deuotior tum pietatis reuerentia, tum animi subiectione ac obsequio.

Maieſtatem Regis FRIDERICI celebra-
 turus, a diuinis vt auſpiciis incipiam, res ipſa &
 ſanctitas religionis admonet. Deum eſſe qui Re-
 ges mortalibus imponit, qui regna conſtituit, &
 firmat, & in tutelam humani generis conſeruat;
 eodem veraciſſimo, qui hæc conſtituit, auctore eſt
 notiſſimum. Quum autem ipſe ſe toties Regem,
 & cæli ac terræ Regem appellat, quid aliud quam
 poteſtatem ſummam, cum mirifica clementia con-
 iunctam, ſignificat? Id quod æternum exem-
 plum eſt, ad cuius imitationem, quos Deus Re-
 ges in ſummo, quod mortales conſcendant, faſti-
 gio locauit, componi vult & conformari, vt o-
 mnibus poteſtate, qua pollent, præſidio ſint, &
 fortunis, quibus inſtructi, quam plurimis benefa-
 ciant. Faceſſant igitur, quibus exoſum nomen
 REGIS eſt, quaſi publicæ libertati inimicum:
 quum nihil per ſe iniquum ſit, quod Deus ſibi
 vindicat, & eum hominibus communicatum,
 Deum tamen auctorem habet: vt indolem magis
 beneficam Regum, & libertatis ſeruatricem, quam
 quidquam formidandum bonis, aut publicæ reâ
 aduerſarium præ ſe ferat. Sint gentium quarum-
 dam iniuſti domini, ſint impotentes alibi tyran-
 ni; REGIS autem nomen ſacroſanctum eſt &
 venerabile, beneficentiæ non minus, quam maie-
 ſtatis ſignum, ad diuinum exemplar & ideam
 conformatum, quod minime pertimeſcant homi-
 nes, ſed bonitate eius, cui impoſitum a Deo eſt,
 perpetuo lætentur. Quod quum ita ſit, ex ipſo
 nomine

nomine futurum præuidemus, ut ampliora sint in posterum, quibus nos REX benignissimus adficiet, quippe natus ad benefaciendum, REGIO nunc nomine, quo diuinitus ornatur, ad præclare merendum fit multo excitatior. Tam mirifice bonus in suos omnes fuit, ut magis esse posse credibile non videretur: attamen nunc cumulus ad EIVS beneficentiam accedet, quia fastigium, quo stetit ille, nunc altius in summum rerum humanarum eleuatum est: & splendor, quo decoratus fuit, serenior iam luce refulget, quam DIADEMA radiatum & nomen REGIS augustissimum circumfundunt.

Exsulta ergo, o Fridericiana Academia! lætare REGIS tui augustiore habitu & forma: de REGALI munificentia tibi gratulare. PRINCEPS magnus & præpotens ELECTOR ingenti te sumtu condidit; idem iam REX creatus te REGIO more, ampliatis cumulatisque beneficiis, conseruabit. Quod si non minus iucundi sunt illi dies, quibus conseruamur, quam quibus nascimur; non minori religione colendus est dies DIADEMATIS sumti, quam ille prior natalitius, nam ex hoc initium Academia habet & per septem annos liberalem conseruationem: ex illo habitura est, quo liberalius in posterum maioreque & Regali munificentia ornetur. Natalis, kalendæ Iuliæ, aut, correctis fastis, v idus Iulias, utique nobis sacrosanctus est, eritque in perpetuum

tuum: nec vero minus hic, quasi natalis alter, a nobis est colendus, quo, qui priori die vitam accepit, & cæli lucem hanc adspexit, REGIS nomen & DIADEMA accipit, idque etiam cælestis nutu providentiæ. Mos fuit Romanorum Principum, quotannis duos natales celebrare, vnum quo nati erant & in lucem editi; alterum quo Orbis imperium susceperunt, quem non minus ac istum natalem appellaverunt, quod illo die in clariorem lucem reipublicæ producti fuerant. De Hadriano, Romano Imperatore, ix kalend. Februar. nato, Aelius Spartianus in Vita refert, tertio iduum Augusti die Natalem Imperii instituisse celebrandum, quum biduo ante, hoc est, quinduo iduum Augusti æque adoptionis natalem celebrari idem iussisset. Quem ergo IMPERII NATALEM dixit, eius diei religionem C. Plinius Secundus reuelavit, quum ex Pontica, quam regebat, provincia ita Traiano Imperatori scripsit: *Diem, in quem tutela generis humani felicissima successione translata est, debita religione celebravimus, commendantes Diis, imperii tui auctoribus, & vota publica & gaudia.* Et alio anno ad eundem Plinius: *Diem, Domine, quo servasti imperium dum suscipis, quanta mereris lætitia celebravimus, precati Deos, ut te generi humano, cuius tutela & securitas saluti tue innisa est, incolumem florentemque præstarent.* Etiam Traianus, respondens Plinio, DIEM IMPERII SVI vocat, eiusque publica repetitaque celebratione

ma-

magnopere lætatur. Quid obstat ergo, Auditores summi & ornatissimi, quo minus Romanum morem imitemur, & hunc XVIII Ianuarii, seu xv kalendas Februarias, natalem alterum serenissimi clementissimique nostri REGIS appellemus, eodemque ritu, & religione, quo adhuc coluimus natalem vitæ, hunc quoque REGNI primum diem celebremus? Quod si ita est, ut nemo dubitat, & adhæc illustre exemplum Romanorum probat; non sollicitè nobis dispiciendum est, quibus cærimoniis, quoue ritu hunc festum REGNI DIEM peragamus, quia natalis vitæ, adhuc quotannis celebratus, præclaro documento est, quo & hicce ritu & qua religione a nobis sit colendus & celebrandus. Quod antequam ingrediamur, de ipso REGNO, quod hodie auspiciis factis inauguratur, præfari aliquid non erit alienum.

Borussorum illud est, antiquæ gentis, nec Romanis olim incognitæ. Cornelius Tacitus, cordatissimus auctor, qui dextero litore maris Suevici, hoc est Codani sinus, adluantur, AESTIOS appellat, Germanicæ originis gentem, quamvis ultra Germaniæ limitem, qui Vistula amnis erat, in Sarmatarum solo positam. Ex succini proveni-
tu, quem Aestiis suis dat Tacitus, ita est ad comprobandum facile, in Borussia illos litore antiquitus sedem habuisse, ut dubitare de eo non liceat. Magno enim consensu auctores veteres confirmant, illud glesii siue succini nusquam copiosius

inueniri, quam in litoribus, quæ ultra Vistulam in finibus sunt Sarmatarum. Idem Cornelius huic Aestiorum genti Sueuorum ritus & habitum contribuit; at linguam similiorem Britannicæ. Laudat quoque colendi agri sollertiam maiorem, quam pro indole Germanorum, ut ab Rheno aduenisse videantur, quod eandem industriam in Vbiis, Rheni accolis, C. Cæsar antea laudauerat: id quod etiam ad linguam, quam Tacitus notauit, aliquanto propius accedit. Alii ex Scandinauia, magna illa septemtrionis peninsula, quam vaginam gentium Iornandes dixit, egressos Aestios, tanquam Gothicam gentem, & litora illa occupasse referunt. Neutris fidem pro certo, ut solet in obscura antiquitate, habemus: industriam potius, quam laudat Tacitus, miramur, quæ prima causa est felicitatis. Idem Iornandes, siue Iordanes, Rauennensis episcopus, & ipse Gothus origine, PACATVM HOMINVM GENVS hos Aestios non sine singulari laude dixit. Pacis studium virtutis fertilitatem probat, quæ largius in otio, quam inter arma & pugnas, prouenit. Indolem quoque discendis litteris idoneam, utrumque Aestiorum studium ostendit, quæ postea clarissime eluxit, quum fatalis barbariei squalor, beatoris sæculi exortu, abstersus in Europa, & litterarum studia etiam in iis gentibus, quæ numquam illa habuerant, de nouo instituta propagataque felici auspicio fuerunt. Longo tempore has oras dictos populos tenuisse, idem Iornandes & Aurelius

relius

relius Cassiodorus auctores sunt, qua tempestate ad Theodericum, Gothorum in Italia Regem, legatos, quos Rex benigne exceperit, misisse memorantur. Quod vero solemne illis temporibus fuit, ut migrationibus & coloniis commiscerentur gentes, his Aestiis & alios accessisse, & cum illis coaluisse tandem, non est quod dubitemus, quum, in urbibus praesertim, coloniarum, ex Germania interiore deductarum, abunde vestigia, nec illa obscura, appareant. Tum liberam & sui iuris fuisse gentem, ~~ad fidem prouum & probabile videtur~~: quo statu & eo tempore fuisse intelligimus, quum S. Mariae Equites Teutonici, ex Palaestina eiekti, Borussia occuparunt, ut reliquias Deorum cultus, in agris passim adhuc superstites, Christianorum sacris in locum subrogatis, extinguere atque delerent. Bene res Equitibus successit, qui regionem longo tractu temporum possederunt, antequam bello a Poloniae Rege infestarentur, quod varia fortuna gestum, tandem ita sacros milites concussit, omni auxilio destitutos, ut Magister illorum ALBERTVS Brandenburgicus, FRIDERICI Franconici, qui frater IOHANNIS Electoris fuit, filius, cum Rege pacisceretur, eique parte, quam armis subegerat, relicta, maiorem sibi & posteris suis, sub Ducatus forma, qui Poloniae clientelae esset, exuta simul tam Ordinis quam Pontificia religione, conseruaret. Qui quod doctissimus Princeps erat, ut litterarum studia in maius vna & melius proferret,

ret, in Regio Borusforum Monte Academiam, quæ adhuc est florentissima, constituit. Ab huius filio ALBERTO FRIDERICO Borussia hereditario iure ad serenissimi REGIS nostri Proauum IOANNEM SIGISMUNDUM peruenit, sed nondum ad formam Regni apparatus, quam demum nostri REGIS Pater FRIDERICVS WILHELMVS, magnus ille virtute ac felicitate Princeps, soluto nexu clientelæ, consentiente Rege & Republica Polonorum, tamquam victoriæ præmium adquisiuit. Sic via ad Regnum patefacta erat, necdum vero Regni nomen & insignia admissa, quæ in hoc tempus, quo amior Genti Brandenburgicæ Fortuna, compositis bellis quæ Europam afflixerant, referuauit. Pacato autem Christianorum orbe, felicissimus FILIVS SVCCESOR, DOMINVS noster clementissimus, quod dudum Domus incluta meruerat, & ad quod magnus Patrens aperuerat accessum, propitiis fati & cælo bene fauente suscepit, hodie in Regio Monte REX BORVSSORVM, quod felicissime vertat, augustis ritibus & fulgentissimis cærimoniis creatus.

Plaudite nunc Auditores: festo die bona verba dicite, grates persoluite immortalī Deo, qui Brandenburgicam DOMVM, abhinc nonaginta & retro annis magnam quidem, non autem pro magnitudine meritorum; tam amplis auxit prouinciis, & tot victoriis, & tantis felicitatibus ornavit,

ornauit, & in summum rerum verticem euexit, vt auspiciis diuinis nunc REGIAM dignitatem ac fastigium obtineat & tueatur. Et olim hanc eminentem gloriam Fortuna faulrix in MAIORIBVS prolulit. Quum mediocribus adhuc finibus res Brandenburgicæ conlenerentur; tamen hæc cella Gens PRINCIPES habuit, quibus Regna quoque propter virtutis magnitudinem ab exteris offerrentur: quemadmodum FRIDERICO II. glorioſæ memoriæ Electori, & Polonicum & Boiohemum oblata in annalibus memorantur, quæ ipſe vero propter graues cauſas temporum, quæ admodum turbulenta erant, magno animo recusauit. Faustum ergo ſemper huic Genti nomen FRIDERICORVM fuit, quia FRIDERICVS Primus Electoralem dignitatem in hanc Domum intulit: FRIDERICVS Secundus dignus Regnis habitus, quæ ei quoque offerebantur: Tertius FRIDERICVS & digniſſimus Regno habitus, & compos etiam nunc Regni Boruſſici factus eſt.

Reputate cum animis veſtris, quam ingens munus diuinæ bonitatis ſit, hanc inclutam Domum tantis auctibus vno ſæculo amplificatam, & in tantum elatam faſtigium eſſe, vt altius attolli nequeat. Sine exemplo hæc felicitas eſt, ab auorum memoria, & amplius, ad noſtram uſque ætatem. Atteri nonnumquam illuſtres familias, & fortuna, quam habuerant, excidere videmus: quæ vero tantis ſucceſſibus exaltata fuerit, & ad ſummum

sine offensa fortunæ tam breui tempore adducta, nec vidimus vllam, neque aliquot sæculorum memoria ex annalibus obseruamus. Cum nascentibus creditum felicitatem oriri; quæ vero neque seruetur, neque tam cito augetur, nisi magnis sit sustentata virtutibus. Frequenti consensu sapientes tradiderunt, Heroum virtutem a Deo esse, & fructum virtutis felicitatem: sine quo auctore & duce esse tanta illa, neque seruari possit diutius. Nec vero preces nihil ac publica vota adferunt. Bono Principi bene omnes precantur, pro salute eius vota faciunt, quibus benigne Deus adnuit, nec preces infructuosas esse sinit. Quod si cæli munus bonus Princeps est, vti omnino est; cælo etiam imputemus, quod felicissimi nostri FRIDERICI virtute, benignitate ac sapientia tam constanter adhuc frui licuerit. Quæ natalitiis diebus voto publico precabamur, vt salutem PRINCIPIS Deus, vt securitatem reipublicæ, vt temporum felicitatem successionē æquabili conseruet; ea audiit Deus, & dedit quæ precabamur, immo maiora dedit quam precati sumus, aut quisquam optare ausus fuit. Nihil imminutum fuit: omnia maiora, nitidiora, quam fuerant, videmus: nec non in dies maioris spes incrementi & novæ prosperitatis adfulget.

O ergo nimium dilecte Deo tuo REX FRIDERICE! nascentem TE ad opem humani generis bona & amica sidera iuuerunt. Dei
hoc

hoc opus est, qui mentem piam, indolem erectam, animum sapientem cum Regiis fortunis tribuit, unde felicitatis & omnium successuum exordium manavit. Amplexus es litterarum studia: hinc progressus felicitatis est Principum, quia litteræ fundamenta virtutum sunt, dum præcepta vivendi bene, & feliciter imperandi suppeditant: & quæ præcipiunt, exemplis maximis illustant, quibus docetur fieri posse quæ præcipiuntur. Discitur ibi sub illustribus magistris, quorum exempla litterarum monumentis commendantur, Regum videlicet, magnorum Principum, & Ducum bello ac victoriis clarissimorum. Quæ si ætate tenera in consuetudinem venerunt, deinceps omnia officia vitæ, omnes melioris fortunæ eventus, & imperandi prudentia, & ipsa, quæ diuersissima videntur, militiæ & castrorum munia, conualescant. Hinc est, REX, incredibilis TVA, quam Orbis miratur, sapientia, cuius semina Deus TIBI indidit, quæ litterarum studiis suscitata ad tantam, quam habes, maturitatem succreuerunt. Hinc pulcherrimi fructus ad rempublicam feruntur, & ut perpetuo ferantur & in posteros propagentur, non solum MAIORVM, sed TVIS maxime curis est effectum, qui tot ubique immenso sumtu alis & conseruas litterarum seminaria, nec contentus illis, quæ acceperas, novum in hac vrbe condidisti, TVAM FRIDERICIANAM, quam tam impense amas, & tantis ornas beneficiis, ut vel sola documentum

sapientiae TVAE terrarum orbi quam illustrissimum maximumque praestet. Sapientia magistra omnes aliae in TE virtutes ad summum sunt perductae, & quod summarum praeium est, ad felicitatis perpetuitatem. Hinc gloria TVA in immensum crevit, & excrefcit in dies latior, ut nec finibus aliis, quam caeli, possit terminari. Huius nunc aequae, ut omnium virtutum, amplissimos fructus capis, REGIS ornamenta & insignia, quae ingentium meritorum TE iam pridem praemia exspectarunt. Dignus etenim hac gloria eras, ut auri & gemmarum fulgor sacratum verticem TVVM claro orbe complecteretur, & hinc inde radios emicantes designaret, quibus sapientia TVA, cuius hi signum sunt, longe lateque per saeculorum memoriam dispergetur. Vulgo creditur, minus valida arma esse ubi litterarum studia plus solito floreat & crescant, quasi his animus emolliatur, ut robur inditum ac fortitudinem amittat. Secus se res habet, Auditores. Evalescit animus cultura litterarum, quia haec gignunt sapientiam, prudentiam alunt, consilia expediunt, nec minus bello quam pace res gerendas regunt, & ad felices eventus perducunt. Monitis suis profunt, exemplis praclaris incitant, & fortunae casibus, quos notauere, cautiores alios efficiunt. Romani, Graeci documento sunt, quorum felicitatem litterae an arma plus adiuvierint, ita dubium plerisque sapientum est, ut tamen, si quod sentiant proferendum sit, litteris plus

plus omnino tribuant. Sed quid antiquis exemplis utimur ad probandum de quo certatur? Vbi iam litteræ quam maxime coluntur, in Brandenburgicis putate regionibus; ibi quam plurima victoriarum monimenta sunt, quæ nemo dubitat ILLIVS sapientiæ tribuenda esse, cuius auspiciis geruntur bella: quo secus fieri non potest, quin litterarum quoque studia, quæ gignunt & nutriunt sapientiam, in laudum bellicarum societatem veniant.

Sed ad obsequium nostrum, illustres & amplissimi Auditores, reuertamur, ut faciamus quid quid diei huius religio nos admonet. Gaudia Plinius, & vota publica, & Traianum Diis suis commendatum memorabat. Gaudium vos omnes ore, vultuque & gestibus præferre video, cuius si vnquam iusta causa fuit, nunc certe omnium est iustissima. Ecquando nobis tanta lux & vniuersis Brandenburgicis exorta est? quando tantus nos splendor circumfulsit, ut post innumeras felicitates, quas a clementissimo PRINCIPE ELECTORE habuimus, nunc nouum decus accedat, nouus adfulgeat splendor, qui REGIAM clementiam, REGIAM tutelam & præsidium, & liberalitatem REGIAM pollicetur. Quis non exsultet gaudio, quum hæc videt, quum audit, quum cogitat? At quid de sensibus nostris in gaudium effusis, quod omnibus manifestum est, iam loquor? ipsæ inanimæ res & sensuum expertes lætari mihi videntur, & hi parietes, nostri

stris Musis a munifico ELECTORE dedicati, quasi gestiunt congratulari, & ab REGE suo ornamentum REGIVM & decus nouum atque maius expectare. Video alios apparatus huius diei magnificentia dignos, qui gaudium, quod nos publicum capit, non sinent leuiter pertransire, aut intra mentem cuiusque ac conscientiam contineri, sed plausu aerem feriente, sonitu ad cælum concrepante lætitiæ vere publicæ extollent, & extra mœnia longissime celerique proferent: vt quod in Heluii Pertinacis & Septimii Seueri, Principum Romanorum, nummis est, nostrum quoque facere & parietibus inscribere possimus, LAETITIAE TEMPORVM. Quæ quod sub sæculi auspiciū obtinunt, fausto omine & aliam inscriptionem, FELICITATI SAECVLI, memoriæ nostræ repræsentant, quæ vt vere sæcularis fiat felicitas, votis, precibus a Deo precamur, & quæ spes certa innisæque bonitati diuinæ est, etiam impetrabimus. Non enim ita latandum est, summi Auditores, vt non animum ad fontem lætitiæ, qui Deus est, aduertamus. Is votis in publica lætitiæ colatur, tam exsoluendis veteribus, quam nouis pro futuro tempore concipiendis. Exsoluntur vetera, quum ipsum, quod precati sumus, vel maius illo, consequuti, Deo, auctori bonorum, gratias agimus, & vt pergat benefacere, maiori pietate sollicitamus. Dixi supra, quantum cum semper, tum maxime a sæculo benignissimus Deus
exce-

excelsæ DOMVI Brandenburgicæ contulerit, quæ quod cuncta eximia, quod maxima & incomparabilia sunt, utique admonemur iis, ut grato animo & pia æstimatione tam ingentia Dei munera consideremus, quorum fructu vis innumerabilis hominum, etiam infimorum, sub tam iusto & tranquillo indulgentissimi PRINCIPIS imperio adhuc lætatur: quæ in malus nunc, accedente REGIA sublimitate, tamquam bonorum cumulo, quæ Deus dedit, extolluntur. De futuro autem vota gemina faciamus, sed arte inter se connexa, & pro salute REGIS ac ELECTORIS clementissimi, & pro Regni ac Prouinciæ in-columitate. Omnes promptos paratosque video, ut bene precentur REGI suo, ut salutem EIVS æterno Numini commendent, ut felicitatem publicam ab eodem petant, & sacris laudum se religionibus obstringant, quas Deo, votorum compotes facti, circumactis annis, reddituri sint. Romanorum nummis multis inscriptum in laurea videmus, VOTIS DECENNALIBVS: quippe decem annorum spatio imperium Principum diuidebant, & decennii felicitate potiti, vota soluebant decennalia; vna pro alteris decem annis, vicennalia nuncupantes: & annis, viginti exactis, tricennalia signauerunt. Maior nostra pietas est, Auditores, quam ut vouendo, bene precando intra decem annorum gradus singulos consistat; sed quod in votis summum est, saltu quasi vult contingere.

ac adsequi, & vnīs votis impetrare omnia. Itaque decennalia vota pro salute REGIS ita facimus, vt vicennalia simul, & tricennalia, & si quæ vltra sunt, comprehendamus, nec non interea annorum singulorum rationem habeamus.

Vide ergo, REX sacratissime, vide DOMINE multo clementissime, quanto studio quanta pietate salutē TVAE intenti simus. Audi bona verba, & lætare: audi pias voces, faustas acclamationes pro salute TVA, pro felicitate TVA, pro incolumitate TVORVM omnium in cælum certatim emissas, quæ efficiant necesse est quod volunt; & impetrent quod optant, quia robur diuinum inest precibus, quas tanta vis hominum in tam pia & iusta causa fundit. Nec enim quisquam in Regno TVO est, in cunctis TVIS, quam late patent, Prouinciis, quin idem nunc sentiat, idem loquatur, idemque a Deo pro salute TVA conceptis formulis precetur. Omnes alta voce clamamus, omnes ex animo precamur: Seruet TE Deus, REX felicissime, annos Deus TVOS augeat, consilia, actus fortunet, suum pace, bello exoptatum det. Seruet TE Deus, vt plurimos serues, omnibus benefacias, & quod proprium nostrarum precum est, litterarum studia, sicut facis, benignissime semper foveas & conserues, quo vberiores fructus ad rem publicam ferantur, & quod consequens est, sacrum NOMEN TVVM, vt mereris REX, consecretur æternitati. Seruet quoque Deus serenissi-

renissimam CONIVGEM, augustam REGINAM, & ipsam multo clementissimam DOMINAM nostram, vt REGIA illius indole ac suauitate perpetuo lateris. Seruet Deus & IVENTVTIS PRINCIPEM, Regni & Electoratus Heredem, DOMINVM itidem nostrum clementissimum, RECTOREM FRIDERICIANAE TVAE MAGNIFICENTISSIMVM, vt per ipsum aliquando & posterī felices sint, sicut TVO, REX, imperio salui nos præsentes sumus.

Deus quæ precamur audiat, & donis in TE
suis & in TVIS omnibus adiueat
perpetuitatem.



ORATIO III.

FRIDERICO III

MARCHIONI BRANDEN-
BURGICO, SACRI ROM. IMPE-
RII ARCHICAMERARIO ET ELE-
CTORI, CETERA.

DE NATALI XXXX

CALEND. IVL. clō Ibc xcvi

EXORTO,

Habita.

ITa Deus nos omnes amet, Auditores, vt claris-
simis documentis hodierno die intelligimus,
esse Numen, quod vota audiat, & nutu propi-
tio mortalibus concedat, quæ precibus illi &
supplicationibus, pietatis officio instimulante, cæ-
lesti consist benignitate, petierunt. Quæ enim
superiore anno, publicæ salutis causa, ex hoc loco
vota fecimus; eorum solutione nos damnatos
esse, lætabundi nunc omnes confitemur. Quid-
quid bonorum mortales possident, a Deo immor-
tali in ipsos profectum est, qui bonitatem suam
omnes patitur circumfluere, vt ab omnibus vene-
rationis fructum & laudes, quas debemus, acci-
piat. Longum foret per humanam vitam, audi-
tores, cursitare, & singulorum conscientiam testa-
ri,

ri, vt, quæ quisque diuinæ beneficentiæ debeat, vel periculis ereptus, vel cumulatus ingentibus bonis; grata & pia cogitatione in memoriã reuocet. Memor festæ huius solennitatis, intra eiusdem me limitem continco, nec quidquam adferendum in hunc illustrem confessum puto, quod non proprium huius diei sit, eiusque diuinam felicitatem clarioribus argumentis ante oculos proponat. Sunt hæ Calendæ Iuliæ, illa fausta lux & auspiciatissima, quæ ante triginta nouem annos propitio fato his terris donauit, quem instar benigni sideris, quotquot heic præsentem sumus, aut in prouinciis consentientes scimus, intuemur lætabundi, veneramur fiducia pleni, & gratæ mentis obsequio nos ei subiectissimos esse profitemur. Eadem dies natalem tertium Academiæ reducit, & quod iucundissimū nobis omnibus est, serenissimo Iuuentutis PRINCIPI & Electoratus HEREDI, augusti PARENTIS voluntate, tertili auspiciis, quod felicissime vertat, Academicos fasces præferri videt. Intra hos fines stet mea oratio; his lætandi & gratulandi officiis terminetur, si vere terminari potest, quod, quamuis in circulo suo persistat, amplissimum tamen ambitum habet, & in immensa prope spatia excursus suos facit. Si vel sola vora superioris temporis, quæ audiit Deus, apud animum proponamus, paternissimum campum ingrediemur, vnde haud facile nos expediemus, quod secunda illa & fructifera vsque adeo fuerunt, vt ne numerare quidem beneficia pos-

possimus, quibus Deus nos, nostris precibus excitatus, benignissime cumulauit. Quæ etsi multitudine sua laborant; vno tamen voto, quæ SALVS PRINCIPIS est, comprehendi posse omnia censemus, ne oratio, suo spatio circumscribenda, in longum ultra modulum excurrat. Dicam de VOTIS pro tam augusta salute soluendis, nuncupandisque, atque ex veteri ritu quemque nostrum sui officii, hoc die peragendi quamvis non selectis verbis, piis tamen & deuotis, admonebo. Vos autem, summi & splendidissimi auditores, fauete quæso, benigne auscultantes; & sequimini me, bonæ verba pro MAGNI PRINCIPIS salute, ex officii deuotione, religiosissima cura præitutum.

Prisci mortales, sapientissimi vtique & cordatissimi viri, magna religione celebrarunt illum diem, quo in lucem editi, aut seruari ex periculo erant, vt quisque inter familiares & amicos suos nihil diceret faceretque, quod fausto omine caret, nec futuri temporis prosperitatem lætiore quodam signo polliceretur. Id quod ex eo se mereri crediderunt, si recurrentium annorum, quibus se auctos intelligebant, gratam memoremque rationem habuissent. Hinc votorum nata religio, vt diis suis supplicarent, quo & in posterum illorum numine felices & incolumes esse liceret; quod si diuinitus impetrarent, non modo ad laudes & gratias agendas, sed ad opus sæpe votium faciendum, aut immolandam hostiam, & se & suos ob-

liga-

ligauerunt. Sunt varia votorum genera, quæ quisque priuata ratione ductus adsignat, & consequutus quod petierat, soluit rem votam, & promissorum religione se exuit. Vilis hæc & vulgaris vouendi ratio, nec ad nostrum, quod sequemur, institutum aut ritum pertinet. In antiquis nummis, Augusti præsertim & Hædriani, illustriora memorantur, VOTA nempe PVBLICA, hoc est pro imperii salute, aut eius, a quo salus erat omnium, ab senatu populoque concepta. Varia huius generis argumenta erant: Quum dubius bellorum exitus esset, victoriæ certioris spes vouendo sæpe præsumpta fuit, quemadmodum Samnitico bello M. Attilius cos. Ioui Statori templum: & Veienti, M. Furius Camillus; Gallico, Seruilius Ahala; Aetolico, M. Fuluius Nobilior ludos magnos eidem deo, tanquam præmia victoriæ, vouerunt. Traditum memoriæ est, eandem ob causam Iunoni Sispitæ, Marti victori, Fortunæ Primigeniæ, Fortunæ Equestri, sacras ædes a ducibus votas, & post victoriam magna religione dedicatas fuisse. Nec minus in publicis malis, in morbis & pestilentia consul Apollini, Aesculapio, & Saluti dona vouere, & dare signa inaurata ex Sibyllinis libris iussus est. Præcis temporibus, sub tribunis militum consulari potestate, ob eandem causam, ædem Apollini PRO VALETVDINE POPVLI votam dicatamque accepimus. Sed nunquam maiori studio atque cura res votorum suscepta fuit, quam quum penes vnum,

vnum, ab Octaviani temporibus, potestas imperii esse coepisset. Mos enim inualuit, ut non fortuna modo aut casu postulante, sed officii etiam & venerationis causa, statis diebus per singulos annos pro SALUTE PRINCIPIS, vel natali eius die, vel quo imperium acceperat, vel, quod Caius iurisconsultus refert, tertio die post calend. Ianuarias vota unanimes nuncuparent, quæ vertente anno, quum nova susceperuri essent, grata mente reddiderunt. Sic non Romæ tantum, aut in Italia certatum officiis fuit, verum etiam in provinciis, ut Plinius Traiano scripsit, prioris anni votis persolutis, commilitones & provinciales nova vota suscepisse, quod libenter etiam & grate a Traiano acceptum est. Quæ proximo, quæ superiore anno precati a Deo immortalis sumus, quod lætitia vultus vestri prodit, auditores, haudquaquam ex animo & memoria elapsa sunt. Scilicet mecum precabamini, ut Deus serenissimum nostrum PRINCIPEM ELECTOREM, & excelsum eiusdem FAMILIAM, remque omnem publicam, atque hanc Academiam, florentem & incolumem ea benignitate servaret, cuius res egregia signa, & non dubia argumenta prioribus annis in eiusdem celsissimæ DOMVS salute cognoveramus. Maiores, quum vota nova facerent, sæpe precibus suis eiusmodi formulam adiciebant, SINT RATA VERBA, SIT RATUM QVOD VOLVMS, EFFICIENT DIVI DIVAEQVE RATAS NOSTRAS
PRE-

PRECES. Num vero nostra, superiore anno concepta, fuerunt irrita? num vllum illorum cecidit, neque singula potius valuerunt prout animo, ore susceperamus? Precati salutem sumus serenissimo ELECTORI & DOMINO nostro: saluus, incolumis, sine vlla offensione valetudinis huius diei lucem adspicit, & rursus annum feliciter exactum esse latatur. Precati sumus eandem prosperitatem serenissimæ CONIVGI, Dominae nostræ clementissimæ; florentissimis LIBERIS, principibus iuventutis: incolumes, saluos adhuc omnes habemus, nunc optimo Marito, & Parenti, de natali, sanctis auspicijs exorto, lætissime gratulantes. Precati sumus felicitatem vniuersæ Domui Brandenburgicæ, vt cum omnibus sanguine, adfinitate, aut fœdere coniunctis eodem fortunæ fastigio persistat: persistat, adsurgit altius, ad summum contendit, nisi iam tum, quod summum est, consequuta fuit. Pax domi inconcussa, exercitus foris inuictus, tranquillitas rerum nostrarum status, fertilitas agrorum, commerciorum secundior successus; hæc, inquam, illa bona sunt, quæ cum summo voto, SALVTE PRINCIPIS, pro publica felicitate superiori natali die precabamur. Cæli hæc munera esse, & Deo O. M. deberi, non ignoramus; sed nec illud nobis dubium aut minus manifestum est, cuius diuinitus data sapientia, virtute, & in suos amore hæc omnia dispensentur, dirigantur, & in æquabili temperamento conseruentur. Quis itaque non intel-

intelligit, nos reos votorum omnium esse, quæ prioribus annis concipiebamus? Soluamus ergo, reddamus Deo, quæ debemus: laudemus eius, unde hæc bona profecta sunt, infinitam benignitatem: conceptis verbis, quæ præiturus sum, gratias clementiæ eius ita agamus: Summe Deus, quo indigniores sumus beneficentia tua; eo maiores agimus habemusque tibi gratias. Admissi votis nostris, preces supplices audiuiisti: dedisti omnia quæ rogabamus: dedisti plura, quam rogare sustinebamus. Saluus est sacratissimus **ELECTOR**; hoc tuæ benignitatis munus est: salua & florens est excelsa Domus Brandenburgica; hoc numeramus in beneficiis perthagnis tuis: tranquillus status est reipublicæ; etiam hoc tibi debemus, Deus, qui conditor & seruator es rerumpublicarum: domi quies inperturbata stat, fixa foris sunt victoriæ tropæa: vtrumque tuum opus est, o princeps pacis, & exercituum domine! Salubritas cæli, vber prouentus terræ, salutiferæ præsentix tuæ vestigia sunt. Fridericiana hæc tuis auspiciis condita, tuo seruata præsidio, documentum præbet sapientiæ & bonitatis tuæ, & admirabilis prouidentix. Sed cuius est facundia tanta, vt omnia beneficia tua non dicam prædicare, sed tantum enumerare possit? Multitudine obmutesco: stupefco eorum magnitudine, quia nec numerus iniri potest, nec, quanta sint, exputando inueniri. Summam eorum effert, qui **SALVTEM PRINCIPIS** nominat, quia
in

in illa SALVS PVBLICA continetur. Hoc est, quod denuo experti nunc omnes intelligimus, & si non voce, adfectu tamen omnes prædicamus, tibi que, æterne Deus, auctori huius fecundi ac fructuosi beneficii, æternas laudes dicimus, & immortales gratias habemus. Putatisne, auditores optimi, his meditationibus soluta vota esse, quæ superiore natali die in hoc loco nuncupabamus? an vero perfolui potest, cuius æterni sumus debitores? aut Deo reddi aliquid, ubi non est finis ab eo accipiendi, quia noua eius beneficia semper veteribus aderescunt? Tanta tamen erga nos Dei bonitas est, vt soluisse interpretetur, quum volumus: aut tantum soluimus, quantum possumus, non quantum debebamus. Nec vero laudes modo vouebant olim Romani, aut trium vel decem dierum supplicationes: sed etiam operibus, quæ edebant vel exstruebant, gratos piosque & religioni se & iudicio hominum exhibebant. Romanos templa & ædes Ioui, Iunoni, Marti, Apollini, Fortunæ, aliisque diis, deabus; sæpe etiam ludos magnos vouisse, iam supra memorauimus, nec ignotum illis est, qui in Romana antiquitate vel mediocriter versati sunt. Abominor impietatem, detestor execranda sacra, quibus idcirco deuoti Romani erant, quod nesciebant veriora. Est tamen in iis, quæ coluerunt Romani, quod forte repurgari, & in vsum, Christiano non indignum, conuerti posse videatur. Templum id BONAE MENTIS est, quod Hannibalis bello Q. Fabius

D

vovit

vouit, T. Otacilius dedicauit. Hæc Fridericiāna mihi, auditores, illud templum bonæ mentis videtur, in qua docendo, discendo quotidie ea sacra fiunt, quibus mens bona præparatur, hoc est doctrina sapientiæ, & ad legem honestatis formati emendatique mores. Satis de ædibus votis: de ludis votiuus addo pauca. Faceſſat ludibunda Roma cum agonibus ſuis, cum magnis ludis, aut circenſibus, quos & ipſi ſapientiores Romani contempſerunt, in litteris ac inter libellos & pugillares illos dies tranſmittentes, quos alii otioſis occupationibus perdebant. Turbæ & vulgo relinquamus fauere panno & colori, cupere currentes equos & inſiſtentes in curribus homines: nunc Venetæ factioni, nunc praſinæ, aut ruſſatæ ſuum ſtudium, ſuas addicere adclamationes. Melioribus inſutrita ingenia non capiuntur his vanitatibus. Fortaſſis autem Apollinares ludi propiores inſtituto noſtro ſunt, non quidem quales Punico bello, vatis Marci & Sibyllæ carminum admonitu, Romani primum in circo maximo fecerunt; ſed quos Auguſtus in animo habuiſſe videtur, quum Apollini templum in Palatino dedicaret, eiſque & ædibus ſuis coniungeret Apollineam bibliothecam. Non eſt, quod aliquem profanum nomen offendaſ, qui non deum commenticiū, ſed verum Muſagetam & rei litterariæ noſtræ ſtatoreſ ſeruatoreſque deſigno, cui omnes obſtricti ad ludos litterarios faciendos ſumus, & ad ſacra doctrinæ ac virtutis

cer-

certamina, quos non amplius Apollinares ludos, sed FRIDERICIANO Sappellemus, quorum victores, generosi & exculi iuvenes, non secus quam iselastici, honorifice in patriam, ornati multiplici scientia & virtute, dimittantur. Non dubito, quin mecum sentiat, auditores, & quæ olim vota fecimus pro Principis optimi salute, sic, quantum fieri a nobis potest, quodammodo soluta, quamvis non persoluta, censeatis. Restat altera pars officii, quod hoc natali die obeamus. Ea est votorum pro futuro tempore deuota nuncupatio. Pium enim ac necessarium esse iudicamus, vt tot bonis mactati diuina benignitate, nouis votis & repetitis precibus etiam futuram felicitatem cogitemus, præsertim quum nihil sit, quod spem nostram interpellet, quo minus alacrius voueamus, postquam nunc omnes intelleximus, non infructuosas fuisse, quas superiore anno pro salute publica preces adcurauimus. Quis non inde omen adripiat futuræ quoque felicitatis? Apud Romanos AVGVRIVM SALVTIS erat, quod, nisi quieto imperio, non poterat rite fieri, ideoque a Ciceronis consulatu, post orbem virtute Pompeii pacatum, ad Augusti vsque tempora & Ianum ab eo clausum; & inde rursus per quadraginta quinque annos, ad medium imperium Claudii, intermissum. Dione Cassio prodente, diuinationis illud genus erat, quo publice probaretur, concederentne dii, vt populo salutem peterent; quasi nefas esset rogare, nisi prius iidem

permisissent. Habeant suos ritus, sua auguria pagani: nos nostris infistemus, aut corrigemus in Romanis, quod prauum; emendabimus quod pollutum est superstitione. Dubios de Numinis voluntate oportet eos fuisse, qui in colendo illo longissime aberrabant. Liberior ad cælestem curiam accessus Christianis patet, tot signis de cælo obseruatis, tot diuinis promissis complanatus. Ex euentu votorum superioris anni, de nouis, augurium salutis certius, quam Romanorum erat, captamus. Quo confisi, optimo Principi gratulamur, & pro salute eius sic vota in futurum soluenda conceptis verbis nuncupamus.

Serenissime ELECTOR, Domine indulgentissime, tuus hic festus dies est, tuæ salutis noua hæc auspicia. Tibi omnes gratulamur, tua omnes lætamur incolumitate. Salue, carum Deo tuo CAPVT, salue, care prouinciis tuis, & singulis, qui in iis ciues tui & clientes sunt. Lætare bonis tuis, quibus sufficis: fruire felicitate, quam mereris, quam solutis votis, quæ feceramus, firmatiorem esse nunc omnes intelligimus. Noua vota suscipimus pro salute tua, qua publica continetur, Deum precantes, ut velit ea semper solui, semper non in charta modo, sed in mentibus nostris signari. Per testes hos omnes signamus, in tua statua figemus, ut futuro anno de soluta charta & TIBI & nobis Deo bene iuuante, gratulemur. Deus Te diu terris commendet nos Te Deo tuo commendamus, quo gloriosi PARENTIS acta æques, victorias

Etorias superes, annos longæuitate vincas, vt
 quamdiu inter mortales eris, nihil mortale ex
 Domo tua sentias, de mortalium genere semper
 bene merearis. Deus Te seruet, PRINCEPS
 OPTIME, vt multi, vt omnes nos per TE ser-
 uemur: Deus seruet serenissimam CONIV-
 GEM, Dominam nostram: seruet serenissimum
 FILIVM, delictum nostrum, & tuæ exemplo for-
 matum, TIBI aliquando consortem det, serissi-
 me successorem. Seruet & celsissimam FILI-
 AM, celsissimos serenissimosque FRATRES,
 Agnatos, Adfines, fœderibus iunctos, vt vndique
 felicitas tua stabiliatur. Habes, quæ ceteri futura
 sperant: possides quæ multi se consequuturos esse
 desperant: quod optant alii, Tu, Deo volente, tenes,
 tuæ ditionis est. O nimium Deo dilecte, cui æther
MINISTROS prospexit sine exemplo fideles,
dexteritate incomparabiles, vsu rerum & sapien-
tia nemini secundos. Deus hos comites TIBI
 seruet, hos consiliorum inuentores, adiutores re-
 rum gerendarum omnium. Inuictus est exercitus
 tuus. Deus victorias augeat, tuis faueat trium-
 phis, vt cum potentissimis Sociis Germaniæ pa-
 cem restituas, restitutam confirmes, confirmatam ad
 seros posteros, si qui futuri sunt, transmittas.
 Sic, qui fructus pacis sunt, virtus & liberalia stu-
 dia florescent, & Fridericiana tua, inter armorum
 strepitus genita, pace & otio reficietur, & nouis
 subinde incrementis aucta, caput lætius extollet,
 tuamque gloriam amplificare studebit, & se tuam

filiam virtutis amore, ac sapientiæ tuæ imitatione geret; quæ Tecum iam sic agit, & venerabunda adloquitur: Indulgentissime PATER, soboles ego tua sum non fictæ, vt Iouis Minerva, sed vere ex ingenio tuo nata, a TE condita & conseruata. Lætor inprimis natalis tui exortu nouo, exortu auspiciatissimo, quia eundem diem & mihi natalem esse clementissime concessisti, vt annos meos cum tuis numerem, & meam salutem in tua contineri per singulos annos intelligam. Quidquid habeo, tuum est: ornamenta mea omnia tuæ munificentia sunt opera: spes incrementi mea ex tua pendet liberalissima voluntate. Diligis me, vt pater filiam, quia, quem vnicum FILIVM habes & tenerrime amas, mihi tertium nunc RECTOREM das. Hoc pignus amoris in me tui est, hoc sperandæ maioris felicitatis fundamentum, quia is mecum adolefcit & adsuescit rei litterariæ, propter quem nihil mihi negabis, omnia mihi conseruandæ, & nouis auctibus ornandæ dabis. Deus Te respiciat, PATER optime, Deus respiciat FILIVM tuum, RECTOREM meum, & audiat suscepta vota mea, sicut Tu audis preces meas. Age, benignissime PATER, quæ defunt mihi, adice: quæ obstant incremento meo, prouidus dispelle: & veræ elegantisque doctrinæ studia, quæ sola ætatem ferunt, sola augendæ tuæ gloriæ sufficiunt, magno animo, summa sapientia tua, in me consolida, confirma. Periculosa nouitates, auctoritate tua, vt sole premente,

mente nebula, vanescant, dissipentur: inculta barbaries, temporibus meis non iam adrepens, ut antea, sed proteruius adfultans, procul a sede sapientiæ tuæ, quam dedicasti, repellatur, ut elegantiores litteræ reuiuiscant, quia hæ solæ sunt, quæ laudes tuas augeant, quæ gloriam tuam posteritati sempiternæ commendent. Vindica, Domine, bonas litteras, sapientiæ veræ nutrices: in Fridericianæ tuæ, potentissimæ **STATOR**, eas statumina, ut ex illa semper prodeant, qui pectus suum earum artium cognitione impleuerint, quibus instructi rempublicam capeſſant, eamque turgent ac firmiter stabiliant. Age mecum pro sapientiæ tuæ, pro amore tuo: sic bene semper mihi erit, nec unquam cessatura sum pro salute tua vota facere, & facta, grati animi pietate submissioneque soluere, ac gloriam Tuam litterarum monumentis æternitati commendare. Sic Tecum, **PRINCEPS MAXIME**, Academia tuæ, spei plena, & ex natali tuo nouis signis ad bene sperandum excitata & exhilarata agit: sic **TIBI** perpetuam salutem & felicissimum imperii cursum precata, suam incolumitatem, sua incrementa, ornamentaque, demississima subiectione ac fiducia commendat.

Tu vero, æterne Deus, auctor & seruator vitæ hominum, rerumque publicarum potentissime firmator, fac, quæsumus, rata vota sint, quæ pro salute indulgentissimi **PATRIÆ PATRIS**, pro **DOMVS BRANDENBUR-**

GICAE constante incolumitate, pro Fridericianæ Academiæ conseruanda & augenda prosperitate deuoti, submissi, ac supplices, nec vero dubitantes, sed confisi bonitate tua, ad vnum omnes nuncupauimus. Sis quoque in posterum propitius tuis muneribus, iisque tanquam cumulum addas, quam omnes precamur, quam omnes speramus, **FELICITATIS BRANDENBURGICAE** perpetuitatem, vt florente atque incolumi republica hunc natalem diem sæpe nobis iterare liceat, atque vt is quotannis immensa bonitate tua iucundior nobis lætiorque recurat.



ORATIO IV.

FRIDERICO III

MARCHIONI BRANDEN-

BURGICO, SACRI ROM. IMPE-

RII ARCHICAMERARIO,

CETERA.

DE NATALI XXXXI

CALEND. IVLIIS clō lōc xcvi.

EXORTO,

Habita.

MAiores nostri, cordatissimi mortales,
vim singularem omnibus inesse, &
ex eorum auspiciis fortunam insequen-
tium temporum iudicari credi-
derunt. Quod quamvis superstitionem præ se
ferre videatur, quod sæpe aliter euenire videmus,
quam omina illa siue auguria nobis addixerant:
tamen si res nostras, earumque cum diuina sorte
nexum, hoc est cum providentia, cogitamus;
vtique non omnis ex omine significatio conte-
mnenda est. Sunt in rebus (ita Deus ordinauit)
futurorum euentuum quædam prologia, quæ si
fausta & felicia contigerunt, lætioris aliquando
spem exitus ostendunt & confirmant, quod Deo

auspice incepta nunquam male possunt, hoc est contra omina, euenire. Et, si etiam nihil, quod diuinum esset, (id vero aliter esse putamus) bona & fausta omina adferrent: non tamen parui, si quid iudico, faciendum illud est, quod eadem accendunt animum, eumque promptum efficiunt, & optima spe adimplent, qua percitus quiduis magnus, etiam cum periculo, adgrediatur. Ex quo fieri solet, ut exitus plerumque, initiis non indignus, consequatur, quia, quæ forti animo suscepta sunt, maiori alacritate perficiuntur, & industriæ mercedem, hoc est felicem euentum, raro non coniunctam habent. Sed nondum, eo confugiamus, necesse est, quia non deesse mihi sentio, qui rerum omnium ordinem & causarum connexionem meditati, in meam ituri sint sententiam, non omne fortuitum esse credentes, quod omen appellamus, sed cælestis providentiæ diuinum sæpe signum documentumque prænotare. Id si vnquam mihi euenisse credam; hoc die, auditores, mihi video euenire. Quis dubitet diuinitus accidisse, ut hoc munus, quod in eo, mihi summorum aliorumque voluntate offerretur, id quod quum hodie mihi rite, quod bene vertat, ac commodo Academiæ auspicandum sit; unde felicius & meliori omine auspicabor, quam ab auspiciis serenissimis, quibus hodie nos omnes illustramur? quid dici atque cum maiori spe faustitatis possit, quam quod natalis maximi optimique PRINCIPIS imperat, idemque natalis huius Academiæ?

miæ? Si læti ominis esse censemus, sub auspiciis suscepti muneris, congratulantium vocibus honorari, eisque, tanquam signis erectis, ad bene sperandum excitari; quanto auspicius erit id primum agere officii causa, quod omnibus lætum, salubre omnibus, & in primis serenissimo PATRIAE PATRI iucundum, atque etiam reipublicæ est necessarium? seu, ut id clarius, auditores, exponam, quid felicius, quam auspicii causa pro optimi PRINCIPIS salute vota ante suscepta reddere, ac nova nuncupare, hoc est, Deo servatori gratias agere, Deum, ut servet in posterum, sollicitare? Quæ si rite a nobis, ut omnes debemus, peragentur; etiam euentum habebunt lætorem, quia piæ preces, & iusta vota nunquam sunt infructuosa, sed, quæ diuina est benignitas, quod petunt, impetrant, aut maius etiam & melius quam petebamus, consequuntur. Admonemur hoc die quisque officii sui, ut curatius meditemur, quantum illud beneficium sit, quod cælo debemus, quo nunc ornati, cumulati omnes sumus; quod saluum, incolumem, augustis rebus florentem habemus PRINCIPEM; quod DOMVM BRANDENBURGICAM in dies feliciorum videmus: quod nostræ etiam Academiae, benigne conservatæ, inter plausus & vota congratulamur. Hoc est quod a Deo immortali superiori anno precabamur: hoc, quod votis nostris benignissimus Deus adnuït, & abundantissime dedit, ut hunc diem omnes communiter, & inter

inter suos quisque gratulationibus transigere, & ex diuinis signis futuram conicere felicitatem, ac bene sperare de rebus suis atque publicis possint. Gratulandum est hac luce publice: vota, superiori tempore suscepta, rite persoluenda, noua facienda, consignanda, adfigenda, ut salutem Deus optimi ELECTORIS, diutius conseruet, felicitatem DOMVS BRANDENBURGICAE augeat, & suis in eam maximis beneficiis adiungat perpetuitatem. Quod munus cui potius quam mihi, aut quando magis, quam hoc tempore exsequendum est, quo eam personam mihi impositam esse intelligo, ut præeam in iis omnes, quæ publico nomine agenda sunt in Academia, ut officii quemque sui, quod faciat hodie, admoneam, & ubique prouideam, ac meo caueam exemplo, ne quid pietatis persoluendum tanto PRINCIPI, non persolutum prætermittatur. Quod igitur bene & feliciter eueniat, mei quod est muneris facio, & quod hac luce faciendum & mihi & vobis est omnibus, lætus plenusque spei adgredior, ut Deo, gratias agendo, superioris anni vota persoluamus, & ELECTORI quod debemus obsequium, gratulatione præstemus, ac noua vota pro futuri temporis prosperitate supplices suscipiamus, omnia agentes, dicentes, quæ lætissimi diei solennitas, & NATALIS PRINCIPIIS, & nostri PRINCIPIIS, ac indulgentissimi PATRIS, & pietas Academiæ erga CONDITOREM suum a singulis nostrum, a me præcipue, nouo Prorectore,

re, exigunt atque postulant. Vos vero, splendissimi auditores, lingua, animo faueatis mihi rogo, & me sequuti, certetis mecum & inter vos singuli piis votis atque precibus, faustisque acclamationibus, ut hoc annale munus Deo gratum, ELECTORI gloriosum, nobis autem salubre sit & nostræ Academiæ, ac futuri temporis fructus perpetuos, id est felicitatis stabilimentum adferat.

Quod diuinis rebus operantes faciunt, ut ora in eam cæli plagam conuertant, a qua lucis est exordium: idem mihi his nataliciis sacris faciendum esse intelligo, ut & oculos & vocem ad illam cæli regionem vertam, quam plenis nunc radiis LVX Brandenburgica, ELECTOR serenissimus, illustrat. Nouistis omnes, ex Marchia sua in Borussia nuper profectum esse, ut cum alia illius provinciæ ordinaret; tum propior regno Polonico esset, quod sua interesse vidit, qui Rex a Polonis eligeretur, quod Brandenburgicæ provinciæ non vno loco attingunt fines Poloniæ. Ita vulgo, ut nostis, iudicatur de itinere, quod ego mihi relinquendum duco, quia neque illorum consuetudinem probo, qui in umbra scholarum & academiæ de arcanis reipublicæ, de institutis militaribus, aut de futuris etiam euentibus magno clamore disputant, quas res ipsi summi Principes a nostro otio procul abesse, suisque claudi aulis ac contineri imperauerunt. Illud potius in hac itineris causa dicam, in quod ea studia, quæ as-
due

due colo, me planius inducunt, quod iustas quidem rationes habet, nec vero in aularum penetralia siue adyta irrumpit. Superiori anno serenissimus ELECTOR in occiduas Germaniæ partes, in Menapios & Sicambros profectus erat; iam in Sciros & Aestios, qui extrema Germanorum, ab ortu æstiuo incolunt, honorifico comitatu egressus. Scilicet magnorum Principum animus, ut ex cælo originem ducit, cælestium rerum naturam æmulatur, quæ ita, quod scitis, comparata est, ut nunquam quiescat, sed semper id agat, quod terris salubre & fructiferum sit, & vitam dat ac conseruet animantibus: quod ut præstare possint benignius, velocissimo motu circumrotantur, ut ubique perlustrent omnia, & tactu suo refoucant & refocillent omnia. Hoc optimus quisque Principum Romanorum imitatus fuit. Octavianus Augustus non in otio urbis delituit, sed dum ætas concedebat, sæpe in prouincias exturrit, ut plures consulatus eius documento sunt, quos non Romæ, tanquam in otio, sed foris ac in prouinciis longinque remotis suscepit. Nam quartum consulatum in Asia: quintum in insula Samo: octauum & nonum Tarracone in Hispania iniit: atque ita agendum ei principi fuit, qui felicissimum sibi imperium, sicut post fuit sub illo, industria & curis apparare & confirmare satagit, ut quæ perculsa & prostrata ciuilibus belli impetu iacebant, præsentia sua erigeret, & pacis fructus ubique gentium resuscitaret. Quid de Hadriano dicam,

dicam, cuius omne pæne imperium itineribus exactum fuit, dum orbem Romanum, ut Eutropius tradit, circumiuit, neque id bellorum causa, qui pacem fere semper coluit; sed ut provinciis bene faceret, ubique ædificaret, praua in rectum, collapsa in integrum, turbata in tranquillissimum statum reduceret? Hoc enim boni principis munus atque officium est, ut non, Persarum more, raro ab hominibus visus, in deliciis liqueat, sed curam gerat reipublicæ & omnium provinciarum, omnia oculis subiciat, ut omnibus opem & salutem adferre possit. Non alius animus Constantinorum, & qui hos sequuti sunt, Christianorum principum fuit, ut vel solæ leges Codicis commonstrant, quæ non omnes Romæ aut Constantinopoli datæ sunt, sed multæ in Treueris, aliæ in Rhætis, quædam Durocortori Remorum, aliæ in Illyricis oris, Carnunti, Bregetione, Singiduni, Serdicæ, Naissi: ut de Bithyniæ Nicomedia & Nicea, de Syriæ Antiochia, aliisque pluribus locis taceam. Hos optimos Principes æmulatus serenissimus noster ELECTOR, ipse provincias suas obit, ut videat ubique locorum, quæ facies rerum sit, quæ forma ciuitatum, ad confirmandas bonas, ad ceteras emendandas, ut omnium felicitas in maius & melius promoueatur. Saluberriima enim boni Principis vestigia sunt, quæ salutem & solatium, quaqua transitur, adferunt, visendi, adloquendi copiam dant, ex quibus præsentissimum auxilium præsidiumque exsurgit. O felices igitur

Ac-

Aestios, Sciros, seu Borussos, apud quos tam benignum fidus tot menses commoratur ! felices etiam Sicambros, qui superiore anno idem lumen intra fines suos habuerunt ! Vterque populus gratulatur sibi, & copiosis fructibus tam salutaris praesentiae laetatur.

Videor mihi intelligere, auditores, quid de me iam cogitetis. Aliena adferri in natali **PRINCIPIS** censetis, quibus huius diei neque excitetur, nec augeatur laetitia. Sed audite quaeso, quorsum mea oratio contendat. Superiore anno precati omnes a Deo immortalis sumus, ut serenissimi **PATRIAE PATRIS** salutem conseruet, felicitatem augeat, provinciarum res fortunet & amplificet. Eius voti nunc compotes facti, non ignorare debemus, quod Christianis nec dubitandum est; haec omnia Dei optimi maximique munus esse, eiusque numini ad gratias agendas deuinctos nos omnes & sanctissime obligatos. Laetantur illae provinciae, quibus vestigia sua clementissimus **PATER** impressit: gratulantur, & perpetuam suam laetitiam fore in summis votorum habent. Qui plausus, quae voces nunc audiuntur in Borussia? quantae gratulationes in Sicambrorum terra? Num vero minora nostra bona sunt, quibus diuina nos benignitas cumulate auxit, & quidem eiusdem **PRINCIPIS** summi ac **ELECTORIS** felicitate? Neminem puto tam ingratum in hac corona esse, ut obliuioni dederit, quanto mirificus **PRINCEPS**, aut per ipsum

ipsum Deus, abhinc tres annos beneficio nos ad-
fecerit. Glorientur Borussi diuturna commoratio-
ne: glorientur & Cliuenses; nobis quidem bre-
uiori tempore is adfuit, cuius lætantur illi præ-
sentia: sed beneficentior adfuit, quam ceteris
cunctis prouinciis, quia suam heic Fridericianam
dedicauit. Admiranda sunt, quæ munificus alibi
PRINCEPS ingentia opera statuit: at nostrum,
quod in hac ciuitate condidit, est opus æternum,
ac immortale, & quando cetera vetustas consum-
ferit, hoc perennabit, & vires ac incrementum ab
annis accipiet, ex illoque CONDITORIS glo-
riam posteritas alet, atque ipsa æternitas conserua-
bit. Omnia manu facta tandem concidunt &
tempore destruuntur: hoc vero, quod posuit,
Academiæ monumentum AVCTORIS sui glori-
am custodiet, augebit, & immortalem reddet, quia
intra se ingenia alit, fouet, excolit, educit, quæ sola
memoriæ seruandæ instructa sunt, & ad præstan-
dam nutritoribus suis immortalitatem. Ibit in
secula, fuisse summum PRINCIPEM, qui quam
aliis locis potuisset, in hac prouincia, & in hac
ciuitate Academiam (quantum decus & ornamen-
tum!) condidisset, eamque de nomine suo ap-
pellasset FRIDERICIANAM. Quæ cogi-
tanti venit mihi in mentem illius clausulæ, qua
Eumenius rhetor Constantino Maximo Flauien-
sium nomine gratiarum actionem finit. OMNI-
VM, inquit, SIS LICET DOMINVS
VRBIVM: NOS TAMEN ETIAM
E NOMEN

NOMEN ACCEPIMVS TVVM. **BIBRACTE** ADHVC DICTA EST **IVLIA**, **POLA**, ET **FLORENTIA**: SED **FLAVIA** EST CIVITAS **AEDVORVM**. Augustodunum intelligit, celebrem ciuitatem Galliae, quæ beneficiis a Flauio Constantino Magno ornata, hoc in maximis numerauit, quod ex illius nomine suum **FLAVIAE** nomen nouo liberalitate acceperit. Cur non potius eodem iure gloriamur? plures sunt Academiae Brandenburgicæ ditionis, Regiomontana, Oderana, Duisburgensis: sed sola nostra est **FRIDERICIANA**, quod augustum & venerabile nomen magni **CONDITORIS** mirificæ erga hanc Academiam indulgentiæ argumentum est. Quanti ergo hunc diem faciemus, qui tantum nobis & Romano imperio **PRINCIPEM** dedit, idemque huic prouinciæ & ciuitati nouam Academiam dedit? Erubescant sane in hac vrbe degentes, si hunc diem non sacrum sanctum habent, aut aliter, quam piis votis ac gratulationibus traducunt, ingentis beneficii, quod acceperunt, immemores. Nos vero, ad quos id propius refertur, nunquam commitemus, vt huius diei feriata memoria ex animo nostro elabatur: nunquam etiam id grata posteritas committet, quæ, quamdiu hanc Fridericianam colet, (colet autem, quod speramus, quamdiu litteras;) nec huius diei memoriam abiiciet, nec laudem **CONDITORIS** vnquam obliuiscetur.

Præcati etiam superiori anno sumus, ut gloria Gentis Brandenburgicæ, qua potentia augetur & auctoritas confirmatur, seruata crescat ad maiorem humani generis vtilitatem. Etiam huius voti damnati omnes sumus, quum quæ hoc anno honoris causa serenissimo ELECTORI præstita fuerunt, magna, eximia, & inusitata fuerunt, & post hominum memoriam nulli Germanorum Principi aut Electori contigerunt. Quum superiori autumno in Cliuensi serenissimus Elector FRIDERICVS esset, potentissimus Rex magnæ Britanniae GVILIELMVS ex Batauia ad ipsum venit Cliuiam, ut de summa republica coram colloquerentur. Hoc soli dedit Electori Brandenburgico, Principum Germaniæ cum potentia tum felicitate primo atque maximo. Sed ne id sanguini datum, aut societati bellorum, aut amicitiae, exislimetur; ecce nuper potentissimus Sarmatiæ vltioris dominus, Russorum imperator, PETRVS ALEXIADES, qui in Asia æque ac Europa regnat, serenissimum nostrum ELECTOREM splendidissima primum legatione coluit, cui mox ipsemet interfuit, & se cognoscendum præbuit, & amicitiæ fœdus cum laudatissimo ELECTORE, glorioso PRINCIPE & nostro DOMINO, coniunxit. Cui vero Germaniæ Principi, præter nostrum, tantus antea honor, & quidem a Russorum summo PRINCIPE contigit, cuius gentis alias non obuia humanitas, rarus extra patriam excursus est. Nihilominus

minus magnitudo virtutum FRIDERICI III, potentissimi Electoris, in remotissima Europæ gente admirationem tantam concitavit, ut illam statim visendi, adeundi, adloquendi cupiditas consequeretur, quæ MAGNUM PRINCIPEM eo induxit, ut non modo legatos mitteret satis honorifice ac quantum dignum tot terrarum domino, instructos: sed nec ipse sibi temperavit (tanta existimatio virtutis est) quin ad serenissimum ELECTOREM excurreret, de cuius laudibus omnia summa iam pridem in Moscovia præcognoverat. Tantum, Deo fortunante, accessit hoc anno, ex quo vota persolvenda sunt, ad gloriam potentissimi ELECTORIS Brandenburgici. Gratulamur illi, Deo gratias agimus, & ut pergat augere auctoritatem & splendorem serenissimæ DOMVS ad utilitatem humani generis, votis nuncupatis supplicamus, quo altero anno ad gloriam instar cumuli lætemur accessisse, quod nunc omnes optamus; eum aliis summis Principibus ac Rebuspublicis serenissimum nostrum ELECTOREM auctoritate sua magnum pondus ad pacificationem, in Batavis nuper agitari ceptam, per illustres LEGATOS suos attulisse. Faxit Deus, ut gloriosum hoc argumentum sit, quod revolutis mensibus & redeunte natali die gratulabundi exerceamus. Quod nondum est, aut adhuc dubium spe præsumamus, Deo confisi, cuius bonitate fiet, sicut adhuc per singulos annos nova gratulandi materia fuit, ut nec, qui insequetur

tur annus, in hac laudis & gratulationis parte sterileſcat. Interea quod præcipuum huius diei munus eſt, vota ſoluemus gratiarum actione: noua faciemus, precando, ſupplicando, vt res ſacra huius temporis rite, nec ſine litatione, quod ſperamus, peragatur.

Benigniſſime Deus, quas tibi agemus, habebimus gratias, quod vota noſtra, ſuperioris anni Quinctilibus calendis ſuſcepta, tam clementer audiuiſti? Dedidiſti nobis, quæ rogauimus: dedidiſti plura, quam rogare auſi ſumus. Salutem PRINCIPIS rogabamus; hunc ſaluum, incolumem, ſed tuo beneficio & munere, habemus: felicitatem imperii precabamur; quam dedidiſti vberriſſimam, & addidiſti maiorem gloriam, quam quiſquam tum vel ſpe vel voto præcepiſſet. Nihil hoc anno imminutum fuit, nihil auditum triſtius, quod animos turbaret, & gratulationibus moram iniiceret aut hæſitationem. Viget ſereniſſima CONIVX, DOMINA noſtra clementiſſima: floret ſereniſſimus IVENTVTIS PRINCEPS, quartum nunc Academiae huius RECTOR MAGNIFICENTISSIMVS: floret princeps FILIA, valent celliſſimi FRATRES, & quoquo verſus reſpicimus, recte, atque ita vt voſuimus, ſeſe omnia noſtra habent. Pacatae ſunt provinciae, agri nouam meſſem promittunt: na- uigationes & commercia incrementum capiunt: quod ſanctum, pium, vbique in eccleſiis docetur: quod iuſtum & æquum, in iudiciis ſtabilitur:

nec quidquam est humanæ societati necessarium,
de quo Brandenburgicæ ditionis homines iure
suo queri possint. Nostra quoque Academia in-
 concussa consistit, doctrinæ & virtutis maiorem
 in dies fructum fert, Immunis etiam hunc annum,
 qui exiit, exemplis funestis atque tristibus. Hæc
 omnia, æterne PATER, tuum munus sunt: hi fru-
 ctus nostratium precum sunt, quas tua bonitate vis
 efficaces esse; indignarum utique, si ex nostro me-
 rito aut dignitate metiaris. Perge, o Deus, pro-
pitius tuis muneribus esse, & quæ dedisti, quæsu-
mus conserva, & si salubria nobis & reipublicæ
 esse vides, eadem auge, & pro immensa beneficen-
 tia tua cumulum adde. Perge audire, quæ voue-
 mus, quæ omnes precamur. PRINCIPIS salu-
 tem, felicitatem, tanquam summam votorum, ti-
 bi in posterum commendamus: celsissimam DO-
 MVM & FAMILIAM commendamus: tran-
 quillum & æquabilem cursum rerum omnium
 commendamus, & votis conceptis signamus, quæ-
 vertente anno persolvemus, maioribus hostiis,
 quum iterum adnueris, sacrificaturi, hoc est, ma-
 iores tibi & solenniores acturi gratias. Audi
 Deus, da salutem, conserva felicitatem, tuere eccle-
 siam, confirma rempublicam, & Academiæ, o statim
litterarum, incrementum adde & stabilitatem, TIBI
 vero, potentissime ELECTOR, omnes animo ob-
 sequentissimo gratulamur, TVA causa lætamur o-
 mnes, etiam nostra & reipublicæ causa lætamur, &
 exultamus, postquam cælesti providentia quadrage-
 simum

simum ætatis annum felici rerum cursu & inoffensa valetudine expleuisti. Addat Deus ætati tuæ annos totidem, eodemque cursu felicitatis fortunatos omnes esse iubeat, ut optimi status auctor rempublicam saluam ac sospitem habeas, & posteritati reliquas intemeratam. Nihil nunc audis, quam vota tuorum, quam preces tuorum, quibus Deus precor adnuat, & TVAM salutem, ex qua tot hominum salus pendet, in dies auctorem firmiterque efficiat, ut, quod semper nobis optandum est, lætiores vndique rerum tuarum successus, etiam ultra vota nostra, habeas, hoc est & plura & maiora bona, quam optare possumus aut animo nostro comprehendere. Deus TE seruet, FAMILIAM seruet, rempublicam seruet, felicitatem perpetuam conseruet. Ut vero TVAM propitio Deo; sic nostram & Academiae salutem CLEMENTIAE TVAE commendamus, quia Deus tot summis Te bonis exornat, accumulatur, ut cunctis, præsertim imperio TVO subiectis, benefacias, & de re publica, ut facis, bene magis atque magis merearis. Tenellæ conseruationis noua Academia est, eoque benignius fouenda, & idemtidem resouenda, ut robur accipiat atque firmo stabilimento consistat. TVO hæc ingenio, propitiis fati, exorta est: TVA creuit voluntate, & crescet amplius, Deo bene iuante, nutu TVO, benignitate TVA. Hanc respice, clementissime DOMINE, quia hæc Te respicit, ut auctorem suum, ut seruatore, & abs

TE exspectat quæ sibi, quæ posteris, quæ ipsis literarum studiis & conseruandis & in maius illustriusque producendis vel idonea sunt, vel etiam necessaria. Tandem officii noui ratio a me postular, vt TE quoque, florentissime IUVENTVTIS PRINCEPS, RECTOR noster MAGNIFICENTISSIME, clementia TVA fretus, adloquar. Indignus sum, qui pro TE Academiam regam; TV regas eam summa auctoritate TVA; fulgentissimi nominis TVI splendore augustiorem celebrioremque facias: ego seruus tuus TVIS illam auspiciis, TVO nomine administra-
bo, in id daturus operam, vt ex serenissimi PATRIS TVI, DOMINI nostri clementissimi, TVAque voluntate, quæ, & ILLIVS, est eadem, apud nos gerantur omnia. Veniet proxime dies, quo & TIBI nostris votis atque precibus, quod debemus omnes, officium faciemus. Interea Deus TE seruet, TVAM Fridericianam seruet, vt TV ad optimam quamque virtutem & MAIORVM gloriam adolescas; Academia TVA TECVM, vt annis, ita virtutibus erescat, ac laudem & famam suam, tam excelso RECTORE dignam, ingeniorum fortibus & morum iu-
uentutis honestate vbique gentium
tueatur.

ORA:

ORATIO V.

SERENISSIMO POTENTISSIMO-
QUE PRINCIPI AC DOMI-
NO, DOMINO

FRIDERICO III.
MARCHIONI BRANDEN-
BURGICO, SACRI ROM. IMPE-
RII ARCHICAMERARIO,
CETĒRA.

DE NATALI XLII

IPSIS CALEND. IVL. clō Ibc xcviij
FELICISSIMO SIDERE
REDVCTO,
Habita.

QVod superiore anno precati a Deo
immortali sumus, eo tempore quum
pax ambigua esset Germaniæ & ma-
ioris pæne Europæ partis; ac omnes
votis nos obstrinximus, si cælestis providentia se-
renissimum ELECTOREM ac DOMINVM
nostrum, eiusque celsissimam DOMVM, confir-
mata valitudine ac æquabili cursu rerum sine for-
tunæ offensione conservaverit, reddideritque quie-

tem & orium patriæ; nostri muneris ex sanctissima sponſione ſore, vt maioribus victimis, qui hodie illuxit, natali die diuina ſacra procuremus, & maiores, quam vnquam, DEO SERVATORI gratias agamus, pluribusque & lætioribus gratulationibus hunc diem calendarum proſequamur: eius deuotionis nos eſſe conuictos iudicio omnium bonorum, congratulatione Germaniæ, & Brandenburgicorum provincialium concordiffimo teſtimonio, maxime nunc lætamur, AUDITORES. Huius enim diei, religioſiſſime colendi, quam multæ nos circumſtant & vrgent momenti maximi rationes? Hæc lux abhinc vno & quadraginta annis, ſereniſſimo PATRIÆ PATRI, adnuente propitio cælo, viuendi primordia feliciter dedit: hæc FRIDERICIANAM ACADEMIAM inaugurauit: hæc toties eidem ſereniſſimum PRINCIPEM inuentutis RECTOREM MAGNIFICENTISSIMUM præfecit, & indulgentiſſimo maximi PARENTIS nutu ac voluntate præficit nunc denuo: & hæc eſt, quæ officium, nuper Aprilis extremo nulla negligentia prætermiſſum, ſed, vt calendæ Iuliæ auguſtiores forent, de induſtria reſeruatum, DECENNALIA videlicet VOTA, ſingulari pietate atque lætitia pro feliciffimo imperii Brandenburgici per annos totidem decurſu, perſoluenda, in memoriam reuocat: hæc eadem nos etiam admonet, vt in futurum tempus noua vota concipiamus, VICENNALIA prorogandi uſdem imperii, & QVINQVENNALIA

Aca-

Academiæ huius Fridericianæ. Patentissimus campus, quem ingredior: largissima & spatiosissima messis, quæ uni mihi demerenda obiiicitur. Diffusa scilicet res est, neque facile in summam colligenda, ut cohereant partes, nec forte quædam illarum inter dicendum prætermittantur. Tentabo tamen colligere, & quamvis non omnia animo possum comprehendere; non puto tamen præcipuarum aliquam partium præteriri, si ita operam distribuerimus, ut Deo, bonorum auctori, immortales gratias agamus, cuius æternæ benignitati debemus omnia, quæ huius diei & adferunt nobis lætitiâ, & eandem mirifice adaugent; deinde PRINCIPI optimo, cuius natalis iam dies agitur, & primum imperii decennium feliciter exactum est, omnes deuotissime gratulemur, & futuræ felicitatis certatim noua vota suscipiamus: præterea iuuentutis PRINCIPIS, RECTORI quantum MAGNIFICENTISSIMO, bene precemur, & ex prioribus annis, quibus præfuit rei literariæ, faustissimum omen futuri temporis, æquali felicitate vel maiori, si quid addi possit, transigendi, capiamus: etiam Academiæ salutē DEO & PRINCIPIBUS quam diligentissime quam subiectissime commendemus. Hæc summa sunt capita, de quibus verba mihi facienda video, quæ faciam non ut debeo in tam multiplici solemnitate, sed ut possim; angustia temporis, ut videris, AVDI-TORES, perclusus: quod utique maius ampliusque spatium maiestas rerum, de quibus agendum

in præsentia est, deposcit. Dicendum enim est de maximi PRINCIPIS virtute & felicitate, quas non facile quis ingenio complecti potest, nedum oratione rebus digna illustrare. Neque vero, quod officii ratio imponit, subire recusabo, ILLIVS incredibili clementia fretus, cuius perpetuitati gloriæ gratulatio hæc instituta est, quem ita mirifice bonum & benignum experti sumus, ut non tam ambitionem verborum, quam simplicitatem deuotissimi adfectus clementissime respiciat. Quem etiam leuem hanc nostram operam, ac subiectissimæ pietatis testem, serenissimo vultu accepturum esse, magna spe atque fiducia præsumo. Vos vero, illustrissimi, nobilissimi, spectatissimique AVDITORES, fauete linguis, attendite animo, & quas preces ac formulas vobis solemnes præibo, eas sequimini, quæso, deuota cogitatione, quo & ego voce, & vos adfectu, tum soluamus, quibus obstricti sumus, priora vota, tum noua pro futuris temporibus in posterum concipiamus. Sic vtrique faciemus quod officii nostri est, & quod tam DEO optimo maximo, quam serenissimo ELECTORI in lætissimo hoc natali die omnes Brandenburgicæ felicitatis participes debemus. Si felices iudicantur, qui bona sua intelligunt, & ad auctorem, vnde sunt profecta, pio gratoque animo referunt; næ multum ad felicitatem nostram conferemus, si hoc die, ut decet, quæ possidemus bona, & quæ speramus, non tam secreta æstimatione, quam laudatione publica pensabimus. Id quod

quod non potest fieri, quin omnia ad Deum referendo, ut debemus referre, ad serenissimi etiam ELECTORIS felicitatem, quæ huius diei medietamentum est, æstimandam laudandamque veniamus, quia is ipse est, per quem tot bona Deus, quibus publice lætamur, in Brandenburgicas gentes contulit. Maxima utique bona sunt, quæ nos, AVDITORES, circumfluunt; neque unquam a Deo precari publice sumus, quin maiora impetremus, quam votis nostris definitum fuerat. Quod maius existimari bonum potest, quam BONVM habere PRINCIPEM, hoc est pium, fortem, beneficum, & ex æquo bonoque omnia sua mentientem? quæ maior felicitas mortalibus contingere potest, quam tranquillus pacatusque status reipublicæ? qui fons est exundantior felicitatis, quam si quam plurimi cultura animorum ad virtutem & optimas quasque disciplinas ac scientias adducuntur? Num vero in hisce quidquam est, quod aliquis nostrum desiderare possit? PRINCIPEM habemus, quo nec votis meliorem effingere possimus: ex cuius bonitate cetera fluunt, quæ Deus in nos bona derivari voluit. Pax & tranquillitas reipublicæ cum flore artium liberalium eiusmodi fructus sunt, quos, post Deum, supremum bonorum auctorem, OPTIMO PRINCIPI, serenissimo ELECTORI & DOMINO clementissimo debemus. Cuius summas virtutes neque ingenium comprehendere, neque vox nostra enarrare potest: sed, ut alio

tem-

tempore necessitas adegit vt faceremus; ita hoc quoque natali die per ipsius bonitatem nobis facere, precamur, liceat, vt delibemus tantummodo virtutes aliquas, ex quibus de ceteris, quod omnes coniunctissimæ & indiuisæ in EO sunt, ab vnoquoque iudicari possit. Bellicosum Principem etiam summe PACIFICVM esse quis non miretur? tot immanibus in bella, in itinera, legationes longinquas, in ædificationes factis sumtibus, & assidue faciendis, quis credat, pro sæculi more, munificentia in bonas litteras & litterarum cultores aliquid loci superesse? sed superest omnino capacissimus, perinde ac pacis studium bellandi fortitudine haudquaquam impeditur. Hæ ergo sunt summæ illæ virtutes, quas in præsentia admirabimur, pacis studium inter arma, & inter maximas & incredibiles impensas maior, quam vsquam reperitur, in litterarum studia liberalitas. Superiore natali die in votis habebamus, vt verrente anno pax Europæ reddita, quæ tum maxime controuersa erat, singulare & lætabile dicendi argumentum præberet. Adnuì voto Deus, & consiliis Principum ac Rerumpublicarum eam post multas contentiones concordiam inesse iussit, vt optatissima pax, quod omnes lætamur, conveniret, in qua quantæ partes potentissimi ELECTORIS Brandenburgici fuerint, & quod momentum ad rem decore ac iuste conficiendam per splendidissimos LEGATOS attulerit, omnes qui vel mediocrem notitiam pacificationis habent, magnis laudi-

ludibus & vnanimi consensu consentunt. Esse non ignoro, qui huic paci nescio quid obiciant, nec firmam stabilemque fore ex signis non nullis sibi persuadeant. quod aliter precamur eueniat, quam illi timidule videntur præsignificare. Sed quoquo res modo habet, quod nostrum non est iudicare; fecit noster pacificus FRIDERICVS, quod suum erat, nec quidquam intermisit quod ad iustam & decoram pacem, eamque stabilem ac diuturnam conferret. Pax armis paranda: eadem & armis conseruanda est, quia qui armis destituti sunt, sæpe luduntur a potentioribus. Nam arma armis cohibentur, & ne partam pacem arma denovo conturbent, armis ostentatis, ab finibus sunt reprimenda. Heic etiam abunde est, Deo adhuc iuuante, in quo se Brandenburgensis felicitas efferat, quum potentissimus ELECTOR FRIDERICVS III neque maximis Regibus potentia armorum cedat, sed regiones atque prouincias, a MAIORIBVS suis acceptas, diuina ope, qua munita ILLIVS virtus est, per se tueri, & in pacatissimo statu conseruare valeat. Fama aiunt bella stare, ac pacem auctoritate. At fama & gloria Brandenburgica non iisdem finibus, quamlibet amplis, quibus Europa, continetur. In Africa sedem fixit: ad Americæ littora penetrauit, vbique tropæa & virtutis monimenta constituit. Quod vernante anno serenissimus ELECTOR in Borussiam iterum profectus est pacis causa, quod nemo dubitat, profectus est. Cui enim ignotæ sunt Poloniarum turbæ, per annum &

amplius non sine viciniarum periculo acerrime agitata? Polonia autem pacata, tranquillitas Europæ consistet: hac autem adflita, & prævalente quadam, quod abominamur, factione, scitis ipsi, auditores, quam fragilis tum quies sit Germaniæ futura: quam vicinum malum regionibus Brandenburgicis. Maxime autem propinquiore accessu ELECTOR BRANDENBURGICVS perfecit, vt nunc tranquillior status Poloniæ sit, & spes appareat maioris in posterum securitatis. Superiore anno singulare & rarissimum argumentum SVMMI MOSCOVORVM PRINCIPIS in Borussiam aduentus, & cum serenissimo ELECTORE amica conuersatio dedit: iam vero cum potentissimo POLONORVM REGE colloquium quam salubre putatis vtrique reipublicæ futurum? quis dubitat, de summa rerum, de pace tuenda firmandaque pactum esse? Faxit Deus, vt conuentus illius vberimos fructus, eosque diuturniores propediem videamus, vt quantus PACATOR FRIDERICVS III sit, per Sarmatiam non minus eluceat, quam dudum eluxit in Batauis, in Germanis, & aliis Europæis gentibus. Magnum est, stare in limite discordis populi, & præsentia atque auctoritate perficere, vt, diffidiis sublatis, concordia colatur, & REGI non amplius a suis negetur obsequium. O pacificum ELECTOREM BRANDENBURGICVM, sed non minus MVNIFICVM eundem! Magnorum Principum esse propriam munificentiam,

tiam, quis ignorat? at plerumque inde exiguum ad reipublicam commodum redundat. Si quid bene insumtum iudicio vulgi laudatur, in bella, in ludos, in pompam, in immodicas substructionum moles magna vis pecuniæ profusa fertur: studiorum liberalium, vnde virtus est & sapientia, vel nulla, vel rara admodum habetur ratio. Nostri autem ELECTORIS munificentia tam late patet, vt non solum quidquid ad vsum reipublicæ cum pacis tum belli temporibus; vel ad splendorem magno PRINCIPE dignum attinet, abundantissime largiatur; verum cum primis etiam litterarum studiis liberalitate sua adesse adfectus, quos cumulos augendis illis, aut in illustrius proferendis, adhuc adiecit? Non dicam de Academia, inter immensos bellorum sumtus impensis maximis fundata, nec minoribus (nostis omnes) dedicata: vel solus annus, qui heri exiit, quot & quantas impensarum principalium accessiones vidit? Salaris quæ deerant, liberalissimus ELECTOR suppleuit: bibliothecæ condendæ ex sua libros, eosque pretiosos misit; augendæ annum addidit stipendium: locandæ & constituendæ magno sumtu ædem coemit; vt vndiqueuersum incredibilem suam in bonas litteras propensionem & beneficentiam non ambitiose, sed in exemplum illustre, non ad intuendum modo, verum etiam ad imitandum præ se ferret. Et hæc summi PRINCIPIS munificentia publica. Priuatis autem, qui litteras colunt, quam mirabiliter benignus est?

quam clementissime indulgens? quantis præmiis
adfcit, ornat, & ad maiorem instigat industriam?
Prædicant hoc Germani, dilaudant Angli atque
Bataui, neque Galli conticescunt de summa EIVS
in humaniores litteras beneficentia & bonitate:
& si omnes silerent, nec tamen pietas me silere
patietur, ut magna voce potius apud omnes lau-
dare iubeat, quantis muneribus industria medio-
cris mea ornata nunc nuper fuerit. In qui-
bus quum IMAGINEM, quam præferunt,
intueor, AVGVSTVM Cæsarem, ingenia refo-
uentem, videre mihi videor; & Tirum VE-
SPASIANVM ex publico prospicientem pro-
fessoribus; aut etiam TRAIANVM, liberalitate
sua merentem cognomen OPTIMI. Tam miri-
ficum, tam incomparabilem PRINCIPEM habe-
mus, & habuimus per decem annos, republica
salua & incolumi. Quod magnum est utique.
sed maius omnino illud est, quod in singulos an-
nos eius temporis, quod dixi, respublica in maius
& melius providentia & bonitate PRINCIPIS
producta fuit. Quot enim victorias hoc decen-
nio numeramus? quot vidimus incrementa ciui-
tatum? quot splendoras ædificationes admira-
mur? quæ AVCTORI omnia egregiam laudem
adferunt: sed maiorem CONDITORI suo
Fridericiana. Hæc monumentum est quod ære
durat perennius; hæc æternitatem FVNDAO-
RI dabit. Cuius cetera opera comparata ita sunt,
ut vetustate aliquando consumantur: at gloria
Aca-

Academiæ instauratæ ab annis vires suas adquiret, & quo vetustior fuerit, eo maiori pulchritudine, quasi semper renouata exsplendescet. Quatuor iam annos illa, Deo adnuente, floruit, accreuit: quinto exacto, QVINQVENNALIA more prius celebrabit, quorum nunc vota suscipienda sunt, ut, anno feliciter circumacto, qua debetur, pietate, religione ac lætitia reddantur. Neque VICENNALIVM votorum obliuiscemur, auditores. Decennio enim prosperrime, ut omnes conuicti fatemur, per suum circulum cælesti benignitate reuoluto; quid restat communis officii ac pietatis, nisi ut nouum decennium æquabili felicitatis cursu transmittendum, a Deo immortalis exspectemus? precibus nostris tanti temporis processum indulsit salutarem: precibus idem dabit, si iustæ fuerint, futuræ prosperitatis successum. Tanto autem iustiores erunt, quanto maiori pietate priora beneficia æstimauerimus, ut eorum causa maiores Deo gratias habeamus. Patrum memoria effossus Romæ lapis quadratus fuit, cuius lateribus vndique ritus sacrificantium cum alatis Victoriis insculptus est; primo autem lateri, quod duas Victorias tener, scutum rotundum eleuantes, hæc inscriptio est superaddita,

CAESARVM DECENNALIA
FELICITER.

Cur non marmoribus etiam vbique, & hisce Fridericiani auditorii parietibus inscribemus

FRIDERICI III DECENNALIA FELICITER.


Faucat diuina clementia, vt possimus etiam VI-
CENNALIA & TRICENNALIA, &
vltiora vota non solum nuncupare solemniter,
sed feliciter etiam, compotes aliquando facti, red-
dere. Maiores nostri quum spes longas proro-
gabant, dixerunt ΘΕΟΤ ΕΝ ΤΟΥΝΑΣΙ ΚΕΙΣΘΑΙ,
hoc est, IN DEI GENVBVS POSI-
TVM ESSE. Simulacris enim deorum su-
scepta vota, & litteris consignata, ad genua adfi-
gebant, quæ non prius resoluebantur, quam im-
petratis iis, quæ vouendo precati fuerant. Absit
pagana superstitio. Non genubus simulacri ali-
cuius, sed memoriæ diuinæ & æternæ curæ ac
prouidentię infigemus, quæ vota pro salute
PRINCIPIS & DOMVS BRANDEN-
BURGICAE natali hoc auspicatissimo facie-
mus. Romanum marmor coronatos tauros, sa-
cerdotem Gabino vestitu, mactatores cum suis mal-
leis ostendit, & vnum canistros cum fructibus su-
stollentem, & plures alios ritus, quibus pagani ho-
mines in sacris suis utebantur. Missis quæ sunt
impia, quæ profana potius, quam sacra, sunt cen-
senda; Christiano ritu nostra vota faciemus, no-
stra sacra peragemus, non taurum, non porcæ ad-
ducentes, sed gratias agentes Deo Seruatori, &
futuræ felicitatis vota puris precibus, & pio adse-
ctu concipientes. Præibo ego: vos sequimini
fauen-

fauentes lingua, & deuota mente versate, perpendite, quæ ad huius diei officium rite procurandum pertinebunt. Tu ergo, æterne Deus, audi quæso, quæ hoc die te precamur, quibus te vocibus ex animo omnes sincero laudamus. **FRIDERICVM** tuum, quem populo tuo rectorem dedisti, per decem annos incolumem, felicem conseruasti. Tuum id munus est: tua hæc clementia: propterea tibi laudes debemus, tibi agimus habebimusque gratias. Suscipe, quæsumus, eundem Principem, & defende ac tuere; eidem robur & felicitatem adde: sapientiam datam auge, & numine tuo in omnibus curis consiliisque rege, vt tuis auspiciis, ipsius ductu, tuis sacris operari, & quod vnicuique iniunxisti, officium facere tranquillo ac beato statu reipublicæ possimus. Adde vitæ ipsius diuturniorem moram, adde imperio constantem felicitatem, vt redeunte hoc natali, aut, si tantum licet mortalibus a te petere, decennio alio exacto, maiores tibi maioresque gratias agamus. Anno, cuius vota soluimus, pacem Europæ reddidisti. Pacem, precamur, redditam confirma: firmatam in posteros quiete diuturna conserua, & in dies stabiliorem diuturnioremque effice, vt, te pacis auctore, sub **PACIFICO PRINCIPE**, quod tuum est; curemus; sub eodem pie, pacate, tranquille vitam, quæ restat, transigamus. Serenissimam **CONIVGEM**, Paterno funere nondum releuatam, solatio tuo refocilla, vt fato tuo sese præbeat, & **MARITI** felici-

citare, quam dedisti, adquiescat. Et quoniam nutu tuo, quem ex felici successu intelligimus, clarissime ostendisti, Academiam hanc salvis auspiciis tuis ante hos quatuor annos conditam, tibi-que, DEVS, & honori tuo dedicatam fuisse, eandem, ut adhuc fecisti, quod grata mente omnes prædicamus; in posterum quoque sanctissimo numine tuo rege, tuo robore confirma, tuere, conserva, ut quæ tuæ sunt voluntatis, quæ ecclesiæ tuæ ac reipublicæ salubria, heic vnice doceamus, discamus, faciamus, quo iuuentus academica, quæ heic honori tuo fingitur atque formatur, quotidie maiorem in virtute, in honestis moribus, in optima quaque scientia progressum faciat, & tuis sanctissimis legibus promptissime obsequatur. **RECTOREM** huius Academiæ nostræ, Principem iuuentutis, **PARENTVM** & nostræ omnium lætitiæ diuinitus conserva, ut sub flore **EIVS** etiam Academia floreat, & **IPSO** per annos crescente, hæc quoque in singulos annos incrementum capiat, & suo **PRINCIPE** atque **RECTORE**, eiusque in litteris & artibus profectu, indeque nato amore atque præsidio litterarum, maximopere lætetur. Serua, tuere **FILIAM**, **FRA TRES** Electoris, omnes clementia tua munitos, ornatos conserva: serua vniuersam **DOMVM BRANDENBURGICAM**, & muneribus tuis, quibus auxisti illam & cumulasti, quod nihil restat addendum, adde, quæsumus, præsentis felicitatis perpetuitatem. Audi Deus has preces nostras, audī
vota,

vota, quæ tibi facimus atque signamus, tuæque adfigimus memoriæ, ut recurrente natali, ut decennio alio peracto, quod bonitatis tuæ fiducia speratur; resoluamus tandem quæ fiximus, reddamus quæ vouimus, & æternis laudibus æternas tibi gratias agamus. TIBI vero, indulgentissime PATRIAE PATER, ex animo subiectissime deuoto gratulamur, quod annum ætatis denuo, quod decem imperii annos feliciter; feliciter, inquam & lætabundi repetimus, FELICITER transegisti. O nimium dilecte Deo tuo PRINCEPS, qui inter tot casus mundi, inter sæuissima bella, inter pericula mortalitatis saluus euasisti, salua existente tua republica. Deo Tecum gratias egimus, agemusque nunquam desituras: vota, olim suscepta, persoluimus, & noua pro salute TVA in posterum soluenda, nuncupamus, quibus, scimus fore, ut non minus Deus adnuat, quam superiora clementissime audiuit. Suffice, PRINCEPS, felicitati tuæ, & bonis, quæ cælo debes ac virtuti tuæ, perpetuo lætare. Sis felix in pace: sis fortis in bellis: sis iustus in iudiciis: sis benignus pauperibus, sis clemens, & indulgens pater omnibus. Quid multa? sis semper idem; qui fuisti, qui nunc es, quia melior & felicior esse non potes. Nihil addo, quam ut subiectissime TE publica voce rogem, quo Academiae quoque TVAE, ut solitus es, propitius esse perseueres, eamque augeas, ornes, defendas, quæ, quod filia TVA est, omnia, quæ

habet, fert accepta TIBI: omnia quæ desiderat
 sibi necessaria, a TVA benignitate,
 vt filia a PATRE,
 expectat.



ORATIO VI.

FRIDERICO III
MARCHIONI BRANDEN-
BURGICO, SACRI ROM. IMPE-
RII ARCHICAMERARIO,
CETERA.

DE NATALI XLIII

FAVSTIS SIDERIBVS
 CALEND. IVLIIS cl^o l^o cxcix.

EXORTO,

Dicta.

Non fefellit expectationem noſtram læ-
 tiſſimus euentus, & quæ votis, preci-
 bus ſuperiore anno optabamus, Dei
 immortalis munere atque benignita-
 te videmus omnia nobis data, præſtita, & maiora
 data quam expetebamus. Summa votorum fuit
 SALVS

SALVS PRINCIPIS, a qua nostra pendet; & æquabilis cursus tranquillitasque reipublicæ. Vtriusque voti, quod lætamur, damnati cælesti bonitate sumus, dum illuxit hodie, quem exoptauimus, serenissimi potentissimique Principis ac Electoris, **FRIDERICI III, DOMINI nostri clementissimi, PATRIAE PATRIS indulgentissimi**, quadragesimus tertius natalis, incolumi vniuersa **DOMO ELECTORALI**, florente republica, pacatis prouinciis, & vnoquoque nostrum lætante ac gratulante, quod saluo **PRINCIPE** salui & ipsi hanc lucem & incolumes adspiciamus. Si Academiam hanc Fridericianam, si florentissimam coronam nobilissimæ iuuentutis, quæ adsidet, quæ circumstat, intuemur, admiranda omnino est æterna prouidentia, qua opus tam nouum, tot æmulationibus circumdatum, non modo intrepidum & inconcussum stetit, sed ita etiam vndique aduentantium frequentia creuit, vt quanto superioris anni numerus maior fuerat quam antecedentium; in tantum hic proximus annus exsuperet & antecellat superiorem. Tanta felicitatis vtriusque documenta nisi cælo imputaremus, ingratissemus essemus mortalium, neque digni, vt vel anno beneficia sua cæleste **NVMEN** nobis proroget. Id quod illud proprium argumentum est, in quo nostra iam excurrat oratio, vt tam Deo gratias agamus, tot munerum, quæ recensuimus, liberalissimo auctori; quam serenissimo **PRINCIPI** nostro & **DOMINO**

indulgentissimo gratulemur de infinitis bonis, quæ felicitati EIVS diuina clementia nunc denuo adiecit: Deumque precemur, vt propitius sit muneribus suis, iisque addat, quam vnice optamus, felicitis cursus perpetuitatem. Equidem scio gaudentium studia per prouincias nunc passim peruolare, & innumeris vocibus sonora gratulationes ad cælum vsque efferre: Fridericiana autem, vt propria sibi, eaque admiranda beneficia, hoc die collata meminit; ita non officio vulgari, quod clamore atque sonitu finiatur contenta, maiore pietate atque studio hunc diem ita transigendum censet, vt ad fontem felicitatis, æterni Numinis clementiam, omnia accepta referat, & votorum solutione, nuncupationeque nouorum, a Deo impetret, vt eadem, quæ adhuc accepimus, in posterum quoque prorogentur, & quia modum non præfinimus beneficentiæ eius, si vtile viderit nostris rebus fore, augeat vetera quæ dedit, & cumulum novum addat futuræ prosperitati. Prisci Romani, cordatissimi mortales, & principum suorum, & magnarum vrbiū natales singulari religione coluerunt, annale munus offerentes Genio, & nihil facientes, dicentes nihil, nisi quod fausti bonique ominis esset, & auspiciū futuræ felicitatis haberet. Imitamur in antiquo ritu quod bonum est: nec vero vel PRINCIPIS, vel Academiae, quasi litteratæ ciuitatis, Genio, sed Deo Geniorum conditori, & vtriusque, cuius natalem celebramus, seruatori, annale munus laudis & gratiarum

rum actionis, conceptis votis superiori anno promissum, pie deuoteque exsoluamus, & bona verba, vt veteri voce vtar, dicemus gratulando, precandoque Deum, vt optimum nostrum PRINCIPEM, ELECTOREM BRANDENBURGICVM, & DOMINVM nostrum, & serenissimam Eiusdem DOMVM ac FAMILIAM, ac patriam & rempublicam, & nostram quoque Academiam conseruet, tueatur, & felicitatem, quam dedit, confirmet atque augeat, quo futuris quoque annis, hoc natali die redeunte, ad maiores maioresque gratias, diuinæ benignitati agendas, deuinctos nos magis atque magis sentiamus. Hoc nostrum hoc die est officium, in campo hoc mea decurrat oratio, Auditores; in hoc & vestra se agitet meditatio, vt vtrique conueniamus lætitiæ ac pietatis sensu, & dicamus, cogitemus quod dignum hoc die, Deoque gratum, & serenissimo ELECTORI honorificum, nobisque omnibus fructiferum atque salubre, nec non famæ & incremento huius Academiæ accommodatum. Hoc cœrtatim, Auditores, nunc agamus, ego dicendo bona verba, vos, subsequentes pia cogitatione, atque animo linguaque mihi & solemnitati huic fauentes.

Quod in exercitu numeroso videmus, plus momenti in duce, quam in copiis vniuersis, esse positum; idem in republica ita fieri censeamus. De Epaminonda tradunt annalium conditores, pluris illum vnum fuisse, quam omnem ciuitatem

The-

Thebanorum, quæ caput fuerit Græciæ, quamdiu suæ ille præfuit reipublicæ; contra ea, & ante illum natum, & post illius interitum, nullam memorabilem Thebarum fuisse felicitatem. Creditisne, Auditores splendidissimi, quod patria nostra, quod ecclesia & respublica, quod hæc ipsa Academia, feliciter agat, quod pace, otio, & tranquillitate fruatur, quod præsidium sit in iustitia & æquitate? hoc, inquam, creditis aliunde nobis obtingere, quam quod diuina prouidentia **MODERATOREM** reipublicæ, & rerum agendarum **DVCEM** saluum, incolumem, felicem habemus? Eius salus est, ut salua sit respublica: Eius cura, ut nihil cuiquam desit: Eius auctoritas atque maiestas, ut omnia sint tuta & pacata. Si caput saluum, bene est membris omnibus: si dolet hoc, necesse est & illa condolare. Superiore anno de pace publica, Europæ restituta, cui conciliandæ etiâ pondus potentissimus **ELECTOR** noster per Legatos, illustres viros, addiderat, gratulati sumus: nunc est, quod de eadem pace gratulemur conseruata, quæ lubrica initio, & instabilis videbatur: sic tamen adhuc firma stetit, ut perstituram etiam in posterum non despere-
mus. Fuit nuper in Borussia, quod turbare illam posse videbatur: sed quæ diuina æquitas est & prouidentia, sine tumultu, sine periculo, aut incommodo ullius, prætermissum fuit. Quod vrbs incluta, nemine impediante, in ditionem est re-
ducta, **ELECTORIS** fuit felicitas: quod tuto possideatur, Eiusdem summa in pace & bello
maie.

maiestas est ac potentia, quæ in posterum etiam, Deo bene iauante, perficiet, vt tranquilla compositione, quæ iustitiæ legibus innixa est, caussa Elbingensis finiatur. Pacem itaque quum, DEO auctore, a PRINCIPE pacifico, clementissimo nostro DOMINO, habeamus, pacis etiam fructus, qui magni sunt & vberès, vt acceptos eidem referamus, officii est ac pietatis, quæ omnia accepta ad curam & meritum illius, a quo in nos profecta sunt, suo quemquæ modo referre postulat. nam quod solum fortuna eminens accipere potest, æstimando, prædicando referamus: refundere quæ dedit, & quasi vicem rependere, neque fors humilis nostra concedit, neque magnitudo illius & felicitas desiderat. Dulce nomen pacis est, & res ipsa salutaris, & tanta vberitas fructuum ex ea, vt ne omnes quidem possim recensere. Si enim pacem securitatis matrem, si publici horri radicem, si commodorum seminarium, si segetem opulentiae, si denique omnium nutricem nominauero, num putabitis a vero me aberrare? Ex pace certa spes salutis, quietis, tranquillitatis omnibus resurgit, vt nec plus sperari potuerit, nec spei responderi felicius. Tantum bonum serenissimus noster ELECTOR nobis præstat & tuetur, vt quæ ex illo emanant commoda, omnino eidem debeamus. Ad singula quædam, non ad omnia recensenda (nec tempus patitur arcte circumscriptum) Deo duce adgrediemur.

Diuturnitas pacis, qua fruimur, vim legibus conseruat, quæ silent inter arma: auctoritatem iudiciis confirmat, vt omnia iuste & ex æquo administrantur. O quam bene cum illis agitur, quibus certa per leges est possessio! vita tuta ab insidiis! fama secura aduersum calumnias! quia hæc demum tranquillitas est vitæ, si omnia, quæ nostra sunt, præsidio legum sunt munita, sunt tuta ab iniuriis priuatis, sunt etiam ab iniustis exactionibus. Florent commercia terra marique & per flumina: quibus omnium rerum copia confertur, paratur abundantia, vt nihil desit, quod ad commode viuendum est necessarium. Dat pax cultum agris, & ex cultus sedulitate prouentum; dat eadem sacris honorem; dat etiam, quod proprium nostri muneris est, litterarum studiis securitatem, quæ pace fouentur, pace aluntur, & in maius pace prouehuntur. nam strepitu armorum circumsonante, & vi Martis vastante agros, euerrente vrbes, quid aliud litteris superest quam tristis fuga & exilium? si modo sit locus aliquis bello vacuus, quo tuto possint confugere. In bello quidem nata est hæc Fridericiana, quod mirum videbatur: sed bello longinquo & partim externo; pacatis prouinciis Brandenburgicis: pace autem nunc illa conseruatur, & quod floret, quod accrescit, & quisque in ea suum accipit, id omne ex fructibus pacis est. Ex quo manifestum fit, qui Academiam tanto sumptu prouinciæ erigere atque animare statuit, id etiam præcipue prouidisse, quo

quo stabile sit opus suum, ac nutrimentis suis diturnum ac perpetuum; id quod prouinciarum pace præstandum, confirmandumque est, sine qua concuti facile possit aut aliquid detrimenti capere. Pacem ergo **PRINCEPS** pacificus vbique in prouinciis suis excitat, atque enutrit, & vt illa sit stabilior, armorum terrore confirmat, & id curis ac consiliis agit, vt cunctis ditionis suæ regionibus; & huic etiam Fridericianæ suæ pax & tranquillitas, quæ adiumenta studiorum sunt, conseruentur. Hæc enim coniuncta debent esse, etiam **Fuluii** Nobilioris exemplo, qui **Aedem Herculis Musarum** in circo **Flaminio** exstruxit, non id modo sequutus, quod ipse litteris, & summi poetæ, **Q. Ennii**, amicitia duceretur, sed quod mutuis opibus & præmiis iuuari ornarique deberent **Musarum** quies defensione **Herculis**, ac virtus **Herculis** & voce & litteris **Musarum**. Esse nobis & studiis nostris **ELECTOREM** potentissimum, instar **Herculis**, fortissimum defensorem, grata mente agnoscimus & gratulabunda voce prædicamus, & ex illius præsidio futuram quoque speramus tranquillitatem. Nec vero quod nostri muneris est, eiusdem **Fuluii** iudicio, nos vnquam obliuiscemur, vt **VIRTVTEM HERCVLIS NOSTRI VOCE MVSARVM ORNEMVS**; sed dies noctesque id agimus, agemusque perpetuo, vt voce, & magis litteris, quæ voce perenniores sunt, tanti **PRINCIPIS** & **CONDITORIS** **Academiæ** incredibilis virtus, & mirificus erga

erga studia litterarum fauor & beneficentia, æternis laudibus in posteris etiam celebretur, quia is dignissimus est, cuius gloriam & decus omnes litterarum cultores, nos maxime quos beneficiis cumulauit, perpetuo colamus, ut ex ingeniis, quæ ipse ornauit, etiam fructum capiat, nunquam interiturum. Ibit in sæcula, fuisse Principem inter Brandenburgicos Electores FRIDERICVM III, qui tanta cura & amore in rem litterariam exstiterit, ut post tres Academias, quas in prouinciis suis habuerit a MAIORIBVS constitutas, ipse quartam, de suo nomine appellatam, alieno quamlibet tempore, inter armorum strepitus & tumultus, tamquam in altissimo otio condiderit, conditam ornarit mirifice, & illustrato studiorum honore consequutus sit, ut STATOR litterarum fugientium ex meritis maximis ab eruditissimo quoque censeretur.

Hæc est gloria certa, quæ serenissimum ELECTOREM in sæcula manebit: & hoc est decus Fridericianæ, ex tanti CONDITORIS amore & indulgentia profectum: ut omnino habeat illa, quo gloriatur, se a sapientissimo PRINCIPE conditam esse, ut sedes liberalium litterarum esset, cui ipse auctoritate & gratia sua honestissimæ iuuentutis frequentiam conciliauerit, eamque suis curis ac optimis institutis non conseruet modo in optimo & florente statu; sed in dies etiam illustriorem celebrioremque faciat. Quidquid enim intra nostram mediocritatem non consistit,
CON-

CONDITORI serenissimo debetur; cuius generis id maxime mirandum est, quod a primo ortu in hanc usque lucem, grandior idemtidem grandiorque numerus a disiunctissimis terrarum oris ad hanc beatissimam bonæ mentis, ac melioris doctrinæ arcem confluxerint, ut inde exemplum sapientiæ, a sapientissimo PRINCIPE in ea repositæ consecratæque, peterent, & in patriam quisque suam transferrent, in suumque & suæ reipublicæ usum salubriter applicarent. Maximi enim CONDITORIS gloriæ, & splendori fulgentissimi PRINCIPIS iuuentutis, RECTORIS nostri MAGNIFICENTISSIMI, debemus, quod tot genere nobiles, tot virtute Maiorum illustres, in Academiam nostram aduentauerint, nunc nuper etiam illustrissimum ornamentum, cui iam par fortassis in omnibus Germaniæ Academicis non reperitur, serenissimus DVX HOLSATIAE, Princeps ac Dominus noster clementissimus, accesserit, qui sicut splendidissima præsentia sua honorem eximium attulit ad Academiam, ita ea quoque reuerenter illud agnoscit, & assidue operam dabit, ut summum Eius in studiis colendis feruorem, qui sane mirandus in tanta celsitudine est, summis ubique laudibus, qua fama transit Academiæ, prosequatur.

Hoc præfandum mihi fuit, Auditores, ut omnibus illuminate appareat, quantum patria nostra carissima, quantum prouinciæ Brandenburgicæ, quantum denique hæc Fridericiana serenissimi

ELECTORIS vitæ & salutis debeant, & quantum ab eadem, diuinitus, quod speratur, prorogata, expectent sibi in posterum. Ex quo manifestum est, quodnam hoc die, qui natalis est optimi **PRINCIPIS**, vniuscuiusque nostrum sit officium. Superiori anno precati a Deo immortalis sumus, ut æquabili fortunæ cursu incolumitas **PATRIS PATRIÆ**, eiusque **DOMVS** celsissimæ, cum prouinciarum & huius **Academiæ** tranquillitate conseruaretur; adiecta sponse sanctissima, si, vertente anno, conuicti eius deuotionis fuisset, maioribus nos victimis **DEO SERVATORI** gratias acturos esse. Conuictos nos omnes videmus, Auditores, quia quæ Deum rogauimus, data nobis ad vnum sunt omnia, & abundantius data, quam tum ipsi rogabamus. Nullum ergo nunc prius, nullum antiquius erit officium, quam ut voto, quo ipsi nos obstrinximus, hoc natali die nos exsoluamus. Prisci Romani hoc moris & instituti tenuerunt, ut quum natali die munus annale Genio soluerent, manum a cæde ac sanguine abstinerent, ne die, qua ipsi lucem accepissent, aliis demerent. Genium autem, quem natali die colebant, Deum interpretabantur, cuius in tutela quisque, ut natus est, viuat. Nos etiam anniuersarium munus persoluemus, verum, ut antea quoque dictum est, non Genio alicui; sed Deo immortalis, cui vota nostra adfiximus; & in cuius tutela, ex quo natus fuit, **ELECTOR** noster serenissimus viuit, & feliciter viuit, ac flo-

ren-

rentem DOMVM suam remque publicam ubique tranquillam & fortunatam videt; etiam hanc Fridericianam suam incrementum in dies maius & illustrius capientem. Ut cædibus Romani hoc die, sic omni nos impietate, omni ritu & consuetudine profana abstineamus, ne, dum Deum in futurum tempus, solutis votis prætermis- si, gratiisque, quas debemus, actis, propitiare ex officio studemus; nostris moribus nostrisque vitiis aduersus nos ultorem concitemus. Sic sanctiora sacra, quam Romani, faciemus, & auditurum Deum esse, quæ pro futuro anno vota nuncupaturi sumus, certissime speramus. Magna utique sunt, ut cognouistis, Auditores, quæ Deus serenissimo PATRIAE PATRI, quæ augustæ DOMVI ELECTORALI, quæ prouinciis ditionis Brandenburgicæ omnibus, quæ dulcissimæ nostræ patriæ, quæ huic etiam Fridericianæ hoc anno, quem exegimus, concessit, quibus si moram Deus & diuturnitatem adiecerit, cumulum bonis suis addidisse grata mente intelligemus, &, quæ pectore sentimus, voce, vita, studiis ætatem declarabimus.

Fac ergo, DEVS maxime, optime, ut diu serenissimus ELECTOR illis bonis, quæ dedisti, frui possit; vitam, quæsumus, da vegetam & longauam, da animum Spiritu tuo illuminatum, eundemque tuo firmatum robore, ut sapienter regat populos, quos ipsius ditioni subiecisti. Electoralem DOMVM, serenissimam CONIV-

GEM, LIBEROS vtriusque sexus, FRATRES, SOROREM, ADFINES & AGNATOS, clementissimos omnes Principes nostros, tuere ac conserua, vt gaudeat ELECTOR Necessitudinibus, quum florere omnes propitio fauore tuo cognouerit. Serua pacem prouinciis, quam dedisti; securitatem firma publicam, tranquillitatemque da constantem, ac nunquam desituram: & Fridericianam, honori tuo dicatam, fortunare Deus perge, tua potenti manu tueri perge, tuo lumine illustra, tuo ductu rege, vt CONDITOR tua lætetur bonitate, quum crescentem in dies, & magis efflorescentem, te auctore, intellexerit. Sed non ita futura vt dentur, precamur a Deo, quasi obliti simus, quæ accepimus, præteritorum. Secus pacti sumus superiori anno, quum vota pro SALUTE PRINCIPIS, pro publica tranquillitate ac pace, pro conseruatione & incremento Academiae faciebamus. Memores eorum sumus, quæ tum vouimus, quibus nos, si aduenerit Deus, adstrinximus. Soluenda illa sunt & reddenda. Verbis & sanctionibus, laudis victimas maiores tum pollicebamur. Laudamus ergo beneficium numen æterni Dei, quo tot innumeris nos bonis cumulauit: gratias voce agimus, animo habemus, quantas vel exprimere verbis vel concipere mente possumus: & hoc non vno die, sed perpetuo, quamdiu sumus superstites. Non enim tam verbis hoc, quam moribus, quam vita est perficiendum. Romani milites & prouinciales,

les, imperii die suscepti redeunté, quem instar natalis, aut magis coluere, præeunte legato consulari, aut provinciæ prætore, iusiurandum singuli repetierunt, quo primum in verba Principis iurauerant, pietate sic certantes ac noua fidei obsequiique in singulos annos pollicitatione: atque ita demum VOTA PVBLICA reddiderunt, & dies ille, vt Plinius Secundus ait, DEBITA LAETITIA ET RELIGIONE CELEBRATVS FVIT. Recte factum & ordine. Exsoluturi nos vota nostra, superiore anno pro SALVTE PRINCIPIS, pro publica incolumitate concepta, quod gratias agendo, vt polliciti sumus, præstari debet; non id dignius, non religiosius perficiemus, quam si ad sacramentum, quo obligati sumus serenissimo ELECTORI, quotidie respiciamus, & idemtidem id animo reuoluamus, faciamusque cum fide quod promissimus. Id quod vobis etiam, generosi & nobilissimi IUVENES, Academiæ huius CIVES, qui eodem vel pari vinculo, tam serenissimo ELECTORI, quam Academiæ Eius deuincti estis, cum primis obseruandum est, vt semper memores sacramenti vestri atque pacti, quo recepti in numeros, æque vt milites, fuistis, aut in ciuitatem adscripti Academicam, religiose ac pie faciatis quod tam sancte omnes compromissistis. Sic demum vere vota facietis hoc natali die: & sic etiam superioris temporis vos voto exsoluetis.

Reliquum est, Auditores splendidissimi, ut serenissimo PRINCIPI ac ELECTORI, PATRIAE PATRI indulgentissimo, de quadragesimo tertio natali, faustis sideribus hac luce reducto, & de cumulatissima, quam is simul attulit, salute ac felicitate, publice gratulemur. Et tanto impensius gratulabimur, tantoque sincerius ac maiori religione, quo perspectior probatiorque est Eius erga Fridericianam suam mirifica & singularis indulgentia. Experimur quotidie, quo adfectu, qua clementia in hanc sedem liberalium litterarum sit, nec credo in Principibus sæculi nostri esse, qui illustrioribus documentis, quanti bonas litteras faciat, orbi exposuerit. Ut cetera, & alio tempore demississime laudata, prætereamus, quantum illud est, quod nuperrimis litteris significavit, se clementissime constituisse, ut serenissimus iuventutis PRINCEPS, vnicus & tenerrime dilectus FILIVS, exacto quinquennio imperii Academici, etiam sextum annum præsit nobis & Fridericianæ RECTOR MAGNIFICENTISSIMVS? nec de sexto tantummodo anno, sed de futuris etiam temporibus, quod maxime demirandum laudandumque est, eadem clementissima voluntate prospexit & ordinavit. O nimium dilectam CONDITORI suo Academiam! quod pignus carius amoris in eam sui singularisque clementiæ possit dare, quam celsissimum NOMEN carissimi, quem vnice amat, in spem Electoratus &


tot

tot prouinciarum geniti FILII? Non credo, post conditas singulas Academiæ, in tanto fastigio, ad tantam spem natum PRINCEPEM tot annos suæ præsedisse Academiæ. Honor ingens inde, & splendor, & auctoritas accedit Academiæ: ad celsissimum autem FILIVM RECTOREM nostrum clementissimum, hoc non inani titulo defertur virtutis incitamentum, vt adolescens adfuescat cum Musis versari, præclaras litteras amare, & maximi PATRIS exemplo easdem fouere, ornare, & in maius illustriusque promouere: ad ipsum denique serenissimum PARENTEM, nostrum mitissimum DOMINVM, ex hoc redundat immortalis gloria, per omnium sæculorum memoriam duratura; esse illum prope vnicum Principem nostrorum temporum, qui pro sapientia sua præclaras litteras & liberalia studia, vnde salus est reipublicæ, ex vero æstimare possit, & suam illis dignitatem restituat ac tueatur: quæ vicissim erga illum non ingratae sunt. sed voce, scriptis gloriam illius, a quo ita ornatae sunt, æternitati, quam solam gratiam referre possunt, commendant, & perpetuo commendabunt. Hæ rationes sunt, & momentorum pondera quibus publice demonstrandum erat, quum & aliæ Academiæ suis quæque Principibus idem idem gratulentur, nostram SVO gratulari sincerissime, hoc est, non quod ita consuetudo aliarum ferat, sed quod inusitata clementia, & incredibilibus beneficiis se

magis, quam ceteras, deuinctam AVCTORI suo esse intelligat.

TIBI ergo, potentiſſime ELECTOR, DOMINE clementiſſime, gratulamur, noſtram lætitiā, publicā lætitiā, ex natali TVO nobis ortā, publice teſtamur: quā carus DEO TVO ſis, cuius numine tam felix es, lætabundi admiramur, & auctorem felicitatis TVÆ æternis laudibus proſequimur. Pro ſalute TVA, quæ noſtra nobis carior eſt, certatim quondam vota nuncupauimus: audiuit Deus, & dedit quæ precati fuimus, TE ac Tuos incolumes conſeruando, & TVAM augendo felicitatem: noſtram quoque tranquillitatem, immo publicā, prorogando. Concepimus quoque in futurum vota, conuerſo anno, ſi adnuerit Deus, perſoluenda, quæ non minus, quā ſuperiora, confidimus Deo rata fore, vt dies hic quotannis lætior felicioꝛque & TIBI & TVIS & nobis omnibus recurrať. Deus TE ſeruet PRINCEPS optime, PATER clementiſſime: Deus vitam TVAM ſeruet, ſalutem ſeruet, annos augeat, imperium fortunet, gloriā in ſæcula transmittat. Tot annis expertus cæleſtem bonitatem, ſpem bonā quoque concipe, nec ſequuturis temporibus eandem TIBI defuturā. Vide ſtudio omnium ditioni Tuæ ſubiectorum, idē nunc ſentientium, id eſt, certatim precantium a Deo ſalutem TVAM. Non infructuoſæ poſſunt preces eſſe hominum innumerabilium pro TE vno die, vna hora Deum ſollicitantium: non irrita vota
legi-

legitime ab omnibus nunc suscepta, consignata, & memoriz causa adfixa. Erit circumacto anno dies, quo gratias Deo agamus, quo TIBI & felicitati TVÆ gratulemur, quam speramus & prædicimus, clementia diuina confisi, in posterum quoque conseruatura iri. Gaude ergo TVIS bonis, PRINCEPS optime, & fruiere gloria bonitatis TVÆ, iustitiæ TVÆ, amoris TVI litterarii, vt æternum gaudeas, & gloriæ TVÆ intersis, eiusque præsumas immortalitatem, videns & præsentiens, quam æque posteritas, quam honorifice de virtutibus TVIS, de meritis maximis perpetuo sit iudicatura, quia iam omnes tam sincere, tam digne de gloria, quam consequutus es, iudicant, & facta tua in cælum attollunt. Ea est vera vita, quæ in animis, in memoria posterorum, manente & vigente gloria, æternum viuitur, quam vtique viuis viuesque immortalem, quia cum aliis innumeris, tum maxime diuino facto, dedicatione Academiæ, meritis es gloriæ perennantis immortalitatem.



ORATIO VII.

FRIDERICO III.
MARCHIONI BRANDEN-
BURGICO, SACRI ROM. IMPE-
RII ARCHICAMERARIO,
CETERA.

DE NATALI XLIV

FAUSTIS SIDERIBVS

V IDVS IVLII clō lō cc

EXORTO,

Habita.

QUum plausus & faustæ gratulationes ex
 auspiciatissimis NVPTIIS HAS-
 SO - BRANDENBURGICIS
 resonare nondum desierunt, nouum
 lætandi gratulandique argumentum de cælo ad-
 fertur, serenissimus DIES NATALIS poten-
 tissimi ELECTORIS BRANDENBUR-
 GICI, DOMINI nostri clementissimi, in tan-
 tum indulgente cælesti providentiâ, vt Branden-
burgicis gentibus nunquam gratulationum voto-
rumque soluendorum finis sit, quia nullus finis est
 continuandæ felicitatis publicæ. Huius enim
non mediocris accessio fuit, quod tanti Principis

ac Electoris FILIA vnica, decus, sui ordinis atque
sexus, tam faustis auspiciis cum iuueni PRIN-
CIPE, Maiorum æque gloria & suis virtutibus
fulgentissimo, coniuncta, atque ita inter potentes
domus, Brandenburgicam & Hasso-Cassellanam,
olim initum fœdus, sæpiusque repetitum, hoc no-
uo connubio firmitus est factum denuo. Tan-
tæ felicitati, qua omnes lætamur, ingentem cu-
mulum dies hodiernus addit, qui, propitio celo
reductus, indulgentissimum PATRIAE PA-
TREM saluum & incolumem, stante ac floren-
te republica & hoc litterarum domicilio, diuina
benignitate seruatum reddit, idemque tanto spem
maiores facit futuræ, eiûsque in maius proue-
hendæ, prosperitatis, quanto luculentiores nos
hoc anno & sæculari cardine ad bene sperandum
salutis atque lætitiæ præfagia exhortantur. Con-
tingit enim mihi, nescio qua sorte, diuina tamen
quod non dubito, vt singulare dicendi argumen-
tum reuolutio temporum atque ipsius sæculi or-
do & successio præstet. Ersi enim cuncta tem-
pora & ortu suo & continenti decursione sunt
paria, ab omni tamen antiquitate creditum fuit
vim quamdam illorum ordini inesse, si ambitu
quodam in se definiantur, & in orbem quasi cum
cæli motu redeant, vt ille annus, quo cardo ver-
titur, omen quoddam præ ceteris temporibus
habeat: & si ille feliciter conuertatur, spem non
incertam faciat, benignitate fatorum fore, vt fu-
tura quoque tempora sine offensa fortunæ, &

qua-

quabili processu tranquillitatis, promoucantur: quia primum ad spem est & fiduciam, quod nomen adhuc pro nostra salute vigilauit, ei eandem quoque in posterum curæ futuram esse, nisi ipsi bonitatem eius, quod abominor, abalienemus. Sic Romanorum principes quinquennialia, decennialia, vicennialia, tam votis quam ludis varii generis celebrauerunt, quod ex præteriti temporis decursione augurium futuri capiebant, non desore illius similem felicitatem, quæ priorem orbem temporis secundo cursu circumegisset. Quo maior ambitus & circuitio temporis, eo certius Romanis augurium erat, ut ita illa lege centesimus quisque annus, capacissimo descriptus circulo, eximium aliquid prosperimumque polliceatur in posterum. Si per se quisque natalis dies ad sperandam felicitatem, exactæ seu perceptæ similem, valet: quanto maiorem ex illo die, qui in annum sæcularem incidit, prosperitatem sperabimus, quam non simplex sperandi ratio, sed tot præclaris ominibus corroborata, & euentu adhuc & faustis exemplis comprobata, haud dubie, sed certis significationibus promittit? Quoad mens respicere præteriti sæculi spatium potest, & eorum meminisse, quæ partim nostra gesta ætate sunt, partim ex annalibus obseruata; hoc sæculare tempus, quod exegimus modo, serenissimæ GENTI BRANDENBURGICAE video salubre ita & tam felix ac fortunatum exstitisse, ut priora tempora cuncta,

fi cum illo conferantur, exiguum momentum, quamlibet per se magnum, ad comparisonem adferant. Nec in Romano imperio facile Princeps est, cuius domui tanta vno sæculo potentia adcreuerit, vt tot amplissimis prouinciis hereditario iure aut transactionibus potiretur, tantisque victoriis rebusque maximis gestis auctoritatem summam & felicitatis fastigium obtineret. Vix ortum erat illud sæculum, quum opulentis prouinciis Cliuensi, Marcana, Rauensbergensi possessiones augerentur Brandenburgicæ. Ad medietatem illud tempus inclinabat, quum Pomerania vtraque certo iure iisdem, quod nemo dubitabat, accederet: vltior etiam, quam longa est, eadem tempestate obtineretur; citerior, pace Germaniæ sic exigente, cum magnis & præclaris regionibus, Magdeburgensi, Halberstadiensi, Mindensi permutaretur. Iisdem prope temporibus, quo Cliuensem Ducatum & Westphalicos Comitatus DOMVS BRANDENBURGICA consequuta est, Borussia quoque ad eandem, hereditate itidem, vel vxorio iure, translata fuit, sed vt suprema potestas penes Polonos esset: quo nexu post medium sæculum. FRIDERICVS WILHELMVS Magnus exsoluit, vt summo ipse iure ac immunitate possideret, atque ita immunem liberamque in posteros etiam transmitteret; insuperque Pomerelliæ non exiguas partes consequeretur. Quid de rebus bellicis & indidem parta gloria dicam?

cam? Gesserat magnas res ALBERTVS Elector, inde Achilles Teutonicus cognominatus: gesserant etiam alii Marchiones & Electores Brandenburgici; sed maiores utique gessit Magnus FRIDERICVS WILHELMVS, quas eadem magnitudine gloriaque FRIDERICVS III, PATRI par felicitate, continuat & auget; vterque & opum amplitudine, & eximia potentia, & inuicto exercituum robore cum Regibus comparandus. Quid de navigationibus in Africam & Americæ litora institutis dicemus, quibus omnes Principes Germaniæ superantur? scilicet maior virtus huius Gentis est, & excitior eius gloria, quam ut Germaniæ contineri finibus, aut vicinarum regionum potuerit: in transmarinas nationes penetrauit, & extra Europæ limites sedem fixit, castella muniuit, & sic terrarumque potentiam suam validissime tuetur. Tantum decus, tantumque, quod cælo imputamus, incrementum indepta Gens Brandenburgica est transacto sæculo, quod utique in memoriam hoc die reuocamus, quia hic natalis, siue præteriti sæculi postremus, siue primus ineuntis est, certe in medio inter vtrumque sæculum constitutus est, ut tam respiciat in prætermissa tempora, quam futura augurando ominandoque diuinet ac præsentiat. Ingentia Dei munera sunt, quæ contulit hoc sæculo in serenissimam DOMVM Brandenburgicam: cui ut gratias hoc natali die agamus, utique officii nostri est & omnium illorum,

lorum, qui deuinctos se huic potentissimæ FAMILIAE intelligunt: simul vt bene de futuris speremus, nostramque spem piis precibus & votorum nuncupatione confirmemus. Ceteris natalibus, superioris anni beneficia, diuinitus conlata, expendebamus; præsentī hoc, superioris sæculi sunt expendenda, quia sæcularis anni natalis est, & in sæculum ante actum, quam longum est, respicere iubet, & quidquid bonorum eo spatio Brandenburgicæ Genti accessit, grato & lætabundo animo reuoluere ac pensitare. Dicis fortassis mihi, quid opus sit, vetustarum rerum & obliuiscitarum memoriam effodere, quum omnino satis videatur, prætermisiss antiquioribus, primum serenissimi ELECTORIS natalem, quo in lucem editus est, repetiisse. Ita alio tempore agebamus, & id nostro sufficiebat instituto; non autem æque præsentī tempori: cuius est quoque non negligere, quæ sæculi vniuersi sunt, quia non postremis demum temporibus serenissima DOMVS ea incrementa cepit, sed altius & ab initio sæculi repetendum est, quibus causis, & qua fortuna, id est diuina prouidentia; quibusque auspiciis & parta fuerit felicitas Brandenburgica, & aucta eadem, & ad hoc, in quo stat, fastigium adducta sit. Quod potius enim gratulandi argumentum natali die potest esse, quam felicitas ELECTORIS & DOMINI nostri? Quid propius instituto, quam ab origine & causis felicitatem explicare? quæ quod per
sæcu-

sæculum recurrunt ad sua initia, inde quoque repetenda sunt, præsertim hoc tempore, quo sæcularis acceptorum memoria cuius non ingrato homini, nec desidi in officio, est recolenda. O mirificam æterni Numinis erga BRANDENBURGICAM DOMVM per integrum sæculum benignitatem & clementiam! cui enim genti, quibus principibus ita bona sua cumulavit, ut Brandenburgicis? & quibus tanta incrementa possessionum dedit, quanta iisdem Brandenburgicis? tantam concessit, auxit, conseruauit felicitatem, quanta huius DOMVS ELECTORALIS diuino beneficio & prouidentia est? Quid felicius foret, quam si Deus his muneribus suis adiceret perpetuitatem? sed additurum esse non est quod dubitemus, quum æterna sit eius bonitas & immutabilis, cui solemne est benefacere, & mereri de genere humano: pro quo nihil vicissim reposcit quam memoriam beneficiorum; nihil grauius detestatur quam eorumdem oblivionem. Beneficentia fidus Deus est: ubique radios diffundit suos, quos nec retrahit, neque nubibus inducit, nisi homines se ipsi auertant, illos declinent & aspernentur. Ea autem, Auditores, est conditio nostræ patriæ, & Brandenburgicarum prouinciarum omnium, ea sacrorum cura & puritas doctrinæ cælestis; ea iustitia sanctis legibus custodita, ut spes omnino super sit, quæ abundans adhuc in Brandenburgicam GENTEM diuina fuit clementia, eam nec in posterum de-
 futu-

futuram esse, præsertim quum omni studio id egerimus, ut votis precibusque piis & moribus castis diuinam illam beneuolentiam retineamus. Bene ergo speremus de nouo sæculo, non minus faustum serenissimo ELECTORI nostro, & vniuersæ GENTI Brandenburgicæ, & nostræ etiam Academiæ fore, quia auspicia omnia adducunt, & non minorem felicitatem, quam adhuc fuit, in posterum quoque futuram esse promittunt. Quæritis, Auditores, quænam sint illa auguria, quibus confisi tanta bona prænuntiemus. Diximus de æterna Dei erga nostram patriam eiusque PARENTEM, tot adhuc significationibus, tot illustribus exemplis declarata benignitate, quæ utique non auerteretur, nisi nostris illam ab recto auersis moribus interuertamus. Accedit serenissimi PATRIÆ PATRIS incolumitas per tot annos sine offensa valetudinis conseruata, quam hoc maxime natali die ad animum proponamus, idem idem cogitantes, quanta in illo sit nobis salus data, quanta felicitas addita, quia Principis salus omnium quoque salus est & prosperitas, qui ditioni subiecti, eius cura, præsidio, ac virtutis robore tuti sunt & tranquille agunt. Id enim in cāssa fuit, ut maiores nostri, cordatissimi mortales, si cui natalis dies incolumi atque saluo rediisset, fausta inde & felicia ominarentur, futurum scilicet in posterum esse, ut, quæ tam auspicato die salus certa esset, eadem nec deinceps vacillaret, sed diutis-

sime, æquabili fortunæ cursu, florente eius ro-
 atque familia, conseruaretur. Quod quidem sicuti
 iustam rationem in priuatis hominibus habuit,
 ita certiozem habebit in tanto PRINCIPLE &
 tot prouinciarum RECTORE atque PATRE,
 pro cuius salute tot vota quotannis, quot
 mensibus, immo quotidie concipiuntur: quæ
 quum rata fuisse cum primis natali die intelliga-
 mus; cur non de huius etiam diei votis, ab incre-
 dibili multitudine hominum aut iam conceptis
 aut mox concipiendis, speremus itidem, non fo-
 re irrita, sed tanto fructuosiora, quo plura non
 vnus anni, sed sæculi vota sæculari hoc tempo-
 re coniunguntur, vt futuro quoque Branden-
 burgicis rebus propitius Deus sit, & in quem lo-
 cum felicitatis perduxit eas, in eodem etiam per-
 petuo conseruet, ac pro mirifica bonitate addat,
 prouchar, quousque commodum & salubre vi-
 sum fuerit. In eo itaque statu, Auditores, res
 nostræ sunt, vt speremus & confidamus fore, vt
 adnuar Deus nostris votis atque precibus, sicut
 nunquam adhuc fuit infructuosa esse aut irrita,
 quæ calendis Iuliis ab ipso tot annos pro E.L.E-
 CTORIS & publica salute precati sumus. Nec
 incertum augurium est quod ex ipsa nostra Fri-
 dericiana Academia accipimus. Condita illa fu-
 it, vt nostis, armorum strepitu circumsonante,
 fremente undique liuore ac inuidia, vt multi, qui
 de futuris conicere suæ disciplinæ credebant
 esse, difficiliores eius progressus & incrementa
 fore,

fore, quam initium fuerat, sibi persuaderent. Vicit vero Brandenburgica fortuna, & propitio Numine factum, ut magis magisque per annos floreret, hoc autem sæculari Christianorum tempore, quod felix omen esse existimo, florentior multum sit, numeroque frequentior aduentantium. Quis ergo exinde non diuinabit, nouo sæculo eandem illius fortunam fore, & incrementa maiora habituram? quæ consequuti si fuerimus, ut minime dubitamus, utique etiam salus publica, felicitasque temporum, quam Romani sæcularibus ludis precabantur, auctior meliorque futura est, quia, ut possit esse, ipsa studia litterarum, quæ in Academiis excoluntur, efficiunt. Ea enim beata est respublica, in qua singuli cives honeste viuunt, ius & æquum colunt, quod turpe inceptu, turpe exitu, defugiunt atque vitant. Quare quæ res animos hominum efficere meliores, eorumque naturam adiuuare potest, uti facilius ad id, quod bonum rectumque est, perducantur; ea profecto ad beandam ciuitatem vel rempublicam, plurimum adferre censenda est. Nota enim est hominum asperitas, noti barbari & inconditi plerorumque mores, qui nisi colantur, emendentur, tristis sane & horrida est rerum facies, & inculta potius illuvies vitiorum, quam vera & ordinata societas hominum. Litterarum autem illud munus & beneficium est, ut hominum mores ad civilem vitam ac moderationem rerum omnium addu-

cantur, a quibus magni & incomparabiles fructus ad reipublicæ salutem stabilitatemque perveniant. Quod si nihil boni aliud litterarum studia ad communem utilitatem adferant, quam quod morum asperitatem emolliunt, ciuilioremque vitam in ciuitates & hominum conuentus inducunt; multum tamen esset, quod culturæ illarum mortalium genus acceptum referret. At plura omnino disciplinæ & liberalia studia ad rempublicam, ut fortunata sit, adportant, quia eruditio in homine sapientiam virtutemque, si quæ insita & innata est, adiuvat, ut aliquid magnum eximiumque inde proficiscatur. Quo enim plures in hominum societate sunt, qui ex litterarum disciplina intelligunt, quod rectum iustumque; & quod summum humanæ vitæ bonum, quo actiones omnes, consilia omnia referenda: quod cuique officium patriæ, quod imperantibus, quod ciuibus atque amicis impendendum, quo, inquam, plures hæc didicerunt, eo beator est illa respublica, quia facilius bonum homines, quod intelligunt, faciunt, quam quod ignorant; facilius vitant vitia quorum sorditatem cernunt, quam si maximo errore pro recto & bono habeant. Iam vero condita est hæc Academia, & tribus Brandenburgicis superadiecta, ut nulla vspiam in Brandenburgicis prouinciis occasio desit discendi bonas litteras & honestas disciplinas, & per illas consequendi felicitatem publicam. Ut vero, supra quam sperabamus, hæc Academia ita creuit,

creuit, vt quamlibet recens, cum antiquissimis numerofissimisque certare possit; sic ex flore eiusdem, sub exitu sæculi se proferente, non tam coniciimus, quam diuinamus, futurum esse, Deo bene iuuante, vt maturior facta ineunte sæculo nouo, & plures & præstantiores fructus ad rempublicam & patriæ salutem adferat. Quod si hoc, vnde omen petimus, spem nostram non fefellerit, sicut adhuc eius rationes bene constiterunt; consequens esse quis non videt, vt cum incremento Academiæ virtus & sapientia, ex litterarum studiis profectæ, larius per provincias disseminentur, & qui proprius earum fructus est, rerum omnium statum feliciorem proferant? Quod si enim plures litterarum doctrina imbuti sunt, illis quoque consulitur recte, quorum laus in obsequio est posita, vt pareant iis, qui plus intelligunt, & ope ac consiliis alios possunt adiuuare. Omnes litterarum studiis operam dare, per humane vitæ ærumnas nequit fieri, & satis bene agitur cum republica, si illi, quos Deus in rebus auctoribus collocauit, pectus earum artium cognitione impleant, quibus instructi rempublicam capessere, eamque tutari ac stabilire possint. Quod quum præcipue fiat in Brandenburgicis regionibus, in qua tot illustres Academiæ, tot domicilia litterarum ac bonæ mentis sacraia, & honesti ac virtutis arces atque præsidia sunt ideo constituta, vt præclaris artibus iuuentus erudita, quod optimum, sectetur, suamque rempublicam & ornet pulcher-

rime, & virtutis, quod tenet, præsidio tueatur.
 Videtis sic, splendidissimi Auditores, quantum augurium felicitatis det litterarum florentior status, nostræ præsertim Fridericianæ Academiæ: ut ex illa quoque spes nostra confirmetur, felix ac fortunatum, quod natali die precamur, insequenti sæculo imperium FRIDERICI III, Domini nostri indulgentissimi fore, quia sub sapientissimo PRINCIPLE, litterarumque fugientium statore defensoreque instituuntur permulti, qui ad ministri sint olim in republica ex prudentiæ præceptis atque legibus gerenda: plures, qui priuatas res suas bene administrent, virtutem colentes, & erga quemuis obseruantes iura æquitatis. Respublica composita ex societatibus est, societales ex hominibus singulis, quorum si quisque facit, quod suum est, & ut leges sapientiæ præcipiunt; vniuersa profecto respublica se bene habet, & in maius meliusque successu temporum promouetur. Tam clarum augurium ex prouentu litterarum elucet, quibus ad vtrumque statum, pacem & bellum, generosa pectora præformantur, maxime tamen ad pacem & tranquillitatem; quia liberales illæ disciplinæ sunt otii & quietis honestamenta: & pace, quam bello, vberius proueniunt, & fructus copiosiores ferunt, eosque ad tutandam pacem & tranquillitatem conferunt. Id quod etiam serenissimo ELECTORI, Principi nostro vere pacifico, maiori curæ est quam vel clarissimi triumphi & victoriæ. Vnde nouum nobis status optimi,

optimi, hoc est felicitatis publicæ, augurium existit, quia potentissimus ELECTOR robur & potentiam suam magis ad pacem conseruandam, quam ad maiorem ex bellis comparandam gloriam, impendit. Quod enim ad Albim nunc copias eduxit, non belli gerendi, sed pacis firmandæ id causa fieri, quis nostrum est qui ignoret? Omnes futurum sperant, ut Cimbrici motus, antequam proferantur longius, HVIVS virtute auctoritateque sedentur & comprimantur, & pax, nuper Germaniæ reparata, perpetuo conseruetur.

Qua enim is incredibili sapientia est, optime intelligit, quantum pax bello præstet, qua sola vis legibus, iudiciis auctoritas seruetur, sacris suis homines manet, & cultus agris, securitas hominibus, & certa cuique rerum suarum possessio: ipsa quoque litterarum studia, quantumvis bello nata, pacato statu reipublicæ fouentur, crescent, florent, & pulcherrimos rei publicæ salubres fructus proferunt: quæ omnia, ubi armorum furor facere cepit, percussa & prostrata in magna vastitate iacent.

Dulce nomen pacis est, dulce libertatis: sed pax & libertas, sine armis defendi & conseruari nequeunt, ut ille demum pacem tutam habeat, cuius arma parata sunt ad repellendum quidquid hostile ingruerit. In hoc etiam serenissimus ELECTOR, quod BONI PRINCIPIS est, egregie præstat, dum ita pacis studiosus est, ut bellum quoque profligare valeat, quod nisi utrumque coniunctum sit, intuta pax,

& seruitus magis quam tranquilla est securitas.
 Sed quorsum hæc disputamus? Omina natalis
diei, coniuncta cum ominibus sæculi vertentis, in
hanc nos digressionem abduxerunt; ut & diem
 hunc auspicalem, & annum sæculi finitorem,
 fausta omnia non superstitiosis hariolationibus,
sed certis ac claris auguriis significare demonstre-
 mus. Est in illis æterna Dei bonitas cum antea
 longo tempore, tum maxime per sæculum, quod
 finimus, Brandenburgicæ Genti luculentissime
 declarata, quæ dum sub noui sæculi auspiciam
 immota, constans, & eadem manet, quæ superio-
 ri tempore fuerat; an est quisquam qui dubitet,
 Deum proinde etiam sæculo, quod inimus, pro-
 pitium fore, & bona bonis, ut solemne ipsi est,
 continuaturum? Est etiam incolumitas serenissi-
 mi ELECTORIS, tot hominum precibus, tot
votis conceptis Deo commendata, ut nefas sit du-
bitare, quin idem auditurus sit, quod tot po-
puli iam precantur atque contendunt. Est
 quoque ipsius PRINCIPIS atque ELE-
 CTORIS ingenium mite atque pacificum,
 cuius incomparabilis virtus quum robore legio-
 num præmunita sit, maius inde arbitrium pacis
 penes ipsum est, eoque id eueniet, ut diuturnio-
 ri tranquillitate & respublica & otium litterari-
 um stabiliatur. Est denique huius Fridericianæ
 Academiae non mediocri incrementum, ex quo
 non possumus, quin sæculi felicitatem expecte-
 mus, quia iuuentute præclaris artibus instituta,

reipu-

reipublicæ præficiuntur, qui ex æquo & bono administrant, quorum exemplis, perinde ut præceptis, docentur alii, quum ipsi faciunt quod aliis præcipiunt, ut utrobique virtutis honestatisque, qui optimus status est reipublicæ, ratio habeatur. Tantum commodum & ornamentum reipublicæ litterarum studia & præclaræ disciplinæ adferunt! quibus apud nos singulari adiumento est, quod serenissimi CONDITORIS gloria exteros æque ac indigenas in hanc opinionem, aut firmam potius persuasionem inducit, id quod a Principe sapientissimo institutum conseruatumque sit, non posse non sapienter esse dispositum, & omnibus numeris fructiferum atque perfectum. Accedit splendor maxime coruscus ex fulgentissimo nomine serenissimi **IUVENTVTIS PRINCIPIS**, Rectoris Academiæ Magnificentissimi, Domini nostri clementissimi, quem optimus **PATER** tot annos Academiæ suæ præesse voluit, & nunc quoque illam benignissimam voluntatem non desinit prorogare, clementissime indulgens, ut etiam septimo anno carissimus **FILIVS**, quem vnice amat, Fride-ricianæ suæ **RECTOR MAGNIFICENTISSIMVS**, quod felicissime vertat, proclametur. Multa iam auguria obseruabamus, quæ futuræ felicitatis certiores nos faciebant, quorum præcipuis hoc puto adiiciendum esse, quod ex præsidio iuuentutis **PRINCIPIS** captamus. A teneris initiatus Musarum sacris, iam ea est ætate, ut ipse intelligat, repetito toties hoc Academico honore,

litterarum studia eorumque præsidium ab indulgentissimo PARENTE commendari, quæ etiam obsequentissimus FILIVS, commendatissima sibi habet, & magis atque magis, adultior factus, in posterum habebit. Numquam enim Academiam desinet fouere, quam ipse rexit, quæ cum ipso adoleuit, cum cuius incrementis suos annos PRINCEPS laudatissimus numeravit. Quod reliquum est, gratias Deo agimus atque habemus, qui votis nostris, superiori anno pro salute EIVS, quem PRINCIPEM populi esse voluit, nuncupatis, benignissime adnuitt. Quod enim ille saluus, id tuum munus est, æternæ Deus: quod incolumem & florentem videt rempublicam, etiam munus tuum est: quod CONIVGEM saluam videt, quod LIBEROS florentes, & in his FILIAM feliciter desponsam, id tuo numini, tuæque providentiæ imputamus. Te laudamus, qui Brandenburgicam rem in sublimiorem locum, quam unquam fuerat, superiori ætate euexisti; euectam, ut bene consistat, stabilivisti firmissime. Seruæ quæsumus, quem PRINCIPEM dedisti nobis: seruæ, quibus ornasti illum, diuina tua munera: da vitam longævam, da FAMILIAE incolumitatem. Servæ felicitatem imperii, fortunam provinciarum, florem huius Academiæ, auspiciis tuis, ipsius ductu conditæ, & tuo numine in maius meliusque adhuc prouectæ; ut singulis circumactis annis, votorum damnati maiores tibi maioresque gratias agamus. Tibi vero serenissime

ELE-

ELECTOR, DOMINE clementissime gratulamur, TVIS bonis, TVA vita, TVA felicitate nimio opere lætamur, nostramque læticiam & gratulationem publica voce, lætabundo gestu, magnis plausibus significamus. O quam carus Deo tu es, qui tantis Te bonis cumulauit! Nunc intelligimus preces & vota nostra, pro salute tua suscepta, numquam infructuosa esse, quia, quæ precabamur superiore anno, reddita nobis sunt omnia, & plura ac maiora data, quam precabamur. Gaude ergo bonis TVIS PRINCEPS optime: suffice muneribus diuinis: quibus ut semper gaudeas, TVO nomine, pro TVA salute, pro felicitate TVA, vota noua non vnius anni, sed vicennalia, triennalia, & ampliora etiam facimus, & quotannis renouabimus, ut salus TVA & felicitas per longam sæculi, quod inimus, partem TE comitetur. Gloria autem TE semper comitabitur, quam tum aliis maximis TVIS operibus, tum diuino facto, dedicatione Academiae, meritis es immortalē.



ORA-

ORATIO VIII.

FRIDERICO
REGI BORVSSIAE,
MARCHIONI BRAN-
DENBURGICO,
CETERA,

DE NATALI XLV.

FAVSTIS SIDERIBVS
CALEND. XI IVLII clb lccc.

DE CAELO REDVCTO

Dicta.

MAius religionis munus sanctiorque reuerentia ad accuratiorem, quam unquam fuit, NATALIS huius celebrationem nos obstringit, Auditores. Etenim natales dies sunt ideo festi & venerabiles, quod quæ illis bona nobis, vel iis quos amamus, quosque colimus, diuinitus annis singulis contigerunt, in animum atque memoriam iucunde nobis reuocant, nosque idem idem admonent, ut solutis prioribus, nuncupatisque novis votis procuremus, quæ pietatis lege cælo sacrificia debentur, cuius benignitate nos, ac nostros ser-

VATOS

vatos intelligimus. Academia officium suum gratulabunda fecit, quoties, ex quo condita fuit, annorum reuolutione hæc auspicata lux adfulserat; & annis singulis iustas rationes habuit vt faceret: sed nunquam iustiores quam hoc præsentī die. Per sacrum numerum percucurrit Academia, & septies deuotione illa, quam augusto CONDI-
TORI suo & SERVATORI munificentis-
simo debet, natalem auspicatissimum inter preces
& vota, faustasque acclamationes celebravit, atque
ea omnia perfecit, quæ cum illius diei religio &
cærimoniæ, tum cultus noster demississimus &
pietas exigebant. Nunc vero, quum octauum
hæc lux nobis exorta est, augustiorem illa vene-
rationis & obseruantia speciem commendat, quia
cum nobis de cælo natalem post quadraginta qua-
tuor adducit, qui superioribus maiestate sua mul-
to splendidior existit, & REGIVS primus nata-
lis est, quem tanto deuotione pietateque colamus,
quanto REGIA MAIESTAS omnes reli-
quas supereminet dignitates. Qui natales religiose
agunt, cum vniuersa ab ineunte ætate, tum maxi-
me exacti anni diuina munera expendunt, & gra-
to animo recolunt, quæ quo illustriora exstite-
runt, eo maiorem splendidioremque lætitiā ad-
ferunt, & ad opimiora vota, si adnuerit Deus, in
futurum etiā adstringunt. Iam propius ad rem
maximam, quæ propria huius diei est, accedimus
explicandam. Nostis, Auditores splendidissimi,
mirre ingentia & sublimia omnia esse, quibus tam

nostra, quam patrum memoria beneficium Numen
excelsissimam DOMVM BRANDEN-
BVRGICAM ornamentis incrementisque
ampliauit adeo, vt maiora conferri aut aliquid ad-
di posse vix quisquam nostrum crediderit. Hoc
vero, quem agimus, anno, aut, si natalibus finire
vultis tempora, anno, qui heri exiit: tantus ac-
cessit cumulus, cælesti benignitate, vt nunc per-
fecta demum felicitas & summa videatur esse, an-
tea tantum magna & eximia fuisse. Postquam
enim serenissimus potentissimusque Princeps &
Dominus, Dominus FRIDERICVS, Mar-
chio Brandenburgicus, S. Rom. Imperii Archi-
camerarius & Elector, reliqua, Dominus noster
multo clementissimus, Ianuario nuper mense
REGALE fastigium, quod summum in Orbe
terrarum est, auspiciis faustis & benignissimis fa-
tis in Borussia conscendit, vtique magnis antea
rebus Brandenburgicis, & paucorum fortunæ
comparandis, quod maximum in humanis est,
abundantissima Dei bonitate est superadditum.
Quum igitur annus hic, quem hodiernus dies fi-
nit & nouum incipit, cumulatiora, quam antea acti,
bona, aut cumulatissima potius, vt omnes noslis,
attulerit; omnino hic dies, qui recolet illa & na-
taliciis sacris prosequetur, augustior religiosior-
que, quam qui antecesserunt natales, habendus est,
maioribusque laudum victimis, & votis curatio-
ribus pro REGIS, hoc est publica salute, conse-
crandus. Est enim & festis diebus discrimen
san-

sanctitatis, ut, quo illustriora sunt cæli beneficia, quorum vel memoriam vel spem ac votum sustinent, eo sacratori etiam religione ac cærimonia transigantur, ut pietatis officia cælestium munerum magnitudini, quia æquare non possunt, certo tamen modo, ac ratione quadam respondeant. Videtis sic, Auditores, quanta nos hodie religio circumstet, quanta officii necessitudo premat, ut maiori veneratione sanctitateque solemmiori hanc lucem celebremus, quæ tam præclara, tam excelsa bona in salute REGIS clementissimi huic Fredericianæ Academiæ & vniuersæ patriæ attulit. Quod quia muneris mei ratio suscipiendum mihi perficiendumque iniungit, vellem equidem tantum mihi ingenii esset, ut digne possim magnificentiam diei huius illustrare, & ea dicere, vouere ac precari, quæ cum REGIS maiestate atque gloria conueniant; cuius benefica salus, diuinitus seruata, & mirifice aucta ornataque, argumentum orationis erit summum ac ita copiosum, ut difficilius sit illius exitum, quam principium aut progressum inuenire. Dicendum enim mihi est de magnitudine diuinæ benignitatis ac prouidentiae, qua REGEM & DOMINVM clementissimum nostrum, ad quadragesimum & quintum vsque ætatis annum, saluum atque incolumem habemus: ac iis hoc anno ornatum, cumulatam dignitatibus, ut ad apicem humanæ felicitatis, summumque, quod Deus hominibus dat, fastigium, nunc maxime propitio cælo fuerit euectus.

Dicen-

Dicendum deinde de infinitis commodis, quæ ex REGIS salute in nos vniuersos tam pacis quam belli temporibus deriuantur. Et tandem, quod proprium huius diei est, de futuro quoque solliciti, vt salus REGIS, & quæ inde felicitas est, seruetur, Deo supplicabimus, & REGI gratulantes, obsequii nostri & demississimæ subiectionis significatione finiemus. Vos vero, illustres, amplissimi, nobilissimi Auditores, fauete animo & lingua, & quum bona verba præibo, sequimini cogitando quæ boni ominis sunt, & ad salutem REGIS atque reipublicæ conducunt.

Bene est, Auditores, curæ adhuc sumus cælesti prouidentia: audiuntur vota nostra, & abest tantum, vt preces infructuosæ fuerint, vt etiam maiora Deus & mirifice præstantiora dederit, quam vel superiori anno, vel vlllo alio, precati fueramus. Saluus enim est REX optimus maximus: salua REGINA serenissima: saluus REGVM FILIVS, princeps florētissimus iuuentutis: salua, felix, pacata respublica, & omnia optatissimo cursu, sine offensa fortunæ, adhuc ita feruntur, vti tot annis ferri, & rebus adferre felicitatem vidimus. Neque æquabili tantum cursu fortunæ vtimur, sed longe feliciori quam antea, quia maiora illustrioraque hoc anno sunt, quæ cælo imputemus, quam vel vnuquam imputare eidem & accepta referre ante solebamus. Summa enim nostra sunt omnia, dum summo rerum humanarum loco, & in felicitatis fastigio.

fastigio constitutum EVM videmus, qui nos regit, qui tuetur & defendit: & maior quoque est felicitas nostra, pax & otium magis securum, ut tam tranquille liberalibus nostris studiis vacare nobis liceat, quam secure alii arant, nauigant, ædificant, aut quaecunque artem ac opificium exercent. Vnde vero hæc publica salus est, hæc felicitas incomparabilis? Ingratissimi mortalium essemus, nisi ad auctorem, a quo accepimus, grata piaque mente referamus. Quod enim præstabilius, quod pulchrius est munus Dei immortalis, quam pius, fortis, felix ac benignus REX siue PRINCEPS? Et, si adhuc dubium fuisset, vtrum forte ac casu rectores terris, an cura Numinis ac providentia darentur; REGEM tamen nostrum diuinitus constitutum esse liqueret. Fingite, Auditores, humanis rebus Fortunam dominari, & sublimi sedentem solio pro libidine versare ac volvere res mortalium, & qualem quisque sortem statumque habeat, illius esse iurisdictionem. Hanc vero, qui ita sentiunt, quod vna mobilem fingunt & maxime inconstantem; videri quidem possent quæ turbantur, peruertuntur, ab illius ingenio esse: ordinatissimam autem constitutionem rerum publicarum, earumque stabilitatem, firmitudinem, incrementum, felicitatem tam fallaci, versatili ac titubanti, si quod esset, numini nequaquam vindicare ac tribuere possemus. Pulcherrimus ordo rerum, & harum moderatio sapientissima, fortissima tutela, & in maius ac melius

lius amplificatio; hæc, inquam, ab æterna sapientia cælestique præsidio sint necesse est. Iam vero si oculos per Germaniam nostram, si etiam per finitimas regiones circumferimus, non videmus Regnum aut Principatum aut Rempublicam esse, quæ diuinæ curæ ac prouidentiae & plura & clariora signa habeat, quam Regnum Borussiae, Electoralis Marchia, & reliquæ Brandenburgenses Prouinciæ præ se ferunt. Romam veteres ex parua magnam & Orbis dominam factam mirabantur: sed tamen Regnum per ducentos quadraginta tres annos, & aliquamdiu etiam consularis Respublica vix quindecim millibus passuum ab vrbe proferri potuit. Res autem Brandenburgicæ, mediocres a Maioribus relictæ, intra octoginta abhinc annos incrementorum tantum benignioribus fatis & cælesti prouidentia ceperunt, ut pæne continuo processu ab Estoniæ finibus atque Lithuaniae per Germaniam, quam longa est, ad Geldrios vsque & Batauos extensæ proferrentur, tantoque nexu inter se & firmamento ac robore consisterent, ut ex eo tempore, quo primum coaluerunt, contra quemuis hostilem impetum, suo tutæ præsidio, sine auxiliis externis, & tueri se, & pacem sibi iustam reddere ac vindicare, redditamque conseruare valuerint. Quod nisi a Dei nutu ac beneuolentia ita factum curatumque esse intelligamus, non tantum incertitæ rerum crimine, sed detestandæ nos etiam impietatis adligaturi sumus. Deus condidit imperia, Deus
fir-

firmat, stabilit, sustentat, & illius arbitrio hæ ori-
untur respublicæ, adsurgunt, crescunt in immen-
sum: illæ contra cadunt, aut exuuntur ornamen-
tis, quia his Deus benefacit, quibus virtus curæ
est & iustitiæ exercitatio; sequiores castigat, ad-
fligit, & si pergant male agere, tandem delet ac
euertit. Huius ergo benignitati debemus, quod
annis superioribus res Brandenburgicæ accessioni-
bus tantis, & miranda felicitate non creuerint modo,
sed ad stabilitatem etiam, ad robur & firmamen-
tum iam ita sint perductæ, ut nullam vim hostium
metuant, & non modo sibi ad tuendam pacem,
sed vicinis etiam sufficiant, idque tanto magis,
quanto Regia auctoritas maiestasque, quam nu-
per Deus contribuit, validior potentiorque est,
ut quæ securitatis sunt & publicæ tranquillitatis,
per se sola tueatur & perficiat. Quemadmodum
vero vniuersum Deus mundum per solem atque
sidera illustrat, calefacit, fecundiorum reddit: ita
Reges quoque & Principes in tam celsa sede col-
locauit, ut, tamquam beneficum sidus, quam plu-
rimis benefaciant, eosdem tueantur, & quan-
tum in ipsis est, a se neminem dimittant tri-
stiores.

Intelligitis nunc, illustres & amplissimi Audi-
tores, quorsum, quæ dixi natali hoc die, valeant.
REX noster sacratissimus est, per quem immor-
talis Deus tam eximia felicitatis publicæ bona no-
bis adhuc contulit, & quod speramus ac preca-
mur, in posterum quoque non minora, sed, ut

per singulos prope annos fœuit facere, maiora
semper auctioraque superioribus conferet. Ipsi
nunc cogitate, quam carum nobis, quam venera-
bile hoc CAPVT esse debeat, a quo diuinitus
tam larga ad nos prosperitas defertur: ad animum
etiam aduertite, quantum Deo hoc nomine debe-
amus: qui REGEM saluum esse voluit, vt &
nos salui essemus ac incolumes: tantam illi felici-
tatem concessit, vt ipsius ductu & imperio nos
fortunati ac felices quoque redderemur. Vo-
uimus superiori anno, si Deus per insequentem
annum hoc sacrum CAPVT æquabili fortuna rei-
publicæ seruaturus esset, maiores nos gratias, natali
redeunte, reddendi voti causa acturos esse. Adnuit
voto Deus, & saluum, felicem præstitit, pro cuius
salute precati fueramus: addidit etiam maiora
ornamenta, quam precabamur, immo summa ad-
didit, & SCEPTVM ac DIADEMA
REGIVMque NOMEN & MAIESTA-
TEM, quibus nihil venerabilius est, tamquam
cumulum suorum munerum, adiecit. O admi-
randam stupendamque Dei benignitatem! cui
prædicandæ quod impares sumus, non cessamus
tamen æternum prædicare, & quum nihil sit quod
referamus, nisi laudis & gloriæ præconium; id
assidue, id vnice ac perpetuo, deuoti semper atque
memores, referamus.

Plinius Secundus Cæcilius dixit, qui distrin-
gere Deum votis nollent, non pacem, non concor-
diam, non securitatem, non opes orare nec honores
sepa-

separatim: simplici hæc cuncta voto, SALVTE PRINCIPIS, tamquam complexu omnium, significare. Tantum enim in salute inest Principis, aut Regis, ut illo servato, cetera omnia, quæ quisquam optare sibi ac suæ possit reipublicæ, bene ac recte se se habeant, & futura etiam sint prospera & recta, quamdiu saluus & felix ille fuerit. SALVTEM itaque REGIS, per quam plurimæ gentes olim iurauerunt, venerabundi ad explicandum meditemur, ut appareat omnibus, ex illa & nostram salutem pendere, & illo saluo, nos quoque saluos ac fortunatos esse.

Primam Secundus ex illo SALVTIS complexu atque copia PACEM produxit, cuius & nomen dulce est ac ita res salutaris & fructifera, ut, matrem si non omnium, at plurimorum tamen bonorum qui nominaverit, & æquo Deo iudicet, & omnes bonos habeat consentientes. Pace quisque possidet suum, pace agri frugibus abundant, discescunt ciuitates, mercatura longe, late profecta fit felicior, & quod caput rei est, liberales artes, quæ inter arma oppressæ iacent, pace eriguntur, & se magis magisque proferunt, iuventutem formant, ut discat virtuti studere, iustitiam colere, pacem amare, & beatam aliquando constituere rempublicam. Trepidant nunc aliæ gentes ac provinciæ rumore imminentis belli; nos, post Deum, salus REGIS nostri tutos præstat. Alii, bello prostrati superiore, nondum erexerunt se; nos autem & illa tuti tempestate e-

ramus protegente Heroe Brandenburgico. Aliis militum transitus incommodat, si non infestat: at neque nobis est facile, quod vel hæc incommoda, quamlibet leuiora, metuamus. Sunt potentissimo REGI nostro tam paratæ copiæ, tam fortis exercitus, ut hostiles incursiones suo milite repellat: transitum militis alieni, nisi voluerit, prohibeat & intercludat: & quod pulcherrimum genus victoriarum est, tantum auctoritate & armorum valet gloria, ut neque velint hostes, neque audeant si voluerint, aduersus eius copias pugnare. Non timet bella REX magnanimus; at neque eadem prouocat: quorum alterum fortitudinis est, moderationi alterum impuratur. Si quis eo insolentiæ processerit, ut iram nostri REGIS, & indignationem mereatur, omnia militi nostro sunt prona atque cedentia, neque maiora flumina, nec quod interfluit mare, tueri hostem possunt, sed vtraque tergo suo exercitum, quoquo tempore transeundum est, æstiuo pontibus nauigiisque, hiberno glacie transportant. Tantum fama fortitudinis & Regno Borussorum, & omnibus regionibus & prouinciis Brandenburgicis præstat, ut pace tutæ omnes sint, bello æque fructibus pacis tranquille ac quiete perfruantur.

CONCORDIAM addit Plinius non minus salute Principis aut Regis innixam, quam pacem; nec minus reipublicæ necessariam ac salutarem. Hæc enim res stabilit atque confirmat, & in immensum, etiamsi paræ fuerint, auget & am-

amplificat. Discordia vero quanta regna, quantas
respublicas euerterit, non attinet recensere: plena
eius rei monumenta sunt historiarum. Ad hanc
vitandam, ad illam obtinendam refert plurimum,
qua forma aut modo res publica regatur: qui sa-
luberrimus omnino est, si vnus imperio, sed pii,
felicis, sapientis pareant omnes. Hoc vniuer-
sum, quod cælum & terram appellamus, consistit
concordia & harmonia, quæ nisi esset, necesse fo-
ret vt dissolueretur ac pereat. Sic in regnis est
& magnis quibusque rebus publicis. Nisi enim
cum prouinciæ inter se, tum singularum ordines
consentiant, & ad vnum sua, hoc est ad publicam
referant vtilitatem; omnia conturbabuntur,
& salus priuatorum & felicitas communis exsu-
labunt. Hoc ne vnquam eueniat, prudentia vni-
us, penes quem imperium est, efficitur. Hic si
saluus est, si pollet auctoritate, vt debet pollere;
omnes partes reipublicæ eo consensu continet &
harmonia, vt bene cuncta conspirent atque conue-
niant, & communis vbique vtilitas obtineatur. In
quo REX noster in primis felix est, qui mirifica
sapientia summaque & Regia auctoritate ita
omnia moderatur, vt vbique amica conseruetur
concordia, & quem necesse est sequi, status tran-
quillus ac beatus reipublicæ sequatur.

Et SECVRITAS ex Regis est SALVTE
siue Principis, vt publicæ viæ sine insidiis, sine
obfessoribus tutæ nocturnæque, vt tempore diurno,
pateant, quo nihil sit quod cursus publicos priua-

posue turbet, nihil quod impediatur. Nec itinera tantum sunt tuta facienda, sed domi, foris sit paritas securitatis, quia fraudes, doli legibus ab agris atque ciuitatibus arcentur, ut quilibet tuto & tranquille possideat sua, suis fruatur commodis & vtilitatibus. Hoc opus Regis ac Principis iusti est, qui quam ipse amat iustitiam, inter suos quoque coli & exerceri imperat, & bonos præmiis inuitat, malos pœnis coercet, ut securitas ubique seruetur & stabiliatur.

Et hæc publica illa commoda sunt, quæ adfert SALVS REGIS, & plura omnino sunt, a quibus recensendis, sequuti Plinium, iam abstinendum ducimus: quæ priuatorum sunt, ab eodem adduntur OPES & HONORES. Omnes intenti sunt, ut sibi suisque prospiciant, & amplificent quæ possidentur, atque ita etiam aliquando heredibus relinquunt: id quod haud ubique licet, sed sub bono tantum Principe aut Rege. De Constantio Augusto, Constantini patre, referunt, ipsum MELIUS duxisse, PVBLICAS OPES A PRIVATIS HABERI, QVAM INTRA VNVM CLAVSTRVM RESERVARI. Bene & sapienter. Nam ille Princeps est dirisissimus, cui ciues parent opulenti, qui in commune conferunt, quandocumque opus est ad rem publicam gerendam, tutandam; aut seruandum splendorem ac dignitatem imperii. Nam cuius est quidquid est omnium, tantum ipse, quantum omnes, possidet. Quod prudentissimum illud temperamentum est, quo res alibi dispo-

cia-

ciabiles, libertas & principatus, saluberrime mi-
scetur. Horum enim coniunctione inexpu-
gnabile Regnorum ac Rerumpublicarum præsi-
dium paratur, quia libertas amorem Imperantibus
conciliat; principatus addit reuerentiam: unde
vinculum videmus necti, quo nihil est validius,
nihilque firmitus in statu publico mortalium.
Non enim exercitus, non classes ita Principem
defendunt ac communiunt, ut amor & beneuo-
lencia parentium. Frustra enim terrore se suc-
cinxerit, qui septus caritate ac amoris veneratio-
ne non fuerit. Iam vero quisnam in Europa
Princeps amore magis cinctus est quam noster
REX clementissimus? qui quod suis libertatem
indulget, ab omnibus amatur, ab omnibus colitur
reuerentia, veneratione adoratur. Id enim sum-
ma virtus ILLIVS, id cælestis indoles & Regia
beneficentia merentur, quia suam ILLE naturam
suumque ingenium sequitur, quum imperio suo
subiectis bene facit, quum virtuti præmia ponit,
quum honores merentibus decernit, ut iis, qui
accipiunt, incitamento maioris virtutis sint, ex-
emplo aliis ad æmulandum, quo ipsi quoque se
dignos faciant, si quibus honestari ornamentis
cupiant. Nihil magis virtuti officit, quam de-
spectus ac contemptio: nihil alius excitat, quam
illius honos & æstimatio: in quo REGIS nostri
incredibilem sapientiam miramur, qua id pruden-
tissime agit, ut virtus & industria cum aliis præmiis
non exiguis, tum honoribus maxime, non forte, sed
iudicio

iudicio datis, repensentur: quia quas ipse artes intelligit atque studia, de his etiam ex æquo iudicat, eas æstimat & honorat, ut quam plurimi ad colendum quod pulchrum & honestum est, hisce præmiis instigentur, & virtus in Regno, in Marchia, in reliquis Provinciis propagetur, & ipsa amplissimos vberrimosque fructus ad communem utilitatem adferat. Cognoscitis sic abunde, Auditores, quam fecunda & fertilis, quam multiplex fructibus sit salus & vita REGIS, ut idcirco carior illa nobis vel nostra singulorum salute, ex tantis meritis, haberi debeat, quia vis infinita hominum ab illa salutem suam accipit, & in futuro quoque tempore expectat.

O iucundam hanc & venerabilem natalis diei lucem quæ tam cari, tam augusti CAPITIS salutem, benignissime adhuc seruata & summis ornata honestamentis ac decoribus, reduxit! Albo semper hanc lapillo, quoties orta fuit, designabamus: nunc autem candidiore ut notemus officium nostrum est, quia illa illustrior nobis, multumque splendidior ac MAIESTATIS præfulgens radiis, cælesti providentia refertur. Ingentium enim beneficiorum atque munerum, à Deo in serenissimum REGEM; ab REGE in nos omnes profectorum, nos admonet, ac idem talem hortatur, ut grata æstimatione agitemus, & quo decet officio ac pietate recolamus. Maiori igitur religione atque studio hunc diem celebremus, nihil prætermittentes quod ad lætitiā tam
claræ

claræ lucis, & ad obsequium nostrum declarandum aliquid adferat. Romani olim, obseruantissimi dierum quibus in lucem editi fuerant, a VOTIS auspicia religionis nataliciæ sumebant, quæ reddebantur partim concepta superiori tempore, partim noua de futuro concipiebantur. Quibus potius quam nobis, aut quando magis quam hoc tempore idem conuenit, quia, quæ precati a Deo sumus, eorum compotes facti, & votorum, ut aiunt, damnati, in eo iam statu omnes sumus, ut nihil prius, nihil antiquius habeamus, quam DEO SERVATORI vota soluere, hoc est immortales gratias imminensæ eius bonitati agere, habere, & laudis æternæ præconio, quæ sola nobis facultas est, quantum fieri potest, referre? Hoc nostrum cuiusque officium poscit, hoc sacra ex votis diei huius obligatio. Qui enim pro salute carissimorum vota faciunt, eo ipso fidem suam obstringunt, ut, si saluos suos circumactō anno (quod in natalibus fit) habituri sint, velint rei votorum esse, dum soluissent illa, hoc est præstitissent, ad quod vouendo se ante adligauerant. Meministis, nobilissimi Auditores, quæ anno proximo, quæ multis superioribus ab immortali Deo hoc natali die precati simus, & quibus pactis, & quanta fide, si auditurus esset Deus, ad vnum omnes promiserimus, non hostiis quidem maioribus, quod Romanis solemne fuit, sed pietate & cultu & veneratione maiori nos facturos esse, ut Deo, tot bonis aucti, æternas gratias agamus, & digna Deo, dig-

na Rege, quoad possit fieri, perpetuo faciamus: Hanc tum fidem dedimus: hoc pacto nos obligabamus. Soluendum ergo, quo votorum constri-
cti sumus vinculo: reddendum quod promisi-
mus: Deus laudandus, a quo accepimus: atque
ita semper gerendum nobis est, vt illos decet,
quos Deus amat, quos magnis beneficiis ornat,
& spem plurium maiorumque non dubiam fa-
cit, si ipsi non impedierimus. Commemorare
hoc loco possem ingentia illa bona, quæ septem
hisce annis Deus in serenissimum REGEM no-
strum, in vniuersam PATRIAM, in hanc
FRIDERICIANAM non parce, sed plenis
manibus, quod aiunt, contulit, eademque seruauit,
& adhuc conseruat, auget, cumulat; nisi eorum
partem (quis enim omnia enarrabit?) supra expo-
suissemus, & recenti vos, Auditores, teneatis me-
moria. Mente magis, quam voce, colitur Deus,
qua si acceptorum memoriam seruamus, gratior
illa quam hecatombe est vel opimæ magno nu-
mero hostiæ: & gratior etiam, quam carmen com-
positissimum vel copiosa & grandiloqua oratio, a
quibus sæpe dicentis mens abest longius. Red-
dituri autem sumus quæ vota debemus, si æterna
memoria seruabimus, quæ si pura, si sancta, si pia
fuerit, neque laudis monumentum, quod voce
ponitur; neque alia honoris & gloriæ insignia
prætermittuntur. Illud diuinorum munerum,
quod proxime datum, ceterorum apex & fastigi-
um summum; illud, inquam, quod ita incredibi-
liter

liter magnum est, ut maius esse non possit; ne, quæso, patiamur ex animo abire, aut minori cura æstimari: quia in eius doni maiestate salus publica innixa est, cuius seruandæ, stabiliendæ causâ nihil gratius Deo offerri potest, quam beneficiorum memoria sempiterna, & digna auctore æstimatio. Hoc ergo agite, Auditores, & Deo vos gratos memoresque præstare, quo futurum esse confidimus, ut plura eius generis sequantur, & maiora etiam, si quid addi possit; saltem explanationa, & in plures diffusâ utilitates, adiciantur. Hoc ipsum est, quod diei huius lux sacrata poscit, quia saluus est REX FRIDERICVS, & viuit: io viuit, & augusta felicitate viuit! Io vota & preces! vota omnibus modis fructifera, preces perpetuo salutare. Io vicimus, quia habemus quod precati sumus! Saluus enim est REX FRIDERICVS, & nos salui & nostra Academia, quæ salutem suam, quæ spiritum ex sacro ILLIVS ore trahit & indole. Hoc salvo nihil triste futurum est, læta omnia oritura: pax, otium, & felix rerum status nostra propria bona & certæ possessiones erunt. Quæ ut sint perpetuo nostræ, heus agite, spectatissimi Auditores, mecum vota pro salute REGIS conceptis verbis facite, solemni formula nuncupate, adfigite in Dei, non genibus, sed æterna & paterna memoria, quæ nunquam obliuiscitur benefacere, & dare quæ petimus, & censum augere beneficiorum. Vota caste, sobrie, sancte concipiantur, si audiri volumus, si rata

si rata fore optamus. Neque enim impuros Deus audit, sed qui pia grataque mente, quæ dedit ante, æstimant; quæ daturus est, expectant. Adeſte omnes boni, digne, rite, caſte pro REGIS ſalute, pro REGIÆ DOMVS incolumitate, felicitate precamini, pollicemini, SI DEVS SACRATISSIMVM REGEM SALVVM ET FELICEM, SI REGINAM REGVMQVE LIBEROS ET AGNATOS PROSPEROS ET FLORENTES, SI REMPVBLICAM BEATAM PER ANNVVM QVINTVM ET QVADRAGESIMVM SERVAVERIT, FVTVRVM ESSE, VT, CIRCVMACTO ILLO, MAIORES EI AGAMVS GRATIAS, ET TOTI IN LAVDES EFFVSI EX NVMERO FELICIVM ANNORVM AETERNÆ BONITATIS MAGNITVDINEM AESTIMEMVS, PRAEDICEMVS, ET POSTERORVM MEMORIAE LITTERARVM MONVMENTIS CVREMVS COMMENDANDAM. Hæc ſumma votorum hoc die ſit, quibus benigne Deus adnuat vt rata ſint & fructuoſa, quo, reuolutis menſibus, ad perſoluendum reddendumque omnes obligemur. Certa ſpes, firma fiducia ſuſtentat, non irritas noſtras preces fore, ſed impetraturas quod petunt, &, credo, plus ac maius, præteritorum exemplo temporum, quam petimus atque optamus,

mus, impetraturas. Quoties enim hoc illustrissimo natali die Deus benignissime nos audit, & plura & cumulationiora dedit, quam petieramus? Num ergo fieri per bonitatem eius immensam potest, quod maiori nunc religione ac studio rogamus, ut neget Deus atque abnuat? Beneficum Numen Deus est, dat sæpius quam negat; nec quidquam negat nisi offensus, quod abominor. Infinita multitudo hominum in Regno Borussiae, in Marchia quadripartita, in provinciis ceteris, amplissimis sane & frequentissimis, existit, qui idem rogant, idem optant, & votis nuncupatis spem honestissimam confirmant. Hanc firmiorem REX ipse facit, Princeps Pius, Iustus, Sapiens, & Deo suo ab ineunte ætate carus. Quapropter grata nostra vota Deo esse, quæ pro tam cari CAPITIS salute vnanimi consensu suscipiuntur, non est villo modo, quod vel leuiter possimus dubitare.

O itaque nimium dilecte Deo, REX felicissime FRIDERICE, cui cælum fauet, cui terra plaudit, cui magni populi & voce vna & animo vno deuoti gratulantur, & felicitatis perennitatem a Deo, Deo propitio TVO, non tam precantur, quam spe certi iam expectant atque impetrant. Latere, REX, bonis TVIS, quæ Deus dedit ac mirum quantum auxit, & ad summum nuper & REGALE fastigium perduxit. Sic Deus TIBI semper propitius, semper benignus, ut TVA beneficentia quam plurimi reficiantur.

Nam

Nam TVA, etiam nostra salus est, & omnium, qui in Regno TVO, in Prouinciis TVIS habitant, & TE colunt ac reuerentur. Quod enim caput humano corpori est, idem, REX, es omnibus ditioni TVAE & mitissimo imperio subiectis. Ab illo vires & salubritas in membra diffunduntur, quæ se bene cuncta habent, quoad illud bene valet atque saluum est. Inde enim lux omnis, sensus omnes sunt & consilia, quibus, quæ hominis sunt, reguntur, vt recta sint, & commoda, & salutaria. Ita etiam nos lumine, REX, TVO, illustramur, TVA videmus perspicacitate, TVA custodimur vigilantia, TVO robore defendimur, & quidquid sumus, quidquid habemus, TVAE mirificæ bonitatis summæque erga nos clementiæ, Deo auspice, cælo fortunante, beneficium atque munus est: idque omnes SALVTIS TVAE fructum, sicut est, grato animo interpretamur, quam tanto maiore studio tuendam cælo commendamus, quanto TVA SALVS est nostra nobis carior. Nam TVA est omnibus communis, ideoque plurimi facienda, omnibus exoptanda: nostra singulorum propria, aut priuata perpaucorum; quæ vero nec esse potest, nec ad breue tempus consistere, nisi communi TVA & publica nutriatur ac sustentetur. Auctor salutis TVAE Deus est: dux, virtus TVA; comes non diuellenda, felicitas: vnde omnia in nos bona proficiscuntur, merita in nos TVA, quæ maxima sunt, effunduntur. Ecce! hæc sunt lætandi

lætandi nobis, & gratulandi TIBI iucundissimum
argumentum, eruntque, dum FRIDERICIANA
TVA erit, hoc est in perpetuum. Maeste ergo
virtute TVA, maeste felicitate, & perge mereri de
humano genere, vt gloria TVA illustrior indies
oriatur, & fulgorem suum in seram transmittat po-
steritatem. Ito, REX, quo virtus TVA, quo sa-
pientia TE TVA ducit, vt felix semper sis, &
semper gratulationes, dignas meritis TVIS, au-
dias. Audi etiam, o REX benignissime, PA-
TER PATRIAE indulgentissime, audi, quæsu-
mus, quæ in FRIDERICIANA nos TVA iam
gratulamur, quæ conceptis verbis TIBI appre-
camur: quibus si Deus adnuerit, quod minime
dubitamus; & salus TVA & TVA felicitas im-
moto & valido stabilitatis firmamento consistens,
& gloria quoque per sæculorum perstabit & flo-
rebit memoriam. Fove, REX, vt soles, quam
condidisti, hanc TVAM FRIDERICIANAM,
quæ gloriæ TVAE est vnice intentæ, deuota feli-
citati, maiestati demississimo obsequio subiecta.
Hæc nunquam de laudibus TVIS conticescet, sed
ingenio & litterariis, quæ ponit, monumentis id
semper aget, ac, vt sperat, etiam perficiet, vt GLO-
RIAM TVAM posteritas alat, & ipsa, cui
consecrata est, æternitas
tueatur.

ORATIO IX.

FRIDERICO,
REGI BORVSSIAE,
MARCHIONI BRAN-
DENBURGICO,
CETERA.

DE NATALI XLVI

IV IDVS IVLIAS clb Is ccll

FELICITER EXORTO,

Dicta.

QVod superiori anno precati a Deo immortalis sumus, quum NATALEM hunc REGIVM conceptis votis atque precibus celebraremus, Deo optimo maximo indulgentissimi REGIS nostri, mississimique DOMINI salutem commendantes; eius rei abunde nos conuictos esse, & quidquid precati sumus, diuino consecutos beneficio, lætandi hoc NATALI die, Auditores, meditamur. Varius quidem hic annus fuit, & tam luctu & tristitia, quam bellico tumultu & periculis non leuiter turbatus: quæ vero æterna Dei erga Regiam Borussicam Domum est benignitas, tristiora hæc

hæc euentis melioribus pensata sunt, luctus, opimis hereditatibus; belli casus ac detrimentum, victoria expugnato validissimo munimento illustri & clarissima. Quæ vero summa vötorum superioris anni fuit, salus & vita REGIS, Regiæque Familiæ incolumitas, ea nunc cælesti munere ita salua habemus atque integra, vt ne maiora quidem aut meliora expetere potuerimus. Quæ omnia ita comparata sunt, vt ad maiorem diei huius religionem ac sanctimoniam nos incitent, iubeantque persolvere, ad quæ solemni voto, quum proximum natalem coleremus, in hoc ipso loco conceptis nos verbis obstringebamus. Meministis enim, illustres & spectatissimi Auditores, nos eo tum voto obligari, vt si Deus sacratissimum REGEM saluum & felicem, si REGINAM, si REGIOS LIBEROS & FRATRES florentes atque prosperos per annum, transactum heri, conseruauerit; futurum omnino esse, vt maioribus hostiis ei gratias agamus, & toti in laudes effusi, ex numero felicium annorum æternæ bonitatis magnitudinem æstimemus, prædicemus, & posterorum memoriæ litterarum monumentis curemus commendandam. Hæc omnia propitio cælo nobis obtigisse, & felicius obtigisse, quam precati sumus, aut vouimus, hereditatum accessione; quis est qui non intelligat? & si recte æstimauerit, quantum bonum salus Regis, & quanta sint cetera, quæ dixi, cæli munera; quis non sentit, ad quod officium

um præstandum hac ipsa, qua fruimur, tranquillitate omnes obligemur? REX & REGINA seruati: HERES Regni, SPES publica, incolumis: Domus Brandenburgica firma & fortunata: quæ sane omnia sunt eiusmodi, vt inde salus nostra, nostra felicitas pendeat, quia REGE auspice, duce, defensore sumus quidquid sumus; habemus quæcumque ex liberalitate EIVS accepimus: tuti vivimus, legum iustitia non minus, quam potentia EIVSDEM circummuniti. Quod vt semper maximi faciendum, summaque prosequendum veneratione est; ita præcipue his illud temporibus ad animum aduertamus, quibus vndique bella circumsonant, quorum vim & fulmina, qui extrema colunt patriæ Sigambri transrhenani, iam nunc, vt nostis, grauiter perferunt. Quæ vt ne nostras quoque adflent regiones, REX fortissimus sollicita cura prospicit, consiliis, armis, suis atque Sociorum, prohibet, id etiam robore ac virtute perficit, vt tutos nos fore, & pace diutius fruituros, omnino, Deo iuuante, ac rege saluo existente, certissime speremus. Hæc sunt, Auditores, quæ potissimum hoc die cum animo cogitemus, quæ voce gestibusque exprimamus, quod ita vero agendum ab vnoquoque est, vt ad ipsum fontem, cælestem bonitatem, referamus, vnde tanta ad nos emanant beneficia: & vt perpetuo manent, votis precibusque procuremus: REGI autem nostro multum clementissimo gratulemur de feliciter exacto quadragesimo quinto ætatis anno; ceterisque

que maximis bonis, quæ adhuc Deus contulit, & idemtidem auxit, ac mirifice conseruauit, constantiam rogemus, &, si Deo ita visum fuerit, perpetuitatem. Diuina illa munera sunt, non humana ope aut consiliis parata: ad quæ homines nihil de suo conferre possunt, nisi vt grato animo excipiant, illorumque auctorem laudent, & vt perseueret esse propitius atque benignus, votis atque precibus, quibus is vnice mouetur atque flectitur, clementiam illius sollicitent atque implorent. Omne ergo officium diei huius in votis est repositum, quæ si rite perficienda sunt, non ad futura tantum tempora prospiciamus, noua munera, aut veterum incrementa petaturi; sed ad illa prius, quæ dudum accepimus, reducamus animum, & quia ex voto accepimus, etiam quæ olim vouimus, rite digneque persoluamus, postquam voti nos reos esse, & consecutos quæ precati eramus, nemo nostrum, nisi ingratissimus, inficiatur. Ea enim liberalitatis natura est, vt noua eliciatur, quum seruetur veteris memoria; eoque deinceps existat largior, quo maiores gratias habemus agimusque propter ante accepta beneficia. Itaque si prorogari cælestem beneficentiam, & in futuros quoque annos proferri volumus; quæ superiori tempore accepimus, summa sane & maxima immortalis Dei munera, ex REGIS serenissimi salute in nosmet omnes deriuata; ea, inquam, omnia grato animo pensitemus, & ad auctorem, vnde sunt, pie deuoteque referamus; quod dum

facimus, non potest fieri, quin vere intelligamus, quantum pondus & momentum in salute REGIS sit; eamque ideirco cariorem, quam nostram, habeamus, quia hæc ex illa est, & REGE saluo ac felice nostra quoque salus confirmatur, felicitas temporum insigniter adaugetur. Hæc summa nostræ orationis in Natali REGIS erit: hæc vestra, Auditores, me præmonente, meditatio: in quo si mecum consenseritis, verba mea faustis cogitationibus prosecuti; diei huius solemnitatem, si non ut dignum est, tamen, ut possumus, ita celebrabimus, ut & DEO honorem & officium, REGI obsequium atque fidem, & sic utrique, quod debemus, pie, devote, ac reuerenter exhibeamus.

Quo in statu nunc res Europæ, atque nostræ etiam sint Germaniæ, ex fama atque nuntiis, qui quotidie adferuntur, non potest quisquam vestrum, splendidissimi Auditores, ignorare. Videbatur nuper pax restituta esse, & vbique terrarum reducta quies ac tranquillitas, postquam diuturni temporis certamina Ryswici tandem in Batauis composita, & nouis pactis (vtinam quoque firmiter!) securitati publicæ prospectum fuit. Vix autem iam cœperant bello vastatæ regiones habitari, & cultus reuocari pristinus, ac commercia liberius exerceri, fructusque pacis adferri ad rempublicam ac communem vtilitatem; quum, ecce, noua & horribilis tempestas ex Hispania seu Gallia potius concitaretur, quæ in Europæ meliores partes

partes celeriter prouecta, procellis suis ac fulminibus dirum aliquod malum, & communis libertatis periculum minitatur. Cuius auertendi magna spes in incluto Heroe, Magnæ Britanniae Rege GVILIELMO erat, quæ vero, fatis sublato illo, turbata & grauiter debilitata fuit. Quorsum vero hæc tristitia auspiciatissimo hoc die adferuntur? Bona verba quidem natali die dicenda, & quæ fausti ominis sunt, vnice facienda esse nouimus: nec vero hæc tristitia in præsentī prætermittenda velim, vt intelligatis, Auditores, quantum præsidii, erepto GVILIELMO Britannico, in prouidentissimo REGE Borussiae situm atque repositum sit. Magna profecto res est præstare Regem: qui vt a Numine proximus, ita eidem quam simillimus præ cetero hominum genere debet esse. Vt Deus vero non vni parti consulit, sed vniuersum hoc curat & sustentat: ita & Rex præcipue quidem suis prospicit, vt tueatur; at vero & aliorum iniurias ad se existimat pertinere, easque, si potest, etiam vindicat. Huius sui muneris, diuinitus impositi, REX noster serenissimus probe memor, & vt suis consulere & aliis etiam auxilium aduersus hostes ferret, cum augustissimo Imperatore Romano, cum Britannorum Regnis, cum Fœderatorum Belgarum præpotente Republica, aliisque Principibus fœdus & societatem iniit, nec iniit modo, sed illico exercitum misit, vt Rhenum inferiorem liberaret: ipse quoque prosecutus iter, vt omnia ex propinquo contueretur, & cum So-

ciis consilia conferret, ac præsentia sua maturaret, quæ interuallis locorum sæpe longius, quam e re publica est, procrastinari vidimus. Felix iter, secunda expeditio, quia bellicorum operum, quæ hoc anno a Sociis aduersus communes hostes suscepta sunt, præcipuum & primum est oppidi natura & arte munitissimi, quod Insulam Cæsaris, vulgo Keyferswerdam appellant, difficilis & longius protracta expugnatio. Hanc sibi REX noster potentissimus poposcerat, adiuuantibus Belgarum copiis: quod EVM credo felici omine admonitum suscepisse, quia superiori bello eundem locum, itidem a Gallis occupatum, feliciter expugnauerat. Respondit euentus spei REGIS felicissimi, & Regionum virtute, ac Belgarum auxilio, effectum tandem, vt Galli cogerentur loco, cui incubuerant, salute pacta, excedere. Præclarum specimen in nouo bello virtutis Regiæ, gloriæque Brandenburgicæ, quippe omnes norunt, afuisse ab oppugnatione participes ceteros Societatis; Regios Borussicos ab vna parte; ab altera Batauos obsidionem confecisse. Quod si tam opimæ primitiæ fuerunt, quantam messem victoriarum secuturam, Auditores, putatis? Quæ sola causa sufficeret, si ceteræ etiam abessent (adsunt autem quam plurimæ) vt noua & lætiori gratulatione natalem hunc diem prosequeremur, quia ex hoc itinere REGIS, & ex Regionum militum virtute cognoscitis, quanta spes in REGE nostro non solum patriæ & Germaniæ vniuersæ, sed

sed etiam Regnis atque Prouinciis exteris, eiusdem societatis foedere coniunctis, sit collocata. Hæc vero ex salute REGIS pendet, cuius præcipua cura & meditatio nostra hoc die est, vt vota superioris anni, suscepta pro illa, persoluamus, & in futurum noua nuncupemus quo Deus felicissimum REGEM nostrum, quem tot egregiis muneribus ornauit, conseruet ac fortunet diutissime, vt virtus EIVS & mirabilis sapientia bonis præsidio, terrori hostibus, & tutelæ ciuibus sit ac patriæ, stabilimento suæ Fridericianæ. In Principum Romanorum nummis inuenimus inscriptos OB CONSERVATIONEM SALVTIS. Hoc non æri aut argento, sed pectoribus nostris inscribendum est, vt semper nobis lætemur, semper REGI gratulemur, Deo autem gratias perpetuas agamus, quod conseruata salus & felicitas ILLIVS sit, qui ab ipso Deo tuendæ saluti nostræ & plurimum est præfectus, & vt velit tueri, sapientia virtuteque ornatus; vt possit etiam, robore & opibus instructus & confirmatus. Quisque suam sibi seruata a Deo salutem gaudet, etiam infimus priuatorum, qui nihil ad publicum, aut vilem & exiguam adfert operam, ceterum sibi obscure, aut lucro suæ viuunt familiæ. Quanto magis commendata sit salus Principis, immo Regis, qui tot populis prospicit, innumerabilem vim hominum regit, & omnia ad humani generis salutem & commoditatem instituit, efficit, atque absoluit? Vel nouissimus nostri REGIS actus ad-

fatim causæ habet, cur felicitati eius gratulemur, diuinam benignitatem admiremur. Vnde alii fugiunt exterriti periculo, illuc ipse properauit, & relicta pacatiore Germaniæ parte, ad fines eius, hostili exercitu obsessos, contendit, vt Cliuensibus suis terris subueniret, suasque copias in pristina virtute, & vincendi consuetudine, præsentia sua confirmaret. Longius inde progressus Haggam Comitum venit, vt cum illustrissimis Fœderatorum Belgarum Ordinibus de summa re publica grauissimisque negotiis conferret: vbi exceptus magnifice, summisque cumulatus honoribus, inter multas congratulationes iam Natalem celebrat: vnde per Comitatus, quos ex Arausionensi hereditate possidet, propediem ad Regiam sedem victor & vndique felix rediturus est. Deo duce ingressus iter erat, fortuna cælesti comite absoluet, tutus a periculis, quæ ab hostium accessu imminebant; & immunis ab offensa valetudinis. O TE felicem, REX sacratissime FRIDERICE, qui Deo tuo, cui confidis, ita carus es, vt diuino suo præsidio, quocumque eas, TE ducat & reducat: & quidquid agas, fortunet, vt ad optatos exitus perueniat! Huius semper confidas numini, vt semper eidem carus sis, semper præsidio eius protegaris, semper feliciter agas, & perficias quidquid hoc auspice suscipies, hoc duce adgredieris. Quod votis possumus, quod precibus & piis formulis, attulimus TIBI, & pro salute TVA Deo supplicauimus, qui audit nos, & votis adnuit, vt nihil earum

earum rerum desideretur, quas ab eius indulgentia superioribus annis precati sumus. Solumus ergo, quibus nos votis obstrinximus pro salute T V A: Deum laudamus, bonitatem eius prædicamus, & propitio Numini salutem T V A M in posterum quoque tuendam commendamus. Sed antequam ad noua vota veniamus, commemoranda etiam sunt, quæ Deus abundantissima beneficentia votis nostris, supra quod precati eramus, addidit, quia tanta eius in REGEM nostrum est bonitas atque clementia, ut per singulos fere annos semper plura dederit quam rogatus fuerat, & maiora dederit splendidioraque, quam vel quisquam nostratum optauerat. Notum est, quam arta coniunctione sanguinis serenissimus REX Borussiae gloriosissimum Magnæ Britannia Regem G V I L I E L M V M contigerit, utpote Amita huius L O V Y S A H E N R I E T T A natus: neque ignotum est qua laudatissimi REGIS nostri Auus H E N R I C V S F R I D E R I C V S, Arausio- nensis Princeps, Successores suos sanctione obligarit, ut si stirps mascula in suis posteris deficeret, alter sexus aut posterum eius, in possessionibus, quas ipse habuerat, legitime succederent. Ius hinc hereditatis cernendæ nostro indulgentissimo R E G I proximum, aut præsens, natura ipsa & nascenti ordo dedit: quod longinquius quidem videbatur, dum Britannia Regi eidemque Arausio- nensi Principi longævam vitam omnes optabamus: illo autem crepto ex mortalitate, non est qui

qui potentissimum REGEM nostrum iure possidendi anteuertat.

Miramur igitur diuinam beneficentiam, quando serenissimæ Domus Brandenburgicæ, nunc Borussicæ Regiæ, incrementa maxima cum animo consideramus. Singularis fortuna populi Romani fuit, tribus regiis hereditatibus locupletati, quod Asiæ ei Pergamenam, Attalus Philometor; Bithyniæ regnum, Nicomedes iunior; Cyrenaicam Pentapolim, Apion Ptolemæus testamento reliquerat. Non minus felix est Domus Brandenburgica, amplis hereditatum accessionibus adeo aucta, ut in Germania nostra non habeamus, quam cum illa incrementorū celeritate ac magnitudine conferre possimus. Antea Marchiæ quadripartitæ finibus continebatur: omnes ceteræ, quas tenet, prouinciæ & regiones fere intra nonaginta annos diuina sorte fuerunt adiectæ. Tum enim Borussia obuenit, in REGNI nunc apicem euectæ tum & Cliuensis Ducatus cum Marca & Rauensbergæ Comitatibus: in quo gradu aliquamdiu constitit, iam satis potens sibi visa, non autem celesti fortunæ, quia maiora Deus huic Genti destinauerat. Cumulus adferebatur Pomeraniæ vtriusque hereditate: & quamuis citerior pacis publicæ causâ concessa Succis fuerit; amplioribus tamen, Ducatu Magdeburgico, & tribus Principatibus, Halberstadiensi, Mindensi, & Caminensi pensata fuit, ut hæ quatuor prouinciæ, ad supplendam Pomeraniam datæ, perinde dici possint hereditatibus obtentæ, quia pro citeriore Pomerania, quæ pacto

pacto hereditario obuenerat; ut pax Germaniæ conueniret, sunt acceptæ. Vltior autem Pomerania, quam longa est, cum Cassubiorum Vinedorumque Ducatibus, eodem pacto in ditionem venit Brandenburgicam: quibus postea, quum ius supremum Borussiae vindicaretur, Lauenburgum & Butouia cum territoriis suis fuerunt adiecta. His tantisque auctibus diuina nondum benignitas, ut confisteret, adqueiuit, sed ineunte nouo sæculo nouum decus, idque summum in rebus mortalium, REGIAM MAIESTATEM cum DIADEMATE adiecit: ut quisque nostrum existimaret, non reliquum esse, quod addi optaremus, nisi eorum, quæ dederat iam Deus, perennem conseruationem. Sed maior est Dei bonitas, quam ut cogitatione metiri ac circumscribere possimus. Citius enim, quam quisquam putauerat, morte gloriosi Britannorum Regis, quæ nascendi ordine quandoque futura videbantur, celeriter præsentia sunt facta; & ius possidendi Arausionensem Principatum, & tot illustres Comitatus atque Dynastias, diuinitus REGI Borussiae collatum, quod firmum certumque omnino persistet, quamlibet præsentis bello, vel aliis impedimentis, nondum omnia possideantur: quum tamen futurum sit, ut sublati illis aut compositis, parata & tranquilla subsequatur possessio. Hæc, cordatissimi Auditores, nobis ideo fuerunt memoranda, ut animo agiteris, quanta Dei sit in serenissimam DOMVMBORVSSO-BRANDENBURGICAM bene-

beneuolentia, qua factum, ut quum multæ Gentēs splendorem suum ægre in hac rerum difficultate conseruent; Brandenburgica per sæculum ferme tot ac tanta incrementa habuerit, & noua idemtidem accipiat: quod utique propitio fato, seu Deo beneficentissimo, imputandum est. Cui idcirco eo maiores gratias debemus agere, quo propius ex nouissima hereditate apparet, perseuerare illius in hanc DOMVM benignitatem, neque in posterum quoque, si votis nostris & precibus insistemus, ab illa recessuram esse. Nihil enim in nobis est, quod ad REGIS salutem ac continuam felicitatem adferre possimus, quam uere atque precari; quod gratum Deo officium non infructuosum est: impetrat, obtinet, quod pia mente petatum rogatumque fuerat.

Videtis nunc, quicumque DOMVI REGIAE estis deuoti, & ex iis, quæ diximus, intelligitis, quæ huius diei sint munia atque officia: penetratis in causas & rationes, propter quas nihil intermittere eorum liceat, ad quæ fide nostra & demississima subiectione omnes sumus deuincti. Qui secus fecerit, aut quæ agenda sunt, egerit negligentius; is iniurius est in REGEM, impius in ipsum DEVM, immemor beneficiorum, quæ accepit, quibus fruitur; ingratus mortaliū, indignissimus que præsidio REGIS, & innumerabilibus, quæ ab ipso habemus bonis est censendus. Nos vero, deuotissimi Auditores, quibus cordi est salus REGIS & Musarchæ nostri,
qua

qua debemus lætitia & veneratione, hunc diem recolamus, eundemque ita transigamus, vt nihil cogitemus nisi sanctum & ad cæli expendenda munera accommodatum: nihil dicamus, nisi laudes & gratulationes: nihil agamus, nisi quod ad vota pro REGIS salute tam soluenda priora, quam adfigenda noua quoque pertineat. Censorinus, Romanus scriptor, id moris institutique maiores tenuisse refert, vt natali die munus annale Genio persoluerent. Non est Genius, quem illi colebant, sed qui vnicus generis humani est genitor siue creator, idemque conseruator omnium. Idem est, cuius nutu & auspiciis ante hos quadraginta quinque annos REX serenissimus in tutelam humani generis natus est, & ita natus, vt caelestem indolem, & diuinam sapientiam, ac imperio gerendo idoneam, & eminentem, fortiretur. Huius clementia idem ex tot tantisque periculis, quæ vitam humanam circumstant, seruatus, innumerabilibus bonis, honoribus, victoriis, felicitatibus ornatus, immo cumulatus; & tandem, quod summum est, DIADEMATE auctus, & in REGALE SOLIVM euectus est. Multum est, terris bonum Principem nasci: plus, ita educari, vt bene de illo sperari possit: plurimum, talem illum se gerere imperio, qualem optauerant ciues sui, & sperauerant ex indole ac recta educatione. Quam ergo nos felices sumus, qui quod vel patres, vel superstites seniores ominibus faustis coniecerunt, quod postea de PVERO, de

de IVVENE sperauerunt, id nunc plenissime in serenissimo REGE nostro habemus, & plus ac maiora omnia habemus, quam quisquam tum sperauerat, aut habuerat i. votis. Quo itaque cultu, qua veneratione putatis, Auditores, tanti muneris, tantæ felicitatis auctorem prosequendum esse? Gemunt multi sub tyrannis, premuntur ab iniquis dominis; expilantur, vastantur, negliguntur: nos autem sub iustissimo REGE, mitissimoque DOMINO; tamquam benigno adlucente sidere, vitam pacatam tranquillamque agimus. Quantum igitur putamus Deo nos hoc nomine debere? quibus votis ac ritibus censemus eius numen venerandum esse, ut optimum hunc REGEM, clementissimū DOMINVM nostrum conseruet, imperium eius stabiliat, potentiam corroboret, actus omnes fortunet, felicitatem perpetuam esse iubeat? aut quando magis id facere oportet, quam eo die, qui gradatim per annos singulorum nos Dei beneficiorum admonet? & cui potius, quam huic FRIDERICIANAE conuenit, religiose hunc diem colere, quia & augusti PRINCÍPIS, qui condidit eam, & vna ipsius Academiæ natalis est, tanto religionis vtriusque nexu, ut diuelli alter ab altero non possit, neque etiam debeat. Quia enim REX condidit Academiam, eique quasi animam & vitam dedit, idque eodem die perfecit, quo SVI IPSE ortus memoriam sacris cærimoniis recolebat; æquum est, ut vtriusque natalis eodem tempore concelebre-
bretur, quia non modo in idem incidunt, verum
alter

alter etiam ex altero originem habet, neque hoc die Fridericiana fuisset dedicata, nisi idem magni **PRINCIPIS & CONDITORIS** fuisset vitæ ac felicitatis auspicalis. Itaque felici est fide nata hæc Academia, quia natali felicissimi **REGIS** est nata: eadem auspiciis faustis & bonis omnibus fuit dedicata, quia auspiciatissimo die augustæ illæ cærimonie inaugurationis sunt peractæ. Ex quo & illud manavit, ut tam illustri & auspiciato die condita, etiam felicitatem **CONDITORIS** sui participaret. Percurrite animo quæso & cogitatione, Auditores, per ceteras, quæ in Germania sunt, Academiæ: an vsquam est, qui magnis incrementis hoc tempore gloriari liceat? pleræque secum bene agi existimant, si eo in statu, quo dudum fuerunt, consistere diutius possint, quem quædam ægre tuentur ac conseruant; Fridericiæ autem nostræ hæc propria & singularis est fortuna, ut inde ab ortu eius ad hanc vsque lucem nullus annus effluerit, quo non grandior identidem, grandiorque numerus fuerit aduentantium vndique, etiam ex disiunctissimis oris ad hanc bonæ mentis sedem & litterarum omnium domicilium, ut sapientiæ hic operam dent, eumque doctrinæ apparatus & cultiorem habitum comparant, quo quisque suæ patriæ prodesse, & vberiores fructus adferre possit ad rempublicam. Longe lateque enim hæc fama peruasit, & inuoluit persuasio, a sapientissimo **PRINCIPE** quæ instituta Academia sit, non posse ad sapientiam

gignendam propagandamque non esse aptissimam,
summeque idoneam, utpote ita ordinatam, ut sine
ambagibus, sine impedimentis, quod optimum
genus est doctrinae ac eruditionis, eo loco per-
fecte disci, & ad usum transferri facillime possit.
 Sio gloria, sic sapientia **CONDITORIS**, Aca-
 demiae ipsi existimationem & famam parat: cui
 ingens pondus accedit, quod quo amore recens na-
 tam complexus erat, eodem adolescentiorem fouet,
 id quod certissimo nuper documento demonstravit,
 dum serenissimum clementissimumq; **FILIVM**, in
 spem Regni, Electoratus & Prouinciarum genitum,
DOMINVM nostrum clementissimum, quem
 singulis adhuc annis praesse Academiae voluit,
 iam nono etiam anno **RECTOREM MA-**
GNIFICENTISSIMVM praeposuit. Quis
 non inde cognoscat, & firmiter sibi persuadeat,
 singularem clementiam atque fauorem sapientis-
 simi **REGIS** in hanc Academiam perseverare,
 qui non solum, quum dedicaretur illa, tanti fasti-
 gii Principem **RECTOREM** dederit, sed in
 nonum nunc annum eandem voluntatem seruet,
 nec obscura praese signa ferat, eiusdem etiam ser-
 uandae in posterum, & maioribus in litteras me-
 ritis identidem confirmandae. Exsulta igitur,
 o fortunata Fridericiana, incredibilem **REGIS**
 tui erga Musas, tuas an suas? indulgentiam ve-
 nerare. Bene de futuro spera tempore, quia is
 signum tibi, idque illustrissimum, ad bene spe-
 randum sustulit. Hoc auspice, hoc seruatore
 vige-

vigebis, florebis, & simul fructus vberes & optimos feres ad rempublicam & ad communem utilitatem. Tanta REGIS amor, tam inusitata clementia te in dies magis atque magis debendam facit, ut omni cura & studio in id intentam te esse deceat, quo in laudes tam mitis, tam benefici DOMINI effusa, pro salute tam CARI CAPITIS & vota sæpe facias, & soluenda in posterum adfigas. Sic excitasse Fridericianam, Auditores, iam sufficiat. Omnes, omnes, qui eius personam agimus, aut pars eiusdem sumus, aut grati hospites in eius confessum venimus, coniungamus pia vota, & huius diei sacra vno animo, vna voce, & plausu vno rite faciamus, ut ad VNIVS salutem, sed quæ omnium communis SALVS est, quidquid dicimus, quidquid cogitamus, conferrantur.

Salve igitur lux faustissima, quæ saluum nobis REGEM reddit, summe clementissimum, & feliciorum reddit, auctioremque novis de cælo bonis, ac insignibus victoriæ novis etiam illustriorem. Salve ipse REX serenissime, potentissime, salve benignissime DOMINE. Deus TE amat, qui tot annos TE servavit, tot ingentibus bonis cumulavit: Deus TE amat, quia in SOLIVM euegit, DIADEMA imposuit: Deus TE semper amet, felicitatem augeat, quia TV amas Deum, & , quæ grata Deo sunt, facis, iustitiam colendo, ornando virtutum cultores, cohibendo sectatores vitiorum. Ecce cælum TIBI

fauet, reducens viræ NATALEM nouum, & multo
splendidiorē, quam quo vitam primum & cæli
lucem accipiebas; quod ille dubiam fortunam præ
se ferebat, hic certissimam confirmat felicitatem. O
nimium dilecte Deo, cui æther fauet, cui fortuna
militat, cui applaudit alma faustitas! Cælestem con-
sensionem sequuntur quotquot in terris virtutem
æstimant, sapientiam honorant, & in pretio ha-
bent litterarum studia, quæ ad virtutem & sapi-
entiam instituunt. Ideo TIBI omnes gratulan-
tur: TVAM admirantur felicitatem: potentio-
res societate TVA gaudent, amicitia gaudent: se-
quiores, clementia TVA & præsidio delectantur.
Vides hoc die, REX, quam omnes gestiant saluti
TVAE gratulari: audis, quanta vis hominum in
bona verba, in faustas acclamationes se effundat, qui
certatim id omnes agunt, vt quisq; optima hoc die,
& maiora, si quid addi possit; saltem diuturniora,
immo perpetua TIBI & REGIAE DOMVI
TVAE precentur, precesque conceptis votis ob-
signent, quo certius impetretur, quod precati sunt,
quia ea vis votorum, volente Deo, & ea efficacia
est, vt nunquam illa sint irrita aut infructuosa, sed
obtineant vel ipsum, cuius ergo suscepta erant,
vel melius isto, vtiliusque, sic fortunante Deo,
consequantur. Nos in ista felicitate TVA boni-
tatem Dei veneramur, & quas possumus, habe-
mus agimusque gratias, & æternum habituros
nos obligamus, quod votis superiori anno factis
tam benigne adfuerit, vt non solum TE saluum
&

& incolumem cum florente DOMO REGIA habeamus, sed addiderit etiam supra bona, quæ voueramus, ut maior copia nobis laudum diuinarum esset; & quod ad TE attinet, duplicatæ gratulationes essent. Christianorum veterum, quod ex Tertulliani formula intelligimus, hæc olim vota erant, quibus Romanos tum Imperatores, quamuis alienos a sacris suis, cum semper, tum singulari deuotione solemnibus diebus prosequébantur: ut Deus illis det VITAM PROLIXAM, IMPERIVM SECVRVM, DOMVM TVTAM, EXERCITVS FORTEs, SENATVM FIDELEm, POPVLVM PROBVM, ORBEM QUIETVM, ET QVAECVMQVE HOMINIS ET CAESARIS VOTA ESSENT. Quanto potius Tibi, REX, sacris melioribus initiato, moribusque imbuto sanctioribus, hæc omnes animo puro, officio sincero, & subiectissimo obsequio precamur, ut TE seruet Deus, vitam TIBI det longæuam, imperium securum, Domum tutam & florentem, exercitum fortem & semper victorem, Ministros fideles, populum probum, quietum Regnum & Prouincias, & quæcumque REGIS & Christiani PRINCIPIS sunt vota & desideria. Hæc nos TIBI, REX optime, precamur: hæc Deus audiet atque præstabit, ut cum REGINA serenissima, DOMINA nostra elementissima, & cum FILIO, PRINCIPE IUVENTVTIS, Herede Regni & Electora-

tus, DOMINO itidem & RECTORE nostro clementissimo, & cum vniuersa DOMO REGIA, sis saluus & felix ac incolumis: & vt tuearis patriam, vincas hostes atque profliges, bonis omnibus benefacias, & TVAE cum primis FRIDERICIANAE, vt solitus es, faueas, eandemque ornare, amplificare pergas: quæ gloriæ TVAE dedita, id voce, scriptis agit vnice, vt VIRTUTEM TVAM miretur posteritas, NOMEN TVVM æternitas sibi adsociet atque conseruet.



ORATIO X.

FRIDERICO
REGI BORVSSIAE,
MARCHIONI BRAN-
DENBURGICO,
CETERA.

DE NATALI XLVII.

IV IDVS IVLIAS clō lccciii

FELICITER EXORTO

Diſta.

VT numquam irrita noſtra vota, Audi-
 tores ſplendidiffimi, fuerunt, quæ pro
 ſalute REGIS potentiffimi, CON-
 DITORIS huius Academiae &
 DOMINI mitiffimi noſtri, ſubmiſſa pietate
 fecimus: ita vltima, quæ ſuperiori anno nuncu-
 pauimus, Deo acceptiora, quam quæ prius conce-
 peramus, exſtitiffe, & magnitudo beneficiorum
 quæ conſecuti ſumus, & illorum non interrupta
 conſtantia ac diuturnitas euincit, & nos reos il-
 lorum facit, quæ vouimus, & ad reddendum ſol-
 vendumque neceſſitate ſacra nos obligat. Cre-
 ſcit cum annis felicitas REGIS, & in dies ma-

iôr illustriorque effulget, quod cœlestis bonitatis documentum est, quæ nostris precibus & conceptis votis non fatigatur, vt quiescat, aut desinat benefacere; sed idem idem excitatur ad xberiora quam petimus, & cumulationora nobis conferenda. Quorum abundantiam nullius eloquentia ita emetiri potest, vt tempori huic gratiam ferat, aut materiæ exæquet dignitatem, vestrasque aures pro exspectatione oblectet ac demulceat. Iactat enim nunc se maxime alacris omnium ac studii plena deuotio, nec operata cogitationum rimari necesse est; exstat in vultu vniuscuiusque vestrum hilaritatis publicæ significatio, & in serenis frontibus animorum præleguntur iudicia. Exsultat gaudium, prorumpit lætitia, gestit vox bona verba proferre, nec intra pectorum latebras patitur auspicatissimo hoc die contineri. Quid moror clariorem lætitiæ confessionem? Natalis est serenissimi potentissimique REGIS BORVSSIAE FRIDERICI, indulgentissimi DOMINI nostri, isque quadragesimus septimus, qui quot annos retro præbet nobis denumerandos, totidem ingentia Dei munera, si vel solam salutem & vitæ incolumitatem respicimus, cui innumera alia cohærent, in memoriam nobis reuocat. Non capit hic dies, quamlibet augustissimus, æternæ bonitatis abundantiam, quæ per tot annos semper largius copiosiusque in sacratissimum nostrum REGEM sese diffudit, vt quolibet natali redeunte maiorem illustrioremque lætandi gratulandi-
que

que habuerimus materiam. Videbatur a biennio
 præclusa crescendi & maiora proferendi conditio;
 quum in Regale fastigium serenissima DOMVS
 BRANDENBURGICA propitio Numine eue-
 cta fuit, vt nihil superesset, quo adscenderet eadem,
 summamque, quam consecuta fuerat, augeret &
 ampliaret dignitatem. Verum enim vero quum
 non maius sit, nec difficilius, dare quod summum
 est, quam illud ipsum in fastigio suo conseruare;
 ac gloriæ, tanto apice dignæ, alimentum perpe-
 tuum, felici rerum omnium successu præbere;
 quis inde non intelligit, quantum cælesti Numini
 debeamus, cuius benignitate factum, vt Regium
 Maiestatis culmen non modo firmatum & in-
 concussum persistet, sed gloria etiam processu tem-
 porum crescat, & ab annis vires ac incrementum
capiat, longiusque in dies incomparabili virtute
 ac illustrissimis victoriis proferatur? Quæ omnia
 pio & hilari animo meditari cui magis conue-
 nit, quam huic Academiæ Fridericiæ, cuius id
 proprium munus est, gratulando laudandoque
 CONDITORIS sui magnitudinem concelo-
 brare? aut quando magis ei conuenit, quam hoc
 die & anniuersario tempore, quod gradatim per
 ætatis annos accessiones felicitatis & incrementa
 salutis publicæ recolenda memoriæ tradit, & ad
 soluenda vora, quæ feceramus, nos excitat atque
 instigat? Hoc enim officium natali die est, ani-
 mo & memoria in primam ætatem regredi, & in-
 de vsque repetere, quanta sint illa cæli munera &

ingentia dona quibus serenissimus REX per omnem vitam non tam ornatus semper fuit, quam mirifice ac excelsissime cumulatus. Non dies sufficeret, si omnia enarranda, ne dicam illustranda, susciperem, quia infinita prope sunt & magnitudine sua demiranda: Vestris cogitationibus, summi & illustres Auditores, superiora illa relinquo repetenda, & intra proximum me annum continebo, vbi nihilominus tam breui temporis intervallo tantam copiam cum Dei beneficentiae, tum REGIS meritorum inuenio praedicandam, vt ne his quoque, quod mihi ad dicendum est spatium, sufficere vlla ratione possit. Quare quae multitudine innumerabilia, & rerum pondere ingentia sunt atque stupenda, in eam summam contraho, atque ita strictim comprehendo, vt breuiter enarrem quae succurrent, non arte oratoria amplificem ac illustrem: quia per se omnia ita sunt magnifica atque excelsa, vt natiuo suo splendore satis abundeque coruscent, alieno colore non indigeant. Vos vero, illustrissimi amplissimique Auditores, quod huius diei officium exigit, alacriter praestate, vt Deo sospitatori superioris temporis vota exsoluamus, & noua rursus pro REGIS salute ac incolumitate concipiamus, pari deinceps religione, quum se iterum circume-
gerit annus, in hoc ipso loco, vti promittimus,
persoluenda. Sic faciemus quod huius diei officium est tam Deo gratum acceptumque, quam indulgentissimae voluntati REGIS, quod nemo dubi-

dubitat, apprimè probatum ac consentaneum.

Quod igitur præcipuum munus est in natalitia solemnitate, id nobis etiam primum iam sit & præstantissimum, salutem REGIS & vitam diuinitus conseruatam expendere ac penitus æstimare. Hanc enim vel solam si dixero, videbor mihi omnia dixisse, quia ex illa manant quæ omnium sunt vota & desideria, vt nihil desit nobis, hanc si saluam habeamus & recte confirmatam. C. Plinius Cæcilius Secundus pro Traiano Capitolinum Iouem rogaturus, Non te, inquit, distringimus votis: non enim pacem, non concordiam, non securitatem, non opes oramus, non honores: simplex cunctaque ista complexum vnum omnium votum est SALVS PRINCIPIS. Quod si hæc complectitur omnia, in hanc maxime intenti hoc Regio natali simus, quia hæc si vacillaret, neque cetera, quæ suscipimus vota, quidquam nobis prodesse: hæc si valet, viget & vegeta est, omnia se recte habent, feliciter omnia succedunt, domi, foris nihil est quod desideretur nostræ salutis, nostræ tranquillitatis, hoc est publicæ & omnium utilitati necessarium. REGEM saluum habemus; vnice lætemur. REGEM viuacem ac vegetum habemus; omnia speremus. REGEM hilari ac tranquillata mente habemus sine mœrore animi, sine turba macerantium curarum; exsulemus ac Deo agamus gratias. Tanta enim bona, tantam felicitatem nisi ad auctorem referamus,

mus, vnde sunt, indignissimi mortalium erimus, & in Deum non minus, quam in REGEM optimum iniurii. Lubrica res est vita mortalium, & mille periculis casibusque obiecta & exposita: quæ cælesti quidem fato, hoc est diuina prouidentia regitur, cuius verò ita rationes sunt incognitæ & inobseruatæ, vt incerti semper simus, nec confidere in re vlla possimus, nisi in bonitate Dei, cuius arbitrium est & iurisdictio immittere homines in vitalem auram, & exinde rursus educere: prorogare vitam longius, & ad breuiorem summam contrahere. Videmus inde, cordatissimi Auditores, quantum sit Dei munus ac beneficium, indulgentissimum REGEM nostrum ad quadragesimum septimum annum, cuius hic dies auspicalis est, habuisse saluum & incolumem, cuius in salute, tamquam sacro cardine, tot populorum, tot prouinciarum, ciuitatum, societatum, & huius etiam Fridericianæ salus vnice conuertitur, & inde omne suum robur, suam firmitudinem, suum præsidium & dignitatem habet. Tanta & tam innumera bona nos serenissimo REGI accepta referimus: refert ille immortalis Deo, cui carus semper fuit, eiusque numine tutus, fortis, felix, sapiens ac potens. Cuius bonitati etiam imputat, quod REGINA est incolumis, quod florentissimæ est PRINCEPS IUVENTVTIS, quod vniuersa DOMVS REGIA sine offensa fortunæ agit. Nam & hæc sunt tanta cæli munera, vt plurimum ad ipsius REGIS salutem conferant, & cum eâ
sacro

sacro quodam vinculo coniuncta sint, quam etiam mirifice augment, consolidant, redduntque vere Regiam ac numeris suis perfectam. Quod si hæc sola meditaremur, satis omnino essent, in quibus huius diei natalis lætitiā agitaremus: sed maior est beneficentia Dei, quam ut in hisce hilaritas publica conclusa teneatur. Plura superaddidit bona, quæ verò cum iis, quæ enarrauimus, ita indiuisso nexu sunt copulata, ut non possint separari, quia ex communi fonte, Dei benignitate, omnia effluunt, & in eundem etiam omnia, tamquam ad originem suam, redundant. Augustus Cæsar in votis habebat, ita sibi saluam ac sospitem rempublicam in sua sede sistere liceret, ut OPTIMI STATUS AVCTOR diceretur, si manserint in vestigio suo quæ iecerit eiusdem fundamenta. Quia etiam noster REX sapientissimus est AVCTOR STATUS OPTIMI, quia ita constitutam, sanctissimisque legibus temperatam rempublicam habet, ut beatior latiorque in dies illa exsurgat, & uberiorēs fructus ad communem conferat utilitatem. Valent leges, suum cuique tribuitur, florent commercia, incrementa capiunt ciuitates, nec rusticola se premi sentiunt: & quod caput rei est, coluntur sacra & custodiuntur, litterarumque studia benignius, quam uspiam, fouentur: ut numquam desint, qui liberalibus disciplinis imbuti & sibi & aliis ad pietatem & iustitiam animique moderationem, & ad ceteras omnes virtutes duces sint, & seduli ex-
cita-

citatores. Illa enim demum beata est respublica, in qua quam plurimi bonis litteris operam dant, quibus fit, ut horridi mores mirigentur, & omnis tollatur asperitas, hominesque ad civilem vitam, & ad cupiditatum moderationem & modestiam traducantur. Quod id ipsum est, quo sapientissimi REGIS curæ atque studia tendunt, qui tot nouas scholas in suis regionibus adhuc constituit, nec desinit statuere, ut vel nostræ ciuitatis Palatina colonia exemplo est nouissimo: nec tribus contentus vniuersæ eruditionis sedibus ac officinis, quas a Maioribus suis acceperat, quartam in eadem hac ciuitate Academiam, FRIDERICIANAM SVAM, condidit, magnisque auxit ornamentis, ut ubique paratissimos habeat, qui iuuentutem instituunt, quo bonæ menti operantur, & virtutes, ad quas adducunt litteræ, ineptis & noxiis rebus, quibus dediti sunt homines, anteférant ac vnice sectentur. Tam ingentibus meritis quodnam præmium a benefico Numine est repositum? idem, quod priscis Heroibus, gloria nominis & virtutis nullis finibus circumscripta, nullis terminanda temporibus, quam ipsa æternitas æui sui comitem semper secum habitura est. Græcorum Romanorumque gloria, quæ immortalis est, duos fontes habuit, ex quibus emanauit; optimarum artium scientiam, & in bello fortitudinem, armorum excellenti peritia instructam. Ex iisdem hausit gloriosus REX noster, quod in tantum flumen laudis atque gloriæ excreuit, ut Orbem terrarum vir-
tutum

tutum fama inundet, nec aliis, quam cæli, contineatur spatiis. Non est huius temporis, superiores victorias & triumphos recensere, quos nulla ætas illaudatos prætermittet: satis argumento sunt quæ nuper parta sunt triumphalia ornamenta: Reinberga capta, Bonna expugnata, Geldria ita arcta obsidione cincta, ut propediem illius etiam deditio expectetur. Pulcherrimum genus victoriæ est, quia incruentum est, sine telorum iactu, ostentato tantum bello, hostes quasi reti concludere, ac terrore cogere ac urgere ad deditiorem. Sic Reinberga, ut dixi, capta est: sic prope abest, ut Geldria etiam capiatur. Vix opus maiore erat ad Bonnam subigendam. Subegit fortissimus Belgarum Heros Cœhornius, sed non suæ gentis solis instructus copiis, verum ex societatis societate etiam Borussicis adiutus, quibus etiam suæ partes erant tam in transrhenano castello capiendū, quam in ipsius urbis munitissimæ propugnaculis deiiciendis, quam & ipsam uno impetu & adsultu haud dubie capturi fuissent, nisi præfectus præsidio, desperata defensione, intra triduum, quam oppugnari cœperat, & se & urbem, duris conditionibus salute pacta, tradidisset. O miram & acceleratam victoriam, cuius socius & particeps REX noster potentissimus fuit! O præclaram victoriam & REGIS nostri propriam, cum nullis communicandam sociis, qua hostile oppidum, etiam præualidis munitionibus cinctum, & Cliuensi provinciæ nimis propinquum, sine pugna, sola obsessione viarum, neque hac ad-

mo-

modum diuturna, ad penuriam rerum omnium, ad desperationem auxilii aliunde aduenturi, ad dediti-
 nem denique & ipsum fuit adactum! Quid dicam
 de excursionibus in Gallicanas regiones, iuste ac for-
 titer repetentibus, quæ superiori anno per vim & in-
 iuriam Cliuensi populo erepta fuerant? Quanta spes
 in septem millibus, qui ad superiorem Rhenum, ex
 castris Cliuensibus egressi, magnis iuuneribus profi-
 ciscuntur? Noua tropæa, nouum triumphum hinc
 propediem futurum auguramur, quia a multis ad-
 huc annis, Deo fortunante, numquam infructuosa
 fuerunt arma Borussia-Brandenburgica. Hæc ex
 bello gloria auspiciis REGIS nostri potentissimi
 nunc nuper parta: his laudibus certe non solum
 ipsi, qui fortiter pugnant, sed ille in primis,
 cuius sunt milites, & cuius imperio omnia
 sua agunt, splendidissime ornatur, eiusque rebus
 magnus honos & ingens deus adiungitur.

Interest autem magnæ gloriæ TVAE, REX
 immortalitate dignissime, vt, quam omnes gen-
 tes atque nationes in cælum tollunt, eadem ad se-
 ram posteritatem ingeniorum studio & industria
 propagetur: quod etiam, si quis vñquam alius,
 amore litterarum TVO & propensa in eruditos
 omnes voluntate ac beneficentia mereris. Et, si
quid de futuris iudicare licet, aut vatum more di-
uinare, perennem TVAM gloriam fore ex ma-
 ximis in rem litterariam meritis haud dubius et-
 iam prædico. Eugebatur inter Heroas & Mu-
sas olim amicitia, vt illi has defenderent; hæc il-
 lorum

lorum facta fortia illustrarent: ideoque vno delubro & Hercules & Musæ ab Romanis fuerunt cultæ, quia Musarum quies defensione Herculis indigeret, & virtus Herculis voce Camenarum, vt ingenio doctissimorum hominum, litterarumque monumentis, quæ ætatem ferrent & perennia essent, æternitati consecraretur. Hoc TVÆ Musæ, REX, sine fictione poetica, sed vero argumento, quia TV vere has ornas & rueris; pro viribus TIBI præstabunt, quæ ideo tot ingenia formant, vt idem in posteris faciant, quo nulla ætas de TVIS meritis, & de virtutis TVÆ gloria conticescat. Quod enim es REX sapientissimus, ideo sapientiæ fontem, præclaras litteras ac disciplinas, ipse colis & æstimas, & tot scholas alis atque Academiis, quo numquam deesse possint, qui REGIAE DOMVS TVÆ ac PRINCIPVM BRANDENBURGICORVM virtutes ac res gestas, TVAS maxime illustriores ceteris, voce, scriptis in sæculorum proferant memoriam. Hæc altera seges TVARVM laudum est, nata ex litterarum amore, æstimatione, fortique præsidio: quæ eædem & bellicarum rerum laudes tuentur in præsentia, & vt æternæ sint, ac cum annis crescant, gratæ mentis pietate perficiunt atque procurant.

Ad Vos reuertor, illustrissimi amplissimique Auditores, vobiscum de officio huius diei nunc propius mihi agendum est. Intellexistis, quæ causæ nos vrgeant & rationes, vt hunc diem ma-

iori religione concelebremus, quia idem tot tan-
 taque cæli munera & serenissimo REGI & nobis
 omnibus per illum a Deo collata, in animum
 & memoriam reducit. Seruatus enim REX a
 periculis: ingentibus ornamentis idem auctus est
 diuinitus: incolumis est DOMVS REGIA:
 salua & fortunata respublica: domi pax & tran-
 quillitas, foris victoriæ & tropæa, &, quod ad eu-
 ras nostras præcipue sit directum, res litteraria et-
 iam & liberale nostrum otium non modo inper-
 turbatum, verum etiam ita quietum & fructuo-
sum est, vt fama eius latius latiusque proucharur,
& vndique, ex longinquis etiam regionibus, ad-
volent atque concurrant, qui exemplum pietatis
optimarumque artium hinc sibi & suæ quisque
reipublicæ expetant. A primo enim ortu Aca-
 demix in hanc vsque lucem nullus fuit annus, quo
 non grandior idemtidem grandiorque numerus
 fuerit aduentantium vndique & confluentium ad
hanc beatissimam mentis & sapientiæ ac sanctitatis
arcem, vt meliori doctrina pectus impleant, & sa-
lubres fructus ferant ad rempublicam tam sacram
quam civilem. Dubitatis, Auditores, me, quod
 res est, de incremento Academix iam dixisse?
 hanc coronam nobilissimorum iuuenum, quæso,
 adspicite, vt verum cognoscatis: in qua quod TV,
 PRINCEPS serenissime SAXONICAE
 GENTIS, DOMINE clementissime, vt ma-
gnum sidus inter minores stellas fulges, & huic
 Academix illustri tua præsentia insigne ornamen-
 tum

tum addis, utique nobis lætamur, tuæque gratulamur erectæ atque excelsæ indoli, quæ non finit TE summo, quo natus es, loco contentum esse, nisi & animum, Maiorum virtute vere generosum, scientia optimarum rerum & imperandi prudentia instruxeris, ac eminenti exemplo huic iuventuti Academicæ præluceas, quo singuli discant, quam non vanum sit aut irritum, quod sapientissimus Romanorum dixit, studia etiam secundas res ornare, & Gentis gloriam, a Maioribus acceptam, semper reddere novis novisque luminibus illustriorem.

In tam felici statu Academicæ, Reipublicæ, Regiæque Aulæ si animo & cogitatione, Auditores spectatissimi, recte ac ordine versamur, nonne id fatendum nobis est, immensam Dei benignitatem esse, unde tam eximia, tam miranda, & incomparabilia in nos bona proficiscantur, quæ si summam vultis aut verbo a me dici atque exprimi, una SALVS REGIS est, ex qua tanta in nos, adnuente Deo, beneficia redundant? Quare quod proprium huius diei munus est, quæ pro salute REGIS anno superiore solemnia vota in hoc ipso loco nuncupauimus, eorum nunc compotes supra, quam voueramus, facti, persoluamus etiam quæ vouimus Deo, ut maiori fiducia felicitatis prorogandæ, pro eadem salute REGIS, quæ nostra nobis est carior, noua vota suscipere, adfigere ac obsignare possimus. Meministis vero, Auditores cordatissimi, superiori anno, hoc ipso die, atque hoc etiam

in loco nostrum quemlibet, me præeunte, se Deo votis obstrinxisse, futurum, si adnuerit Deus, dederitque quæ precati simus, ut circumacto anno maioribus hostiis litemus, & cælesti bonitati gratias agamus, quod benignissime præstiterit, quæ, votis rite factis, animo & voce conceperamus. Præstitit omnino Deus, quæ tum omnes precabamur: REGEM, REGINAM, IUVENTUTIS PRINCIPEM, & reliquos DOMVS REGIAE præstitit incolumes ad vnum omnes: domi pacem præstitit & quietem: foris victorias dedit dignas curru triumphali. Quibus bonis aliisque plurimis qui adfecti sumus, rei vna votorum sumus, & obligati ad soluendum quæ voueramus. Soluimus autem, si grata mente reputamus diuina munera, Deumque auctorem laudibus æternis celebramus. Deo enim REX ipse salutem, vitam, Diadema, Regnum, & quidquid habet, acceptum refert. num ergo nos hæsitabimus eidem referre cuncta, quæ cum REGIS salute nobis bona dantur, & ex illa in nos abundantissime deriuantur? Romani Ioui suo varii generis cognomina addiderunt, Statoris, Seruatoris, Sospitatoris, Depulsoris, Præstitis, Custodis; falsa omnia Ioui commenticio: vero autem Deo vere a nobis in laudis professionem attribuuntur. Hic enim Seruator vitæ est & omnis prosperitatis: hic Stator nostrorum bonorum, ut permanent constanter: hic Sospitator, cuius omnes spirita sumus sospites ac salui: hic quoque Depulsor est

est malorum omnium : Præstes est idem, quia præstat tuta omnia ac salubria, & præstitit semper, quæ votis nostris pro REGIS salute precati fuëramus. Custos idem est vigilans & Defensor fortis, his præsertim temporibus, quibus vndique bella circumsonant, quæ profligat Deus, ne propius ad nostram pertingant patriam. Huic ergo Deo vere Optimo Maximo, huic Seruatori, Præstiti, Custodi soluamus, quibus obstricti vinculis sumus : huic reddamas, offeramus, quos hostias laudis atque gloriæ debemus : huic sit honor & decus sempiternum, qui seruauit nobis REGEM & REGIAM DOMVM ac fortunam Regiam : qui propulsauit mala quæ imminebant omnia. Tu quoque, æterne Deus, pro eadem bonitate tua, qua humano generi perpetuum benefacis, audi, quæsumus, vota nostra, quæ noua facimus & nuncupamus pro salute REGIS carissimi Tibi; hoc est pro ipsius & omnium, quos nutu tuo regit, constanti prosperitate. Serua, quem tot annos elementissime seruasti, quem nuper Diademate & Regio apice decorauisti, quem semper & domi forisque felicem præstitisti. Sis & in posterum Stator salutis Eius : sis Conseruator felicitatis : sis Custos Regni & Prouinciarum ; sis Præstes omnium bonorum, Depulsor malorum omnium. Sis quoque propitius Academiae Fridericianæ, quam in decimum fouisti annum, & ornauisti, adauxisti, quod grato animo & pia voce omnes prædicamus. Fac quoque, æternam vt bonitatem tuam

eidem ad Vicennalia, & vltra etiam, conserues, vt semper maior & vberior tuæ laudis & gloriæ a nobis extollendæ, materia succrescat, & tam qui docent quam qui discunt, amore tui & continentia cupiditatum pie, sancte, honeste, quod officii sui est, libenter quisque & certatim faciant. Nos denuo fidem nostram tibi obstringimus, si rata habueris, quæ noua pro REGIS capite obsignamus; futurum, vt, vertente anno, maiori ore & religione tuas laudes efferamus, maioresque beneficentiæ tuæ voce, vita, moribus agamus ac semper habeamus gratias.


Hæc vota nostra huius diei sunt, forma simplici ac veteri more, sine ambitiosis verbis, concepta & signata: quia, quæ cum Deo sunt agenda, sine fuco, sine ornatu proferenda sunt, vt candor, fides, & simplicitas iubet, & ipsa huius diei sanctitudo & solemnitas. Hodie REX sacratissimus sacra tractat, Deum laudat, Deo supplicat. Nos decet, obsequii gloria & perpetuæ imitationis laude idem, maxime hoc die, sequi: quæ causa est, cur semper Genethliaci nostri in sacro magis, quam ciuili argumento sese efferant. Idem dicendi genus etiam Romanis, quamquam auersis a vero Deo, curæ cordique fuit. Plinium iterum audiamus, Traiano ex prouincia scribentem, DEOS se inter vota precatum esse, quo Imperatorem remque publicam florentem & incolumem sua benignitate seruarent. Et anno alio: Natalem (Principis) & se & prouinciales debita religione

gione celebrasse, COMMENDANTES DIIS
 ET VOTA PVBLICA ET GAVDIA.
 Cui ipse augustus Imperator respondit: SOL-
 VISSE VOTA DIIS IMMORTALI-
 BVS, TE PRAEEVNT, PRO MEA
 INCOLVMITATE COMMILITO-
 NES CVM PROVINCIALIBVS, IN
 FVTVRVMQVE NVNCVPASSE,
 LIBENTER COGNOVI EX LITTE-
 RIS TVIS. En verum & vetus exemplum
 diei natalis inter sacras meditationes transigendi?
 quod quum ipse REX, Deo suo deuotus, sed san-
 ctiori ratione quam Traianus, æmuletur; cur &
 ipsi non Huius pietatem imitemur? Vita sane &
 virtus REGIS censura est perpetua: ad hanc
 dirigamur, ad hanc conuertamur, vt non tam im-
 perio nobis opus sit, quam tanto & tam illustri
 pietatis & virtutum omnium exemplo. Num
 dubitabimus, æque vt Traianus scripsit, LIBEN-
 TER nostra sacra vota & Deo soluta, & Deo
 nuncupata, LIBENTER, inquam, REGEM
 nostrum auditurum esse, & ex sacro studio no-
 stro aliquam percepturum voluptatem? Hoc enim
 ipsum studium REGIS est Pii, Felicis, Augusti:
 hoc conuenit diei huius lætitiæ & sanctitati.
 Sacer omnis dies natalis est, quem nihil profanum
 interpolet, vt sancta castaque religione transiga-
 tur. Sacra omnia sunt, id est diuina beneficia,
 quæ illo die recolantur ante accepta; & quæ
 præcipiantur spe, vt pote accipienda in posterum.

Huc ergo dirigendus animus, si digne natalem peragemus: huc cogitationes omnes adferendæ, ad laudes videlicet Dei Seruatoris. Secus qui fecerint, profanant potius huius lucis sanctitatem, quam celebrant, quia aliena agunt, & indigna nobilissimo sanctissimoque diei huius argumento. Nobis vero alius animus est, alia in natali hoc religio & reuerentia.

Salue igitur lux faustissima, auspiciatissima, quæ saluum nobis REGEM fers & DOMVM REGIAM incolumem, florentem! salue ipse REX sacratissime, potentissime! salue mitissime, benignissime DOMINE! Dilectus TV Deo es, qui ad hunc diem TE perduxit saluum. Dilectus Deo es, qui tot felicitatibus tuis Diadema addidit & Solum, in quod euectus es, Regale. Deus TE semper amet, Solum TVVM confirmet, potentiam corroboraret. Seruet menti diuinam, quam dedit ipse, sapientiam; augeat, quæ inde est, admirandam felicitatem, qua vt MAIORES TVOS omnes antecellis, sic eosdem etiam longæuitate superes. Suffice, REX, felicitati TVAE, & summis bonis, quæ cælo debes ac virtuti TVAE, perpetuo lætare. Sis felix in pace, sis fortis in bellis, sis iustus in iudiciis; sis benignus afflictis & pauperibus, sis clemens & indulgens omnibus. Deus audiat, quæ pro salute TVA, pro REGINA, pro PRINCIPE IVENTVTIS, pro vniuersa DOMO REGIA magno con-

consensu precati omnes sumus, vt lætiores vndique successus rerum habeas, & pluribus maioribusque bonis, quam vel optare vel cogitare animo possumus, TVA REGIA DOMVS circumfluat. Non infructuosæ possunt preces innumerabilium esse hominum, pro salute TVA, hoc ipso die, Deo, quem colis, supplicantium: non irrita vota, legitime ab omnibus nunc suscepta, consignata, & memoriæ causa adfixa. Erit circumuoluto anno dies hic splendidior, & semper lætior illustriorque recurret, quo per annorum futuram seriem felicitati TVAE semper gratulemur, sicut nunc ad vnum omnes faustis acclamationibus votisque conceptis ac precibus TIBI, REX OPTIME, & virtuti TVAE ac felicitati gratulamur, Deumque rogamus, vt perpetuo sic possimus gratulari, & pluribus annis, quos idem Deus TIBI augeat, novum iterum novumque & aliud ex alio laudandi & gratulandi argumentum habeamus.



ORATIO XI.

FRIDERICO,
REGI BORVSSIAE,
MARCHIONI BRAN-
DENBURGICO,
CETERA.

DE NATALI XLVIII

IV IDVS IVLIAS clō l3 cclv

FELICITER EXORTO

Dicta.

S Alui sumus, lætemur Auditores, quia
 REX noster indulgentissimus, quæ
 immensa Dei benignitas est, saluus &
 incolumis cum SVIS existit, serva-
 tus ex periculis humanæ fragilitatis,
 a fortunæ offensione, quæ plures nunc
 vexat, inconcussus. Ardet Europa bello, quo ma-
 gna Germaniæ pars pæne conflagravit: collidun-
 tur exterorum Regna & Respublicæ: damna mu-
 tua terra marique inferuntur, & quæ sola adflictis
 leuamento est, spes euentus melioris ac reparan-
 dæ pacis procul a votis miserorum remota est.
 Nos vero, quum undique arma circumsonant, pa-
 cati

cati ac tranquilli agimus, & quisque imperturbatus suum agit, sua possidet: quæ sane, quod omnibus confitendum, singularis & maxima Dei beneficentia est: a quo si cogitando progredimur, proxime potentissimo sapientissimoque REGI ac mitissimo DOMINO nostro debemus tranquillam & moderatam, qua fruimur, cum vitæ generis, tum fortunarum conditionem. Hic enim consiliis; Hic curis & laboribus non solum prospicit salutem patriæ; sed auctoritate etiam, & potentia, & exercituum robore præstat & perficit, ut arceatur a finibus nostris, quæ alios percellit ac prostermit, bellorum immanis vis atque crudelitas. Neque hoc sine præsentissimo supremi Numinis auxilio & bonitate admirabili, quæ ingens semper in serenissimum nostrum REGEM fuit; quæ a prima ætate mirificis eum dotibus & vere REGIIS exornavit: quæ, postquam rerum potitus est, per singulos annos, gradatim quasi, adauxit bona, & ad summum euexit apicem; & in quartum usque annum in fastigio illo immotam & firmiter stabilitam, quam benignissime dedit, conseruauit felicitatem. Quam mirabilem Dei in sacratissimum REGEM beneuolentiam, in nos omnes etiam ex Ipso redundantem, nisi omni laude, prædicatione, litteris, monumentisque decorandam censeamus, ingratorum hominum detestabilem culpam non poterimus effugere. Quibus enim potius hoc officium faciendum est, quam Fridericianæ Academiæ, quæ omnia sua ex salute
&

& clementia indulgentissimi REGIS munificentissimi CONDITORIS sui accepit? aut quando magis id nobis faciendum, quam hoc ipso die, qui tam cæleste Donum terris primum ostendit, & in vitalem lucem edidit, ac inde vsque religione nos obligauit, vt quotannis reuerentiam nostram renouemus, ac sollemnia vota obeamus, exsoluendo superiori tempore concepta, nuncupando noua reddendaque in futurum. Quod quum omnium sit munus atque officium, quotquot in fide & clientela potentissimi REGIS sunt: singulare tamen & proprium id Fridericianæ nostræ est, quæ spiritum suum ex sacro ore sui CONDITORIS trahit, salutem suam & incrementa eidem debet munificentissimo SERVATORI. Quæ etiam hoc lætiori animo id sibi exsequendum putat, quo non modo honorificentius, sed quod euentus comprobauit, salutarius quoque fuit, eodem die natam esse, qui serenissimi CONDITORIS felicissimus natalis fuerat. Si qui sunt mortalium, qui superstitiones dierum fastorum nefastorumque obseruandas respiciunt & auersantur, in iis ego libenter nomen meum profiteor; nec vero infitiri ausim, esse vim quamdam inditam sideribus, quæ, vt in terra nascentibus manifesto efficaciam prodit suam; ita etiam mirabili dispositione eiusque varietate ad hominum prosperitatem aut sequiorem fortunam aliquid conferat. Quoniam vero inexplicabiles sunt nobis astrorum rationes, quibus felicitas

tem-

temporum hominibus vel adferri, vel saltem significari soleat; certiores modi faustitatis, quibus bene nobiscum diebus agatur, sunt in præsentia inuestigandi, quos etiam hoc natali die, si animum aduertimus, inuenisse videmur, idque haud dubie nobis persuademus. Illa est fausta dies & prospera, quam multæ preces, multa & pia vota consecrant atque commendant, quia hæc nunquam infructuosa sunt, sed efficaciora etiam, quam vel cæli felicissima adfectio, & siderum ordinatissimus positus potest conferre. Iam vero ante quadraginta & septem annos prægnans & grauida rerum natura eum PRINCIPEM in Borussia Regio Monte parturiebat, qui primus ex Gente sua REGIVM DIADEMA esset diuinitus accepturus, & primus in patriam terram Regni Christiani inlaturus nomen, insignia, & ornamenta. Quis autem nescit, etiam ex loci auspiciatoris omine, illo die fuisse maiora vota nuncupata, & faustioribus litatum precationibus, quod omnes futurorum non incuriosi præfagirent, eum, qui natus tum erat, PRINCIPEM, magnum incrementum fore celsissimæ DOMVS BRANDENBURGICAE? Adnuuit Deus votis atque precibus, præsertim per singulos annos repetitis, quos semper feliciores, si superiora respicimus tempora, obortos intelligimus. Hoc itaque auspiciatissimo die quod etiam hæc Academia CONDITORIS voluntate dedicata fuit; qui, reputate quæso, potuisset illa feliciore sidere nasci,

sci, quam quo natus est ipse REX noster felicissimus? Sidus autem illud non est illorum ordinis, quorum motus, leges & significationes prisce Chaldæi tradiderunt, sed nihil aliud, quam Dei bonitas & infinita clementia, precibus ac votis mortalium, quod miremini, idemtidem excitata, & largius largiusque, ut in ipsum REGEM, ita in OPVS quoque illius diuinum & immortale factum, FRIDERICIANAM hanc Academiam, effusa. Agite ergo, splendidissimi cordatissimique Auditores, diem illum, quo tanta salus REGI sacratissimo, ac multum clementissimo DOMINO nostro, & olim exorta est, & hodieque mirandum in modum multiplicata exoritur, & in nos etiam lucem suam suosque radios repercutit atque diffundit; hunc, inquam, diem piis celebrate votis atque precibus, dicturi nihil, nihil acturi nisi quod boni faustique ominis esse videatur. Recordemur præterita pio gratoque animo, ut de futuris etiam modeste possimus diuinare, &, quod est optimum saluberrimumque, spe ac fiducia, diuinæ bonitati innixa, præsumere & anticipare. Natalis hic REGIS potentissimi quadagesimus octauus est, cuius ut numerus in se rotundus est & perfectissimus, ita perfectiorem quoque salutem ac prosperitatem diuinitus significat, quam etiam in posterum futuram esse talem, qualem speramus, eo minus est quod dubitemus, quo clariora celestis beneficentiæ ex præteritis argumenta non incerto diuinandi modo perspicimus. Superiori
anno

anno vouebamus, Auditores, ut salus REGIS & REGIAE DOMVS, ac prospera & æquabilis rerum felicitas sine offensione fortunæ conseruetur, quo ita florente reipublicæ statu nostra quoque litterarum studia feliciter coli ac exerceri, & in maius, si fata sinerent, proferri, & ad amplissimos fructus perducì possint. Num vero irrita nostra vota, quæ fecimus; aut preces fuerunt infructuosæ? Impius sit, oportet, qui diuinam non prædicet in hac causâ benignitatem, quam ipse REX hodie deuotus & gratulabundus veneratur. Salua est, quod cælo imputamus, AVGVSTA REGIS indulgentissimi DOMVS: saluum Regnum inter vicinas Poloniae Liuaniaeque concussiones: pacatæ Prouinciæ omnes ditionis Brandenburgicæ: & quæ belli flammis erat proxima, etiam nuper quodammodo ambusta, secura nunc est, vicinæ Menapiorum sedis, qua hostibus parebat, oppidis cunctis ac castellis abhinc biennio expugnatis, nunc etiam, quæ sola hostibus supererat, metropoli Geldria, sola obsidione, sine pugna, sine adsultibus, qui felicissimus belli gerendi modus est, quia sine cruore, sine vincentium vlla iactura est; in deditionem redacta. Sinite me hoc loco, Auditores, præterire, quæ ad Danubium superiori anno, non quidem culpa nostrorum, sed vel eorum, ut fertur, quibus illi auxilio venerant, vel fatali necessitate, meministis accidisse. Moderata tamen hunc ipsum casum cælestis est prouidentia, cuius ea natura est atque indoles, ut

damn

damna repenset melioribus, & per cædes etiam incrementum prosperitatis adferat: quod, præter alias feliciores pugnas, deditione munitissimæ urbis Geldriæ, & tributorum ex Gallicis prouinciis exactiōe, abductis obsidibus confirmata, præclare nuper factum est: & breui post clarioribus documentis ac victoriis, quod utique speramus, demonstrabitur. Patefacta fortunæ & victoriæ via est: cæsi ad Donawerdam hostes: ex præsidiiis suis & munitionibus, deiecti & quod certum argumentum diuinæ ultionis est, ad idem flumen eladem ingentem acceperunt, iuxta quod leuiorem superiori anno intulerant. Vident nunc Germanis non redire priscam virtutem, sed ab illis nunquam discessisse: vident Britannis robur adesse insuperabile, nec in Batauis scientiam & animum vincendi desiderari. Breuia sunt latronum gaudia, & qui iniusta bella gerunt, Vindictis Dei ultionem mox sentient: quia iniuriarum auctoribus ad ultimum non sufficit. Vincit tandem melior causa, quia diuino armata est auxilio: perit fraus, scelus, impietas, quia Deum ultorem sibi aduersarium habent & ad pœnas postulantes. Erit, erit propediem, quo par aut maior victoria ab Rheno superiore, ubi Borussiae prætendunt legiones, nuntiabitur. Dudum cohortes supplementis integratæ sunt, etiam nouis cohortibus submisissis corroboratæ nunc ita, ut non tantum sustinere impetus hostiles, sed superare etiam & profligare valeant. Præsumt nostris egregii Du-

ces: adsunt Socii fortissimi ex Britannia, Bataua, Germania: terrent hostem magna Heroum nomina, & fulmina bellorum, Scipionum instar, EVGENIVS Sabaudus, & Britannus MARLBORVGHIUS: & quod maxime omnino faciendum, Deus ipse in nostris præsidiis est, quo duce ac auspice non quidquam est, quod æstiuâ hac expeditione desperemus. Ita autem ad superiorem Rhenum REX potentissimus suas copias misit, ut cum Cæsariis, aduersus communes hostes, Imperii limitem defendant, ut nec suum vtrumque limitem, interiecta Germania, quam longa est, disiunctum, præsidiis nudauerit: sed habet etiam ad Rhenum inferiorem legiones validas, quæ Cliuensem prouinciam cum finitimis tueantur, ac, ubi opus fuerit, cum Belgis se facile coniungant: habet quoque robustissimas in Regno suo Borussico, quæ Polonicas turbas ac concertationes obseruent, ne quid vel ex illa parte res publica nostra detrimenti accipiat. Sic vero præstantissimæ REGIS copię in limites sunteductæ, ut hostes arceant, pericula propellant, & vndique tranquillitatem patriæ nostræ confirment ac stabiliant; ut tamen propterea interiores prouinciæ nequaquam suo sint destitutæ præsidio. Sunt in urbibus munitis, sunt in castellis qui excubent, defendant, milites periti & condocesfacti: sunt in oppidis & agris nouitii, sine tamen onere ac molestia prouinciarum: ex quo singularis & admiranda sapientissimi REGIS prudentia elucet. Iuniores

res enim colonos, qui robore & ætate valent, delegit, eisque campidoctores præfecit, qui certis diebus in armis illos exerceant. Hi domi quisque suæ & in patria sua manent, & agrum, ut antea, colunt, aut, qui in oppidis sunt, opificio suo vacant, nihilominus parati omnes, si temporum necessitas postulauerit, ut patriam defendant, & hostiles incursiones prohibeant ac intercludant. Quo fit, dum foris exercitus depugnant, & vincunt, ut interiora quoque Regni & Prouinciarum tutæ sint, nec bellorum metu aut fama consternentur facile, nec mercatura, unde neruus rerum est, turbetur ac impediatur. Hæc enim non excursionibus tantum hostium, sed rumore etiam & formidine, si non tota pessum deiicitur, retardatur tamen & minuitur. Hinc itaque, Auditores, tranquillus est status reipublicæ & prouinciarum: hinc nostrum sacrum otium est & studium litterarum, quod sine turbis, sine impedimentis continuamus libere. Nec pacis fructus apud nos cessant aut minuuntur. Quæ enim maiora expectabimus quietis præmia? quæ vberiora dona fortunæ? DEVS fecit nobis hæc otia: REX curis prouidis, & sapientia, quam & ipse a Deo accepit, eadem conseruat. Longum est ex illo percensere beneficia REGIS liberalissimi, quæ, in orbem sine quiete redeuntia, contexta eius benignitate, non statis annis aut diebus, sed perpetuo in nos proficiunt, sic infinita numero, atque ita commodis suis ampliata, ut numquam obliuionem induc-
tura

Quæ sit vel multitudo omnium, vel gratia singulorum. Vultis, compendio Vos, Auditores, ad fontem adduci, unde in nos hæc omnia emanent? Præter Deum, cui bona omnia debemus, non possum breuius, nec verius id demonstrare, quam de Traiano suo Plinius Secundus, id, quod omnium vota comprehendat, & quod omnium indigentiae ac necessitati sufficiat, breuibus verbis magnam summam complexus dixit, SALVTEM esse PRINCIPIS. Salus Principis, salus Regis hæc omnia continet, quæ enarrauimus, & ita fecunda illa ac liberalis est, vt bona sua diffundat latissime, & omnibus beneficiat, suum cuique tribuat, omnibusque sit præsidio, & omnes tueatur ac custodiat. O quam lætus igitur hic dies est, qui principium salutis REGIAE olim attulit, qui toties circumactæ anno recurrens semper noua incrementa salutis dedit, eaque adeo maiora & illustriora, quo crebrius ille propitiis fatis ac fauente cælo repetitus fuit! Nullum quidem tempus officio vacuum sit, hoc est diuinorum munerum, Regiæque benignitatis prædicatione: vt vero sunt statim dies, quibus sacra Dei beneficia, quæ æternæ nos securitati transdunt, sollempnius in Ecclesia meditamur; ita vitæ huius ac prosperitatis memoriam prisca mortales natali potissimum die, quoties orbe temporum conuoluto reddebatur, pie grateque recolendam instituerunt. Is enim lætus iucundusque dies est, quo huius nos cæli spiritu frui, & in hac ætheris

luce primum viuere cœpimus : qui, quum de cælo conuersione siderum reducitur, primum uiuendi beneficium in memoriam nobis reuocat : & quo sæpius recurrit, eo maior certiorque lætitia salutis est conseruatæ. Hoc summus, hoc infimus agit, & quisque delectatur bonis suis, &, cui debet illa, cælo hostiam laudis, & gratæ memoriæ immolat. Quod si priuatorum natales religione tanta recoluntur ; quanto maiori pietate ac reuerentia illorum natalitijs dies agendus est, a quorum vita non vnus salus hominis, aut vnus etiam familiæ, sed multarum ciuitatum, magnarumque pendet gentium ? Ad rem propius nunc veniamus, & in ipsam arcem causæ ingrediamur, Auditores. Reputate quæso, quantum bonorum adhuc sub R E G E sacratissimo habuerimus, & nunc quoque habeamus : quorum ne numerus quidem a nobis iniri potest. E contrario considerate aliorum, etiam vicinorum in ipsa Germania, conditionem duram atque miseram. Quanta vis hominum nunc gemit, luget, exulat amissis omnibus fortunis, domo, agris, natali solo : aut si maneat in patria, quantis exactionibus & iniuriis vexantur, opprimuntur ? quia quacumque illud Martis fulmen peruaferit, nihil nisi vastitatem & pauperiem relinquit. Nos autem, DEO bene fauente, R E G E curis & imperio moderante, omnium, quæ diximus, malorum adhuc immunes, placida rerum quiete & profunda tranquillitate gaudemus. O rem inæstimabilem, & aliis omnibus ante-

anteferendam! Plerique quidem malignitatis humanæ vitio, dum possident, minoris faciunt, neque præstantiam illius boni & vbertatem eius expendunt: qui vero amiserunt, qui aduenæ, qui exsules nunc opem nostram implorant; ii vero intelligunt, quanti pretii ac æstimationis sit pax & tranquilla rerum possessio. Quorum tristi & miserando exemplo, quum ante oculos versantur, nos singuli admonemur, vt cautiore simus erga bona nostra: quæ facile perduntur, si minus reuerenter fortunam, a DEO & REGE datam, habeamus. Hic, hic est dies, qui nos excitet ad dignam rerum æstimationem, quæ, quantæ quantæ sunt, ex salute REGIS clementissimi in nosmet profluunt. Hic dies est, qui nostra commoda cum REGIS felicitate coniuncta ita demonstrat, vt nec dissolui ab illa aut separari vllopactò possint. Si, quod verum est, sentimus; si, quod sentimus, profitendum est publice, vtique nos omnes exclamare decet: REGIS SALVS nostra salus: REGIS VITA noster vigor, & spiritus: REGIS FELICITAS nostrarum est rerum successio fausta & incrementum. His vt perpetuo frui liceat, voti quidem nostri est optare, diuini autem arbitrii repræsentare quod optamus: sicut REGIS salus & prosperitas, vnde commoda nostra sunt, vnice Deo accepta referenda est. A Deo enim Reges sunt: a Deo illorum fortuna & felicitas: cuius solius quoque est per annos seruare, per gradus augere, & ad summum

uectos in fastigio ad perpetuam stabilitatem confirmare. Quod id ipsum est, cuius hic candidissimus dies nos admonet, quem si digne, si religiose, si cum spe magnorum fructuum transigere volumus; maiorum more votis & faustis gratulationibus res omnis peragenda est. Armis certent, fortiter pugnent qui adlecti sunt in militiam; aliud munus togatorum est, qui votis & precibus contendant, ut Deus REGIS arma & SOCIORVM fortunet, & domi quoque prosperitatem, quam dedit, in seros usque posteros conseruet. De Iano fingunt fabulæ, bifrontem fuisse, siue faciem prætulisse geminam, ut quæ ante, quæque post tergum essent, intueretur: quod ad prudentiam sollertiamque huius regis referunt doctiores, quippe quod ille & præterita nosset, & futura prospiceret, sicut Anteuorta & Postuorta, Diuinitatis aptissimæ comites, ut Macrobius dixit, apud Romanos colebantur. Nihil nobis cum fabulis est negotii: quod vero veteres, cordati homines, inuolucris illis significauerunt, id in usum iam nostrum transferre non alienum ab instituto huius dici est. Qui natalem diem rite, hoc est ex veterum consuetudine celebrant, hos oportet bifrontes quasi Ianos esse, id est ad præterita æque tempora referre animum, & ad futura prospectare. Lux enim illa, qua nati sumus, repræsentanda est animo, & inde usque repetendum, quot & quanta beneficia æternum Numen ad præsentem usque diem contulerit. Si votis, ut
prisci

prisci mortales soliti erant, res peragatur, noua ex
iis, saltem de superiori anno, nascetur obligatio,
quæ ad soluendum id obstringit, quod uoueramus,
si compotes illius facti fuerimus. Tum uero ad
futura tempora prospiciendum est, & illorum,
quam speramus, felicitas votis nouis atque præci-
bus concilianda. Hanc viam ingrediamur hodie,
hanc officii rationem, splendidissimi ornatissimique
Auditores, nunc vnice teneamus. Ad natalem
non vnus e multis, sed potentissimi REGIS &
indulgentissimi DOMINI submissa deuotione
reflectendum, eoque vires mentis ac ingenii con-
uertendæ. Longum foret, voce ac verbis repe-
tere, quæ adhuc sunt sparsim dicta de superiore
anno & longinquiore tempore, quo Dei benigni-
tate sacratissimum REGEM seruatum, mirifice-
que ornatum & auctum memorauimus: neque
attinet iterare, quanta bona ex REGIS salute ac
felicitate in nos profecta fuerint, & etiamnum
proficiscantur. Otium, pax, & tranquillitas rerum
status in finibus nostris florent, quo tempore a-
lios, non ita longinque remotos, vis Martis per-
culit, exhaustit, disiecit, exilio ad incertas redegit,
vrbes euertit, agros vastauit, ac tristem squali-
damque faciem cultissimis paullo ante regionibus
induxit. Meministis hæc ipsimet Auditores, sine
nostra repetita suggestione. Non autem offi-
ciorum multitudine distinemur: absolui res, hæc
ex parte, perpaucis potest, memoria & prædica-
tione. Vouimus superiore anno, si Deus adnu-

erit votis nostris, maioribus nos victimis remsa-
cram hodie facturos esse. Victimæ, laudes Dei
sunt: æque tanto maiores, quanto sinceritate
constantiores; ut maximæ omnino sint, quæ per-
petuæ in animo & memoria seruantur. Voto-
rum rei sumus, quod nemo negat: neque nexu
illorum se quisquam soluet, nisi laudando Deum,
& gratias agendo: idque non voce tantum, quæ
præterit ac vanescit; sed æterna beneficiorum me-
moriam & prædicatione. Hoc si digne & constan-
ter perfecimus, planior nobis ad alterum quod
restat, paratiorque via patebit, quod futura ex
præteritis sunt metienda, & fundamentum spei
ex superioribus repetendum. Speramus melio-
ra, neque id vanis auguriis inducti, sed non du-
biis de cælo significationibus confirmati. Qui
tot annos votis nostris fuit propitius, num dubi-
tamus, eadem in REGEM & DOMVM RE-
GIAM voluntate fore, si in vota nostra vocaue-
rimus? Obligant nos vota nostra: obligat se ipse
nobis Deus, & ad bonos, quæ vouentur, ducit
exitus, si hoc munus caste, si pura mente adgre-
diamur, & Genio REGIAE MAIESTA-
TIS merum, id est integrum, sincerum, non
mixtum adfectum animi libemus. Deus, cui vi-
tam & spiritum debemus, Genius ille est, cuius
in tutela, ut quisque natus est, existit, vivit, ac
mouetur. Hoc propitio, Genii quoque minores,
& ministrantes Spiritus, REGI omnino præsto
adsunt, singulis mortalibus adpositi custodes & defen-

defensores: qui quamuis minus sunt conspicui, omnium tamen agendorum excitatores sunt & adiutores, actorumque speculatores atque testes. Hi indiuisi comites adsunt illis, quos caros Deo esse non nesciunt; & domi cum illis sunt in pace & in republica: cum illis exeunt in secessus, peregrinantur cum illis, rusticantur, in castra proficiscuntur: pro illis pugnant, & vincunt gloriose, quippe qui Heroes æque fortissimi, vt sanctissimi sunt Spiritus. Hos necessario conciliabimus, si Deum nascendi viuendique auctorem atque præsidem propitiauerimus. Hic, hic vocatus non temere, sed religiose, sed caste, sed conscientia teste, audit, surgit, & obuios sibi ac iniquam REGIAM DOMVM molientes adgreditur, retundit, percellit, eiicit. Hoc tutore, hoc sospitatore & oritur felicitas quotidie noua, & perpetuo etiam conseruatur. Quin igitur salutem tantam, ante oculos positam, adipimur, & votis, quia prostat, facimus nostram! Sicuti Romanorum Principum natalibus & milites & prouinciales ac vniuersus populus sollempnia vota in futurum nuncupabant, quibus se ad lætam gratamque solutionem, peracto anno præstandam, obligauerunt: sic illos imitati voueamus, Auditores, SI AETERNVM NVMEN, QVOD COLIMVS, SACRATISSIMVM NOSTRVM REGEM DOMVMQVE OMNEM REGIAM CVM REGNO, PROVINCIIIS, REPUBLICA VNI-

VERSA, ET HAC ETIAM ACADE-
MIA SERVAVÉRIT, VT QVOD TRI-
STE, QVOD FVNESTVM, ET CVM
PRIMIS CALAMITOSISSIMVM
BELLVM, QVOD VICINOS VR-
GET, QVAM LONGISSIME A NO-
BIS ABSIT, PACIS AVTEM FRV-
CTVS NOBIS INTEGRI MANE-
ANT, VIGEANT, CRESCANT; FV-
TVRVM ESSE, VT REVOLVTO
ANNO, AVT PERPETVO POTIVS,
MAIORES, IMMO MAXIMAS HO-
STIAS DIVINAE LAVDIS ATQVE
GLORIAE OFFERAMVS, NEC VM-
QVAM COMMITTAMVS, VT TAM
ILLVSTRIVM BENEFICIORVM
MEMORIAM OBLIVIO ABOLEAT.

Hoc meum præeuntis votum, hæc mea est sen-
tentia, in quam iuro : Vos, vos quoque, quod non
dubitō, dicetis singuli veteri formula, IDEM IN
ME; ET IDEM IN ME; IDEM IN
NOS OMNES RECIPIMVS, SANCIMVS
IVRAMVS. Deus audiat, faueatque nostris
precibus, vt salus Regia, & felicitas publica cum
annis augeantur, maneantque in posteritatem.
Concepta nunc, Auditores, & nuncupata vota
sunt: restat vt adfigamus memoriæ, ac litteris
consignemus, quo certa & rata sint, & nos pie-
tatis officio adstringant, suosque, quos speramus,
fru-


fructus & REGI, & Patriæ, & nobis adferant
vberrimos.

Sic Natalem TVVM (ignosce adloquenti
MAIESTATEM TVAM) sic, inquam, ce-
lebramus Regium Natalem TVVM, REX
optime, REX, sacratissime, o magnum patriæ
Præsidium, Musarum Spes, Solarium, Leuamen-
tum. Rogamus, supplicamus, vt salus TVA
Deo curæ sit, Deo cara sit, nobis semper fructi-
fera & benigna: quæ vtique talis erit, qualem
nunc optamus, quia TE REGE saluo, nihil tri-
ste nobis eueniet: TE felice, nostra florebit pro-
spèritas. Pax, pax in votis omnium est, credi-
mus, etiam in TVIS. Hanc armis TVIS ma-
gnorumque Sociorum consequemur: quia Deus
arma Vestra fortunabit, vt ex castris TVIS lau-
reatas litteras, victoriarum nunciatrices, propediem,
& dehinc sæpius accipias, & victoriis pax reparetur,
victoriisque confirmetur. Gratulamur nunc
MAIESTATI TVAE de Natali quadrage-
simo octauo, id est de salute ac felicitate TVA
ad tantum ætatis propitio Dei numine producta:
mox de tropæis, de triumphis gratulabimur; qui-
bus noua lux TVAM gloriam collustrabit, & Ma-
iestas Tua splendore nouo effulgescet. Bona
caussa, diuina auspicia, virtus TVA militumque,
haud dubium nobis augurium euentus dant me-
lioris. Accedunt auxiliares quasi copiæ, preces,
vota, gemitus infinitæ multitudinis, quibus quo-
minus Deus adnuat, ne Orcus quidem impedire
pote-

poterit. His & vota nostra adiungimus, ex animo precantes vitæ TVAE, TVAE Salutis, TVAE Felicitati perpetuitatem. Plus enim virtuti TVAE, qua summa dudum consecutus es, precari a Deo non possumus, quam eorum, quæ tenes, felicem, immotam, & perpetuam constantiam. Deus TE seruet, REX indulgentissime; Deus TE seruet, quia mereris ita de Patria, de Ecclesia, de Republica, de litterarum studiis: Deus seruet AVGVSTAM REGINAM, DOMINAM nostram multo clementissimam: seruet IVVENTVTIS PRINCIPEM, DOMINVM & RECTOREM nostrum MAGNIFICENTISSIMVM: seruet omnem REGIAM DOMVM, ADGNATOS REGIOS, & Socios Fœderatosque maximos seruet: det imperium securum, Regnum tranquillum & firmatum, Prouincias pacatas, & rerum omnium vberem amplissimumque prouentum.

Vnum patere, REX, a Fridericiana TVA addici, cuius iam vota non annua, vt antea; neque simplicia sunt, sed, decennialibus solutis, Romano more VICENNALIA concipiuntur, quibus vehementer a Deo precamur, vt, qui Academiam, moderante TE, adhuc seruauit saluam & florentem, etiam altero illam, quod inimus, decennio vsque ad tricennalia vota, & amplius, sub TVO, REX, imperio, eadem benignitate foueat actuetur, quo, soluturi per crebra decennia maioribus

bus hostiis maiora vota, Deo, quas debemus, agamus gratias; TIBI, REX, sapientiæ TVAE fructus, cum annis semper auctiores amplioresque, gratulemur; nobis vero vtriusque bonitate ac clementia perpetuo gaudeamus.



ORATIO XII.

AVGVSTIS MANIBVS

GLORIOSISSIMAE PRINCIPIS

SOPHIAE

CHARLOTTAE

REGINAE BO-

RVSSORVM,

MARCHIONIS ELECTRI-

CIS BRANDENBVRGICAE,

RELICVA.

IPSO REGIARVM EXSEQVIA-

RVM DIE, IV KAL. IVL. clclcccv

Dicata.

A Deo igitur nihil firmum, munitum, ac stabile in rebus humanis est, vt summa æque ac infima factorum necessitate concutian-

tiantur, neque in fastigio felicitatis tuto & secure consistere liceat, nec ipsa maiestas, quam populi venerantur, sit præsidio sibi & stabilimento! O miseram sortem mortalium! circumscriptam naturam hominum, quæ, ut ut magnum aliquid & eximium potest producere, æternum tamen ac immortale præstare nequit! quippe nascendi & pereundi vicibus sunt omnia inclusa, nec quidquam certius nobis est, quam incertam esse vivendi conditionem, & caducum, quod etiam firmissimum videbatur. Tam fallaces spes nostræ sunt, tam fragilis humanarum rerum fortuna, quæ in medio sæpe spatio franguntur, etiam ad apicem perductæ, casu, quo minime putabamus, in ruinam implicantur. Horreo plura dicere, & ad maximum EXEMPLVM, quod fata heu! kalendis Februariis proposuerunt, voce flebili, lugubri gestu applicare: nec vero per officii & pietatis rationes, quod dictu triste & acerbum est, silentio licet inuoluere, aut recusare, quam casus imponit, augustæ REGINAE, clementissimæ DOMINAE nostræ, demississima subiectione debitam ac necessariam laudationem. Laudauimus sæpe, & prompte laudauimus, sed viuam floridamque, in sui admirationem tam ciues quam peregrinos perfectione sua attrahentem. Nunc vero tristis & funesta est, quam augustis Manibus laudationem debemus: & idcirco difficilior, quod lætitia vocem excitat & promptiorem reddit; luctus & mœror impedit ac retardat. Nihilominus facien-

dum

dum quod officii est, & suprema gloriosissimæ REGINAE persoluenda, præsertim quod indulgentissimus REX & DOMINVS noster clementissimo mandato ita fieri imperavit. Vtinam vero tanta vis ingenii, & dicendi copia tanta supereretur, ut tam excelsæ REGINAE fastigio verba paria facere, & vestræ etiam expectationi, Auditores summi, dare satis in præsentem possem. Quotquot enim in illustri hac corona vel adsidere vel circumstare video, non copiosam modo, sed ornatam in primis & Regio dignam culmine orationem expectare intelligo: cuius rei ut mihi gratia fiat, aliique facundiori hæc persona imponatur, si rogare iam non licet, non possum tamen vehementer non exoptare. Si enim e longinquo etiam campum, qui laudatori nunc percurrendus est, inspicio; obstupescam necesse est, & viribus prorsus diffidam, quas scio quam sint exiguæ, & quantum absint ab eo, ut magnitudinem tam augusti argumenti capiant. Quorsum enim circumspicio dicturus, Regia & summa mihi omnia occurrunt, quæ nec animo complecti per magnitudinem possum, neque verbis, tali fastigio dignis, illustrare. Conabor tamen, quod imperatum est, subire, & utcumque vires ferent, etiam sustinebo, quod ipsa magnitudo rei, quæ tenuit primum, nunc recte meditati est solatio. Quod enim, quæ dicenda mihi, summa omnia sunt, & culmen rerum, quas Orbis habet, adæquant; futurum spero, quæ oratorem deficient, ut æque aut magis

magis rerum magnitudini, quam huius imbecillitati impotentur: quamquam nec hanc deprecor, sed me imparē tantis rebus esse, tantum abest, ut dissimulem, ut spem veniæ etiam in tenuitatis confessione mihi ponendam esse confidam. Agite modo, summi & illustres Auditores, benevolentia vestra, quam toties expertus fui, orationis inopiam subleuate, ut hoc lugubre officium glorioſæ noſtræ REGINAE publico Academiae nomino præſtare, & quoad fieri poteſt, exſequi mihi liceat.

Quæ ſingula in ſingulis illuſtrium feminarum ſunt magna & admirabilia; in glorioſa noſtra REGINA, quod cæli munus ſingulare eſt, ita conſociata ſunt omnia, ut mens ex contuitu tot luminum hebeſcat, & ægre diſcernere illa, & particulatim conſiderare valeat. Sit vero initium, quod natura conſtituit, ab ortu & natalium ſplendore, quem illuſtriſſimum glorioſa REGINA fortita fuit. Paternum genus ea antiquitate eſt, ut ad priſcos Romanos, terrarum orbis dominos, originem ſuam referat, & diuturna ſucceſſione demonſtret. Ex Italia enim proſectos conſtat, qui Bauariam primum, dein Saxoniam inferiorem obtinuerunt, tantamque gloriâ virtutis in Germania conſecuti ſunt, tantamque potentiam, ut in primis & ſummis Imperii Romani Principibus cenſerentur: quam dignitatem non conſervarunt modo per tot ſæcula, ſed cumulum quoque honeſtamenti & gloriæ addiderunt. HENRICVS

RICVS LEO inter Principes, vt leo in animalibus, summus erat & Regia potestate: cuius posterius, **HENRICI**, **OTTONES**, **WILHELMI**, **ERNESTI**, & alii, in incrementum Domus celsissimæ nati, quam acceperunt a Maioribus virtutis gloriam, maximis suis meritis auctiorem ad posteros transmiserunt, e quibus in primis fuit magnanimus Heros **GEORGIUS**, beatissimæ **REGINAE** nostræ Auus, cuius filius, **NOSTRAE** Parens, **ERNESTVS AVGVSTVS**; virtute tanta, tantisque in patriam meritis fuit, vt gloriosissimus Imperator **LEOPOLDVS** eum dignissimum censuerit; cui Electoralem dignitatem, quæ summa in Imperio nostro & proxima Regiæ sublimitati est, conferret, qua etiam serenissimus iam Filius **GEORGIUS LVDOVICVS**, Frater **REGINAE** gloriosæ, eminet, ac in celsissima Domo tuetur ac propagat. Si nunc ad alteram originem, ad quam augusta **REGINA** per Matrem serenissimam adscendit, progressum orationis facimus, quanta supremæ dignitatis insignia, quot diademata se animo & oculis obii-ciunt? nihil enim nisi Regium est & maiestate plenum; quod conspiciamus, idque in altissimam antiquitatem recurrit. Serenissima **SOPHIA** Palatina, primi Electoris Brunsvico - Luneburgici Vidua, beatissimæ **REGINAE** nostræ Mater, Britannicorum Regnorum Heres legitima Senatus vtriusque sententiis est declarata; cuius sum-

mæ dignitatis etiam Posterì participes facti, in quibus & ipsa gloriosa nostra REGINA erat. Auus quoque FRIDERICVS, Palatinus Elector, Rex a Bohemiæ Ordinibus, quibus dignissimus visus est, electus fuit, & magnifice inauratus: quamquam, vt humanis rebus sæpe accidit, felicitati eius fata obstiterunt. Quid de Proauo IACOBO dicam, qui primus faustis auspiciis tria Regna Britannica, Angliæ, Scotiæ, Hiberniæ coniunxit, inde Magni cognomine dignissimus? Princeps item pius, iustus, pacificus, summaque sapientia, quæ vel ex eo clarissime elucet, quod coniuncta Regna tanta moderatione rexit, vt ad nostra vsque tempora societas firma & constans permaneret. Magna omnino felicitas, quæ huic Regi non casu aut fortuna contigit, sed summa sapientia, ex litterarum studiis, quibus deditissimus fuit, profecta. Hoc Proauo, Rege Magno, gloriosissima REGINA nostra gaudebat, per quem genus suum ad eam temporum antiquitatem referebat, vt vix Maiores EIVS numerari possint, omnes Reges, omnes auitæ libertatis fortissimi propugnatores. Hæc enim natio illa est, quæ sola, non tantum ex Britannicis, sed omnibus prope Europæis, Romanorum arma repressisse dicitur, semper libera & sui iuris; adeoque Romanorum Britanniam infestans, vt hi nostri arma opponerent, quibus diffidebant; sed vallis murisque, per amplius triginta millia passuum transuerse ductis, a Caledoniis se & Pictis tuta-

ren-

rentur. Intelligitis hinc, Auditores, incunabulorum REGINAE nostræ gloriam : quam sublimiorem illustrioremque tot Cognati & Adfines faciunt, omnes summæ, id est Regiæ dignitatis. Proxima est Patruus IOHANNIS FRIDERICI Filia, WILHELMINA AMALIA, augustissima iam Imperatrix, & feminarum, quæ vivunt, excelsissima : nec minus Amita NOSTRÆ, seu Soror Parentis, SOPHIA AMALIA, Daniæ & Norwégiæ Regina, vxor Regis FRIDERICI III, qui primus virtute ac constantia perfecit, vt Regnum sibi posterisque hereditarium confirmaretur ; Mater Regis CHRISTIANI V Daniæ ; & VLRICAE, Suecorum & Vandalorum Regiæ ; nec non serenissimi Principis GEORGII, Mariti potentissimæ Regiæ Britannorum ; & Auiæ FRIDERICI IV, qui nunc Danis & Norwegis magna felicitate imperat. Tot Reges Reginasque NOSTRA sanguine coniunctos ex Patruo Amitaque habet, vt Electores, magnosque Principes alios taceamus. Ex altera parte sunt WILHELMVS & MARIA, Britannorum Reges, æternæ nuper memoriæ consecrati : & iam felicissima Regina ANNA, qui omnes cum NOSTRA ab IACOBO Magno, primo Magnæ Britanniae, id est Regnorum coniunctorum Rege, oriuntur.

Quæ ergo tot Regibus Reginisque proxime cognata est, cum quibus communem Progenitores habet ; quam aliam putatis indolem, quod aliud

ingenium, nisi A V G V S T V M & R E G I V M, nascendo sortiri potuisse? Sequuntur mores vim natura ingenitam, & quanto illa est sublimior augustiorque, tanto hi quoque præstantiores sunt, & ad virtutis gloriam magis magisque conformati. Comitantur fortunæ bona, Deo rerum moderatore ita disponente, ut magnis mentibus etiam hospitium contingat aptum, in quo habitent, suasque exerceant virtutis operationes: neque alia illis desint bona, quæ magnis rebus gerendis sunt necessaria. Hic vero se tantus numerus bonorum, tanta virtutum multitudo se offert, ut difficilis fiat electio, quia quod præcedat, quod sequatur, propter summam æqualitatem paremque magnitudinem non video. Vbi enim omnia summa sunt, vbi erant in REGINA nostra; ibi non datur ordo partium, quæ primæ sint, quæ mediæ aut postremæ Quidquid benigna Natura habet eximium, illustre, ac magnificum, in vnam N O S T R A M non parce aut sparsim, sed pleno effudit cornu, ut nihil umquam in principe femina laudari poterit, quo N O S T R A non excellenter & abundantissime ornata fuerit. Fingunt poetæ, Iunoni, Palladi, Veneri certamen quondam de forma fuisse, eique liti diiudicandæ Parin, Priami filium, tum in monte Ida agentem, electum esse: vnamquamque harum arbitro, quo sibi æquiorē faceret, largiter esse pollicitam, Iunonem, regnum amplum & opulentum; Palladem, sapientiam, qualem

qualem ipsa haberet; Venerem, formosissimam
feminarum. Diuisa sic inter Deas bona, nec vna
habebat omnia, quæ daret, sed circumscripta suo
limite erant, quæ iudici offerebantur munera. In
nostra REGINA nulla fabula locum habebat: res
erat verissima, quidquid illi tribuebatur: nec cum
certamine possidebat aliarum, quæ omnes cæli &
naturæ dotes possidebat, omnibus sui ordinis &
sexus bonorum cumulo eminentior. Quod Iuno
daret, in Coniuge REGE & ELECTORE
habuit, & ipsa principum feminarum prima, etiam
REGINA vncta & coronata. Quod a Pallade
expectaret, fausto sidere ingenitum, quum nasce-
retur, institutione ac disciplina auxit, vt diuina
fieret sapientia, rerumque aliarum notitia admi-
randa. Forma vel ipsum Parin permouere po-
tuisset, vt NOSTRAE malum aureum, non
Veneri impudicæ, daret. Omnia sic in vnâ
collata, quæ, etiam in plures diuisa, raro propi-
tium cælum dat. Quæ cuncta, quod fieri non
potest, vt vno obtutu contemplemur; nictante
quasi oculo ex iis aliud post aliud inspiciemus,
quo fiet, vt licet totam serenitatem non capia-
mus, quas partes tamen complecti possum, exci-
piam inde, & si quæ vis orationis est, exponam
atque explicem.

Sic nata NOSTRA excelso loco, omnibusque
naturæ dotibus ornata, & erectam indeptâ indo-
lem, per se ac vi ingenita ad decus, virtutem,
& honestatis gloriam adspirauit, nihil sordidum,

nihil humile ac indignum sentiens, omnes mentis cogitationes ad originem illius, quæ ex cælo est, conuertens. Hæc est quam Tacitus NATURAE BONITATEM dixit, quæ arceat ab illecebris peccandi, in recto animum contineat, ne partem in alterutram declinet. Erst autem generosa mens sibi ipsa dux & instigatrix est; tamen si sollers institutio accedit, iuvat illa vim insitam, ut magnum aliquid & eximium oriatur, quod tantum virtutis, quantum in hominem cadit, possideat. Sunt enim in iis, quæ animum ornant ac perficiunt, quæ difficulter natura penetramus, præceptis autem ac disciplinæ patent; quo litterarum linguarumque studia referenda: quædam etiam naturæ vim exsuperant, qualis de Deo diuinisque rebus est scientia, quæ fructus fert, qui in omnes virtutes se disseminant, & in laudis gloriæque segetem efflorescunt. Igitur serenissimis NOSTRAE Parentibus id primæ ac maximæ curæ fuit, ut, quod pignus mirificæ indolis a Deo acceperant, sollertia docentium ad summam perfectionem adduceretur, adhibitis præstantissimis viris, qui verum sensum de Deo & Christianis sacris docerent, traderentque quod summo loco natæ Virgini decorum sit, ut inter Aularum auocamenta, utrimque adblandientia, cursum tamen rectum & æquabilem teneret, & ad propositam a Deo metam se sine offensione proferret. Ad hanc & ceterarum rerum cognitionem multum linguæ contulerunt, Italica atque Gallicana, qua-

quarum nitore beatissima nostra REGINA ab ineunte ætate delectata fuit: vtraque etiam tam scite loquebatur, vt natiuus sermo, non adscitus videretur. Non autem existimandum est, cultiorum linguas gentium nihil præter ornamentum & gloriam adferre. Amplior vtriusque est utilitas, quam vt in sermone cum hominibus earum gentium, aut iis, qui inter illas peregrinati sunt, aut linguam aliunde addidicerunt, contineatur: latissime per plurima sapientiæ ac scientiarum spatia excurrit. Quis enim vestrum ignorat, Auditores, summo studio illas gentes, quidquid scientiarum elegantiarumque est, non modo coluisse diligenter, verum etiam litterarum monumentis, vt pluribus prodesse, liberaliter mandauisse, & certatim etiamnum ac fideliter mandare? Quidquid ab his gentibus ingeniose excogitatum, industria elaboratum perpolitumque fuit, quod ad sapientiam & rerum tam veterum quam recentiorum notitiam, etiam ad pietatem ac morum compositionem conferat; id gloriosa REGINA, vt cupidissima discendi erat, in adolescentia perlegit, & incredibilem inde scientiam diuinarum humanarumque rerum, tam pro animi nutrimento, quod litterarum præbent studia, quam pro oblectatione sui honestissima comparauit. Non mediocris hæc pars felicitatis est, ita sapere, ita res nosse populorum & rerum publicarum, ita mores variarum perspexisse nationum, vt sibi quisque consulere, & in prosperis animum

moderari, in aduersis solatium ipse præbere possit. Felicior autem REGINA nostra fuit, quæ alterum haud experta, in lætiori vsu litterarum adquiescere per ætatem, suumque inde petere oblectamentum, & suam firmare tranquillitatem potuit. Hinc & ceteris virtutibus robur accedit, humanitati maxime, quæ propria hominum cultiorum, eminentiæ Principum singulari est honestamento. Lumina terræ sunt Principes, ut Sol & alia sidera in cælo. Quemadmodum vero nec altitudini Solis, nec fulgentissimæ claritati, neque præseruido calori, quo omnia fouet, vel minimum decedit, quod infima quæque illustrat, & vi sua etiam in subterranea penetrat; sed eo plus inde admirabilitatis habet: ita nec maiestas Principum humanitatis officio deprimitur, sed eleuatur potius, ut ad Solis naturam, quem æmuletur, quam proxime accedat. Ex illa etiā benignitas fluit & liberalissima beneficentia, sicut sidera non tantū lucent, verū etiā calefaciunt, exsuscitant, conseruant. Qui nouit, quid sit hominē esse, & quē is debeat imitari; non potest per cælestē naturā suam (de cælo enim mens indita) non cælum quoque & sidera beneficiis in alios, humiliores etiam, collatis æmulari: & dum æmuletur, similis fieri cælestibus, & sideream sibi perennemque comparare gloriam. Tanta incrementa virtutis sunt ex animi cultura & recta educatione.

Quod peregrinationes etiam ad perfectionem conferunt, quum oculis subiiciuntur, quæ diuersis locis sunt illustria ad imitandum exempla, qui
mores

mores hominum, quæ vita ciuium; quæ contra alibi notantur vitanda & fugienda; mirum, quantum animus, his cognitis & perspectis, ad virtutem exsuscitetur: & quæ antea vel natura indita erant semina, vel præceptis elicitæ laudum seges, ea citius feliciusque sub alio cælo ad maturitatem perveniunt. Neque in hac, insueta sexui, proficendi ratione fortuna REGINAE nostræ defuit, quam, ut ut tenellam, vndecimo ætatis anno Mater serenissima, Sororem, Abbatissæ Malbissonii præfectam, & Fratris Filiam, Ducis Aurelianensis uxorem, salutatura, in Gallos secum duxit, ubi quidquid in cultissima natione illustre est ac eximium, animo & oculis contemplata, etiam in Regiam admissa Aulam, ipsius Regis benevolentiam, non tam adfinitatis causa, quia sanguine Vxorî Fratris erat coniunctissima; quam propter admirabiles virtutes, ex tenera tum ætate elucentes, experta est: etiam ab aliis, quacumque transiit in itinere isto, eximio honore, propter eandem causam, excepta. Nec est quod quispiam miretur, qui fieri possit, ut id ætatulæ virtutes tantas, tam cultos mores capiat. Est enim hoc a natura excelsis datum animis, ut annaria lege constringi & retineri nequeant, quod derepente ac ante diem illorum virtus erumat. Numerent annos suos qui de plebe sunt: cæleste ingenium ætatem ipsam antecedit, &, instar arboris generosæ, statim cum planta illius fructus est. Id quamlibet rarum ac singulare; NOSTRÆ tamen cum

primis, aut ante primas & principes omnes, natura fautrice contigit, ut & adolescentula plus sciret, quam vix aliæ ætate robustiori: quia excellentior indoles virtutis amorem cum primis annis profert, & vis ingenii virtutis par est operationi, in quamcumque ætatem etiam inciderit.

Sic culta, sic ornata NOSTRA domum rediit, & quo magis adoleuit, eo maiorem famam virtutis & formæ excitauit, qua summum felicitatis suæ complementum adsecuta est. Hac enim inductus, nec sine cælesti prouidentia, serenissimus PRINCEPS, nunc REX & DOMINVS noster indulgentissimus, FRIDERICVS, Magno tum superstitute Parente, quum celsissimam Coniugem ELISABETHAM HENRIETTAM Hassiacam extulisset, expleto luctus tempore, egregiam hanc & incomparabilem SOPHIAM CHARLOTTAM, Brunfuico-Luneburgicam, tori sociam sibi elegit: quo connubio nihil auspicius, nihilque æqualius feliciusque exoptari potuit. Genus utrimque par: virtus utriusque ad summum educta: & quum IPSA esset Principum feminarum sapientissima, conuenienter ei PRINCIPI nupsit, qui sui ordinis omnes sapientia superabat. Hinc idem sensus, eadem voluntas, firmum ac stabile matrimonii fundamentum: hinc mutus amor, mutua reuerentia, & arctissima coniunctio animarum. Laudent Romani Augusti, & Liuiæ; laudent etiam Traiani & Plotinæ matrimonium, & utriusque concordiam

am maiorem in modum prædicent: sed vtrique defuit, quod maximum in coniugio momentum est, illudque reddit dulcissimum, pignus liberorum. Non comparo REGINAM nostram vel Liulæ vel Plotinæ, quam scio meliorem altera fuisse, altera nobiliorem: in eo autem maxime anteferendam censeo, quod matrimonii sui diuinum pignus, Deo fortunante, serenissimum IUVENTVTIS PRINCIPEM reliquit, in quem spes patriæ reclinat, in quo MATER reniuit & vere fit immortalis. Si quid humanitas in augusto hoc matrimonio desiderandum est, diuturnitas est, quam solam cæleste fatum, cetera huic ipsi coniugio maxime propitium, negauit. Nimis felices nobis visi fuisset, si huic Deus muneri suo addidisset perpetuitatem, vt vetustior nexu maiorem in dies non iucunditatem modo, verum etiam utilitatem maximam adferret. Fuit enim & eo nomine Coniugium hoc faustum & fortunatum, quod inter potentissimas Germaniæ Gentes, Borusso-Brandenburgicam & Brunsvico-Luneburgensem, firmum & stabile foedus societatemque constituit, cuius vinculum amabili suauitate sua, quoad vixit, serenissima REGINA fuit, eritque etiam, vt speramus, postquam oculis subducta est, memoria sui perpetuæ inter vtramque Domum amicitiae stabilimentum.

Neque enim virtutes mors exstinxit, neque virtutum & gratiarum memoriam, quæ mori nesciã, ab annis vires sumit & incrementum. Memoriam

memoriam REGINA pietatis reliquit, non in speciem & ostentationem, sed intra pectoris cultre penetralia, quæ nihilominus, ut ignis, latere non poterat, sed per alias virtutes multiplices, quarum parens est pietas, emicuit, & radios quoquo versus splendidissimos diffudit. In primis elucebat suavis & amore non tam temperata quam in dies aucta erga REGEM reuerentia; item cura & amor in FILIVM tenerrimus, quem ut unicum educabat, ita vnice, hoc est vehementissime dilexit. Nec minori affectu in FILIAM REGIS, quamvis ex se non genitam, fuit, ut illius partes, in cuius locum successerat, non modo diligenter ageret, verum etiam adimpleret. PARENTES autem serenissimos tanta veneratione, & FRATRES serenissimos tanto amore coluit, ut magis illi coli non potuerint. Ceteris, immo omnibus, erat facilis & benigna, singulorumque, qui petebant, beneficiis, quibus potuit, ornabat, alienum a persona sua ducens, tristem aliquem, quisquis esset, aut gementem dimisisse. Nec vero hac benignissima comitate quidquam fecit, quod dignitati suæ maiestatique derogaret; sed qua sapientia erat & animi moderatione, gravitatem humanitate temperabat, & hanc vicissim ad generis referebat dignitatem: quod sapientum iudicio semper difficillimum fuit habitum; NOSTRAE autem non difficile fuit, quæ ab ætate prima se ita adfuefecerat, ut modum teneret in omnibus, ac neque bonis suis efferretur, neque comi-

comitate infra decus se submitteret, ita par summis & principibus, ut etiam infimis benigna esset, & humana. Ex qua mirabili moderatione magnitudo animi, digna Principibus virtus, nascitur, quæ ita secundis rebus magnaue fortuna utitur, ut nihil inde sibi indulgeat, nihil etiam de humanitatis officio remittat, sordidas solas res & vitia despiciat & contemnat. Animi magnitudinem constantia comitatur, quæ ille semper sibi constat, non elatior rebus lætioribus, neque depressior aduersis, sed semper idem, semper firmus, ad utramque fortunam paratus, Deo confisus, virtute innixus, quæcumque fortuna inciderit: in secunda aduersæ non obliuiscitur, nec humanæ fragilitatis; nec deiicitur ab aduersante, sed sperat meliora, etiam expectat. Magnus animus REGINAE nostræ erat, quo fortunam suam & felicitatem non capiebat modo, sed prudenter etiam & ex virtutis lege moderata fuit, ut fugeret indigna suo ordine; honesta & decora perpetuo tueretur, nihil fortunæ cederet, sed, utraq; maior, ea diceret faceretque, quæ animum recti bonique tenacem probarent; & in quouis cursu rerum se æquabilem gereret ac neutro inclinaret. Hinc illa fortitudo & constantia insuperabilis, quæ res lætas & aduersas inuicta tulit animo, & se non regi a fortuna, sed eidem imperare, magnis præclarisque documentis demonstravit. Quem primum pepererat FRIDERICVM AVGVSTVM, quarto mense amisit, & alterum quoque immaturo partu: hos ve-

ro casus constantissime tulit; nec minus obitum
 serenissimorum Parentis atque Fratrum, quos in-
 credibili amore ac pietate prosequuta fuerat. No-
 uerat & animo semper agitabat, quæ fata huma-
 næ vitæ sint, & quanta eius fragilitas, & quam
 nulli mortalium conueniat Deo refragari; vt pô-
 tius æquo & obsequenti animo ferenda sint, quæ
 mutare aut interuvertere supra conditionem est
 hominum. Par robur etiam in Cognatorum o-
 stendit funeribus, & communia fata tolerando vi-
 cit, quæ grauius premunt, si indignamur imperi-
 um diuinum; ferendo, patiendò fiunt leuiora.
Aliena erat ab amore sui, auersabatur blanditias
& adulationem, nec ferre poterat, si quis sibi
præsenti laudes, quamlibet veras meritasque, con-
tribueret. Iusti æquique fuit amantissima: pu-
 dicitiam vero sibi quasi propriam vindicauit, ab-
 horrens vel verbum impudentius, vel iocum li-
 beriore: vt, quæ in nummo Plotinæ Augustæ,
 Traiani coniugis, ara conspicitur, inscripta ARA
 PVDICITIAE; illam REGINAE nostræ
 monumento vel imagini meritissimo iure adscribi
 quoque deceat. Studiosissima fuit legendi vari-
os libros, sed præstantes, vtilis, salutare, qui vel
ad Dei cognitionem ac cultum pertinebant, vel
ad animi morumque faciebant medicinam, vel
rerum in Orbe gestarum, Regnorumque
ac Rerumpublicarum historiam expositam
 continebant. Remissiones animi; quæ bre-
 ues erant & moderatæ, in musica quærebat &
 scē-

scenica poesi, qua vanitatem rerum, ineptias hominum & reprehensibiles mores non tam ad sui oblectationem, vel quorumvis, adspectantium ostendi voluit, quam ut illos, qui vitiis impliciti aderant, & spectabant, emendaret, ut ex tristi eventu discerent castigatius vivere, suasque continerent cupiditates, ac mores ad precepta honestatis ac virtutis conformarent. Quid quaeritis, Auditores? Ut sapientes censuerunt, etiam ori red- dendam rationem esse, sic sapientissima REGINA, quum subsecivis horis animum remitteret, non ludicris, ineptis aut sordidis rebus faucebat, verum, qua animi erat magnitudine ac generositate, ad decorum & honestum omnes remissiones, quibus nullam indulgit licentiam, referebat.

Hæ tantæ virtutes, hi mores ex virtutibus nati, suavitatem temperati, vna cum forma, qua omnibus antecellebat, beatissimam REGINAM fecerunt summe gratiosam, & omnibus venerabilem, quoscumque adiit, quave transiit vel comitata REGEM serenissimum, vel sola ad Parentes aut Cognatos suos profecta. Quum potentissimus REX expeditiones vel bellicas vel alias ad Rhenum inferiorem aut in provincias Belgarum faceret, quo in ipsum amore coniugali erat, lubens sequuta fuit, in eoque itinere, quarto post conubium anno, serenissimam MARIAM Arausionensem Principem, post Britanniae Reginam, cognatam suam, absente Wilhelmo marito, inuisit: &

quid

quia maxima in iis virtutum erat æqualitas, in tantam consenserunt amicitiam, ut mutuis litteris conseruata, ne obitu quidem augustæ MARIAE ex animo NOSTRAE exstingui potuerit. Octauo post anno etiam maximum Regem WILHELMVM; itidem Cognatum suum vidit, quum is nostrum REGEM salutaturus Cluiam venisset. Mirum dictu, quanta beneuolentia Rex summus nostram REGINAM complexus fuerit. Quarto post anno cum serenissima Matre, iam Vidua, in thermas Aquisgranenses profecta; quum valetudini consuluisset, vsque Bruxellas Brabantiae excurrit, vbi FILIVM carissimum, qui interea Auunculum magnum, Regem WILHELMVM in Looënsi prætorio veneratus fuerat, maximo gaudio recepit: & in Bataviam regressa, Hagæ Comitum summis honoribus æque, ac quum primum eo venisset, ab Ordinibus potentissimis excepta fuit, etiam ab ipso REGE Britanniarum, tum ibi præsentē, conuentū & colloquio iterum iterumque honorata. Magnum decus, summus honor ab Rege pro necessitudine & dignitate æstimari: a præpotentibus coli Ordinibus Fœderatorum Belgarum: sed maior honos & amplior dignitas decreta illi fuerat, quippe sequenti anno, qui sæculi noui primus erat, solemnissimo ritu & magnifica pompa, applaudentibus cunctis & gratulantibus, REGINA BORVSSORVM inuncta fuit, quo apicem honoris, qui mortalibus

talibus conferri potest, Deo adnuente, consequuta fuit.

Trepidat lingua, horret dicere quæ restant fu-
nestissima: & tamen dicenda sunt, sed breuiter,
quia consultius, Auditores, dolorem animo pres-
sum occultare, quam multis verbis illius irritare
acerbitatem. Ea firmitudine corporis REGI-
NA videbatur, vt non tantum vota secure pro
salute eius faceremus, sed, quæ voueramus, etiam
spe præciperemus: verum collapsa spes, vota alio
versa, ac optaueramus; quod fatum nec opinatum
nobis fuit, beatissimæ vero REGINAE non
inprouisum. Duodecim enim anni sunt, quum
florētissima ætate, mortalitatem meditabunda,
confectis tabulis suprema sua ordinaret, in iisque
SERVATORIS de Resurrectione verba in exse-
quiis suis interpretanda definiret. O præclarum
exemplum & omnibus imitandum! Quis credat,
si hominum consuetudinem, si mores singulorum
in consilium adhibeamus, tam excelsæ Principi,
tam florida ætate, cui nihil desitearum rerum, quæ
ad viuendum incitare possunt, id curæ fuisse? at
fuit NOSTRAE, quia sic instituta, sic edocta ab
incunte ætate fuerat, quod mori discere sit sum-
ma sapientia: & nosse fragilitatem suam, pars
maxima humanæ felicitatis. Iam fatum adprope-
rabat, quum REGINA nostra, in serenissimam
Matrem vnice pia, Hanoueram proficisceretur, vt
eius senectutem præsentia leuaret, quamquam nec
ipsa satis firma, & bis in itinere illo offensam va-

letudinis experta. Quum tandem, quo destina-
uerat, xvi kal. Febr. venisset, & per dies aliquot
bene valeret; postea, se morbus prodidit, sensim
primum, mox in febrem erumpens, quæ vero
brevi sedata ita fuit, vt e conclaui prodire, cum
FRATRE ELECTORE prandere aliquo-
ties potuerit. Sed sæpius recurrit morbus, &
tandem ita vices debilitauit, vt vitz finem adesse
nec ipsa REGINA, nec alii, qui aderant, dubita-
rent. Tum vero virtutes, vt militis in prælio,
se maxime exseruerunt, fides firma, spes secunda,
constantia fortis, patientia insuperabilis, & qua
animi magnitudine erat, omnia, quæ maximi fa-
ciunt mortales, ex animo dimisit, vt Deo vacaret
& sanctis meditationibus; in quibus a Gallicæ
Ecclesiæ Ministro adiuta non semel fuit. quem quum
iterum aduocaret, prænuntiare illi iussit, SE SIBI
OMNIA APVD ANIMVM PROPO-
SVISSE, ET ETIAMNVM PROPO-
NERE, QVAE IN PRAESENTI
STATV, QVO IPSA ESSET, SVB
VITAE FINEM, PROPONI ET AD-
MONERI POSSENT: SEQVE DE-
VM PROPITIVM PLACATVMQVE
HABERE. O beatam animam, quæ ita certa
de Numine propitiato, excessum ex mortali vita
parat! Valedixit omnibus, & Aulæ supremo
Magistro Billouio in mandatis dedit, vt serenissi-
mo REGI suis verbis vltimum VALE dicat, &
gratias pro amore agat, & felicitatem perpetuam
ad-

adprecetur: Eidem FILIVM commendet, & qui sibi ministrando adfuerint. Per eundem etiam Bülouium valere carissimum FILIVM iussit: Fratribus VALETE presentibus dixit: Matri per alterum Fratrum, quam ad id tempus, ne gravius doleret, de fato dulcissimæ Filie celaverant. Sic omnibus peractis, quæ agenda morienti sunt, Deo plena & Christi meritis confisa, animam BEATA ET LENISSIMA MORTE, ut Fratri Electori prædixerat, kalendis Februariis Creatori reddidit, quum sex & triginta annos vixisset, menses tres.

O vero ter quaterque, & æternum beata, SOPHIA CHARLOTTA, Angelorum associata consortio! non portionis nunc terræ, sed CAELI REGINAM, ut es, TE appellamus. Maesta gloria TVA, fruire quiete, letare felicitate, quam plenis manibus a Deo collatam possides; & possides æternum. Vale, beatissima REGINA, saluæ elementissima DOMINA: vale, hæc, æternum vale. Nos qui TE mortalem venerati sumus, postquam immortalis facta es, memoriam TVI perpetuo colemus, gloriam virtutum commendabimus posteritati, ut nulla unquam ætas de laudibus TVIS conticescat.

ORATIO XIII.

MEMORIAE
SUPREMI ACADE-
MIAE FRIDERICIANAE
CURATORIS

*ILLVSTRISSIMI DOMINI, VIRI
CONSVMMATISSIMI*

PAVLI a FVCHS,

S. ROM. IMP. LIB. BARONIS,
POTENTISSIMI RE-
GIS BORVSSIAE CONSI-
LIARII STATVS RERVMQVE
BELLICARVM INTIMI, ITEM
FEVDALIVM RERVM DIRECTO-
RIS, DVCATVS VLTERIORIS PO-
MERANIAE AC PRINCIPATVS CAMI-
NENSIS CANCELLARII, ET SACRI
CONSISTORII PER MARCHI-
AM PRAESIDIS, VNDIQUE
EMINENTISSIMI,

NONIS AVGVSTI cl^o l^o cciv
MORTALITATE INTERCEPTI,
DEDICATA.

Vixit,

VIxit, superuixit, immo viuit per
 sæculorum memoriam VIR sum-
 mus & illustrissimus PAVLVS
 FVCHSIVS, de patria, republica,
 & hac nostra academia meritissi-
 mus. Vixit, eheu! & viuere desiit,

qui dignus immortalitate fuit: gloriæ suæ super-
 uixit multos annos: legit rerum a se gestarum
 annales & historias, & ante, quam vita excederet,
 posteritati interfuit. Viuit etiam in bonorum
 omnium memoria: viuit in monumentis ingenii
 quæ extruxit; viuit fama bene administratæ rei-
 publicæ; viuit & gloria, quæ numquam peribit,
 litterarum & eloquentiæ. Nam illa vita, quæ vi-
uitur spiritu & corpore, non est vera vita, quæ
ingeniis & sapientiæ cultoribus sufficiat. Poste-
ritatem prospicit mens generosa, in illa versari
laudarique concupiscit, & quum ipsa immortalis
sit, sui etiam memoriam, & meritorum laudem
appetit immortalem. Etiam nullam virtus a-
liam mercedem laborum, nullam litterarum stu-
dia desiderant, quæ viam virtuti sternunt, præter
hanc laudis & gloriæ sempiternam. Quam vt
 consequantur magnæ animæ, ab ipsis Musis,
 quas illæ coluerunt, prospicitur; quia suorum
 ingeniis perficiunt, vt nulla ætas, vt memo-
 ria nulla de laudibus illarum conticescat. Ad
 quod quum omnes conferant, quotquot virtu-
 tem & doctrinam in pretio habent; quanto ma-
 ius, quanto iustius putatis, Auditores, officium

Fridericianæ esse, quæ non tantum, quod alii, miratur, ingenium VIRI summum, iudicium peracutum, doctrinam consummatam, facundiam incomparabilem; verum rationes etiam habet proprias, easque sibi necessarias iustissimasque, quibus inducatur, ut ipsa magis, quam quisquam alius, in maximi VIRI laudes intenta, se gratam, immo deuotam piis Manibus perpetuo exhibeat. Recordatur enim semper (nec enim fas est obliuisci) huius ore, sacro AVGVSTI CONDITORIS mandato, se dedicatam, eiusdemque & Collegarum Triumvirorum curis ac consiliis ad eum florem ac famæ celebritatem succereuisse, ut de fructuum copia præstantiaque cum antiquissimis academiis frequentissimisque certare possit. Has propter rationes se maxime ad memoriam tanti VIRI colendam, & in Honoris templo æternitati vicissim dedicandam, sese obstrictam esse intelligit: quod nunc mihi munus impositum esse video, cui digne exsequendo par Fuchsiæ eloquentia (at ubi inuenitur?) omnino foret necessaria. Nihilominus, quum excusabilius sit deficere dicendi facultate, quam, officio neglecto, notam ingrati animi admittere; Fridericianæ personam in me suscipio, & utcumque potero, illustrissimi VIRI merita memoriæ æternæ dedicabo, ut nec posteris, nec vlla ætas nesciat, quibus studiis VIR summus ad tantam virtutis ac doctrinæ gloriam progressus fuerit: indeque exemplum capiat, quod iuuentuti, ad rempublicam instituendæ,

endæ, imitandum æmulandumque perpetuo proponatur. Duo enim sunt, quæ illustrium virorum exemplis pariter observari decet, grata veneratio memoriæ, & sollers virtutum imitatio. Neutrum abesse ab officio huius diei decet, quod non expletur, nisi coniuncta illa efficiant, ad quod a maioribus instituta sunt parentalia sacra, siue funebres, uti vocantur, laudationes. Vos vero, Auditores splendidissimi, ut beatis Manibus impense omnes fauetis, sic mihi quoque de maximi VIRI virtutibus ac doctrina, & quæ inde ortum habuerunt, honoribus ac rebus gestis dicturo, non lingua modo, sed animo & auribus etiam, quod vnice precor, pro vestra mihi non ignota benevolentia favere.

Annus sæculi nuper exacti quadragesimus erat, quum natura non effeta in citeriore Pomerania, eiusque ad Oderam metropoli, cum virum parituri erat, qui litterarum præsidium, & gerendarum rerum magnum lumen futurus erat. Quantas fovitrix natura opes habet, quibus indolem instruat ac ornet nascentium; eas omnes in NOSTRVM, quem laudamus, contulit ac cumulavit, ut tantus aliquando fieret, quantum virtuti ac doctrinæ, maximo ingenio, acerrima voluntate, summoque studio ad fastigium feliciter euehendæ, satis est ac necessarium. Si quid etiam momenti in natali solo est ad ingenii felicitatem obtinendam; neque id NOSTRO videmus defuisse, cælum salubre, nec molle tamen, sed quod

induret ad laborem: mores civium, non magis mercaturæ, quæ per flumen & vicinum mare exercetur, quam litterarum studiis idoneos, quippe illustre, quod ibi est, Gymnasium, optimis repletum disciplinis, NOSTRI adolescentiæ ad profectus solita maiores incitamento singulari fuit. Interest multum, quo quisque loco, quibus ducibus, qua via in Musarum penetralia ingrediatur. Plurimi hodie dum festinant cursum, in devia abripiuntur, malis abducti præceptoribus, qui quum, ignari rectæ viæ, per compendia volunt ducere, in dispendia resquis & vepribus horrentia inducunt. Qui enim vel sacra Themidis, vel alius superioris disciplinæ, sine litterarum studiis, quod est illotis, ut aiunt, manibus, tractari posse existimant, plerumque eiusmodi formant ac fingunt homines, quibus nec Reges neque Principes ad magnas res agendas uti possunt. Magnorum Principum aliæ rationes sunt, quam ceterorum, nec illis hac scientia, quæ iuri dicundo addiscitur, satisfieri in rebus suis potest. Legationibus opus est ad externos Reges atque Respublicas: Latinæ sæpe ad eosdem sunt epistolæ scribendæ, aut aliud eadem lingua copiosius in causis publicis & pacis bellicque momentis demonstrandum: quibus sane impar est muneribus, qui non in iuvenute ad illa se præparaverit. Hugonem Grotium, magnum virum, uti erat, ac illustratorem naturæ & gentium iuris omnes laudant & demirantur, paucissimi vero ad fontes, unde fluxerit sapientia illius,

~~illius, respiciunt.~~ Ipse eos minime celauit, oratores, historicos, poetas veteres nominatim commendans, vnde corruarit suam, quam Orbis admiratur, naturalis iuris ac populorum consuetudinum notitiam ac facultatem. Hinc enim optima nascitur vis consultandi, & saluberrima consilia ab exemplis & rationibus sæculorum proficiuntur. Quasi vero ad huius viri exemplum se componeret noster PAVLVS FVCHSIVS, nequaquam adolescens, quod multi faciunt, studia illa posthabuit aut neglexit, quæ ceterorum fundamenta sunt: neque leuius tractauit illa, aut properantius iusto transcucurrit; sed, quoad ætas ferebat, eorum se illis tradidit; neque, quum ad grauiora adgrederetur, illorum curam ex animo abiecit; sed, vt omnes liberales artes inter se vinculo cohærent, ita primas secundis aliisque sequentibus semper coniunctas esse voluit, vt disciplinis disciplinas adiuuaret, nec, riuos sequendo, fontes ipsos limpidißimos amitteret: idque tam concitatus indole sua fecit, propendente in meliora studia; quam ductu illorum, a quorum ore pendebat, hominum litterarum elegantium doctrina instructissimorum. Erant enim illo tempore plenæ Germanorum academix optimis liberalissimisque studiis, & in singulis docebant quidam, qui humaniores litteras ex antiquis monumentis explicarent, a quibus, qui plus vulgo sapiebant, didicerunt quæ ad vsum singularem & eximium rei publicæ conferrent. In horum numero NO-

STER nomen profitebatur suum, & iam tum a-
dolescens intellexit, quæ vera sint & firmiora stu-
dia, quibus cetera suffulciantur; quæ inde non
tantum ornamentum petunt, sed vsus etiam sui &
exercitii facilitatem. Vt ergo bene capta per-
poliret, in Batauos profectus est, vbi elegantiores
Musæ, Græcia barbaris relictæ, sedem sibi ac do-
miciliū constituerunt. Ibi vixit in conspectu
clarissimorum hominum, ad quorum se exemplum
conformabat, iisdemque, quibus ipsi pollebant ar-
tibus, pectus suum etiam impleuit, id maxime
miratus imitatusque, quod in gente illa summum
est & præcipuum, pristino Romanorum more
studia artium ac disciplinarum doceri, nec primo
loco esse quod magis, quam cetera, lucrosū est;
sed quod puleherrimos fert fructus ad rempubli-
cam & communem vtilitatem. Romani, corda-
tissimi mortales, primas partes eloquentiæ dabant,
qua plurimum possent in republica, nec in vrbe
tantum aut Italia, verum etiam in prouinciis, &
ipsis castris, quum bello interessent. Quapropter
de Seruio Sulpicio refertur, iurisconsultorum æ-
tatis suæ principe, quum eloquentiæ palmam, quam
adfectabat, præceptam sibi a Cicerone ac Horten-
sio vidisset, maluisse in secunda arte primum es-
se, quam in prima, id est eloquentia, secundum.
Hac via ad summa nobilissimus quisque Fœde-
ratorum Belgarum grassatur, quibus semper ora-
toribus opus est, quos in aulas Imperatoris, Re-
gum, Principum delegent, quibus sæpe numero
Lati-

Latine, communi eruditæ Europæ lingua, causâ sua agenda est. Despiciant artem qui ignorant: ineptos rhetores cum oratoribus confundant, qui discernere nesciunt: sunt nihilominus sapientiores multi, qui altius inspiciunt, discrimen intelligunt, vsum cognoscunt & prædicant. Plus ad hæc studia requiritur, quam vulgus imperite iudicat: cognitio omnis antiquitatis, lectio oratorum, poetarum, historicorum: nec non iuris, legum, & philosophiæ, eius præsertim, quæ de moribus agit & ciuitate, non leuiter tincta, sed penitus imbuta cognitio atque scientia. An existimatis, suppetere oratori posse, quod quotidie in tanta varietate rerum dicat, nisi animum vniuersa doctrina clarissimorum hominum excoluerit? e quibus alius inuentionis ordinem suppeditat, alius materiam & amplificationem: iste selecta & idonea verba subministrat: ille ornatum præbet & artificium: sunt qui ad excursus & digressiones, etiam oratori necessarias, plurimum conferant: ut ita nulla parte litterarum carere possit, qui oratoris nomen sibi tuendum vindicandumque proposuit. Quæritis, Auditores, cur tam multa de argumento hoc verba faciamus? Id institutum exigebat nostrum, quia summus, quem nostra ætas vidit, Orator mihi laudandus est; & si dicemus quod res est, non alio magis studio, immo præcipue hoc ipso ad tantos honores, quos gessit, euectus fuit. Sed de hoc infra pluribus dicemus: nunc, quæ restant de ingenii cultura, & ad rem publi-

publicam præparatione, persequemur. In Galliam NOSTER & Britanniam profectus, non, ut multi, quo tantum pulchras aut munitas vrbes, & splendida ædificia, aut pompam & obsequia aularum spectet; sed quidquid vbique bonum, præclarum, & elegans erat, in usum ut verteret suum, & antiquitates perscrutaretur, & quantas Romani olim res hoc vel illo loco gesserint, ad spectu oculorum excitatus, apud animum curatius consideraret. Magna hæc aliorum decora, neque vero satis dant doctioribus. Habent exteræ nationes illæ viros omni eruditionis genere ac elegantissimis studiis perpolitos ornatosque. Hos adire, cum his esse ac versari, horum sermonibus, studiis, moribus intendere animum, ac inde discere quod salubre ac frugiferum est; hoc vero præcipuum peregrinationis munus sollicitissimus noster FVCHSIVS ducebat; etiam perlustrare bibliothecas, & thesauros scrutari antiquitatum, nummorum præsertim veterum, e quibus doctissimus quisque nunc elicit, quæ ad nitidiorem elegantiam, ad emendandas rerum gestarum ac temporum rationes faciunt.

Sic formatus ornatusque optimarum disciplinarum scientiis, honores non largitionibus inuasit, aut arroganter petiit & iactabundus; sed, qua modestia erat, ordinaria se via ad rempublicam contulit, illius memor sapientum præcepti, quod Philopœmeni, non minus philosopho summo, quam militiæ præclaro duci, Plutarchus tribuit, semper

semper in ore animoque habuisse, DOCTRINAM DEBERE AD FACTA TENDERE, NON OTII AVT DISSERTATIONIS CAVSSA VSVRPARI.

Qui amœniores Musas per inscitiam suam contemnunt, apud vulgum criminari solent, illarum cultores inutiles ad res gerendas esse, siue ad tractandam rempublicam; quam vero hi turpiter a recto sensu aberrant, non vetustis Græcorum Romanorumque exemplis ostendam, ne quis mihi referat, aliam conditionem nostrorum temporum esse, alium nunc statum reipublicæ; sed vel solus hic summus VIR, cui suprema iam persoluimus, configet ac refellet illos, & pudendæ ignorantiae convincet, quippe ille ad omnem elegantiam litterarum excultus, tantum operæ studiique reipublicæ nauauit, quantum non facile, quisquis etiam est, præstantium virorum alius: quod nec ipse NOSTER potuisset efficere, nisi tam præclare instructus ornatusque litterarum fuisset præsidio. Ve vero fructus, quos collegerat, adferret ad rempublicam, primum foro dedit operam, in quo non modo iuste ac legitime versatus fuit, sed ita diserte quoque, ac ea claritate suæ fidei commissas causas egit, vt facile appareret maiori eum ingenio esse, quam vt dignum sit, forensi illud strepitu consumi, nec diuitias, quas possideat, illustriori loco exponere. Illorum ergo consilio, qui rebus præsunt, & ingenia dignoscunt, publicumque statum litterarum curant, glorioso

rioso Principi FRIDERICO WILHELMO Magno commendatus fuit, vt paullo ante ab illo constitutæ Duisburgensi Academiæ Professor iurisprudentiæ adderetur, cui ornandæ prouinciæ in primis esset idoneus, vtpote iis litteris, quibus antiquum ius Romanorum illustratur, quam maxime eruditus. Ibi vero campum nactus est NOSTER, in quo virtus eius excurreret, & doctrina se mirifice in publico conspectu explicaret. Docuit incredibili suauitate, summa eruditione, idque tam perspicue, itaque sincere, vt omnium ad se oculos animosque aduerteret. Et vt aliis etiam extra spatium suum prodesset, Paraphrasin Iustinianearum Institutionum, singulari felicitate compositam, publici iuris fecit, nihilque in vlla parte prætermisit quod quisquam summo ingenio, acerrima industria, magnoque vsu cognitum ac perceptum proponere aliis & tradere posset. Contentus sua fortuna erat honestoque loco atque otio, quamquam ipse minime otiosus erat, sed semper aliquid meditabatur, quod ornandæ iuuentuti, & rei litterariæ augendæ in publicum conferret. Est enim hoc vitæ genus maxime tranquillum, etiam rei publicæ, si quod aliud, frugiferum; nec minus proferendæ famæ nominis idoneum: quod ipse postmodum, quum summis iam honoribus emerneret, per epistolas amicis suis sæpe laudauit. His ergo bonis contentus NOSTER erat, iisque tranquillus fruebatur: sed fama maioribus eum desti-

destinauerant. Etenim ingenii magnitudo in dies magis elucebat, eoque factum fuit, ut a triennio in Aulam reuocaretur, secreta status publici litteris consignaturus. Tunc vero enituit clarissime, quid ingenium possit, humaniorum litterarum præsidio, & quod inde exsurgit, ciuilis prudentiæ, confirmatum. Expedita epim celeritate miraque sapientia omnia feliciter & scite componebat, nullaque res ita ardua, confusa, turbata, distracta erat, quam ille singulari artificio ad pulcherrimam formam elegantiamque non potuerit redigere. Sub idem tempus Rex Galliarum, ut Belgicas Hispanorum provincias, quibus dudum inhauerat, deuoraret, Belgas Fœderatos, quos solos consiliis suis obstare aliquoties expertus fuerat, immani bello imparatos adgressus, in societatem illectis Magnæ Britanniae Rege, qui mari vrgeret; & Colonienſi Electore ac Episcopo Monasterienſi, qui Germanorum auxilia accessu prohiberent; cum his, inquam, sociis eos Belgas funditus delere constituerat. Quæ res quod grauissimum periculum Germaniæ nostræ intentaret, beatus noster FVCHSIVS, priuatis credo consiliis, & periclitandi ingenii causa, quo perspicacissimo pollebat æque ac scribendi facultate; omnem statum illius belli cum veris causis & futuris euentibus Epistola Latina, dissimulato suo, præscripto Sinceri Germani nomine, ad Ludouicum Seldenum perscripsit, quæ quod summo iudicio tersissimoque stilo composita esset, cumulum

existimationi, antea virtute ac doctrina partæ,
 addidit. Tum enim, quod aiunt, ex vngue le-
onem viri summi, ELECTORIS maximi in
 dirigenda republica administri, cognouerunt. Ita-
 que aucti honores atque præmia, & quæ Latine
 aut Gallice (nam utroque sermone, ut natio,
 excellebat) quæ, inquam, his linguis consignanda
 aut expedienda erant ipsi soli committuntur: fit
 & Aulicus Consiliarius, & paucos post annos san-
 ctiori Senatui potentissimi ELECTORIS ad-
 lectus est. Tantos fructus litterarum ferunt stu-
dia, si bene radicata sint, & cum iuris studio ac
 philosophiæ, quibus adiumento sunt, suauiter con-
 iuncta. Hæ illæ alæ fuerunt, quibus ad tantam
 dignitatem atque gloriam VIR illustrissimus e-
 uectus fuit; hæ omnibus expeditionibus subsidio;
 hæ perpetuo per omnem ætatem ornamento. Si
 quid grauitè, si ornate, si Latine, ut ad externos
 Reges atque Principes, elaborandum erat, NO-
 STRI is labor & opus solius erat, aut voluptas
 potius, quam labor, quia adfuetus his artibus in
 iisque exercitus ita erat, ut sine difficultate, sine
 tædio aut molestia, prompte celeriterque omnia,
 nec minus sapienter, perficeret. Possem comme-
 morare, quæ ad inuictissimum Imperatorem pro
 Vngaris, sacrorum causa misere adflictis; aut ad
 Regem Hispaniæ de naue ad Ostendam capta &
 abducta; aut ad diuersos illos maximi PRIN-
 CIPIS nomine ac auctoritate conscripserit; &
 quæ nuper in causa Elbingensi ad Regem &
 Rem-

Rempubicam Polonicam copiosissime clarissime-
 que exposuerit: cuius generis litteraria moni-
 menta permulta in scriniis Regiis adseruantur;
 sed satis ad demonstrandum Epistola sit, ad sere-
 nissimum Sueciæ Regem aduersus Legati Suecici
 impudentissimam criminationem sacro mandato
 consignata, quæ integra in Pufendorffianis exstat
 commentariis. Orationes autem, vel sub indul-
 gentissimo REGE nostro, vel sub PARENTE
 gloriosissimo habitæ, huius VIRI quasi propriæ e-
 rant, quia nemo fuit disertior promptiorque ad
 dicendum, siue patrio sermone, siue veteri Ro-
 mano verba facienda essent. Testis est vel sola
 Dedicatio huius Academiæ, plausu amplissimi thea-
 tri digna; omnibusque numeris perfectissima.
~~Siue enim verborum delectum singularem specte-~~
~~mus, siue formam & compositionem, siue deni-~~
~~que argumentum & materiam; nihil magnifi-~~
~~centius ornatusque dici potuisset.~~ Quid quæri-
 tis? Digna omnia erant inuestate CONDITO-
 RIS Academiæ, qui in solio præsidebat, audiebat-
 que clementissime, augusto suo nomine dedicari;
 quæ perennem gloriâ adlatûra esset, nouam A-
 cademiâ Fridericianam. Legatos Regum &
Rerumpublicarum præci Romani ORATORES
ab officio dixerunt, quia legationis munus oratio-
ne plerumque peragendum est. Noster autem;
 non vt aliquis e multis; verum, vt erat, e-
 gregius & incomparabilis Orator quam plu-
 rimis legationibus; simul ac virtus eius in-

Q

notuit;

innotuit, ad magnos Principes & Respublicas perfunctus est, & vbique sua eloquentia, sapientissimis consiliis coniuncta, perfecit, vt felicior eventus sequeretur, sui que PRINCIPIS ac DOMINI satisficeret voluntati. In Dania id præstitum primo fuit, cuius Regem Domino suo conciliauit adeo, vt is in periculosa. quæ tum agitabatur, nouæ contra Gallos societatis causa plane cum ELECTORE consentiret, diffiso (quod priori societate expertus fuerat) tam constantiæ, quam viribus Sociorum. Nec multo post tempore, quum gloriosus ELECTOR pro pace & securitate Germaniæ, omnem, vt aiunt, lapidem moueret, hunc suum Oratorem ad Coloniensem Electorem, ad Duces Brunsvico-Luneburgenses, ad Episcopum Paderbornensem, Principem Arausiæ, Ciuitatem Amstelodamensem, & ad Ordines Frisiæ orientalis misit, vt facundia sua demonstraret, quam necessariæ illo tempore indutiæ essent, cum Gallorum Rege incundæ, quod Cæsaris arma bello Turcico distinerentur, Hispania eneruata esset, exhausti Belgæ, Britanni paci ac otio procliuiiores viderentur: quæ etiam indutiæ viginti annorum tandem Ratisponæ, in Comitiorum loco, factæ sunt, vtinam etiam a Gallo constantius seruata, nec breui post tempore, præter opinionem omnium, perfido consilio abruptæ & conculcata. Illa in Bataviâ Frisiâque legatio occasionem dedit de commerciis terra marique exercendis agendi: & eodem tempore nauigationes in Africam Americam-

camque Emdæ Frisiorum, frustra nonnullis reclamantibus, ad certas rationes adductæ ac confirmatæ sunt: qua in re quoque nostri FVCHSIJ studium atque consilia laudantur. Mire id gloriam Brandenburgicam adauxit, quum in vniversa Germania nemo sit Principum, qui extra illas Solis vias, vbi cælis Atlas axem torquet, prope medium terrarum Orbis circulum, in aurifero litore castella possideat, præsidii teneat, & classem eo quorannis mittat, quæ mercandi causa in Americam vsque excurrit. Sed ad alia nobis est properandum. Tangit Batauiam Cliuensis terra, vetus Sicambrorum sedes; eique adnexæ quædam aliæ regiones: quibus nihil consultius est & vtilius, quam firma & perpetua cum Belgis Fœderatis amicitia, a longo tempore constantius culta & conseruata: vltimo autem, quod antecesserat, Gallorum bello / quo potentissimus ELECTOR auxilio Batauis profectus fuerat, non disrupta quidem, querelis autem mutuis debilitata & diminuta, cuius redintegrandæ causâ pacificus non minus, quam bellicosus ELECTOR eloquentissimum suum FVCHSIVM ad Ordines Belgarum misit, vt veterem amicitiam concordiamque renouaret: quod is etiâ, sublati dissentendi causis, adeo feliciter perfecit, vt insequente anno cum ELECTORE in eosdem Batauos delatus, maximi voluptate egregios transactionis suæ fructus, in summa illius ac Ordinum Fœderatorum consensione ac amicitia perspiceret. Et quem fugit no-

Q 3

strum,

strum, Auditores, difficillima inter Daniæ Regem & Holsatiæ Ducem, etiam vtrimque a Filiis repetita controuersia? etiam eiusdem Regis cum serenissimo Duce Luneburgensi de Ratzenburgica munitione concertatio? Ad has vero & similes disceptationes plures, & plerasque grauius protractas ac armis decertatas, illustrissimus noster FVCHSIVS, vt pacificatoris partes ageret, legatus, plurimis in hac causa institutis conuentibus interfuit, omniumque confessione illius studio, prudentia, & dicendi facultate ingens pondus ad facilitatem additum conciliationem. Tanta enim illius fuit sollertia, tanta vis prospiciendi futura, & tam prompta rerum omnium, etiam maximarum, expeditio, vt non solum grauissimæ quæque causæ ad illum deferrentur, sed ordinariis etiam muneribus in sanctiore Senatu, in Consilio Bellico, (nam & huius Collegii pars fuit eximia) & quorum Moderator ipse ac Director fuit, in Feudalium rerum Iudicio supremo, & in sacro Consistorio; etiam prouinciarum negotiis integrarum,* abunde ingenii magnitudine ac stupenda industria sufficeret. Propter quam agendi dexteritatem prægloriosus Elector FRIDERICVS WILHELMVS, & post huius ad Superos excessum, Filius & Heres FRIDERICVS, REX ac DOMINVS noster indulgentissimus, quoquo ibant longius, ac iter per prouincias aut extra illas faciebant, vt Agamemnon Nestorem, ita hunc suum FVCHSIVM comitem fere perpetuum habuerunt, quod illum ad subita
quæ-

quæque in dubiis rebus explicanda instructum paratumque experti essent. Sic maximus ille Heros in omnibus aduersus Gallos & Suecos expeditionibus, in Westphalia, ad Rhenum superiorem, in Bataua, Pomerania citeriore, in Borussia & ad Liouoniæ fines, & quas alias victor regiones cum exercitu peragrauit, hunc secum habuit in castris, in prouinciis, vt, quoties opus esset, (erat autem ferre quotidie) huius consiliis, voce, litteris vteretur. Nec minus potentissimo REGI & multum clementissimo DOMINO nostro idem in longinquis itineribus adfuit, quoties in Borussiam, aut Cliuenses regiones & Batauiam profectus fuit, præcipue, vbi fidelitatis iusiurandum in prouinciis accipiendum erat. Egregii & mirifice disertis sermones sunt, quibus singulis locis prouinciales ad fidem & obsequium suo DOMINO præstandum, exhortatus est, qui propediem, vt fama fert, typis exscripti, in lucem & publicum vsum prodibunt, ingenii ac facundiæ auctoris sui testes luculentissimi. Nec vero existimandum est, detrimento studiorum tot itinera & peregrinationes, quas diximus, fuisse. Qui enim dulcedinem studiorum in iuuentute imbibuerunt, numquam illa deferunt, sed vias quoque legendo fallunt, meditantur in diuersoriis, & semper aliquid agunt, quo publici labores quasi condiantur, & animus litterarum amoenitatibus refocilletur. Hæ enim alunt & augment industriam, hæ nouam quotidie alacritatem addunt, vt illa præstantior nostri pars nullis fran-

gatur laboribus, sit contra maneatque semper insuperabilis. Atque hæc ex publicis eius tam domi quam foris gestis rebus delibasse sufficiat. Quis enim tot annorum facta omnia recogitabit? & si quis esset, qui cogitaret, quis illa, non dico illustrare, sed tantum cum momentis suis simpliciter enarrare poterit? Verendum esset, ne dies nos deficeret, si singula velimus persequi ac recensere.

Restat aliud, quod nostri muneris est proprium, nec præteriri a nobis, illæsa pietate, potest, supra quidem leviter memoratum, nunc vero graviore cura & pleniori voce prædicandum. Non obliuiscitur Academia magnificentiam illius diei, quo ab augusto CONDITORE splendidissimis ritibus dedicata fuit: nec illius VIRI non meminisse potest, cuius suauiloquenti ore ipsa facta fuit dedicatio. Immortale hoc REGIS factum dignum utique præcone erat, qui usquam terrarum inueniri posset, eloquentissimo. Hoc vero ad munificentissimi AVCTORIS felicitatem accessit, ut eius diuinum opus, quo maxime sibi humanum genus devinxit, Orbi admirandum prædicandumque exponeret, qui omnes non modo ætatis suæ oratores, sed plurimum etiam sæculorum superaret. Magnum hoc & illustre est, cuius causa Academia nostra Fuchsianæ gloriæ æternum faueat: sed nec id solum est, quod illam ad memoriæ & laudis officium obstringat, verum, si recte reputamus, plura alia successerunt, si non maiora, tamen numero illi primo maximoque præferenda. Postquam

quam enim ei Cura Academiæ, quamlibet distri-
ctissimo reipublicæ muneribus, ab clementissimo
STATORE ac SERVATORE illius com-
missa fuit, tanto is studio Academiæ res tuendas
sibi & in maius prouehendas suscepit, vt putare
potuissetis, nihil illum aliud agere, nisi vt littera-
rum commodis & propagationi studeret: licet ne-
mo ignoret, quam infinitis curis aliis, quantisque
laboribus distentus fuerit, quibus tamen omnibus
ingenio & industria par, immo superior exstabat.
Scilicet hæc generosi pectoris natura est atque in-
doles, vt laboribus minime frangatur, sed recre-
etur potius ac reficiatur, quasi hoc eius nutrimen-
tum sit, & inter diuersa genera, quod litterarum
humaniorum est, suaue condimentum & laboris
mitigatio. Qui enim perfecte sunt eruditi, num-
quam maiori se adfici gaudio existimant, quam
quum in litterarum studiis versantur, aut ad iu-
vandas illas conferre aliquid pro suæ dignitatis
modulo vel amplitudine possunt. Quæ ra-
tiones communes NOSTRO cum aliis; nec
vero illæ solæ erant: addere possum singulares,
quibus, vt faueret nostris studiis, tamquam sti-
mulo concitabatur. Quisque operæ suæ aut lo-
borum gaudet fructibus, atque illustri etiam
FVCHSIO nihil delectabilius fuit, quam quum
videret, adnuisse Deum votis suis, quæ, quum
Regiis auspiciis dedicaret, pro incremento
& flore nouæ Academiæ non vulgaria, sed
exquisitissimis verbis concepta, sanctissimisque

facta cærimoniis rite nuncupauerat. Accessit dulcis recordatio, quibus ipse artibus studiisque ad tantos honores tantamque fortunam profectus fuisset, quod sane melioribus se litteris debere non ingratus profitebatur: quibus tam præclare de se meritis vt gratiam referret, nunc demum sibi materiam oblatam esse, quum curam suscepisset Academiae, lætabundus cogitauit. Hinc tantus amor tantumque studium VIRI summi in nostras Musas fuit, vt neque maius, nec testatius esse potuerit. Hæc publice ille, & in publicæ rei communem vtilitatem præstitit: quibus etiam publicum præmium, famam & gloriam, nec loci nec temporum limitibus circumscriptam, id est vere immortalem, consecutus est.

Nec vero ceteræ virtutes eius sunt sine laudibus dimittendæ, iustitia, beneficentia, humanitas, amicitia, reliquæ, quas communi vita aut priuatim ita excoluit, vt æque illarum fructus in rempublicam, cui natus erat, remitterentur. Improbitalis, futilitatis, calumniarum ac delationum, item inconstantia ac leuitatis; iactantia quoque atque ambitionis osor erat acerrimus, nec ferre illos poterat, qui non regia via, quæ virtus est & eruditio, ad honores adspirabant. Grauis fuit, vt dignum persona erat, quam agebat: idem vero etiam comis & benignus erga omnes, sed probos maxime ac virtutis amantes; quos vero simul elegantioribus litteris ornatos intellexerat, hos, vt sui similes, amauit, fouit, & si minus felices essent,

sent, vt latentem virtutem in lucem protraheret, studiosissime adlaborauit. Est enim proprium magnæ indolis, ingenii dotes in aliis non contemnere, sed amplecti, commendare, ac pretium virtuti ponere, ne illud contingat, quod indignissimum est, vt præclaræ mentes nullam mercedem, nisi ex conscientia, habeant. Amicos NOSTER non genere aut dignitate, sed ingenio distinguebat: & quo quisque virtute erat spectatior, eo faciliorem aditum ad consummatissimi VIRI amicitiam inueniebat: & receptus ab eo, quod haud difficile fuit; non vulgares fructus ex benevolentia eius & humanitate percepit. Cautè ac circumspectè inibat amicitias, vt probis tantum se committeret: si vero semel facta fuerat coniunctio, tanta constantia amabat quos legerat, vt quamuis distractus reipublicæ negotiis, numquam tamen deesset officiis amicitiae. Summos, infimos eadem voluntate, eodem amore complectebatur, & quod difficillimum est temperare, par summis fuit, communis infimis, neque illorum consuetudine humanitatem dimittebat; neque amore horum, grauitatem minus tuebatur. Litterulis salutatus, quamquam publice occupatissimus, tamen illi corespondebat cuilibet, pro capto illius & ingenio, litteratis Latine, idque tam scite ac eleganter, vt nec antiquum Latium tam Latinum fuisse videatur: & hoc, quod sæpe miratus sum, suopte ingenio suaque manu celerrime faciebat. Vt autem animo ingenti erat, ita par-

huic contigit firmitudo corporis, quæ nullis laboribus infrangebatur: neque quum iam in flexu ætas esset, imminui robur aut decrescere vires sensit. Tanta vis est consuetudinis, vt neque senectute debilitari se patiatur. Bis connubium felicissime iniit: ex priori duas Filias suscepit, quarum altera Parentem mortalitatis sine antecessit; altera illustrissimo Status Consiliario & Regio ad præpotentes Belgarum Fœderatorum Ordines Legato WOLFGANGO Libero Baroni de SMETTA V diuinis auspiciis locata est, Matrona tam suis virtutibus mirificis, quam Parentis, Maritique meritis conspieua & illustris: ex coniugio posteriore reliquit Filium, IOHAN- NEM PAVLVM, Lib. Baronem a FVCHS, Potentissimi Borussiæ REGIS Consiliarium Au- licum, & Appellationum in Westphaliæ Prouincia Rauensberga: vt ita etiam domi suæ NOSTER felix fuerit, sicut in Aula fuit & publicis hono- ribus, sicut etiam foris & in legationibus: idem- que gratus fuit Principibus, iucundus amicis, cli- entibus benignus ac beneuolus, in nostram Aca- demiam semper officiosus, ideoque a nobis æterna memoria colendus. Digna virtus immortalitate, quam post fata demum accipit, victura inter po- steros, qui sincerius & ex æquo omnia censent, meritorum memoriam conseruant incorruptam & immortalem. Hanc magnæ animæ cogitant quum de patria bene merentur: hanc etiam NO- STER per omnem viam præuiderat, quum tot labo-

labores summa perferret alacritate: hæc illum ad bene merendum excitauit, & sponte currenti honestatis causâ, stimulum superaddidit, quæ gloriæ & immortalitatis est præsentio. Quam dum viam indefessus persequabatur, stitit, abruptis insuperabile fatum præclaras decursiones, & VIRVM ad summa natum, & publico bono quotidie magis inuigilantem, oculis quidem nostris, non autem memoriæ, quæ perpetua est, subduxit. Inopinatus obitus omnibus fuit: ipsi autem DEFUNCTO felix & beatus. Sæpe quæsitum a sapientibus, quinam ex vita excessus esset felicissimus. Quidam puerorum mortes laudauerunt, antequam fortunæ casus ac ludibria subirent: plures longæ vitæ protractionem finem prætulerunt, quod bonis suis diutissime fruerentur, qui vitam per feros annos in decrepitam usque ætatem proferrent. Rex Philippus, Amyntæ filius, mortem subitam, sine doloris sensu incidentem, dixit esse optimam. Sed vanæ hæc opiniones sunt, quia mortis genus non est res arbitrii nostri, sed ut cuique diuino fato & voluntate destinatum est. Si tamen votis licet agere, videtur illud genus, quo noster emigravit FVCHSIVS, ceteris omnino esse præferendum. M. Tullius de se in tumultu Catilinario dixit, non esse consulari viro mortem immaturam, quod non tam ille de annis suis (nam quadragesimum quartum tum forte agebat) quam de honoris apice haud dubie intellexit. Felicior NOSTER, qui viginti annis

æta-

ætatem illam superauit: honoribus etiam, qui summi in Aulis Regum Principumque sunt, per multos annos functus est. Præterea illa ætate mori, quæ senilis quidem est, sine tamen incommodis senectutis, tamquam cæli munus imputari potest: præsertim si aliquot dierum præmoneat infirmitas, ut ad transitum in meliores sedes apparari rite possit; quo nihil intrat nisi purum & ex omni parte diuinitus mundatum. Nam magnis etiam virtutibus, quia homines! sumus, næui adhærent, quorum causa cum Deo agendum, & Christi utendum meritis, ut deleantur. In hoc quoque noster SENEX fortunatus fuit, qui nec immaturam, neque ingloriam mortem obiit, sed post clarissima facta & maxima in rempublicam merita; nec imparatus, sed inter sanctas meditationes pretiosum illud depositum, animam diuinis dotibus ornatam, ei, a quo acceperat, placidus ac lubens reddidit. Augustus Cæsar, supremo die, amicos est percontatus, ecquid iis videretur mimum vitæ commode trans-egisse. Scilicet præstantissima etiam vita, & in summis acta honoribus, nihil nisi fabula est, qua breui tempore persona magna agitur; mox exuitur, ac nulla est. Quum enim decretoria hora venit, detrahitur persona, res agitur, & si Deo conciliatus homo est, in cælestes sedes transcribitur, ubi vita sine morte, gaudia sine metu doloris, ac sine vlla perturbatione sunt permanentque perpetuo. Ad hæc translatus est beatissimus noster

ster

ster FVCHSIVS, postquam vitæ fabulam præ-
clare commodeque per omnes actus absoluerat:
qui in maius nunc & illustrius theatrum productus
personam inter cælitæ agit non fabulosam & ali-
quando deponendam, sed veram & æternitate in-
ter cælestes plausus perfectissime representandam.

Quapropter quod nostri muneris est, gratulami-
 ni, Auditores, felicitati, qua exultat ille ac tri-
 umphat: & vitæ apud nos illustribus meritis per-
 actæ, ad vnum omnes applaudite: memoriam au-
tem eius, nominisque gloriam in animis vestris
æternum conserveate. Sic virtuti sua præmia

constabunt: sic alii ad gloriam virtutis via & in-

genio, tanti VIRI exemplo incitati,

contentent, etiam per-
 venient.



ORATIO XIV.
DE
**MELIORIBVS
LITTERIS RE-
STITVENDIS**
SVB INITIVM
COLLEGII ELEGANTIORIS
LITTERATVRAE,
IN
FRIDERICIANA ACADEMIA
SERENISSIMIS AVSPICIIS
CONSTITVTI,

PVBLCHE HABITA

PRID. NON. IAN. clō lōc. xcviij.

ITa vobis omnia velim eueniant, AVDI-
TORES, vt nudius quartus sub anni
auspiciū, quod Deus felix & faustum esse
iubeat, gratulabundi omnes inuicem præcati
a Deo immortalī sumus. Quod si consequuti
fuerimus, vt optamus, vt speramus, bene nobis o-
mnibus erit, bene huic Fridericianæ Academiæ,
bene

bene singulis in ea, & singulorum quoque studiis & ipsis studiorum præfidiis ac incrementis. Precati enim sumus salutem PRINCIPIS O.M. qua communis salus continetur: precati sumus salutem magnificentissimi RECTORIS nostri, serenissimi iuventutis PRINCIPIS, in quo spes publica futuræ tranquillitatis florescit: precati sumus illustrium CVRATORVM, aliorumque, qui circa ELECTOREM sunt arcanorum omnium participes, sine offensa fortunæ constantem incolumitatem. Hos enim saluos vna cum PRINCIPE si habemus, nihil omnino desperandum est, & salua res nostra singulorum erit, ac salua res publica Academiæ, cuius in eo, post salutem tanti PRINCIPIS & seruatoris sui, summa salus continetur, vt concordie tranquillitate omnes litterarum studiis, & quisque suæ professioni operam det, sui que muneris limite contentus pacem alat atque amicitiam, & ad publicum magis, quam ad suum commodum, suos actus, sua studia & conatus omnes referat; vt illustri & nobilissimus ordo iuventutis etiam, quod suum est, industrie faciat, hoc est legibus parendo, virtuti postponat voluptates & res ludicras, ac vbique se ita gerat, vt expectationi parentum, propinquorum, suorumque ciuium, patriæ denique ipsi satisfaciat, quod ita futurum esse confido, vt incremento studiorum increseat gloria Academiæ, ea que exteri adducti, frequentius suos huc ablegent, quum viderint approbauerintque, eam hinc sapien-
tiam

tiam virtutemque bono publico peti, quam non facile in locis aliis & litterarum domiciliis inueniant. Hoc obtineri posse, ac gloriam Academiæ in maius ampliusque promoueri, non est quod dubitemus, si modo quisque veram eruditionem & viam, qua ad illam peruenitur, apud animum suum constitutam habeat, & suis etiam eandem fideliter ostendat. Cuius ad gloriam progressus ducem maximum habemus, serenissimum & sapientissimum Principem FRIDERICVM III, Marchionem & Electorem Brandenburgicum, nostrum DOMINVM clementissimum, in Fridericianæ suæ salutem & incrementum paternis curis suis quam maxime intentum, cuius mandatis si parebimus, non parum momenti ad incrementum Academiæ adferetur. Mandatorium quæ ad florem studiorum pertinent, prope vltimum & admodum recens illud est, quod, si ex usu reipublicæ iudicetur, facile primum atque præcipuum censeretur, esse nempe iuventutis studia ita in hoc Lyceo ordinanda, vt ante omnia fundamento prospiciatur, cui structura imponenda sit disciplinarum omnium. Huic enim firmato & diligentius emunito quidquid superstructum est, inconcussum perstat, & vim ac imperus dissentientium perfert, nec sibi modo, sed vniuersæ reipublicæ præsidio est & singulari ornameto. Hoc est, quod sapientissimus PRINCEPS noster in sua Academia constituit & perpetuo seruari iussit, *Collegium politioris doctrinæ, siue elegantium meliorumque*

rumque litterarum. Cuius exercitationem assiduam, quum clementissimus PRINCEPS mihi maiori ex parte imposuerit, antequam ad munus demandatum adgrediar, non ab re fore puto, aut a tempore hoc nostro alienum, si de clementissima tanti PRINCIPIS voluntate, & de usu & præstantia saluberrimi instituti, in hoc splendido confesso aliquid prædixero, ut omnibus manifestum fiat, quos fructus ferat; & quæ impedimenta, nisi remoueantur, illius salubritatem extinguant. Vos vero, patres conscripti, & ceteri auditores splendidissimi, fauete quæso dicenti de re, quæ parua forsan nonnullis aut pluribus videtur, sapientioribus autem magna omnino est, & ex qua momentum pendet disciplinarum omnium, etiam ornatus & præsidium litterarum. Dicam vero non verbis ad legem compositis, aut accuratiore tractationis delectu, sed ut aliud ex alio in mentem mihi venerit, atque res ipsa, quæ plana & enodis est, simplicitate se sua memoriæ meæ suggesserit: & breuiter dicam, ne in re non omnibus grata, beneuolentiam, quam spero, longiori sermone impediam aut ipsemet interuertam.

Decus quondam Academiz Lugdunensis Petrus Cunnæus, summus æque iuris consultus & orator perfectissimus, Academiam illam Batauorum dicit elegantiarum omnium sedem, litterarum domicilium. Musarum ac Gratiarum angustissimum esse sacrarium. Recte sensit vir clarissimus, & propitio Deo iudicauit. Illæ enim sunt præstantes

academiæ, quibus humanitatis studia, ex quibus gratia & lepos omnis est, non exulant neque inde proscripta sunt, sed vigent, florent, & benignius ad fructum copiose faciendum refouentur. Ceteræ disciplinæ durum aliquid & horridum sonant, quæ nisi elegantioribus emolliantur, parum valent ad morum vitæque mitigandam asperitatem. Humanitatis causa constitutæ sunt Academiæ, quæ id nunquam, cuius gratia sunt, labore vilo adsequuntur, nisi disciplinæ illæ cum ceteris studiis coniungantur, quæ nomen habent ab eulta illa & eleganti humanitate. Per hoc creuit Batauorum gloria, quod artes & scientias non illo inculto modo & horrente tradebant, qui in aliis nationibus plerisque ex barbaris sæculis relictus erat; sed ad antiquum litterarum cultum & elegantiam atque nitorem, quæ omnium disciplinarum fundamenta sunt, suam doctrinam, sua reuocabant omnia. Quod in causa fuit felicissima, ut ex omnibus regionibus Europæ, & ex disiunctissimis terris, tanquam ad sapientiæ & bonæ mentis arcem, magnus quotidie concursus ab iis fieret in Batauorum Lugdunensem, qui doctrinæ melioris & incorruptæ antiquitatis exemplum & imaginem petebant. Nos quoque, splendidissimi auditores, ad Batauorum gloriam peruenimus, si illustre exemplum imitati, non ad res nudas ac horridulas, sed ad elegantiam simul, & cultum nitidiorem, animum conuertemus, præsertim quum manifestum sit, cum ornatu illo coniunctum esse quod vnicum est artium & disciplinarum fundamentum. In ceteris rebus omni-

omnibus, in corporis cultu, in victu, vestitu, squalorem ac situm deuitamus: ornatum contra & elegantiam diligimus, eaque generosiores mentes a sequioribus distinctas separatasque volumus: negligentiam vero huius cultus, humilioris animi, aut sordidi etiam, signum interpretamur. Quod si in aliis rebus mundiciem amamus, & laudabiliter amamus; cur minus illam curamus in studiis, ne & illa ornatiores efficiantur? Quo præstantior animus est corpore, hoc maiori curæ debet esse illius, quam huius, cultura; illius, quam huius, ornamentum. At vero scientiis animus noster excolitur, liberalibus studiis nutritur, & a nitore litterarum suum quoque cultum, suum nitorem accipit. Siquis vero tam parui animi sit, ut nihil sibi esse discendum putet, ex quo non illico fœnus & magnum lucrum capiat; hunc dico gemino errore implicatum deceptumque esse. Nobiliora enim sunt cuncta litterarum studia, quam ut lucri sortibus aut quæstui exercendo inseruiant; & digni opificio illiberali sunt, qui id tantum animo intèdunt, quod infra illius nobilitatem est, & ex sordida quaque re copiosius captari potest. Deinde etiam in eo falluntur illi homines, quod sua utilitate destitui credunt, quæ omnium studiorum sunt utilissima. Quis enim ita ignarus rerum est, ut fundamentum & utile & necessarium esse nesciat? sine quo quidquid extruxeritis, non consistet diu, sed corruet, si vel leniori tempestate concutietur. Iam vero ea studia, quæ humaniora appellamus, ceterorum omnium vel fundamentum

vel apparatus necessarium esse, certe præsidium & fundamentum; nemo ibit infitias, nisi rudis illorum & expers omnis humanitatis, qui quæ nunquam attigit liberaliora studia, & quos fructus opimos ferant, penitus ignorat, de iis si quid iudicat, temere & præcipitanter iudicari oportet. Quorum iudicium non maioris faciendum est quam illorum, qui sensuum adfectu stupore non possant cibos gustare, aut dulce ab amaro, sapidum ab insipido satuoque discernere. Sunt ubique terrarum, qui aliter censeant, ac benignius iudicant, & his, quæ commendo studiis, primas omnino deferunt, quia cunctis ceteris non solum ornamentum dant, sed præsidium etiam & stabilitatem adferunt. Exemplis convincendi sunt, qui verbis habere fidem nolunt. Vidimus heic & aliis in Academiis veteranos sæpe studiorum sectatores, & ut sibi & aliis videbantur non parum laboriosos, qui in disciplina, cui se quisque addixerat, non mediocriter versati aut progressi etiam videbantur: hi quum vel publice vel priuatim aliquid dicendum fuit, quam trepidanter hæsitarent, & quæ scire nemo dubitabat, male nihilominus proferebant, aut si loquaciores natura erant, ita turbabant, confundebant omnia, ut se ipsi non intelligerent nedum ab aliis intelligerentur. Quam contra distincte, ornate, illuminate sua pronunciant, qui elegantioribus literis nutriti ad omnia grauiora studia se ab adolescentia præparauerunt? Si quid explicatius dicendum est, dicendi facultas suppetit, qua puris,

qua

qua elegantibus verbis & sententiis edisserant: si
quid illustrandum ex historiis, unde lux omnium
rerum humanarum est; ex ordine gestorum, ex
serie temporum, & consuetudine sæculorum, quæ
instar legis est, & ex antiquis ritibus exponunt sua,
declarant, illuminant, & quia rationalis discipli-
næ non imperiti sunt, argutis conclusiunculis pro-
bare & confirmare sua, & destruere aliena, tam
scire quam expedite cum vi & efficacia possunt. Si
 quid scribendum est, quod ætatem ferat, quod pa-
 tronis placeat, quod omnium fauorem conciliet; solæ
 litteræ, quas laudamus, sunt, quæ rem admirandi ef-
 fectus perficiunt, ut trahant retrahantque animos,
 quoquo versus voluerint; ut elegantia stili commen-
 datius faciant, si quid asperum per se aut iniucun-
 dum videatur. Quid quæritis, auditores? egregie se
 vindicant bonæ litteræ in sui contemtoribus, nec
 modo adolescentiam illorum, sed omnem quoque
 ætatem vlciscantur, dum pueris deridendos præ-
 bent, si contra leges, quas despiciatui habent, se
 barbarismis & solœcismis contaminant. Cetera
 quæ incurrunt mala, quod odiosa res est enarrare,
 ne quis in exprobrationem vertat, lubens iam præ-
 tereo. Ciceronis vox est, omnes trahi laudis stu-
 dio, & optimum quemque quam maxime gloria
 duci. Absit vero, ut patrocinium ambitioni quæ-
 ram, quam execror atque detestor: illam laudem
 & gloriam intelligo, quæ & rerum bene gestarum
 præmium est, & in posterum gerendarum nouum
 incitamentum, quam sane, ut virtuti connexam,

nemo sapiens facile improbauerit. Nulla vero est disciplina, quæ ita per gentes famam ac nationes profert, ut studium elegantiorum litterarum. Harum cultores quamvis semibarbari multi in Germania contemnant, amant tamen Itali, in pretio habent Belgæ, Britanni admirantur, colit nunc Septentrio, nec Galli, quamvis inter bella & certamina cum nostris, despiciunt illos, sed, quod æquum est, de illis illorumque studiis indicant. Hæ alæ sunt, quibus & altæ disciplinæ se prouehunt, & exteris se commendant: sine iis subsidunt grauitate, nec longius, aut ultra fines patriæ propelli facile possunt. Sic etiam fama colentium utrumque studium est: illorum sine terminis vagatur; horum plerumque angustiori coartatur limite. Non ignoro equidem esse plures, qui me non intelligant, aut nesciant quæ Musæ elegantiores sint, quæ vera fundamenta omnium disciplinarum. Qui excusatione mihi digni videntur, si simpliciter illud ignorant, aut suorum culpa præter viam meliorem transuecti abductique in studiis fuerunt. Si sciunt quodammodo meliora, sed desidia negligunt, aut proterue contemunt; il censuram profecto, quam sapientiores agunt, pro merito suo incurrunt, & ultionem subibunt dignam contemptoribus Musarum. Sed ad prius genus, de quo spes est melioris profectus, reuertor, in quo plerosque esse video, quorum vicem doleam, quod non ducti ad meliora in adolescentia fuerunt, ut eas litteras cognoscerent, quæ fundamentum
sunt

sunt omnis doctrinæ, quæ gratiam addunt seu-
 rioribus disciplinis, quæ iuventutem alunt, & se-
 nectutem oblectant, quæ ceteris studiisq[ue] gene-
 ribus & firmo sunt præsidio, & singulari in vtraque
 fortuna ornamēto. Hi vt intelligant, quæ vo-
 luntas sapientissimi nostri PRINCIPIS & DOMI-
 NI sit indulgentissimi; vt cognoscant, quæ stu-
 dia in ELECTORALI AVLA maximi fiant, &
 ab ipsis summis in ea ac illustribus VIRIS percolan-
 tur; vt etiam non ignorent, qua via inire gratiam
 clementiamque a tanto PRINCIPLE, quo studio
 MAECENATVM, qui in AVLA sunt, fauorem
 mereri possint; explicabo breuiter, quæ sint illæ
 humaniores litteræ ac disciplinæ, quæ tantopere
 vobis, iuvenes nobilissimi, a maximo PRINCI-
 PE, a summis VIRIS & arcanorum consciis ac
 moderatoribus commendantur. ~~Possim id am-
 plissimis verbis & multis laudibus enarrare, nisi
 mea me modestia renocaret, quia in vtramque pro-
 fessionem meam incidunt.~~ Vt rem compen-
 dii faciam, vtramque dico professionem me-
 am; mihi ab initio Academiæ clementissime
 demandatam, commendari, quarum alte-
 ra dicendi facultatem docet, altera prudentiæ ci-
 uilis ex historia fundamentum verum ponit, con-
 firmat, atque conseruat: vtraque autem ita com-
 parata est, vt neutra ab altera separari possit, sed
 vtraque cum ad ornatum & elegantiam, tum,
 quod maximi æstimandum est, ad omnium disci-

plinarum. stabilimentum conferat. Non dicam, quanti eloquentiam Romani eorumque principes viri fecerint, quo pacto M. Tullius ad præturam usque, hoc est, ad quadragesimum ætatis annum se declamando exercuerit, senex in eodem studio designatos C. O. S. S. Pansam atque Hirtium, quos grandes prætextatos per iocum appellabat, instituerit: nec dicam quid civili bello Pompeius M. in litteris hisce egerit, quid Mutinensi Octavianus Cæsar, & quos præterea Suetonius de Claris Rhetoribus commendat; de his, inquam, nihil dico, ne quis aliud tempus, alium usum rerum mihi obiiciat, qui vero non penitus est alius, sed cum renatis litteris auctorum memoria restitutus, & ad nostra tempora magis magisque accommodatus. Hi ferre sunt illi scopuli ad quos adhuc iuuentus obhæsit, vel tanquam naufraglum passura, procul inde quæ si velis remisque aufugit. Vultis causam audire rei prope incredibilis? Nolite credere, auditores, cum, qui de re omni proposita bene diserteque dicturus aut scripturus est, ieiunum rhetorem aut grammaticum esse aut litterarum tantummodo prægustatorem. Opus est, ut idem sit multiplici scientia instructus, quæ consummare laudem hominis possit doctissimi. Non desunt qui epistolæ scribendæ artem, aut compingendæ orationis a nobis expetant: quibus si proponuntur, quæ opus sunt comparandæ facultati; aut recusant laborum illum subire, aut si ægre subeunt tanquam canis ex Nilo bibens ociosæ opinionis recurrunt. Non sunt oratoris institutiones,

nes, ut ceterarum professionum, quarum fructus solo auditu percipi, aut ratiocinatione potest digeri & applicari. Labore opus est, & lectione multa, & excerptis variis, ac crebra imitatione. Si vultis distinctius eloquentiæ apparatus cognoscere, dicam, ut sentio, ut probatum experimentis habeo. Ad comparandam eloquentiam aliquis orator adhibeatur, historici legantur, etiam si consulantur crebrius, qui veterum more philosophiam tradiderunt, ut inter Latinos M. Tullius & M. Annaeus Seneca illustri nobis exemplo sunt & præclarissimo documento. Horum lectione, imitatione, stilus parandus est, ut orator ornatum adferat, historicus res suppediet, philosophus rerum augeat amplificationem. Illam enim de adfectibus doctrinam, de animi characteribus, de formis ingeniorum, de gentium moribus, de virtutibus & officio hominis, & quæ his aduersa sunt, & alia necessaria oratori, philosophiæ iam laudatæ munus sunt. Inane dicendi studium est, quod ex nudis verbis, plerumque turgidis & sequepedalibus, conglomerationatur. Res oportet verbis subesse, ne materia sua destituatur oratio. Idcirco historiæ in primis ad eloquentiam conferunt, antiquæ præsertim, ab antiquis ingeniis signatæ & compositæ, quas qui legit; & rebus locupletatur, & augetur sermonis elegantia, quæ Latinis inest scriptoribus. Hunc apparatus si adolescentibus ostendo, horrent, subterfugiant, quasi monstra oculis & terribilia obiecta fuissent. Non miror, non aliter

enim ducti a suis magistris sunt, qui sæpe ipsi ignorant, quæ via sequenda sit, ut ad elegantiores Musas, & ad eloquentiam perueniatur. Accedit spes parentum festinata, qui curas suas præcipitant, nec filios ad veram doctrinam capeßendam, sed ad umbram illius, seu id quod in superficie apparet, confectandum adhortantur, in fordido & illiberali lucro spem omnem collocantes. Nec missos in Academiam philosopho commendant, aut qui humaniores docet litteras; (tantam enim moram non fert impatientia illorum) sed supremarum disciplinarum penetralia inuolare iubent, ut citius reuertantur ex academia, & honores nescio quos, elapsuros forsan nisi præoccupentur, capeßituri possint petere. Hi si quando optant sibi dicendi scribendique facultatem, ita obruti per totum diem collegiis intempestiuis sunt, & corporis exercitationibus, ut ne hornula supersit vlla, nisi nocturna forsan, quam stilo dent; at minus spatii, quod legendo auctori alicui, aut imitando impendant. Vnde fieri solet, ut exercitia oratoria & epistolica plerumque infructuosa sint, quod animus aliis rebus occupatus fatigatusque non capit tantum ingenui laboris, quantus in hoc studio colendo postulatur, cuius apparatus quia non intelligunt; eis nec cupiditas est ignotæ rei, neque alacritas exercitationi necessaria. Nec tamen vnquam destitit hoc bonum omnibus offerre, licet pauci admodum sint, qui illud in usum suum exceperint. Nec felicior in altera mea professione sum, quæ itidem ad

elegantiores Musas & politio^{rem} litteraturam adducit. Multos enim hæc opinio inuasit, vel ab inuidis & maleuolis ita persuasos, vel sua rei optimæ utilissimæque ignorantia deceptos; inutiles has prælectiones esse homini superioribus studiis intento, quod vetera tradam, recentiora expectantibus, aut in verbis hæream nimia cura interpretandis, nec videar cum gratia iucunditateque docere. Nouum crimen, auditores, & ante hunc diem inauditum, quod quia ab iis obijcitur, qui me vel nunquam audiuerunt, vel si quando hospites in collegio fuerunt, quod imparati prorsus accefferant; id, quod utilissimum est, atque etiam pernecessarium, non intellexerunt. Vetera trado & antiqua; fateor: neque verò nouorum vnquam obliuiscor, qui proxima æstate historiam nouam superioris & nostri sæculi, eamque tam sacram quam ciuilem, exposui publice. Germaniæ autem historiam non semel ex hoc loco explicauī, & nunc iterum explico, sequenti hebdomade alteram eius nobilioremque partem (nam eo vsque perueni) a Carolo M. auspiciaturus, deducendam ante vernas nundinas ad nostra vsque tempora. Sed cur ita inuisa est antiquitas, Romana certe, in qua explananda sum assiduus? plurimos vestrum ciuili scio prudentiæ addictos. At vero nulla vsquam respublica, nulla ciuitas fuit, in quam plus sibi fortuna permisit, quam in illam, vt Martialis ait, terrarum decem gentiumque Romam, cui par est nihil &

nihil secundum. Huius sane ciuitatis prospera & aduersa didicisse, quæ vita ciuium, qui mores fuerint, per quos viros, quibusque artibus domi militiæque & partum olim & auctum sit imperium, quod amplissimum in orbe terrarum fuit; si quid creditis mihi, auditores, ea non postrema pars & civilis & elegantioris eruditionis est. Ex his studiis & similibus horum, vester Hugo Grotius, quem magni facitis, & merito quidem eius, immensam suam doctrinam hausit, quam de pacis & belli iure prodidit: ex his civilis prudentiæ & moralis philosophiæ fundamenta sapientissimus quisque sumit: ex his vtriusque documenta clariora excipiuntur, quia quod alii præceptis; hi exemplis & experimentis tradunt, quibus confirmant fieri posse, quod alii præcipiunt; aut vitari, quod prohibent & detestantur. Quid de iure civili & legibus dicam Romanis? nonne curatius legis cuiusque sensum indagamus, si ad illa tempora & statum reipublicæ referimus, sub quo illæ latæ & promulgatæ fuerunt? Ibi enim causas, quæ impulerint legislatorem, ut ita censeret, inuenimus. Ut vero multum momenti in causâ omnis rei situm est, sic etiam in legis vniuscuiusque ratione; ut neque antiquam Romanorum historiam nihil conferre ad legum interpretationem dicendum sit. Sed in verbis me inhærere aiunt. Ita est, auditores, atque ita etiam decet Latinitatis & eloquentiæ professorem. Coniunctissima sunt mea munia, & alterum altero explicatur, &
cum

cum nuper Germanicam historiam a principio & Cimbrico bello exposui, vsus ad id fui, vt necesse erat, optimo quoque scriptore, C. Iulio Cæsare, Corn. Tacito, Velleio Paterculo, L. Floro, Fl. Eutropio, Liuiana Epitoma, & ex singulis magnas sæpe partes interpretabar, nec minus Latinitatis, quæ purissime se offerebat, quam rerum & historiarum habebam rationem. Iam Plinii panegyricum, Traiano imperatori dictum, publicis lectionibus interpretari cœpi, aut ad partem deduxi fere mediam, qui liber arti oratorię tam verborum delectu ac nitore, quam mensura periodorum cum primis inseruit: nec vero ista oratoris arte, aut etiam Latinitate, quam clarissime propono, auctoris circumscripta aut terminata est utilitas. Latius excurrit in Romanas antiquitates, & in ciuilem prudentiam, & in ius ipsum quoque Romanorum ciuile. Nam tota illa oratio perpetua censura est Principis, & boni quidem cum malo comparatio, hoc est Traiani cum Domitiano. Prouoco ad pauciores testes (non enim erubescō paucitatem confiteri: an vero nec his erubescendum sit, qui tam salubria parui pendunt, sapientioribus iudicandum relinquo) ad pauciores ergo illos prouoco, qui superiori hebdomade, ne longinquius tempus reducam, me publice audierunt, quam egregia de congiariis diuidendis, quam rara de donationis militum, quos ritus nemo sane luculentius, quam ille Plinius Secundus nobis reliquit: quam præclara de præfe-

ctu-

ctura morum, de censura principum, & id genus pluribus rebus proposuerim. Explicavi legem Voconiam, diuersas leges Iulias, copiosius autem vicesimarum legem, ab Augusto institutam, a successoribus corruptam, a Narua repurgatam quodammodo, in integrum restitutam a Traiano. Addebantur multa eodem auctore, quæ iuris sunt naturæ, & ad potestatem parentum in liberos pertinent. Nec iniucundum spectaculum erat, quod idem Plinius edebat, supplicium de delatoribus sumtum, quum vidimus hos pessimos homines, tanquam publicæ sollicitudinis victimas, ad lentas grauiioresque poenas abduci, in nauigia compingi, ventis & tempestatibus dari, vt abirent fugerentque vastatas delationibus terras: & qui multis exilii ac deportationis causa fuerant, nunc extorres ipsos, si seruasset procella, in scopulis hære, & inhospitale litus colere, & relicta post tergum humani generis securitate, mædere ac miseria excruciarî. Hæc vero & similia num adeo indigna sunt, vt sperni ab iuris & ciuilis prudentiæ studiosis debeant? aut a paucis tantummodo exaudiri? Tales autem obseruationes quotidie notamus, explicamus. Nam vbi etiam in Latinis lectionibus occurrunt, quæ vsum in alia disciplina habent, consistimus paulisper, & fecunditatem auctorum veterum demonstramus. Miramini vero auditores, quo consilio fiat, vt vtilissimæ Romanorum antiquitates tanto odio deui-
tent fugiantque adolescentes, quum alibi magno
con-

concurso inutilia & monstrosa barbarorum nomina, ut veterum Danorum in Britannia, antiquissimorum in Hispania regum, quos Annus nobis Viterbiensis finxit, excipiant, unde nihil ad ius publicum priuatumue, aut ad civilem prudentiam, qua barbari caruerunt, excerpere potest aut colligi. Sed non obscura huius rei potest causa esse. Plus laboris aut maior preparatio ad Romanam historiam, ex antiquis & classicis auctoribus eruendam, est necessaria. Ingratum autem multis est quod laboris aliquid insueti habet, quamuis illum non ingrata utilitate repenset. Hinc est, quod insuauis multis & iniucundæ meæ lectiones sint, quia me, quantalibet vultis, & suauitate & perspicuitate docentem, non intelligunt: ii autem soli non intelligunt, qui vel nulla, vel perexigua Latinitatis & antiquitatum fundamenta posuerunt, cuius rei culpa non tam in ipsos, quam in ductores illorum redundat, qui & ipsi fortassis elegantiarum & cultioris doctrinæ vel rudes fuerunt, vel parce nimis ac modice periti. Agite vero, generosa pectora, animum ne abiicite, industriam modo spondete. Suppleri pensarique potest, quod huc usque tam ab aliis, quam a vobis negligentia est prætermisum: operam vobis addico meam. Adhuc sex horis per hebdomadem publice trado has litteras elegantiores: tradam totidem aliis horis, atque etiam publice, si cupidiore vos, & maiori frequen-

quentia cognouero. Hæ enim sunt illæ meliores litteræ, quas tantopere sapientissimus PRINCEPS, & vsu rerum exercitissimi CONSILIARII Eius commendant, & ad illas præmiis inuitant ac adliciunt, futurum videlicet esse, vt hi præ ceteris reipublicæ præficiantur, & honores, quantos studiis meruerint, in Brandenburgicis regionibus capeffent. Agite carissimi iuuenes, amplectimini beneficium quod offertur, occasionem tam commodam, tam opportunam, nolite negligere. Si quid triginta annorum vsu possum, quod forsan alia ætas nondum capit, vt breuiter, & perspicue, atque etiam cum suauitate doceam; id omne in commodum vestrum, in augendum decus vestrum & ornamentum confero. Vestram salutem propositam mihi habeo: vestram publicam priuatæ meæ antepono, non vnquam commissurus, quantum in me erit, vt serenissimum ELECTOREM, nostrum omnium & patriæ parentem, qui & hoc beneficio se patrem communem præstat: & illustrissimos AVLAÆ PROCERES spes magna, quam de hoc collegio habent, destituat atque frustretur. Vos modo sedulitate vestra perficite, ne illi fraudentur aut eludantur, quam summam impietatem a vobis, quod vnice precor, Deus, ille rector ductorque animarum, procul abesse iubeat. Finem dicendi facerem, nisi vnum restaret, quod nolim vos ignorare. De studio, de labore, quem elegantium cultura litterarum poscit, iam multa dixi, & v-

reor,

vereor ne nimium dixisse videar, quia laborem formidant adolescentes; voluptate ad quodvis suscipiendum adliciuntur. At huius rei ita comparata ratio, ut omnium pulcherrimarum est, quæ initium duriusculum habent, processum molliorem, exitum mirifice lætum atque iucundum. Neque ipsum initium ita difficile ac impeditum est, ut industria superari non possit, præsertim si adsit, qui ducat, qui manu leuet, qui regat vacillantes, & quod præcipuum est, compendio ad planiora perducatur, atque ex ipsa litterarum amœnitatem in dies iucundiora omnia efficiat. Hunc me ducem vobis profiteor, nec deerunt collegæ coniunctissimi: vos modo sequimini præeuntem, & adfirmanti credite, eam harum litterarum esse suavitatem, ut, qui vere illam degustauerit, citius cetera cuncta possit, quam hæc studia deferere.

Succedite, tentate; neminem obsequi aut operæ poenitebit.



S

ORA-

* ORATIO XV.

FRIDERICO III
MARCHIONI BRAN-
DENBURGICO, S. ROM.
IMPERII ARCHICAMERARIO,
CETERA,

DE NATALI XXXIX

FAVSTIS SIDERIBVS

CALEND. IVL. clolxxxv

EXORTO,

HABITA.

QUod superiori año precati a Deo immortalitatis sumus, ut æquabili fortunæ cursu incolumitas PATRIS PATRIÆ, & securitas publica cum incremento Academiæ conseruaretur; eius deuotionis nos diuino beneficio conuictos esse, ad vnum omnes maximopere lætatur, Auditores. Illuxerunt enim Calendæ Iuliæ, dies vtique candidissimo calculo prænotandus, quod geminum nobis natalem & FRIDERICI III, magni Principis ac Electoris,

* Oratio hæc serius ad nos submissa fuit: quo nomine extremum locum hunc obtinet.

ris, & non minus indulgentissimi patris quam æquissimi domini nostri: & FRIDERICIANÆ ACADEMIAE, illius in bonas litteras & liberales disciplinas singulari amore progenitæ, repræsentant. Quod si iucundus parentibus primus liberorum natalis est: quanto iucundior erit anniuersaria solennitate repetitus, præsertim si lætior euentus approbavit, quæ votis antea & precibus nostris speraueramus, quia nascendi incerta conditio: certissima autem conseruationis lætitia est. Iustas itaque rationes habemus & pietati consentaneas, vt diem hunc inter preces & gratulationes transigamus, & annale munus non Genio, quod Romani faciebant, sed Deo Sospitatori soluentes, ea omnia dicamus faciamusque, quæ boni faustique ominis esse, & spem futuræ felicitatis augere & conseruare nobis videntur. Aequa beneficiorum æstimatio est, si ad fontem, vnde manarunt, pio gratoque animo referuntur. Quis vero ita alienus ab sensu humanitatis est, vt Principis incolumitatem, vt tranquillitatem publicam, vt Academiae salutem & incrementum nesciat diuina munera esse, & cælo vnico, vnde venerunt, imputanda? Pietas ergo exigit, vt quæ vota superiori tempore nuncupauimus pro salute serenissimæ PATRIÆ PATRIS, pro incolumitate AVGVSTÆ FAMILIAE, pro Academia etiam, communi natali connexæ, felicitate & incremento; ea nunc pie deuoteque exsoluamus, Deo immortalis gratias agentes, cuius beneficio tantam prosperitatem debemus: & dignis istum

laudibus prædicantes, cuius virtute & ingenio Deus vti voluit, ut tam eximia bona nostræ patriæ, nostræ Academiæ obuenirent, quo grata acceptorum memoria idem inuitatus pergat bonitatem suam indulgere, atque temporum, quæ vti sumus, felicitatem in futurum etiam proferre, & beneficiis suis, quæ sola videtur superesse, adlicere perennitatem. Hoc alterum munus est, quod hodie nos peragere decet, ut futuris etiam temporibus prospiciamus, hoc est, conceptis verbis atque solennibus formulis vota noua nuncupemus, & a Deo supplices precemur, ut optimi Principis, & Electoralis Domus, ac dulcissimæ patriæ, & huius etiam Fridericianæ incolumitatem conseruet & identidem augeat. Adfuit Deus superioris anni votis nostris, & felicissimo euentu eadem approbavit. Bene ergo de futuro speremus, fore itidem cælesti benignitate, ut, qui altero vertente anno superstites erimus, vbertatem diuinæ bonitatis prædicemus, quum nouis beneficiis, noua Principis & subiectorum felicitate nos ornatos fuisse intellexerimus. Spem hanc diuina bonitas sustentet, quæ obsequio nostro magis prouocetur, ne indigni tantis bonis videamur: quod itidem futurum esse, noua iam signa, noua Academiæ auspicia, quæ precor fausta & felicia sint, sperare iubent, ut nihil quidquam superesse videamus, quod de fructu officii nostri & deuotæ gratulationis dubios nos possit reddere. Vna cura & difficultas me circumstat, quod vereor, ut digna mihi tanto Prin-

Principe oratio contingat, quæ quam longius abest ab ingenio meo, eo certius in clementia eiusdem, quem laudaturus sum, confido, cuius in eo quosque magnæ & inusitata gloria est, quod nihil sibi ambitiose tribui, nihil fingi, aut supra quam res est blandimentis verborum attolli cupiat. Tanta & tam numerosa illius virtus est, tanta rerum gestarum gloria, ut vel nuda earum enarratio aliorum fides & cum ambitu quæsitæ laudes supergrediatur, nec dicenti de illo mihi deesse possit veræ laudis fecunda & fertilis materia.

Intelligamus ergo bona nostra, Auditores, & quanta sit felicitas, bono Principe uti, secreta quisque animi æstimatione pensitemus. Alias terras, quæso, alia tempora cogitate, ubi gemunt homines libertate oppressa, nec varæ virtutis documentum, sed solius patientiæ dant, quod pietas, fides, iustitia & ceteræ bonæ artes, quas optimus quisque colit, si non exulare iubentur, ita tamen depressæ atque contemptæ iacent, ut erigere se humo ægre possint, dum cuncta virtutis præmia ambitione possidentur, vel ineptis & indignis plerumque conferuntur. O ergo felices regiones Brandenburgicas, ubi res alibi dissociabiles, principatus & libertas, ita suauiter miscentur, ut quotidie felicitatem imperii FRIDERICVS Elector augeat, nec spem modo ac votum securitas publica, sed ipsius voti fiduciam ac robur in dies maius atque maius adsumat. Stant virtuti sua præmia, sunt artes liberales in honore, iuste ac moderate aguntur omnia quæ publico nomine fiunt, fruitur quisque,

qua decet, libertate, quisque officium suum non impeditus potest obire, ut de temporum felicitate cur nobis gratulemur, utique iustas rationes habeamus. Tanta bona Deo auspici & summo auctori, quod nemo negauerit, debemus: nec vero ignotum potest esse, per quem Deus sua munera dispenset, cuius animum ita consilio, sapientia, & prudentia instruat, ut quod pulchrum & honestum est, vnice cogitet: quod publicam utilitatem fert, & auget securitatem; strenue perficiat, perfectum ornet & amplificet quotidie. Quidquid huius felicitatis est, non ex longinquo arcessemus, aut ex occulto contactu fiderum, aut quas alii rationes vtriusque fortunæ rebus publicis adfingunt. Clara nobis & in aperto posita sunt omnia, talem vnamquamque esse rempublicam, qualis est ipse, qui illam moderatur, qui si pius est, si eruditus & amans litterarum, si abstinens voluptatum est, quæ non facile ab ampla fortuna auelluntur: ita, inquam, si animo adfectus est auspice & auctore Deo; næ is eximios fructus & grandem utilitatem ad rem publicam adferat oportet. Non enim exigua res est, a teneris pietate imbutum esse, ac ex doctrinæ disciplinis nosse, quid præstantissimum sit bonorum omnium, quod officium imperantes, quod parentes obsequium deceat, quibus virtutibus stabiliri respublica, quibus vitiis contra moueri loco illa aut euerti possit. Quæ omnia egregie tradita & in posteritatis usum relictæ per eos sunt, qui Prin-
cipum

cupum res gestas litterarum monumentis consignarunt, aut de virtute ac officiis differuerunt, quorum præceptis atque monitis qui animum suum impleuit, is sane non vnius ætatis sapientiam, sed omnium sæculorum; nec vnius & alterius hominis, sed plurium, qui bonæ menti operam dederunt, intelligit. Et quum ipse Princeps sapientiæ addictus & litterarum studiis imbutus est, id curæ sibi in primis habet, vt sui similes, hoc est optimos quosque & sapientiæ præceptis institutos, rebusque gerendis apprime idoneos sibi ministros imperii legat, quorum consiliis & prudentia fit, vt de instantibus verissime, & de futuris perspicacissime iudicetur, & ex æquo, iusto, bono, & vt salubre est rei publicæ, sine mora, sine offensa expedite atque promte gerantur omnia. Videtis sic, splendidissimi auditores, quantum intersit reipublicæ, bonum Principem habere, cuius virtute, prouidentia, sapientia, nec non clementissima voluntate omnia reguntur, bradinantur, distribuuntur. Intelligitis etiam, ex quo fonte tantum bonum emanet, qui cum pietate litterarum amor, cultus, & benigna conservatio est, quæ singula in serenissimo ELECTORE nostro tam eximia & vere inusitata sunt, vt dubitari omnino possit, an inter Europæ Principes inueniatur, qui anteferri felicissima gubernatione, & vnde illa oritur, amore sapientiæ possit, in quo studii genere paucos esse existimo, quos cum ingenio illius comparare his temporibus liceat.

Possem hæc longius excurrere ac multis documentis illustrare, quo adfectu & singulari amore sapientissimus ELECTOR in studia litterarum sit, in quanto numero atque pretio illa ponat, quam benigne eadem ac illorum cultores foueat: possem, inquam, hæc pluribus declarare, nisi domesticum, idque illustrissimum exemplum, FRIDERICIANA ACADEMIA, abunde sufficiat ad Conditoris sui singularem in bonas litteras propensionem, fauorem atque studium luculentissime omnibus demonstrandum. Vbique gentium hi fere mores eorum sunt, quos benignum Numen in rebus lætioribus collocauit, vt magnos sumtus in scenicos ludos, in saltationes, in spectra pyrobolica, aut similes res leues atque euanidas effundant; a litterarum autem studiis plerumque alienati, ægre conseruent & parce nimis tueantur quæ maiores ipsorum ad augendum doctrinæ & disciplinarum cultum constituerunt. Noster serenissimus ELECTOR nihil earum rerum intermittit, quæ ad splendorem maiestatis faciunt, aut securitatem reipublicæ confirmant: litterarum autem studia cum primis fouet, suo vsu & maiorum etiam expertus, illas demum beatas esse respublicas, in quibus litterarum cultus diligentissime exerceatur, quia harum disciplinis mores hominum formantur, vt recte de rebus sentiant, & quod pulchrum honestumque est, præferant his, quæ vel inuidiæ aliquid, vel ambitionis, vel turpis lucri & indecoræ voluptatis admixtum habent.

Quis

Quis credidisset, difficillimis hisce temporibus, quibus pæne omnis Europa in armis est, illorumque magnam partem ipse potentissimus noster Elector præstat, de augenda litteraria re & nouo Musarum domicilio consilia capi posse? cepit illa auspiciato FRIDERICVS III, & quum innumerae difficultates essent, explicuit feliciter, & contra plurimorum opinionem, qui de euentu maximo-perere dubitabant, felicissime quoque perfecit, nec perfectum augere ac nouis accessionibus ornare etiam nunc desistit.

Tempus admonet, quo conditum hoc Athenæum dixi, vt de bellicis etiam studiis potentissimi ELECTORIS dicam. Vt tempora sunt & res mortalium, iniuriis ille Princeps patet, qui armis se & ditioni suæ subiectos non potest tueri. Ferrum Principem tuetur, & arma securitatem populo præstant. Multos quidem hæc opinio infedit, mollescere animos, nec fortes milites creari, vbi vigeant litterarum studia. Non ita esse, Auditores, tam antiqua Romanorum, quam nostra ætate Brandenburgicorum exempla ostendunt. De illorum fortitudine pleni sunt historicorum libri, qua amplissimas prouincias & regna sibi subiecerunt, eamque laudem tam apud posteros, quam suæ ætatis homines consequuti sunt, vt omnium consensu orbis terrarum domini & populorum principes fuisse, ex egregiis facinoribus suis censeantur. Neque vero illud certum est, vtrum armis an litterarum studiis

diis imperium suum Romani magis confirmauerint. Legiones & classes ad proferendos fines profuisse non negamus: at hoc commune cum multis gentibus Romani habuerunt. Prouincias autem in officio continere, barbarorum mores ad humanitatem traducere, atque ita moderate imperare, ut victi mallent Romano populo parere, quam ad immanitatem pristinam spe libertatis, quantam vultis etiam, proposita, reuerti: hoc vero non armorum puto, sed litterarum atque disciplinæ fuisse, quibus instituti Romani, rudes animos tractare, feritate exuere, ad cultiorem vitam aduocare, præ cunctis populis didicerant. Circumspectis rationibus omnibus ita mecum statuo, & ita animum induco, Brandenburgicam Gentem in primis esse, quæ Romanam virtutem æmulata, doctrinam litterarum cum armis æqualiter coniungat, eoque temperamento felicitatem sibi, & gloriam apud posteros illustriorem ac immortalem pariat. Quantum ingenii culturæ sapientissimi ELECTORIS auspiciis impendatur, ex ante dictis luculentum esse arbitror: bellicas eiusdem curas & armorum potentiam quis esse potest, qui ignoret, quum contra tot hostes Germaniæ adhuc nulla insignis victoria parta fuerit, cuius non cum primis particeps exercitus Brandenburgicus esset.

Sed hæc non sola sunt, quamuis sunt maxima, quæ Brandenburgicæ Gentis felicitatem illustrant. Numerosior virtus serenissimi ELECTORIS est, quam

quam ut hisce limitibus circumseribi patiatur. Sapientiae gloriam & bellicarum rerum famam iam audiimus. Restat alia cura, PATRIS PATRIAE propria, qua, ne quid desit patriae, quod ad commodum illius vel ornamentum faciat, ut diligentissimus pater prospicit. Nulli terrae natura omnia indulget, & quo magis in septentrionem vergit, eo minus habet, quibus cetera in austrum prospectantes laetantur. Quae vero naturae munera quibusdam regionibus negata sunt, suppleri arte, ac industria pensari possunt. Qua de causa variarum gentium commercia & navigationes instituuntur, ut quibus singulae bonis caeli munere abundant, ad aliarum quoque usum haud magno sumtu nec difficillimo labore transferri possint. Quod quo rarius studium in Germania fuit, eo magis admiramur FRIDERICVM WILHELMVM Magnum, gloriosae memoriae Principem, qui longiores navigationes, quam suctum antea fuerat, ex portibus suis instituit, & in Africam usque produxit, etiam sub alio caelo & ignoto Germaniae climate propugnacula muniuit, indeque quotannis diuitias sub alio Sole natas, in patriam nostram mirantibus cunctis reuexit: nec non amnes nauigabiles coniunxit, & alios non maximos nauigiorum patientes fecit. Gloriosum PARENTEM non modo sequitur FILIVS ac HERES serenissimus, sed omni studio etiam auget, quod a tanto Heroe bene atque e re publica coeptum fuerat, & id ubique agit,

agat, ut ditioni suæ subiectis & mercaturam faciliorem reddat, & aliarum gentium bona tam nobis, quam sibi communia faciat, id quod huic civitati quoque & litterarum sedi futurum prope diem esse, non speramus modo omnes, sed place ne etiam confidimus, postquam ingenti sumtu, & magnis molibus exstructis, Salm in dies magis magisque navigabilem fieri videmus, ut sic neque augendis litterarum studiis, neque armis defendendæ communi patriæ, neque civium commodis in maius prouehendis quidquam deesse patiatur, sed ubique se cum sapientissimum Principem, tum fortissimum Defensorem, tum prouidentissimum Patrem patriæ præstet, eiusque commodis mirifico auctu amplificandis assiduus & indefessus studeat. Quæ quum ita sint, Auditores, non difficile ad iudicandum unicuique est, quanta nos necessitas stringat, ut qui tam bonum, sapientem, fortem, ac prouidum Principem diuinitus obtigisse videmus, Deo auctori omnium bonarum rerum in primis gratias agamus, qui illum in nostram salutem & publicam utilitatem per tot annos nobis seruauit; & pro futura eiusdem ac totius Domus Brandenburgicæ incolamitate votis, precibus supplicemus, ut muneribus suis Deus addat, quam omnes optamus, felicem & tranquillam inoffensæ fortunæ perpetuitatem. Magna omnino & regia cuncta sunt, quæ Deus AVGVSTAE ELECTORIS DOMVI concedat, ut maiora vix optari possint, quibus simoram
Deus

Deus & diuturnitatem adiecerit, cumulum bonis suis addidisse interpretabimur. Fac Deus optime maxime, ut frui diu bonis liceat, quæ indulgentia tua Electorali Domui, & vniuersæ patriæ, & nostræ etiam Academiæ indulxisti. Tuum munus est, quod fruimur; tuæ benignitatis sit, ut in posterum fruamur, ut diu perfruamur. Non te nostris votis distringimus, non multiplicia & numeris suis diuersa; pacem, securitatem, concordiam, opes, honores, oramus aut aliarum rerum adfluentiam: simplex & cuncta ista complexum vnum omnium votum est SALVS PRINCIPIS, quæ potiti habebimus abunde, quæ mortali nostræ vitæ tum commoda sunt, tum etiam necessaria. Non noua perimus, sed antiquæ bonitatis tuæ perseverationem, ut quod adhuc benignissime dedisti, non desinas precibus & votis nostris in posterum etiam dare. Dæritatem Electori, quam mereri omnium nostrum iudicio videtur: serua animu eius, quem dedisti, sapientia ornatum, robore Spiritus tui confirmatum, ut quod facit, alacriter & semper faciat, & de humano genere ac posteris bene mereatur. Sic vota, superiori anno concepta, laude bonitatis tuæ nunc grati & memores persoluimus: sic noua in futurum nuncupamus, persoluenda, si permiseris, circumacto anno, & natali hoc reuertente die. Quod a te permissum iri, eadem bonitate tuâ confisi speramus, quæ nunquam committer, ut preces nostræ infructuosæ sint, aut irrita vota, tan-


tanto omnium consensu, tam sincero adfectu pro salute Principis nuncupata. Adhuc Deus votis nostris, exaudi, quas fundimus, preces; sic nunquam cessabimus bonitatis tuæ laudes prædicare, obsequio & pietate memores beneficiorum esse, tam quæ dedisti, quam quæ daturus es, quod speramus, in posterum. TIBI vero, serenissime Elector, Princeps optime, omnes qui præsentem sumus, gratulamur, neque dubito, quin absentes idem, quod nos, & animo & adfectu pio faciant. TIBI gratulamur ita, ut nobis etiam gratulemur, quia Tua salus, nostra salus, Tua felicitas nostræ ingens accessio & incrementum est. Magna utique & innumera bona sunt, quæ Deus in Te, Princeps magne, congerit, quibus maiora precari vix audemus, quod nec Tua finit moderatio: at illorum perpetuitatem precari non dubitamus neque desinimus: nec sperare illam per cælestis clementiæ signa, subueremur. TE, Princeps Elector, Deus seruet, ut diu bene merearis: cæpta tua & consilia secundet, ut publica felicitas conservetur. Floreat AVGVSTA DOMVS TVA, ut florescat patriæ prosperitas: floreat excelsissima CONIVX, Domina nostra clementissima, ut in illius amore atque suauitate adquiescas: floreat serenissimus IVENTVTIS PRINCEPS, Academiae huius iterum RECTOR MAGNIFICENTISSIMVS, ut spes patriæ semper floreat, & ex illius flore suum vigorem Academia trahat, cui

De-

Deus illum etiam hoc anno, quem auspicamur, feliciter præesse iubeat. Floreant excelsa & serenissima Capita, FILIA, FRATRES, SOROR, & omnes sanguine, adfinitate, societate coniuncti cum Domo Brandenburgica, ut salute singulorum vniuersæ Gentis felicitas augeat, securitas publica incrementum capiat, & in seros posteros perenni stabilitate immobilis consistat. Cælestium ingeniorum hæc indoles atque natura est, ut semper bene faciant, bene mereantur, in quo id ipsum agunt, quod origini suæ conueniens est, quia cælum, unde venerunt, nunquam desinit motu suo & virtute, quæ infra sunt, fouere, nutrire, frugifera efficere, ac fulgentissimo fide re illustrare, & salubritatem mirabili concordia atque consensu adferre. Hæc & Tua indoles est, Elector beneficentissime: hæc Tuorum semper sit precamur, ut cælestem originem, cælestem benignitatem clementia & bene merendi voluntate, ut facitis, semper præferatis, & tot serenorum Caputum sensus atque studia in Tua voluntate conueniant, & tanquam cælesti harmonia concordent, ut illorum consensu nostra patria lætetur, suamque inde salutem augeri non ingrata, sed in laudes Tuas, ut debet, intenta & parata sentiat. Floreant etiam & felices sint quos Administros rerum habes tam pace quam bello gerendarum, ut illorum virtute, prudentia, dexteritate quod decorum & salubre rei publicæ est, semper consulatur, perficiatur.

atur, & ad communem referatur utilitatem. Sic
quum TIBI, quum TVIS, quum communi
patriæ virtute Tua & Tuorum bene erit; hæc et-
iam Academia Tua magis magisque efflorescet, &
fructus non indignos feret sæculi Tui felicitate.
Hæc Tua Academia est, quæ deuotissimo cultu &
plena spei TIBI Conditori suo hodie gratulatur:
hæc etiam ingentium, quæ dedisti, beneficiorum
memor; gratias TIBI hoc altero natali suo ge-
stit agere, sed vt mea voce agantur, quod ex o-
mnium vultu coniicio, vnice cupit, aut iure quodam
suo a me flagitat. Quum autem ingentia sint &
prorsus innumera, quæ TIBI accepta referi-
mus; puto reuerentius esse, ea integra & illibata
cogitationibus horum, qui me audiunt, reserua-
ri, quam carptim & breuiter perstringi, quia fere
sequitur, vt illa, quæ vno complexu apprehendi-
mus, tanta, quanta sunt, esse videantur: ex dis-
iunctis autem singula sectantes, propter multitu-
dinem facile vnum, aut plura prætermittamus.
Omnia ergo me dicturum credo, si omnem rem
litterariam nostram, & omnia eius præsidia & or-
namenta TIBI deberi profitebor. Ipse æterni-
tati NOMEN TVVM consecrasti, quando
cum Academia tua id commune voluisti esse, quod
vt illi perquam est honorificum, ita TIBI vere
immortale erit, quia Musæ immortales sunt, &
omnes illos mori vetant, a quibus se ornatas bene-
ficio, & laute habitas esse intelligunt. Venerabi-
le hoc Nomen Tuum nostra gloria, nostra volu-
ptas

ptas & delectatio est, etiam amoris in nos Tui pignus & certissimum argumentum. Eutemnius, Augustodunensis professor, ad Flaviū Constantinum magnum Flaviensium nomine gratiarum actionem non ambiciosus quidem nec blandientibus verbis, sed quæ veritas, quæ pietas, quæ fiducia exprimebat, ita suavisime finiuit: NOS TAMEN NOMEN ACCEPIMVS TVVM IAM, ET FLAVIA EST CIVITAS AEDVORVM. Idem mihi iam finis dicendi sit: NOS, PRINCEPS MAXIME, AVGVSTVM TVVM NOMEN ACCEPIMVS, ET ACADEMIA HALENSIS EST FRIDERICIANA, quod nulla vnquam obliuio delebit, sed semper grato animo & ore, si qua sero futura est, prædicabit posteritas. Nos certe assidui prædicamus, & quando propitio cælo Natalis Tuus redierit, maioribus auspiciis & angustiori lætitia prædicaturi sumus.



T

ORA-

ORATIO
FVNEBRIS
CLARISSIMO MERITIS.
SIMOQVE
VIR O,
CHRISTOPHORO
CELLARIO,
ELOQVENTIAE ET AN-
TIQVITATVM IN REGIA FRI-
DERICIANA DESIDERA-
TISSIMO PRO-
FESSORI,
A. D. IV. IDVS IVNIAS clō 13cc VII.
DECERNENTE AMPLISSIMO
ACADEMIAE SENATV
PVBLICE DICTA
AB
ANDR. IVLIO DORNMEIER,
PHIL. ORD. ADIVNCTO.

DIXIT, quæ dicenda supererant, Ora-
tor consummatissimus, &, quod o-
mnes publico luctu, mœflissimaque
mente perpendimus, VIXIT. In
lu-

luctu mansuetiores musæ sunt, plangunt vehementer, miro gestiunt desiderio, & insolabili pæne dolore conficiuntur, præsidium suum ac firmamentum, ducem atque auctorem, quo diu gloriatæ sunt, lamentabili comploratione, sed nunquam rediturum, hoc tempore requirentes. CHRISTOPHORVS CELLARIVS, ille, qui maximum eloquentiæ Romanæ decus, qui lucem attulit ingenuis litteris, ille, cuius fama non intra Halensia mœnia est conclusa, sed iisdem, quibus Romana lingua, spatiis peruagatur; Orator tuus & stator fugientium litterarum, Academia FRIDERICIANA, tuus, barbara haud ita pridem Germania, tuus, culta Batavia, tuus, Britannia, Dania, Suecia, Europa vniuersa; ille inquam pridie Nonas Iunias orbi ereptus est, illum habuimus, illius abitum acerbissime deploramus. Fateor, nec enim diu celare possum, me singulare quiddam in fatis adnotasse, dum in tanta eruditorum frequentia non alius cœtus, quam qui cultiorum hominum est, maius discrimen ac detrimentum sensit: & fere dubito, annon id culpam aliquam eorum arguat, qui quiduis aliud præoptando, pretiosam doctrinam modis omnibus adspernantur. Paucissimis ab hinc annis ex ornatisima hac serie sunt euocati, quos præstantissimæ litteræ nobilitarunt, Danorum Olaus Borrichius, Batauorum Græuius, Schubartus Germanorum, viri de præclaris litteris meritissimi, æternæque memoriæ commendandi. Hos tandem sequutus est venerabilis Senex, Academiæ nostræ

& orbis eximium decus: quo extincto, si oculos nostros undique circumferamus, omnem eruditorum cumulum percensendo, qui oratores dici mereantur, tantorum virorum laudibus iungendi, præter unum duosue vix quemquam reperimus. Forsan quia humanioribus musis non iste, quo dignissimæ sunt, cultus tribuitur, fata illud in pœnam decernunt, ut hæ musæ subinde sileant, hæ musæ, quibus interpellatis quid coorietur, quantum damnum existat; ex aduerso quid reflorescentes profint, compluribus dudum adapertum est experimentis. Sed inuectiua ne iudicetur oratio, quæ summi viri meritissimis laudibus est consecrata, tantæ iacturæ causas haud memorabo, nec abditiora Numinis sciscitabor consilia. Unum hoc dico: extincta sunt lucidissima orbis literati lumina; vixit CELLARIVS, & præter doctrinæ laudem, insignem utique, omniumque suffragiis adprobatam, communi luctui reliquit occasionem. Hæc si scirent, quos in extrema literatorum provincia, in Britannia, Batauia, aliisque spatiis, amicos tibi, beatissime, comparasti, quorumque ad lætitiā, tua se merita extendunt! hæc si scirent! Credo ego, contingere vix posse, ut a lacrymis sibi temperarent, quas dolor largiores ciet, si qui amici, suavi litterarum mercimonio coniuncti, mortis interuentu disseparantur. Ut enim virtutis maior splendor est e longinquo, ita clarissimus CELLARIVS, etsi carus Germanis suis, carior tamen adhuc fuit exteris, illu-

illustriorque apparuit; immo erit, & intuentium oculis nunquam non apparebit. Referunt, qui aliunde ad nos proficiscuntur, non ii solum, qui hinc ad peregrinas excurrunt regiones, indidem ad nos reuertentes, sed illi quoque, qui nunquam nostris in spatiis adfuerunt, atque fingere idcirco non existimantur; referunt omnes, CELLARIVM nomen, quoties apud alias gentes audia-
tur, ita ubiuis esse venerabile, vt oraculi instar id habeant, &, qui Germanorum est, hunc suum pronuntient, eiusque pro meritis miris conatibus contendunt. Nos itaque an illis exteris deteriores simus, an tardiores ad perpendenda ingenia, an ab honore CELLARII, ab officio nostro remotiores, consideremus, spectatissimi Auditores. Sane ab hac suspitione vt nos adseramus, supremumque sic ei celebremus officium, ne parcius, quam pro meritis eius, egisse censeamur, id curate iam nostrum cuiuslibet esse suscipiendum, pietas exigit, suadet honestas, perfectissimæ nos undique rationes conuincunt. Proinde, quem heri tumultu suo decoris exsequiis mandauimus, eius beatis manibus, amplissimo Academiae senatu discernente, hoc ipso loco publico, quo sæpius oratorem illum cognostis, sermonis mirificum flumen, pariterque eruditionem demirati, iusta reliqua sunt persoluenda: idque officium, quantum quidem ad verba meditanda requiritur, ego, si non plenissime sum obiturus, tamen ex iis rationibus suscipiam, quæ me beatissime defuncto pri-

num, deinceps vestræ quoque, Patres Academiae Conscripti, obstringunt auctoritati. Quonam autem dictionis ornatu? nam de oratore instituetur oratio: quo eruditionis apparatu? quippe Cellarius est, non mediocris doctrinæ quispiam, cuius in laudibus commemorandis occupabor: qua denique mentis præsentia? nam hic dolor ad me quoque pertingit. Date hoc imbecillitati meæ, humanissimi Auditores, date sermonis inopiæ, ut, quantum potero iam, non quantum debeo, in hoc amplissimo lugentium cœtu perficiam, vitam honoremque tanti CELLARII interpretando. Quod si igitur, unde proficisci solet oratio, initium arcessam, natalem locum, eorumque temporum faciem, quibus natus educatusque NOSTER est, tantam dicendi copiam, tamque multiplicem, video mihi subministrare, ut, si ubiuis expedire me vellem, in immensum excreceret amplificatio. Compertum nobis est, Smalcaldiam esse, ubi primam is lucem adspexit: idque si non, vel si dubie comperissemus, vereor, ne idem ei, quod Homero, contingeret, quem septem Græciæ ciuitates certatim sibi vindicarunt. Smalcaldiam autem dum dico, urbem appello, cui celebratissimum istud fœdus Smalcaldicum, historiarum monumentis insertum, & conscripti ibidem articuli, duraturam memoriam conciliarunt. Fingas tamen, esse aliquam casam, ex qua CELLARIUS prodierit; certe casam illam hoc viro nobilitari posse, famæque

am-

amplissimarum urbium æquiparari, non incongruentem reor, neque cordatiorum iudicis derisam sententiam. Sed nec istud in hoc argumento est relinquendum, Smalcaldiam, defuncti patriam, ferrariis fodinis enotuisse; unde Lutherus, urbis istius æstimator, eam celebrem vocat Chalcidem, oppidi cuiusdam nomen restaurans, quod olim erat in Eubœa situm, æris inuentione clarissimum. Quæ si ad loci celebritatem pertinent, quidni hoc etiam pertineat, aurum quoque, vel quod auro pretiosius est, inde prouenisse, aureum CELLARII nostri ingenium, cuius ministeriis tandem aurea latinitas, multa rubigine obducta, pristino suo nitore est restituta. Chalciæcus, ut hoc etiam attexam, notum Mineræ cognomen est, siue, quod domum æream habuisse fertur, seu quod Chalcidenses, qui erant in Eubœa exfules, templum aliquod Mineræ condiderunt. Mitto significationum amplitudinem, ne ludere in argumento serio videar: scio tamen, Chalcidensem CELLARIVM, genuinum Mineræ filium, quidquid æneum erat, in purissimum aurum conuertisse. Mirabile autem est, quum prima eius ætas in illa tempora incidisset, quibus adhuc tricennali bello Germania adfligebatur, tamen in iis ærumnis hanc indolem enituisse; idque ipsum mirari magis adhuc decet, quoniam haud largissime suppetebat, unde vitæ studiisque prospiceret, fortunis posterioribus temporum inclementia committentis. Accedit, quod

vix trimulus patrem amisit, Virum Ampliſſimum & ſumme ſpectabilem, CHRISTOPHORVM CELLARIVM, fideliffimum apud Smalcaldienſes ſacri coetus epiſcopum, patrem tam claro filio non inficiandum: quæ fortuna ſpem eius adeo non fregit, vt potius erigeret magis magisque, & ad litteras colendas excitaret. Ita nimirum providentiſſima Dei cura, ſi quos in lucem provehere deſtinavit, contra vulgarem fiduciam iis proſpicit, iis animum adſpirat, vt contra fortunam ſpei inſiſtant, tandemque aliquando, orna- tiſſima quæque munera capeſſendo, ex tenuiore ſorte feliciter eluſtentur. Perſæpe bonæ litteræ his fatiſ moderatæ ſunt, turbulentiffimis tempo- ribus, quum vix præter arma quidquam ſonaret, fertiliffime ſe proferentes, ſedemque in genero- ſis mentibus, immo ampliorem adhuc nobiliſſi- mis in urbibus confirmantes. Cuius rei ſi quis a me veritatem requiſiuerit, poſſum plurimis eam documentis roborare, ac documentis quidem il- luſtriſſimis: ex quibus duo tantummodo, ne lon- gius hinc diuertam, ante oculos veſtros deſigam. Lugdunum Batauorum, totius Belgii quoddam miraculum, eo temporum articulo, quo ſtrepitu armorum circumſonaret, optimis muſis dedica- batur: Halæ Boruſſorum, inter præſentiſſimos metus, inter armorum conamina, vicina licet, nobis tamen pariter perhorreſcenda, ſapientiſſimi FRIDERICI conſiliis, Regis ac Domini noſtri indulgentiſſimi, hoc litterarum illuſtre domici- lium

lium est constitutum. Exempla sane luculentissima, & ad omnem perpetuitatem propaganda: quæ dum hoc loco commemoro, non possum, quin vtriusque Academiae duos eruditos, quorum alter alteri fuit simillimus, quamvis locorum temporumque spatiis separatos, in hac laudum explanatione coniungam. Petrus Cumanus, CHRISTOPHORVS CELLARIVS, Eloquentiæ cultissimi Professores, historiarum & antiquiorum rituum indagatores, principes cultioris doctrinæ viri, hi duo sunt, his parem in istis scientiis proxime superiora sæcula, quantum scimus, nullum viderunt, neque ventura, si quæ tamen ventura sunt, ostendent superiorem. Sed vnde digressus sum, istuc ordo me reuocat, earumque virtutum contemplatio, quæ adolescentiorem NO-STRI ætatem decorarunt. Pietatem hic primum, deinceps industriam, iunctas tamen virtutes video, nunquam illius vel pueri vel adolescentis iudicio diuulsas, & neutiquam diuellendas, si qui sunt, qui ad solidam sapientiam connituntur. In istis vero doctrinis, quibus tenerior ille initiatus fuit, prima ordine occurrit linguarum peritia, cui penitus imbibendæ selectissimam indolem admouit: quippe hæc est illa scientia, quæ fundamentum subdit eruditioni reliquæ; sine qua nihil, quod solidum acuratumque sit, adquiri propiore aditu posse, ille exactis Præceptorum rationibus confidebat. Inprimis eloquentiæ studio ducebatur, ita nobili & iucundo, ita illustriori-

bus ingeniis non indigno, vt summis quoque in orbe hominibus, summis terrarum Principibus, in deliciis fuerit, variis rationibus excultum. Ita eximiam ad laudem a Cornelio Tacito, auctore grauissimo, eiusdemque præstantiæ scriptoribus nonnullis, referri video, tanta Tiberium latinitatis tractum esse dulcedine, vt monopolium appellaturus, græcum vocabulum, prius veniam postularit, quod sibi peregrino verbo vtendum esset. Neque est, quod quis hoc loco ignorantiam suam professurus, id mihi verbum obiecerit, quod solet frequentius, nec debet audiri, in deperditis habendam esse, quæ in vocibus emendandis versetur cogitatio: sciunt eruditi, quantas hæc ignorantio disceptationes, quantas in sacro argumento, quantas in ciuili pariter, sæpenumero peperit, quantoque errore, qui non omnium sæculorum voces intelligunt, singularumque significatus internoscunt, a recta interpretatione abludant. Fecit igitur egregie CELLARIVS noster, quod puriori dictioni, quæ pars est eloquentiæ, diligentem operam addixit, seque illorum societate, quos loquentia magis adficit, quam eloquentia, sedulitatis aliisque impendiis exemit. Quumque verissime hoc adfirmetur, quod Quintilianus perhibet, oratorem ab incunabulis instituendum esse: tempori obsecundauit noster CELLARIVS, hanc primis annis industriam capeffens, vt oratoriam indolem, quæ quidem nasci omnino debet, fingi præceptis non potest, optimorum du-

cum

cum institutis ad futuram excellentiam formaret. Ita sane, qui puer tum erat, exemplo suo complures redarguit, maiores natu litteratos, qui, ne tempus inutiliter teratur, biennio consummandam præcipiunt, vel ad summum triennio, Romanam eloquentiam. Alia hæc ars est, quam quæ plerisque innotuit; neque tam discitur eloquentia, quam scitur; non propinatur, sed mora quadam, nobis vix aduertentibus, ingeniis instillatur. — Si qui enim verborum copiam congesterunt, si omnem pertentantur grammaticen, si puriorem dictionem callent, si figuris abundant, si magnifice quidvis pronuntiant, ceteris autem, quæ non dico, prætermittis, eos equidem eloquentes esse, ipsis postulantibus, minus ægre concedo; sed credibile magis existimo, aliud quiddam hoc esse, quam eloquentiam, teste, cui refragari non ausim, Marco Tullio Cicerone. Præter rem ista si videar attulisse; eadem me rationes, quæ Mareum Tullium, excusabunt, illum, quum Archiam poetam, eundemque Præceptorem, oratione prosequuturus, ad poeticam artem prædicandam excurreret; me vero, quum oratoris laudibus laudem orationis adnecto. Multa sane sunt, quæ ad perfectam eloquentiam concurrunt, estque inter hanc & reliqua studia quædam adfinitas, tam arcto nexu coniuncta, vt, in partibus qui subsistunt, totam non adsequantur scientiam, nec orationis titulum absoluant. Hoc animaduerso CELLARIUS, quum iam linguas, latinam & græcam,

cam, alacri animo, memoria felicissima, adolescens apprehendisset; excitatam deinde sollertiam, quantam potuit, ad emendatiorem philosophiam direxit, non illam, quæ terminorum, quos nescio quo grammatices fato dicunt, non quæ syllogismorum ineptientium, aut lubricæ disputationis, captiosorum verborum, fallacium interrogationum, alioque id genus apparatu concluditur, sed honoratiorem aliquam, & idoneis rationibus expectendam, quam & ipse Clarissimus Vir, illa oratione, qua vale Citicensibus musis dixit, cum honore nominavit; illam, quæ de adfectibus, animi characteribus, ingeniorum formis, gentium moribus, hominum officio & virtutibus agit, etiam quæ his aduersaria sunt, exponit, inutile nihil, nihil spinosum admiscet. Hæc illa philosophia est, hanc ille plebeie sapientie præoptavit. Structis itaque doctrinarum his fundamentis, duodevicesimo ætatis anno Ienensem Academiam, inclitam litterarum sedem, vbi coepta studia perpoliret, fatis sic dirigentibus elegit, ibidemque non humaniori dumtaxat & philosophicæ eruditioni, mathematicæ speciatim, omnium in contemplatiua philosophia nobilissimæ, sed sanctiori quoque doctrinæ, egregiam mentem impendit, operam nauans diligentissimis viris, Bechmanno, Weigelio, Frischmutho, aliisque, quos tunc Iena præcipuos possidebat. Poterat iam istud præmium, quod industriæ ipsius offerebatur, dignus accipere, sed differendum ratus est, donec

aliarum

aliarum quoque academiarum lumina vidisset. Eoque voto Giesſæ & aliis locis adimpleto, Ienam repetiit, accepitque, quod dudum meruerat, illud ex philosophia & artibus ornamentum. Non is quidem honos ingeniis exprobandus est, Auditores, non ita penitus industria suis præmiis spolianda: intelligite vero rarissimam istius iuuenis verecundiam, quem non appetisse cognouimus, sed accepisse, honorem industriæ destinatum. Annon aliud hoc æuo contingat,annon, quod modestia deprecatur, sibi expetat ignauia, impudentia consequatur, est hæc quædam recentioris historiæ quæstio, quam pro me, cui alia iam sunt iniuncta, experientia quotidiana, ridiculis quidem exemplis, sed rem explicantibus euoluet. Dixi, quibus se studiis amplissimus Vir protulerit, iam, quibus muneribus, qua fide ac diligentia sit perfunctus, si vultis, Auditores, exponam. Scholæ natus, ad scholam præformatus, scholasticam operam auspicatus est, in hac felicissime processit, consenuit, exspirauit. Nihil hoc laudis esse, aut nihil præcipuæ, dixerint scholastici decoris obtrectatores; ego contra contendō: ego, si nemo est, eruditorum in censu illustribus, quin ex schola prodierit, si scholæ sunt a pietate conditæ, si scholæ sunt horti, in quibus plantæ proueniunt vtilissimæ, ipso Deo rigante, ecquid aliud cuius luculentius, quam scholæ munera inter honestissima quæque referri oportere? Videor mihi iam Cæcilium Secundum audire,
toti-

totidemque verbis, quibus Isæum rhetorem prædicabat: Annum sexagesimum excessit, & adhuc scholasticus est: quo genere hominum nihil aut simplicius, aut sincerius, aut melius. Nos enim, qui in foro verisque litibus terimur, multum malitiæ, quamvis nolimus, addiscimus; schola autem & auditorium, ut ficta causa, ita res inermis, innoxia est, senibus præsertim: nam quid in senectute felicius, quam quod dulcissimum est, in iuuenta? Bene est, bene censes, Secunde, nec habeo, quod obuertam. Si qui ergo de scholis aliter, quam pulcherrime sentiunt, hoc est, si bonis litteris contemptorem animum opponunt, valeant illi, atque hinc cum iudiciis suis facessant: scholæ munera, id quod probavi, sunt improbis horum vocibus meritissimo præferenda. Atque hæc ratio est, propter quam CELLARIVS noster, ad scholas varie requisitus, hoc vitæ genus amplecti nil detrectavit, sed complura iuventutis gymnasia, Weissenfelsense, Vinariense, Citicense, Meerspurgenſe, tandemque Academiam hanc nostram, doctrinis elegantioribus adauxit. Longum erit, quam sedulitatem in istis gymnasiis comprobavit, quantum amoris ac benevolentiae sibi adquisiverit, quam gratus ipsis quoque Principibus fuerit, oratione persequi: quod si quis autem industriae scholasticæ quoddam specimen poposcerit, ad sola illa programmata me refero, quæ oratoriis exercitiis in Citizenſi lyceo præmiſit, ſeorſum quodam fasciculo comprehenſa; quibus ſane quid doctius

doctius limatiusque proponi potuisset, nihil occurrit, iudicio quidem meo: si quis eorum nomina comperire gestiat, quos fautores ei comparauerit ista opera, multa pars MAGNI & ILLUSTRES dicuntur, neque reliqui sunt infirmitatem constituti. Si quis maiora adhuc exigat, illa plurimorum appello testimonia, qui, quam ægre summi Principes ipsum dimiserint, nobis exponunt. Id quod suis etiam verbis, relictissimus rerum suarum interpres, Ciza discessurus, & in serenissimo Principis conspectu, vera pariter ac grata oratione celebrauit, nihil, inquit, abituro sibi tam obstitisse, quam Principis indulgentiam, Principis præmia non adspernanda, cui vero indulgentiæ, quibus præmiis, diuinum nutum crediderit esse anteponendum. Haud postrema temporariæ felicitatis pars est, Principibus probari; sed hos ego felicissimos demum reor, quos virtus commendat & eruditio, non illos, qui vano conatu, nullisque meritis, hunc aditum consequuntur. Virtus & eruditio Cellarium commendabant, tantamque reperiabant ubiuis gratiam, ut omnium voluntates aduerterent, atque incredibili vi & efficacia permulcerent. Non vnus ex illis erat, qui blandiorem vocem fingunt, ut auram captent benigniorem: non Eumenium illum æmulabatur, eloquentissimum Constantii Cæsaris, adulatorem dicam, an oratorem? maiora in orbem terrarum Constantii beneficia, quam deorum, vere quidem, sed impu-

impudentissime pronuntiantem: non Mamertinum aliquem effingebat, Eumenio non absimilem, qui omnibus humanis vitiis Principem suum absolutum esse, non credebat, sed in vulgus auremque Principis dictitabat. Minime vero talem cognouimus cordatissimum hunc oratorem, neque, si talis repertus esset, tantam piorum Principum, quos publice prædicauit, indulgentiam meruisset; nunquam sanctissimi Regis nostri tanta fuisset clementia, ut, quam sanctam cupiebat Academiam, nullaque nec morum sorde, nec verborum violabilem, eam huiuscemodi oratoris ministerio scædari permisisset. Veni in eum locum, ubi campus aperitur amplissimus, ostendendi, quæ sint eæ dotes, quibus ille, ut aliis locis, ita in Academia nostra, tantum amorem, tantamque sit gloriam consequutus. Nemo vero mihi vitium appellet, si non modo rem edisseruero notissimam, sed nec omnem indolem operamque eius adsequutus fuero: agam enim, quod ordo præcipit, faciemque magni CELLARII, si non omnibus, potioribus tamen lineamentis exscribam. Vitæ exemplum accuratissimum, amor erga collegas, mira humanitas colloquentis, iudicantis rara modestia, hæc omnia, sed non sola sunt, quæ tantam apud omnes gratiam habuerunt. Quæ quum strictim equidem, ut compertissima, hic attingam, facere tamen haud possum, ut speciatim non eloquar, quam sit incredibili amore quosuis complexus, quos nouerat artium cultores esse,

esse, non auersos ab iis laboribus, quibus illæ perfici debent ac perpoliri. Expertus dico, quod dico. Subit memoriam, quum ego ad hanc Aca-
demiã primũ accederem, quantum ille huma-
nitatis mihi, Pro-Rẽctorem ipsum adeunti, quan-
tum spei ostenderit, si litteris præstantioribus,
quas ille dirigebat, me totum impenderem. Gra-
te adhuc interpretor, nec dabo posthac obliuioni,
illam beneficentiam, quam post aliquanto, quum
ipsi propius innotuissem, abunde perspexi, dum,
quotiescunque vellem, museum mihi aperiebat,
libros promebat, mecum de rebus eruditis varie
disquirebat, immo hinc quodam tempore disces-
suro tantum, quantum satis ad abitum demoran-
dum erat, sua sponte suppeditabat. Poteram id
argumentum copiosius explicare, sed vereor, ne,
si viueret, qui hæc mihi præstitit, hanc vocem
eius modestia recusaret. Neque forsan admitte-
ret, vt, quam sit amplissimum adiumentum, quod
litteratus orbis accepit, quam varia ingenii mo-
nimenta, quibus sui memoriam in futurum æuũ
transmisit, dicere mihi proponerem. Sed dicam
tamen, si cui forsan obscurum sit: si nullum præ-
terierit; dicam nihilominus, ne mihi tantarum
rerum ignoratio tribuatur. Magnam ingraue-
scens ætatis partem his curis, sed tamquam deli-
ciis insumsit, vt post mortem exstaret, quod ar-
tium studiosis varie prodesset: idque demonstrant
egregii libri, eius celeberrimo nomine prænota-
ti. Sunt autem hi potiores, ac pæne omnes,

probatæ latinæ auctores, accuratissimis adno-
 tationibus declarati; eorumque index locupletis-
 simus, quem Fabri lexicon diu dixerunt, congru-
 entius posthac Cellario tribuendum. Lexicon
vero quanta opera conficiatur, ex omnibus pauci
sunt, qui cognorunt, vnde excellens quidam Phi-
lologus apte iudicat, si quis eruditus puniendum
crimen admiserit, non illum ad metalla damnan-
dum esse, sed ad lexica contexenda. Neque vero
 hoc vnum lexicon, sed alterum quoddam, quod
 antibarbari vocabulum sibi præscribit, adcuravit:
 de quo puto venustius dici, quod de Amphionio
 carmine confingitur, tantam vim habuisse & ef-
 ficaciam, vt saxa concussa fuerint, & ad interual-
 la carminis consistentia, sponte murum velut ar-
 te construxerint. Ita prorsus, dum Cellarii An-
 tibarbarum mihi propono, non aliud videor ob
 oculos habere, quam quoddam munimentum, ad
 arcendam rudioris plebis barbariem exstructum.
 Mitto reliqua incomparabilis viri monumenta,
 mitto scriptionis antiquæ notitiam, seu orthogra-
phiam, operam diu desideratam, mitto cetera, quæ
ex ingenio copiosissimo, tamquam instructissima
CELLA, deprompta sunt, mitto cultissimas ora-
tiones, ab oratore grauissimo exaratas, quem face-
 tum dicerem, nisi hæc vox esset Christianis ora-
 toribus, seuerioris musæ decreto, penitus abro-
 gata. Vnum occurrit, quod incuriæ vitio non
est relinquendum. Notitiam orbis antiqui, pu-
 blicæ utilitatis egregium opus, & exterorum
 typis

typis iteratum, ante paucissimos annos, post multam operam impensam, eruditorum votis exhibuit; de quo dixerim, vix Columbum illum Christophorum tantum industriæ, quantum eiusdem nominis Cellarium, illum in orbe nouo, hunc in antiquo detegendo, mortalibus præstitisse. Mediam vero geographiam, quam quidem ingressus erat, occupatissimus Senex, inchoatam reliquit, cetero labore morte intercepto. Quum videlicet varias sub cælo regiones, varias vrbes, & quæ varia sunt, oculis suis obisset, sensit magis magisque, nihil sine vicissitudine reperiri: & qui corrupta fastidiebat vocabula, puriori antiquitati deditus, doluit maxime, muros iam dici & rudera, quæ olim vrbes atque amphitheatra insigniebantur. Omnia mire mutari vidit, antiqua obsolescere, noua ad pompam potius quam elegantiam componi, nihil per se stabile esse, sed caduca omnia, circumcisa & breuia, nullam rem, cui vere vocabulum illud tribueret, quod in ore & oratione frequentius habebat, perpetuitatem. Quare consistere maluit, quam longius in hoc orbe progredi; aliumque orbem, vbi æternæ veritatis vocabulum, æternamque felicitatem reperiret, non corporis oculis, sed mentis, inuestigauit, nec infeliciter. Nam pridie Nonas Iunias ad eum, quem quæsierat, portum appulit, nostrisque ab oculis in perpetuum recessit. In perpetuum vero? immo nunquam: nunquam eius memoriam vlla ætas in animis nostris delebit. Interim

tamen dolemus; interim ornamentum nostrum requirimus, morte sublatum. Non iniustus hic dolor est; sed qui tamen solatium tandem admittit, tandem mitigatur. Non illud solatium: senex erat, infirmus erat; hoc enim pagana quoque mens, tamquam infirmissimum, dudum reiecit: sed efficacius quoddam, & Christianis dignum. Illud inquam solatium, quod Lutheri pietas viduæ cuidam adhibebat, obitum mariti CELLARII lugenti, quem haud scio an illuc, vnde ortus est NOSTER, referendum putem. Deus est, cuius nos sumus, cuius nostra sunt omnia. Deo igitur euocante, sequendum est & adquiescendum. Deus marito melior est, immo melior maritis, patribus, filiis, filiabus. Hoc illud solatium est, dolori oppositum: quid autem ad musas idem? Immo vero ad vos etiam, musæ, atque ad vos potissimum, hoc verbum pertinet, hoc deinde officium. Vos itaque, si Deum nostis, Deo confidite, a Deo præsidium expetite, præsidium exspectate. Vixit, nec votis unquam recuperabitur, CELLARIVS, vestra gloria, vestrum ornamentum. Huic vitam & quietem concedite, huius merita gloriamque propagate. Supremum officium, quod vobis pietas, quod nobis omnibus iniungit, in eo consideratur, ut sapientissima veneremur cæli consilia, quantoque magis CELLARIO sumus obstricti, tanto paratiore animo beatissimis ipsius manibus gratulemur.

EXEQVIAS

VIRI

NOBILISSIMI ATQVE EXCELLEN-
TISSIMI,

CHRISTOPHORI
CELLARII,

ANTIQVITATVM ET ELO-
QVENTIAE PROFESSORIS CE-
LEBERRIMI,

DIE VIII. MENSIS IVNII,

HORA II. POST MERIDIEM

HONESTO RITV DEDVCENDAS

INDICIT

ACADEMIAE FRIDERICIANAE
PRORECTOR

FRIDERICVS HOFFMANNVS,
CONSILIARIVS ET ARCHIATER REGIVS
MEDICINAE ET PHIL. NAT. P.P.O.

Cuius viri hoc die exequias indica-
mus, eum si non aliunde, saltem
ex sermone coniicietis, qui mul-
tum abest a nitore, mundicia, cul-
tuque isto, per quem epistolae, aca-

demiae causa vsque a primordio eius facta, in laude ac pretio cum Germanis fuisse, tum cultiori orbi uniuerso. Quis bonus mortem non lugeat? quæ magnam literis; maiorem patriæ; maximam autem ciuibus nostris iacturam attulit eamque vix consolabilem, hoc præcipue tuo, quod durissimum esse solet politici humanitati. Desiderant proli! istæ præsidium suum: illam amissi decoris memoria tangit discruciatque: academiam verò vtrumque constringit, quæ sine remedio permanet, quo vel mœrorem depellat vel obliget vulnus, hoc casu acceptum. Adauget dolorem & cum non leuiter intendit, quod, animo conclusus, tundat pectus, & verba desint, quibus in querelas se effundat, neque mirum, cum vitam amiserit, quem os & manus academiae omni iure dixeramus. Et quidem nostro carere elogio potest vir excellentis doctrinæ, quod scriptis celebrior longe sit, quam cuiusque oratione, exterorum quamplurimis cognitus magis, quam inter pomœria ciuitatis, vbi vixit docuitque. *Smalcaldia* ei patria fuit, quam urbem haud dubie plures nesciunt, in quorum tamen manibus versantur opera defuncti. Patrem habuit virum honoratum, CHRISTOPHORVM CELLARIVM, primarium istius ditionis antistitem, sequior ætas *Superintendentem* dixit. MARIA mater, filia IOACHIMI ZEHNERI fuit, supremi sacrorum cœtuum, quotquot eorum in Hennebergico principatu florent, præfecti. Filio, sacris

cris initiato idem cum patre nomen delatum: verum celebritas & commemoratio utriusque multum diuersa, quam noster non auitis fortunis debuit, sed virtuti, labori, doctrinæ. Mireris tanti viri ortum in anno MDCCXXXVIII. inueniri, tum enim, die XXII mensis nouembris in lucem editus fuit, quo tempore, cum natale solum, quod nactus est, tum Germania omnis diuturno eoque funestissimo bello exhausta, parum absuit a perniciæ & exitio. Exemplum inde accipiant posteræ, nihil obesse egestatem virtuti. Velut etiam cumulus accessit calamitati patris obitus præmaturus, quem infans vidit, cum tres annos vix egressus fuisset. Ea plerumque matrum est indulgentia, ut filios raro educant ad perferendos labores. Noster, hortatu matris, aut potius cœlesti aliquo mentis instinctu tyrocinia literarum ea sollicitudine posuit, institutore IOANNE SCHMIDIO patrii ludi moderatore, ut anno ætatis decimo octauo academiam peteret iretque Ienam, cum ob docentium claritatem, tum propter utilitatem annonæ, quod opes eius magnas impensas non ferrent. FRISCHMUTHIVM; BECHMANNVM; WEIGELIVM ibi doctores frequentauit: hunc matheseos; illum philosophiæ; istum ebrææ linguæ causa. Anno MDCCCLIX. Gießam se contulit, HABERKORNI, magni theologi fama ad hoc iter excitatus. Cuius viri institutione in sacris dogmatibus vsus est eoque præside in arenam prodiit respondit-

que grauissimum argumentum *de infinito valore meriti Christi*. Rediit hinc *Ienam*, in illam pauperum altricem, cum animus desiderio flagraret, a *mathematico* & orientalium *linguarum* doctore inter auditores suscipi aëroamaticos, quibus doctrinæ partes aperirent, vulgaribus discipulis præclusas. Eodem tempore *ZAPFIVM* audiuit, cursumque philosophiæ, quem ingressus fuerat, hoc magistro absoluit confecitque. Latuit post aliquandiu in occulto, primum *Gotba*; deinde in hac nostra ciuitate. Quod non sine diuino pro-
 uidentis numinis consilio factum est, ut tempus, ac orium illi esset, quæ didicerat, concoquere & digerere animumque ad idonei olim doctoris officia præparare. *Triginta* fere annos natus fuerat, quo *spartam muneris* nactus est, *vbi tyrocinia poneret doctrinæ & virtutis*. In *Weisenselsensi* gymnasio linguam *ebraeam* iuxta atque *ethicam* tradidit, ad vtramque disciplinam a principe tum *AVGVSTO* rite vocatus, cum paulo ante præclaræ eruditioni, quæ in nostro elucere cœperat, *MAGISTRI* artium priuilegia *IENENSES* impertiuiſſent. Qui familiaris illo vſi, facile intellexerunt, in tanta paucitate eorum, qui habiles sint ad ferendos illustrioris scholæ fascēs, cum ita institutum esse ornatumque, ut huic prouinciæ natus & quodam naturæ munere constitutus esse, videretur: cum doctrinæ ergo, tum vitæ, quod linguas artibus iunxisset, moribus grauis ac integer esset, in laboribus assiduus & vtilis atque
 iuuen-

iuuentuti exemplo prælucere, quod in literis
æque ac probitate imitaretur. Ita factum est, vt
de illo plurimæ scholæ certarent neque retinere
possent, quem modo nactæ fuissent, cum aliæ aliis
egregium doctorem viderentur inuidisse. *Vi-*
nariense prytaneum an. CIO IDC LXXIII. rexit
Post triennium *Cizense* moderatus est, vbi illu-
stris viri SEKENDORFII cum amicitia tenuit
aliquando diutius, totis duodecim annis. Hinc
Merseburgum, ad similem spartam euocatus, con-
cessit. Quinquennium fere ibi absoluit, hono-
ribus, qui alibi sæpenumero ei decreti sunt, etiam
in vicina academia, quod ætas in senium verge-
ret, provide declinatis. *Fridericiana* desiderio
non minus difficiliter neque ante respondit, quam
nutus ac consilia Dei probe cognouisset. Inter
potissimas enim curas illa fuit AVGVSTISSIMI
eius CONDITORIS, vt nouæ academix virum
daret, qui elegantiorum literarum studiis lumen
adferret. Hoc dum fecit, non solum ad orna-
mentum respexit, quo nouum sacrarium apud
exteros bene audiret; sed etiam commoda iu-
uentutis promouit, vt scholæ nostri seminarium
literariæ reipublicæ essent, vnde olim prodirent,
qui cultiores doctrinas ipsi aliis iterum imperti-
rentur. Quo fine prouectiores Latini sermonis
cultores stipendiis mactauit princeps, quorum
industriæ & humanitari pie defunctus testis ad-
fuit suffragatorque. Amplissimos scientiæ limi-
tes, quibus ille diuersissimarum rerum cognitio-

nem continuit & sororio quodam vinculo sociavit, oceanum adpello, quem nullo tempore exhausseris. *Græcam; Ebream; Syriacam; Chaldaicam; Arabicam; Samaritanam,* linguasque orientalium populorum alias, quæ illis vicinæ sunt, non extremis tantum labris salutavit, sed ita familiares habuit, ut alios eas iterum doceret & primus in Germanis esset, qui præceptionibus eas includeret & typis exscriberet, caractere nondum viso neque intellecto patriæ urbium tabernis. Qua causa ipse manus rei admovit, statum ordinavit disposuitque, ut typographus in oculis haberet, quod sequeretur. LATINI deinde sermonis non cultor, sed Argus fuit: qui plusquam herculeo labore verba, sententias, dictiones alias e puriori Latinitate expunxit, alias, falso aliis suspectas, in civitatem postliminio recepit. Qua in re ita curate versatus est, ut, causa vocabuli vnius, prolixum quandoque librum a capite ad calcem eumque ad verbum legeret, ne, quod aliis exprobratur, ex indicibus tantum proficeret, alienis oculis videret, in testimonioque suo titubaret. Emendationibus in lexicon Fabri, iterato studio factis, thesaurum quoque fori Romani, quod in animo habuit, a mendis eadem felicitate facilitateque purgavisset, nisi bibliopola eum adstrinxisset pacto, ne, post Fabrum, aliis lexicographis medelam adhiberet; isque solus in hoc argumento regnaret in orbe literato. Neque fieri potuit, ut nostrum aliquid fugeret, quod adparatum

paratum instrueret purioris Latii. Classics enim, quos dicimus, auctores præter Liuium & Tacitum, ubi codices desiderauit, omnes vere edidit, emendauit, explicauit atque indicibus, non aliena manu collectis, auxit, insigni commodo humanitatis. Porro non satis ei fuerat, paganos legisse. Seni in deliciis fuere scriptores christiani in utroque genere dicendi. Lactantio; Prudentio; Sedulio aliis magnam operam impendit, ut in manibus ac scholis illi essent hominum christianorum. Rerum olim gestarum tempora, exitus, causas, loca in promptu non minus habuit, quod hoc argumentorum cumulo opus esse intelligeret perfecto oratori. In stylo planus & luculentus fuit, hoc charactere centum orationes internoscas & suo vindices auctori, quæ in limine alia nomina præ se ferunt. Lipsiensium actis, quæ inseruerit, inseruit autem plurima, eodem remedio ab aliis discernes, cum æquabilitatem seripcionis alii difficulter imitentur. Peregrinationibus nullum tempus dedit: sed animo notitiam complexus est orbis uniuersi. In rebus præcipue antiquis omne punctum tulit. Museo-
lo inclusus itinera indicauit; fluuiorum ortus, gressus, exitus docuit correxitque; regnorum limites; spatia populorum; urbium locationes situsque eruit, obscuris lumen accendit errores-
que in viam reduxit: ut extera regna non pudeat, ex peregrino scriptore antiquam patriæ notitiam hausisse. Siue enim Belgam siue Anglauu

aut quodcunque tandem nomen subscriptor mentiat^{ur}, non alia causa impulit, ut Germani geographi librum prelo daret, cum iniuria ac damno legitimi bibliopolæ. Idem periculum thesaurus LL. idem libri alii plures, a defuncto scripti incurrissent, nisi conatibus obicem posuissent nostrates & viuis sordida lucra ipse reprobauisset. Quod si enim quæstui habuisset scripta sua, fieri non potuisset, quin innumeras fere opes & ipse contraheret, & hoc commercio, thesaurum ad poster^{os} transmitteret, vnde compendia ipsi sperare possent, semper duratura. Sed ita agitur cum erudit^{is}, ut ymbris honorarii pascantur, ipsam vigiliarum suarum mercedem surripiant negotiatores. Ad familiam pergo, coniugem, liberos, nepotes, quos plures vidit. Vxor ei HEDEVICA ELEONORA, etiam nunc superstes, vidua mœstissima. Hanc virtus, forma, natalium dignitas illi commendauerunt. Præclaræ enim genti originem debet, quæ cognomentum habet A BERG; patre edita GEORGIO FRIDERICO, qui Gothano & Lüneburgico principibus a consiliis cultuque fuit architecturæ militaris. Quadraginta fere annorum matrimonium coluit prosperum ac fecundum. Pater septem liberorum fuit, quorum tres supersunt. CHRISTOPHORVS, Borussia regi a negotiorum circuli Saxoniae inferioris secretis. HEDEVICA SOPHIA & MARIA ELISABETHA, quarum illa maritum habet IOHANNEM FRIDEMAN-


NVM

NVM SCHNEIDERVM doctorem & professorem philosophiæ ordinarium atque extraordinarium iuris: altera collocata est IACOBO FRIDERICO LVDOVICI, iurium doctori & professori extraordinario atque ordini iſtor. adſcripto. Paucis abhinc annis superſtes quoque in illis fuerat SALOMON, Medicina Licentiatus, qui, cum ex Belgio redux factus eſſet. & in ſanandi arte ſingulares profectus oſtendiſſet, præmatura morte obiit, maximo parentis luctu, quod is cum tenerrime amaviſſet. Ceterum morbi mortisque cauſam in noſtro habueris ipſam ſenectutem, corporis viribus tot vigiliis & aſſiduo labore valde attritis. Calculi dolores acceſſerunt, vt animus mortem præſagiret: partim quod illi maximis cruciatibus corpus affligerent, partim etiam, quod intelligeret deſunctus, inter hos ipſos Wagenſcilium, virum illi amiçiſſimum, paulo ante mortem oppetiſſe. Conſecit extremum diem plenus fidei fiduciæque in SERVATOREM CHRISTVM, IV MENSIS IVNII HORA V matutina: annos natus octo & ſexaginta. Veſtrum eſt, quotquot literas in pretio habetis, manibus viri bene precari, qui optime de vobis meritis famæque gloriam naſtus eſt, nullo tempore

intermorituram. P. P. Halæ

III IVN. CIO MDCCVII.

F I N I S.



MAG 200 2396



Quoniam doctrinae est, de futuris
civ. Politicis.

Politicus prudens

Politicus prudens
Aulicus politicus est
homo nullius in
gratia




100-443142

Journal of Management Studies, 19(6), 701-718.

Thesis est flocci nuplius



Gala



Burglunna

que grauissimum argumentum *de infinito valore meriti Christi*. Rediit hinc *Ienam*, in illam pauperum altricem, cum animus desiderio flagraret, a *mathematico* & orientalium *linguarum* doctore inter auditores suscipi aëroamaticos, quibus doctrinæ partes aperirent, vulgaribus discipulis præclusas. Eodem tempore *ZAPFIVM* audiuit, cursumque philosophiæ, quem ingressus fuerat, hoc magistro absoluit confecitque. Latuit post aliquandiu in occulto, primum *Gotha*; deinde in hac nostra ciuitate. Quod non sine diuino pro-
 uidentis numinis consilio factum est, ut tempus, ac orium illi esset, quæ didicerat, concoquere & digerere animumque ad idonei olim doctoris officia præparare. Triginta fere annos natus fuerat, quo *spartam muneris* nactus est, ubi tyrocinia poneret doctrinæ & virtutis. In *Weisenselsensi* gymnasio linguam *ebraam* iuxta atque *ethicam* tradidit, ad vtramque disciplinam a principe tum *AVGVSTO* rite vocatus, cum paulo ante præclaræ eruditioni, quæ in nostro elucere cœperat, *MAGISTRI* artium priuilegia *IENENSES* impertiuissent. Qui familiarius illo vsi, facile intellexerunt, in tanta paucitate eorum, qui habiles sint ad ferendos illustrioris scholæ fascēs, eum ita institutum esse ornatumque, ut huic prouinciæ natus & quodam naturæ munere constitutus esse, videretur: cum doctrinæ ergo, tum vitæ, quod linguas artibus iunxisset, moribus grauis ac integer esset, in laboribus assiduus & utilis atque
 iuuen-

iuventuti exemplo præluceret, quod in literis
æque ac probitate imitaretur. Ita factum est, vt
de illo plurimæ scholæ certarent neque retinere
possent, quem modo nactæ fuissent, cum aliæ aliis
egregium doctorem viderentur inuidisse. *Vi-*
nariense prytaneum an. CIO IDC LXXIII. rexit
Post triennium *Cizense* moderatus est, vbi illu-
stris viri SEKENDORFII eum amicitia tenuit
aliquando diutius, totis duodecim annis. Hinc
Merseburgum, ad similem spartam euocatus, con-
cessit. Quinquennium fere ibi absoluit, hono-
ribus, qui alibi sæpenumero ei decreti sunt, etiam
in vicina academia, quod ætas in senium verge-
ret, provide declinatis. *Fridericiana* desiderio
non minus difficiliter neque ante respondit, quam
nutus ac consilia Dei probe cognouisset. Inter
potissimas enim curas illa fuit AVGVSTISSIMI
eius CONDITORIS, vt nouæ academix virum
daret, qui elegantiorum literarum studiis lumen
adferret. Hoc dum fecit, non solum ad orna-
mentum respexit, quo nouum sacrarium apud
exteros bene audiret; sed etiam commoda iu-
uentutis promouit, vt scholæ nostri seminarium
literariæ reipublicæ essent, vnde olim prodirent,
qui cultiores doctrinas ipsi aliis iterum imperti-
rentur. Quo fine prouectiores Latini sermonis
cultores stipendiis maectauit princeps, quorum
industriæ & humanitari pie defunctus testis ad-
fuit suffragatorque. Amplissimos scientiæ limi-
tes, quibus ille diuersissimarum rerum cognitio-

nem continuit & sororio quodam vinculo sociavit, oceanum adpello, quem nullo tempore exhausseris. *Græcam; Ebream; Syriacam; Chaldaicam; Arabicam; Samaritanam*, linguasque orientalium populorum alias, quæ illis vicinæ sunt, non extremis tantum labris salutavit, sed ita familiares habuit, ut alios eas iterum doceret & primus in Germanis esset, qui præceptionibus eas includeret & typis exscriberet, characterè nondum viso neque intellecto patriæ urbium tabernis. Qua causa ipse manus rei admovit, statum ordinavit disposuitque, ut typographus in oculis haberet, quod sequeretur. LATINI deinde sermonis non cultor, sed Argus fuit: qui plusquam herculeo labore verba, sententias, dictiones alias e puriori Latinitate expunxit, alias, falso aliis suspectas, in ciuitatem postliminio recepit. Qua in re ita curate versatus est, ut, causa vocabuli vnius, prolixum quandoque librum a capite ad calcem eumque ad verbum legeret, ne, quod aliis exprobratur, ex indicibus tantum proficeret, alienis oculis videret, in testimonioque suo titubaret. Emendationibus in lexicon Fabri, iterato studio factis, thesaurum quoque fori Romani, quod in animo habuit, a mendis eadem felicitate facilitateque purgauisset, nisi bibliopola eum adstrinxisset pacto, ne, post Fabrum, aliis lexicographis medelam adhiberet; isque solus in hoc argumento regnaret in orbe literato. Neque fieri potuit, ut nostrum aliquid fugeret, quod adparatum

paratum instrueret purioris Latii. Classics enim, quos dicimus, auctores præter Liuium & Tacitum, ubi codices desiderauit, omnes vere edidit, emendauit, explicauit atque indicibus, non aliena manu collectis, auxit, insigni commodo humanitatis. Porro non satis ei fuerat, paganos legisse. Seni in deliciis fuere scriptores christiani in utroque genere dicendi. Lactantio; Prudentio; Sedulio aliis magnam operam impendit, ut in manibus ac scholis illi essent hominum christianorum. Rerum olim gestarum tempora, exitus, causas, loca in promptu non minus habuit, quod hoc argumentorum cumulo opus esse intelligeret perfecto oratori. In stylo planus & lueulentus fuit, hoc caractere centum orationes internoscas & suo vindices auctori, quæ in limine alia nomina præ se ferunt. Lipsiensium actis, quæ inseruerit, inseruit autem plurima, eodem remedio ab aliis discernes, cum æquabilitatem seripcionis alii difficulter imitentur. Peregrinationibus nullum tempus dedit: sed animo notitiam complexus est orbis uniuersi. In rebus præcipue antiquis omne punctum tulit. Museo-
lo inclusus itinera indicauit; fluuiorum ortus, gressus, exitus docuit correxitque; regnorum limites; spatia populorum; urbium locationes situsque eruit, obscuris lumen accendit erroresque in viam reduxit: ut extera regna non pudeat, ex peregrino scriptore antiquam patriæ notitiam hausisse. Sive enim Belgam siue Anglau


aut quodcumque tandem nomen subscriptor mentiat^{ur}, non alia causa impulit, ut Germani geographi librum prelo^daret, cum iniuria ac damno legitimi bibliopolæ. Idem periculum thesaurus LL. idem libri alii plures, a defuncto scripti incurrissent, nisi conatibus obicem posuissent nostrares & viuis sordida lucra ipse reprobauisset. Quod si enim quæstui habuisset scripta sua, fieri non potuisset, quin innumeras fere opes & ipse contraheret, & hoc commercio, thesaurum ad poster^{os} transmitteret, vnde compendia ipsi sperare possent, semper duratura. Sed ita agitur cum erudit^{is}, ut ymbris honorarii pascantur, ipsam vigiliarum suarum mercedem surripiant negotiatores. Ad familiam pergo, coniugem, liberos, nepotes, quos plures vidit. Vxor ei HEDEVICA ELEONORA, etiam nunc superstes, vidua mœstissima. Hanc virtus, forma, natalium dignitas illi commendauerunt. Præclaræ enim genti originem debet, quæ cognomentum habet A BERG; patre edita GEORGIO FRIDERICO, qui Gothano & Lüneburgico principibus a consiliis cultuque fuit architecturæ militaris. Quadraginta fere annorum matrimonium coluit prosperum ac fecundum. Pater septem liberorum fuit, quorum tres supersunt. CHRISTOPHORVS, Borussia regi a negotiorum circuli Saxoniae inferioris secretis. HEDEVICA SOPHIA & MARIA ELISABETHA, quarum illa maritum habet IOHANNEM FRIDEMAN-

NVM

NVM SCHNEIDERVM doctorem & professorem philosophiæ ordinarium atque extraordinarium iuris: altera collocata est IACOBO FRIDERICO LVDOVICI, iurium doctori & professori extraordinario atque ordini iſtor. adſcripto. Paucis abhinc annis ſuperſtes quoque in illis fuerat SALOMON, *Medicina Licentiatus*, qui, cum ex Belgio redux factus eſſet. & in ſanandi arte ſingulares profeſtus oſtendiſſet, præmatura morte obiit, maximo parentis luctu, quod is cum tenerrime amaviſſet. Ceterum morbi mortisque cauſam in noſtro habueris ipſam ſenectutem, corporis viribus tot vigiliis & aſſiduo labore valde attritis. Calculi dolores acceſſerunt, vt animus mortem præſagiret: partim quod illi maximis cruciatibus corpus affligerent, partim etiam, quod intelligeret deſunctus, inter hos ipſos Wagenſeium, virum illi amiciffimum, paulo ante mortem oppetiſſe. Conſecit extremum diem plenus fidei fiduciæque in SERVATOREM CHRISTVM, IV MENSIS IVNII HORA V matutina: annos natus octo & ſexaginta. Veſtrum eſt, quotquot literas in pretio habetis, manibus viri bene precari, qui optime de vobis meritis ſamæque gloriæ nactus eſt, nullo tempore intermorituram. P. P. Halæ

IX IVN. CIO MDCCVII.

F I N I S.



1140-711. 2394



Quoniam doctrinae est, de futuro con-
cere. Politicus.

Politicus prudens



Politicus prudens
Aulicus politicus est
homo nullius in
gratia

[Signature]

Journal of Management Studies, 19(1), 67-80.

Thesis est flocci nullius

Gala



Burglunna



